

為唐書

後晉 劉 眗 等撰

中 華 書 局

卷一二〇至卷一三七(傳)

售唐 書卷 一百二十

列傳第七十

郭子儀 子曜 晞 曖 曙 晤 映 晞子鋼 曖子釗 鏦 釗子仲文 弟幼明 子昕

於木剌山置橫塞軍及安北都護府,命子儀領其使,拜左衞大將軍。 安北都護府於永淸栅北築城,仍改橫塞爲天德軍,子儀爲之使,兼九原太守、朔方節度右兵 **祁國公。** 郭子儀,華州鄭縣人。父敬之,歷綏、渭、桂、壽、泗五州刺史,以子儀貴,贈太保, 子儀長六尺餘,體貌秀傑,始以武舉高等補左衞長史,累歷諸軍使。 十三載, 移横塞軍及 天寶八載 追封

馬使。

嚴寇河曲,子儀擊敗之,進收雲中馬邑,開東脛,以功加御史大夫。 本軍東討。 十四載,安祿山反。十一月,以子儀爲衞尉卿,兼靈武郡太守,充朔方節度使,詔子儀以 途舉兵出單于府,收靜邊軍, 斬賊將周萬頃, 傳首闕下。 祿山遺大同軍使高秀

列傳第七十 郭子儀

儀選聴 襲其幕 以 節 級,生擒五 釋之、陳迴光等陣於嘉山 守郭獻璆)精兵 度使李光弼 + 益之。 騎 ,賊人 子儀將北 五 載 五 千人,獲馬五千匹,思明露髮跣足奔于博陵。於是河北十餘郡皆斬賊守者以迎 獲兵仗數萬。 百更挑之,三日至行唐,賊疲乃退,我軍乘之,又敗於沙河。。祿山聞思明敗,乃 正 不及息。 我軍至恆陽,賊亦隨至。 率 月,賊將蔡希德陷常山郡,執顏杲卿,河北郡縣皆爲賊守。二月,子儀與河 圖范陽,軍聲大振。 師下井陘,拔常山郡,破 數日、 ,賊將史思明、蔡希德、尹子奇等亦結陣而至,一戰敗之,斬馘四萬 師還常山,賊將史思明以數萬人踵其後,我行亦行,我止亦止。 光弼議曰:「賊怠矣,可以戰。」六月,子儀、光弼率僕固懷恩、渾 子儀堅壁自固,賊來則守,賊去則追,晝揚其兵,夕 一、賊於九門,南攻趙郡,生擒賊四千,皆捨之,斬僞太

州 쬭 後 行 爲統帥以討賊,帝素重陷,許之。 大 步 在 ,奏迎車) 騎五 一,軍 都 是月,哥舒翰爲賊所敗,潼關不守,玄宗幸蜀,肅宗幸靈武,子儀副使杜鴻漸爲朔方留 督 聲途振 萬 府長史、朔方軍節 駕。 至 自 七月, 河北。 興復之勢, 肅宗卽位,以賊據 時朝廷初立,兵衆寡弱,雖得牧馬,軍容缺然。及子儀、光弼 度使。 民有望焉。 肅宗大閱六軍,南趨關輔,至彭原郡,宰相房琯請兵萬人, 兵及陳濤,爲賊所敗,喪師殆盡。 兩京,方謀收復,韶子儀班師。 韶以子儀爲兵部尙書、同中書門下平章事,依前 方事討除,而軍半殪, 八月,子儀與李光弼 全師

州 唯倚朔方軍爲根本。 部落數萬,欲迫行在。 十一月,賊將阿史那從禮以同羅、僕骨五千騎出塞,誘河曲九府、六胡 子儀 與迴紇首領葛邏支往擊敗之,斬獲數萬,河曲 平定。

乾祐兵 河東 之間 儀攻蒲州 司戶 無復寇鈔 賊 入將半,下懸門擊之,乾祐未入,遂得脫身東走。 將崔乾祐守潼關。二年三月,子儀大破賊於潼關,崔乾祐退保蒲津。 、韓旻、司士徐炅、宗子李藏鋒等,陷賊在蒲州,四人密謀俟王師至則爲內應。 趙復等斬賊守陴者,開門納子儀。 乾祐與麾下數千人北走安邑,安邑百姓僞降, 子儀遂收陝郡永豐倉。自是潼、陝 時永樂尉趙復、

我軍亂, 熄、 餘 帥。 大潰,盡委兵仗於淸渠之上。 如故。 討賊,子儀與葉護宴狎修好,相與誓平國難,相得甚好。子儀奉元帥爲中軍,與賊將安守 李歸仁戰於京西香積寺之北,王師結陣橫亙三十里,賊衆十萬陳於北。 五月, 是月, 李嗣業奮命馳突,擒賊十餘騎乃定。 斬首六萬級。 九月, 安祿 韶子儀帥師趨京城。師於潏水之西,與賊將安太淸、安守忠戰,王師不利, 山死,朝廷欲圖大舉,詔子儀還鳳翔。 從元帥廣平王率蕃漢之師十五萬進收長安。 賊將張通儒守長安,聞歸仁等敗,是夜奔陝郡。 子儀收合餘衆,保武功,詣闕請罪,乞降官資,乃降爲左僕射 迴紇以奇兵出賊陣之後夾攻之,賊軍大潰,自 四月,進位 迴紇遺葉護太子領四千騎助 .司空,充關內、河東副元 翌日, 歸仁先薄我軍,

肅宗在鳳翔聞 師,老幼百萬,夾道歡叫,涕泣而言曰:「不圖今日復見官軍。」 廣平王休士三日,率師東趣。 捷,羣臣稱賀,帝以宗廟被焚,悲咽不自勝,臣僚無不感泣

勞之曰:「雖吾之家國,實由卿再造。」子儀頓首感謝。十二月,還東都,命子儀經營北 郡邑皆平〔1〕,以功加司徒,封代國公,食邑千戶。 尋入朝,天子遣兵仗戎容迎於屬上,肅宗 陳希烈、偽中書令張垍等三百餘人素服請罪,王慰撫遣之。是時,河東、河西、河南賊所盜 遂與安慶緒 於黄埃中發 电於陝西 稍卻 十月 ,安慶緒遣嚴莊悉其衆十萬來赴陝州,與張通儒同抗官軍。賊聞官軍至,悉其衆 負山爲陣。 十餘箭,賊驚顧曰:「迴紇來!」卽時大敗,僵屍遍山澤。嚴莊、張通儒走歸洛陽, 渡河保相州。 賊分兵三千人,絕我歸路,衆心大搖,子儀麾迴紇令進,盡殺之。師馳至其後, 子儀以大軍擊其前,迴紇登山乘其背,遇賊潛師於山中,與鬭過期 子儀奉廣平王入東都,陳兵於天津橋南,士庶歡呼於路。 偽侍中

節度許叔冀、平盧兵馬使董秦等九節度之師討安慶緒。 禮、北庭行營節度李嗣業、襄鄧節度使魯炅、荆南節度季廣琛(三)、河南節度使崔光遠、滑濮 望春樓待之, 屬,故不立元帥,唯以中官魚朝恩爲觀軍容宣慰使。十月,子儀自杏園渡河,圍衞州。 乾元元年七月,破賊河上,擒僞將安守忠以獻,遂朝京師,敕百僚班迎於長樂驛,帝御 進位中書令。九月,奉韶大舉,子儀與河東節度使李光弼、關內節度使王思 帝以子儀、光弼俱是元勳,難相統 安慶

賊軍又敗,乃連營圍之。慶緒遣薛嵩以所乘馬十匹求救於史思明,且言禪代。十二月,思 之,賊衆大敗。是役也,獲爲鄭王安慶和以獻,遂收衞州。進軍趨鄴,與賊再戰於愁思岡, 子儀僞遁,賊果乘之,及壘門,遽聞鼓譟,俄而弓弩齊發,矢注如雨,賊徒震駭,子儀整衆追 者三千人伏於壁內,誠之曰:「俟吾小卻,賊必爭進,則登城鼓譟,弓弩齊發以迫之。」 旣戰, 緒與其驍將安雄俊、崔乾祐、薛嵩、田承嗣悉其衆來援,分爲三軍。子儀陣以待之,預選射

明遣將李歸仁率衆赴之,營于滏陽。

韶令留守東都。三月,以子儀爲東都畿、山南東道、河南諸道行營元帥。 賊軍潰而北,委棄兵仗輜重,累積於路。

諸軍各還本鎮。

子儀以朔方軍保河陽,斷浮橋,有 矢。子儀爲後陣,未及合戰,大風遽起,吹沙拔木,天地晦暝,跬步不辨物色。我師潰而南, 魏州來。李光弼、王思禮、許叔冀、魯炅前軍遇賊于鄴南,與之接戰,夷傷相半,魯炅中流 所承稟,自多徂春,竟未破賊,但引潭水以灌其城,城中食盡,易子而食。 二月,思明率衆自 二年正月,史思明自率范陽精卒復陷魏州,乃僞稱燕王。王師雖衆,軍無統帥,進退無

不遑寢息。 馬元帥,李光弼副之,委以陝東軍事,代子儀之任。子儀雖失兵柄,乃心王室,以禍難未平, 中官魚朝恩素害子儀之功,因其不振,媒孽之,尋召還京師。天子以趙王條爲天下兵 俄而史思明再陷河洛,朝廷旰食,復慮審寇逼迫京畿,三年正月,授子儀那寧、

列傳第七十 郭子儀

邮坊 河 深然之。 . 西 兩 泂 鎭 東 上元元年九月,以子儀爲諸道兵馬都 節度使,仍留京師。 諸鎭之師,取邠寧、朔方、大同、横野,徑抵范陽。 言事者以子儀有社稷大功,今殘孽未除,不宜置之散地,肅宗 統, 管崇嗣副之, 令率英武、 韶下旬日,復爲朝恩所間,事竟 威遠等禁軍及

以賞 莫有見 能彈壓 殺其 害景 日:「河東之事 副 元 山者 軍。 帥 帥李國貞。 上元二年二月,李光弼兵敗於邙山,河陽失守,魚朝恩退保陝州。三年二月,河中軍亂 者。 ,充本管觀察處置使,進封汾陽郡王,出鎭絳州。 勢不獲已,遂用子儀爲朔方、河中、北庭、潞、儀、澤、沁等州節度行營兼興平、定國 子儀 由是河東 子儀請曰:「老臣受命,將死於外,不見陛下,目不瞑矣。」帝乃引至臥內,謂子儀 至絳,擒其殺國貞賊首王元振數十人誅之。 一以委卿。」子儀嗚咽流涕。 時太原節度鄧景山亦爲部下所殺,恐其合從連賊,朝廷憂之。 諸鎭率皆奉法。 賜御馬、銀器、雜綵, 三月,子儀辭赴鎮,肅宗 太原辛雲京聞子儀誅元振,亦誅 別賜絹 四萬疋、布五萬端 後輩帥臣未 不豫、羣臣

離 間 四 請罷 月 ,代宗卽位,內官程元振用事, 副 元 帥, 加實封七百戶,充肅宗山陵使。 自矜定策之功,忌嫉宿將,以子儀功高難制,巧行 子儀旣謝恩,上表進肅宗所賜前後韶

敕[三]

因自陳訴曰:

獎,念及勤勞,貽臣詔書一千餘首,聖旨徼婉,慰諭綢繆,彰徼臣一時之功,成子孫萬代 之寶。自靈武、河北、河南、彭原、鄜坊、河東、鳳翔、兩京、絳州,臣所經行,賜手詔敕書 偷全,久妨賢路。自受恩塞下,制敵行間,東西十年,前後百戰。天寒劍折,濺血霑 調鼎飪,是以常許國家之死,實荷日月之明。 臣本愚淺,言多詆直,慮此招謗,上瀆冕 京之妖祲。陛下雄圖丕斷,再造區字,自後不以臣寡劣,委文武之二柄,外敷邦敎,內 |武,册先皇帝,乃舉兵而南,大蒐於||岐陽。 先帝憂勤宗社,託臣以家國,俾副陛下掃兩 凡二十卷,昧死上進,庶煩聽覽。 衣,野宿魂驚,飮冰傷骨。跋涉難阻,出沒死生,所仗唯天,以至今日。陛下曲垂惠 陛下居高聽卑,察臣不貳,皇天后土,察臣無私。伏以器忌滿盈,日增兢惕,焉敢 臣德薄蟬翼,命輕鴻毛,累蒙國恩,猥廁朝列。會天地震盪,中原血戰,臣北自

患難,收復兩京,禮之逾厚。時史朝義尙據洛陽,元帥雅王率師進討,代宗欲以子儀副之, 韶答曰:「殷不德不明,俾大臣憂疑,殷之過也。殷甚自愧,公勿以爲慮。」代宗以子儀頃同 而魚朝恩、程元振亂政,殺裴莪、來瑱,子儀旣爲所間,其事遂寢,乃留京師。

吐蕃陷涇州,虜刺史高暉,暉遂與蕃軍爲鄉導,引賊深入京畿,掠奉天、武功,濟渭而南,緣 俄而梁崇義據襄陽叛,僕固懷恩阻兵於汾州,引迴紇、吐蕃之衆入寇河西。 明年十月,

第七十 郭子儀

儀以 蕃軍 **性**,盛張旗幟,鼓鞞震山谷。 官。 計豐王等所向,

、

遂護送行在。 將王獻忠從駕, 兵 山 齊 逼 柄 京 撃鼓於 तिवं 招輯亡逸, 大 已過 東。 子儀遣六軍兵馬使張知節、烏崇福、羽林軍使長孫全緒等將兵萬人爲前鋒,營於韓公 ,及徵還朝廷,部曲散去。及是承韶,部下唯二十騎,強取民家畜產以助軍。 師, 韶子儀權京城留守。 軍 君上 續進, 渭水。 渭 朱雀街,蕃軍惶駭而去。 北行營兵馬使呂日將遊戰于盩厔,自辰至酉,殺蕃軍數千,然其徒多殞。 計 其軍漸振。 無所出,遽詔子儀爲關內副元帥,出鎭咸陽。 至產 沿路遂以四百騎叛,仍逼豐王已下十王欲投於賊。 其日,天子避狄幸陝州。 西。 射生將王撫自署爲京兆尹,聚兵二千人,擾亂京城,子儀召撫殺 審寇犯京城, 得故邠王守禮子廣武王承宏(E), 立帝號, 假署百 全緒遣禁軍舊將王甫入長安,陰結少年豪俠以爲內應,一日 子儀以三千騎傍南山,至商州,得武關防兵及六軍散卒四千 大將李忠義先屯兵苑中,渭北節度使王仲升守朝堂。 子儀聞上避狄,雪涕還京,至則車駕已發。射生 子儀自相州不利,李光弼代掌 子儀入開遠門,遇之, 至咸陽 賊將

不 欲 天子還京,勸 自 西 蕃 入寇、車駕東幸,天下皆咎程元振,諫官屢論之四。 帝且都洛陽以避蕃寇,代宗然之,下詔有日。 子儀聞之,因兵部侍郎張重 元振懼,又以子儀復立功,

慰迴,附章論奏曰

亂起。 **凋、濁河之固,神明之奧,王者所都。地方數千里,帶甲十餘萬,兵強士勇,雄視八方,** 處之而泰,去之而亡,前史所書,不唯一姓。及隋氏季末,煬帝南遷,河、洛丘墟,兵戈 有利則出攻,無利則入守。 而先帝仗朔方之衆,慶緒奔亡,陛下藉西土之師,朝義就戮。豈唯天道助順,抑亦地 玄宗之明,多在秦川,鮮居東洛。 臣 聞 高 祖唱義,亦先入關,惟能翦滅姦雄,底定區宇。 雍州之地, 古稱天府, 右控隴、蜀, 左扼崤、函, 前有終南、太華之險, 後有淸 此用武之國,非諸夏所同,秦、漢因之,卒成帝業。 間者羯胡構亂,九服分崩,河北、河南,盡從逆命。然 。以至于太宗、高宗之盛,中宗、 其後或

形使然,此陛下所知,非臣飾說。

之地 荒。 苟避 邑榛 路云云,不知信否,咸謂陛下已有成命,將幸洛都。), 久陷 棘 斷 遂令陛下 征 近 , 豺狼 賦 絕 因 一吐蕃凌逼,變駕東巡。蓋以六軍之兵,素非精練,皆市肆屠沽之人,務挂虛名, ,及驅以就戰,百無一堪。 ,千里蕭條。 !賊中,宮室焚燒,十不存一。 百曹荒廢,曾無尺椽,中間畿內,不滿千戶。 井 所嘷,旣乏軍儲,又鮮人力。 振蕩不安,退居陝服。 將何以奉萬乘之牲餼,供百官之次舍。矧其土地狹阨,纔數百 亦有潛輸貨財,因以求免。 斯蓋關於委任失所,豈可謂案地非良者哉!今道 東至鄭、汴,達于徐方,北自覃懷,經于相土, 臣熟思其端,未見其利。夫以東周 又中官掩蔽,庶政多

里間 ,東有成阜,南有二室,險不足恃,適爲戰場。陛下奈何棄久安之勢,從至危之策,

忽社稷之計,生天下之心。臣雖至愚,竊爲陛下不取。

薄征 中興之功,旬月可冀,卜年之期,永永無極矣。願時邁順動,迴鑾上都,再造邦家,唯新 庶 天子,躬儉節用,苟能黜素餐之吏,去冗食之官,抑豎刁、易牙之權,任護瑗、史鰌之直, 衣,冠大帛之冠,元年革車三十乘,季年三百乘, 卒能恢復舊業, 享無疆之休。 況明明 深謂不然。 政,奉宗廟以修薦享,謁陵寢以崇孝思,臣雖隕越,死無所恨。 . 她力,卹隱迨鰥,委諸相以簡賢任能,付老臣以練兵禦侮,則黎元自理,寇盜自平, 且 聖旨所慮,豈不以京畿新遭剽掠,田野空虛,恐糧食不充,國用有闕,以臣所見, 昔衞文公小國之君,諸侯之主耳,遭懿公爲狄所滅,始廬于曹,衣大布之

代宗省表,垂泣謂左右曰:「子儀用心,眞社稷臣也。可亟還京師。」十一月,車駕自陝還宮, 子儀伏地請罪,帝駐車勞之曰:「朕用卿不早,故及於此。」乃賜鐵券,圖形凌煙閣

州 兵楡次,爲帳下將張惟岳所殺,傳首京師。惟岳以瑒之衆歸於子儀,懷恩懼,棄其母而走靈 副 元帥、 是時, 明年九月,以子儀守太尉,充北道邠寧、涇原、河西已東通和蕃及朔方招撫觀察使,其 河中節度觀察使,出鎭河中。蕃戎旣退,僕固懷恩部下離散。是月,懷恩子暘主 河北副元帥僕固懷恩方頓軍汾州,掠丼、汾諸縣以爲己邑。乃以子儀兼關內河

榮巳極,功業已成,尋合乞骸,保全餘齒。但以寇讎在近,家國未安,臣子之心,不敢寧處。 皆讓,欒騰爲汰,不敢違也。臣誠薄劣,竊慕古人,務欲以身率先,大變浮俗,是用勤勤懇懇, 德薄而位尊,功微而賞厚,實繁有衆,不可殫論。臣每見之,深以爲念。昔范宜子讓,其下 **苟西戎卽敍,懷恩就擒,疇昔官爵,誓無所受,必當追蹤范蠡,繼迹留侯。 臣之鄙懷,切在於** 竊憂非據,輒敢上聞。伏奉詔書,未允誠懇。臣疇昔之分,早知止足,今茲累請,竊懼滿盈。 關內河東副元帥、中書令如故。子儀以懷恩未誅,不宜讓使,堅辭太尉,曰:「太尉職雄任重, 願罷此官,庶禮讓興行,由臣而致也。臣位爲上相,爵爲眞王,參啓沃之謀,受腹心之寄,恩 義實由衷,事非矯飾,志之所至,敢不盡言。自兵亂已來,紀綱寖壞,時多躁競,俗少康隅。

方兵馬使曜率師援之,與邠寧節度使白孝德閉城拒守。懷恩前鋒至奉天,近城挑戰,諸將 心,今所以能爲亂者,引思歸之人耳。懷恩本臣偏將,其下皆臣之部曲,臣恩信嘗及之,今 請擊之,子儀止之曰:「夫客兵深入,利在速戰,不可爭鋒。彼皆吾之部曲,緩之自當攜貳; 臣爲大將,必不忍以鋒刃相向,以此知其無能爲也。」虜寇邠州,子儀在涇陽,子儀令長男朔 問禦戎之計,子儀曰:「以臣所見,懷恩無能爲也。」帝問其故,對曰:「懷恩雖稱驍勇,素失士 十月,僕固懷恩引吐蕃、迴紇、党項數十萬南下,京師大恐,子儀出鎭奉天。帝召子儀

此。」優韶不許。子儀見上,感泣懇讓,乃止。

若迫之,是速其戰,戰則勝負未可知。 敢言戰者斬!」堅壁待之,果不戰而退。 入朝,帝御安福門待之,命子儀樓上行朝見之禮,宴賜隆厚。 子儀自涇陽

宰相百僚送上,遣射生五百騎執戟翼從,自朝堂至省,賜教坊樂。」子儀不受,復上表曰: 復速神明之誅。伏乞天慈,俯停新命。」答詔不允。翌日,敕所司令子儀於尚書省視事。 東,飮至策勳,再有斯授。豈臣末職,敢亂大倫。德薄位尊,難逃天子之責〔₭〕;負乘致寇, 心,豈意未歷旬時,復延寵命。以臣褊淺,又寡智謀,安可謬職南宮,當茲大任。況太宗昔 盈寤寐。臣昨所以固辭太尉,乞保餘年,殊私曲臨,遂見矜許。竊謂陛下巳知其願,深察其 參朝政,外總兵權。上不能翼戴三光,下不能糾逖羣歷,功微賞厚,任重恩深,**覆**餗之憂,實 居藩邸,嘗踐此官,累聖相承,曠而不置。皇太子爲雍王之日,陛下以其總兵薄伐,平定關 十一月,以子儀爲尙書令,上表懇辭曰:「臣以薄劣,素乏行能,逢時擾攘,猥蒙驅策,內

繁同色,清濁不分,「爛羊」之謡,復聞聖代。臣頃觀其弊,思革其源,以逆寇猶存,未敢輕 貽萬方之非。臣雖至愚,安敢輕受。 況久經兵亂,僭賞者多,一人之身,兼官數四,朱 代作則。陛下守文繼體,固當奉而行之,豈可猥私老臣,隳厥成式,上掩陛下之德,下 務欲褒崇,區區微誠,益用惶懼。何則?太宗立極之主,聖德在人,自後因廢此官,永 臣伏以尙書令,武德之際,太宗爲之,昨瀝懇上陳,請罷斯職;而陛下未垂亮祭,

議。今元兇沮敗,計日成擒,中外無虞,妖氛漸息。 政皆亂,則國家又安得永代而無患哉!陛下荷能從臣之言,俯察誠請,彼貪榮冒進者, 亦將各讓其所兼之官,自然天下文明,百工式敍,太平之業,可得而復也。臣誠蒙鄙, 始於老臣,化及班列。 。豈可輕爲此舉,以亂國章。 國章亂於上,則庶政隳於下,海內之 此陛下作法之際,審官之時,固合

語政理之源,無待禮成,曲從德讓。宜宣示於外,編之史册。」遣內侍魚朝恩傳詔,賜美人盧 氏等六人、從者八人,幷車服、帷帳、牀蓐、珍玩之具。 難。所以命掌六聯,首茲百辟,顧循時議,僉謂允諧。而屢拜封章,懇懷讓挹,守淳素之道, 朝,累匡多難,靖羣氛於海麦,凝庶績於天階。敏事而寡言,居敬而行簡,人難其易,爾易其 手韶答曰:「優崇之命,所以報功;總領之司,期於賦政。卿入居合鉉,出統戎旃,爰自先 **識昧古今,志之所切,實在於此。**

德、劉開元等三十餘萬南下,先發數萬人掠同州,期自華陰趨<u>藍田,以</u>扼南路,懷恩率重**兵** 節度行營,出鎭河中。八月,僕固懷恩誘吐蕃、迴紇、党項、羌、渾、奴刺,山賊任敷、鄭庭、郝 李忠臣屯東渭橋 繼其後。 時蕃虜屢寇京畿,倚瀟、陝爲內地,常以重兵鎭之。永泰元年五月,以子儀都統河南道 迴紇、吐蕃自涇、邠、鳳翔數道寇京畿,掠奉天、醴泉。京師震恐,天子下詔親征,命 了,李光進屯雲陽,馬璘、郝廷玉屯便橋,駱奉先、李日越屯盩厔,李抱玉屯**凰**

周智光屯同州, 杜冕屯坊州,天子以禁軍屯苑內。京城壯丁,丼令團結。 城二門塞其

魚朝恩括士庶私馬,重兵捉城門,市民由竇穴而遁去,人情危迫。

愚也 領、各飲之酒、與之羅錦、歡言如初。 勞之曰:「安乎?久同忠義,何至於是?」迴紇皆捨兵下馬齊拜曰:「果吾父也。」子儀召其首 以爲害也。」乃傳呼曰:「令公來!」虜初疑,持滿注矢以待之。 子儀以數十騎徐出,免胄而 翦除兇逆,恢復二京。 是時子儀與公等周旋艱難,何日忘之。 今忽棄舊好,助一叛臣,何其 報之日:「皇帝萬歲無疆。」迴紇皆日:「懷恩欺我。」子儀又使論之日:「公等頃年遠涉萬里, 僕固懷恩言天可汗已棄四海,令公亦謝世,中國無主,故從其來。今令公存,天可汗存乎?」 重。 之衆,今力固不敵,且至誠感神,況虜輩乎!」諸將曰:「請選鐵騎五百衞從。」子儀曰:「適足 安得而見之?」子儀將出,諸將諫曰:「戎狄之心,不可信也,請無往。」子儀曰:「虜有數十倍 騎二千出沒於左右前後,虜見而問曰:「此誰也?」報曰:「郭令公也。」迴紇曰:「令公存乎? · 且懷恩背主棄親,於公等何有?」迴紇曰:「謂令公亡矣,不然,何以至此。令公誠存, 子儀使李國臣、高昇拒其東,魏楚玉當其南,陳迴光當其西,朱元琮當其北。子儀率甲 是時,急召子儀自河中至,屯於涇陽,而虜騎已合。子儀一軍萬餘人,而雜虜圍之數

子儀說迴紇曰:「吐蕃本吾舅甥之國,無負而至,是無親也。若倒戈乘之,如拾地芥耳。

破吐蕃 乎 馬使白元光與迴紇會軍。 其羊馬滿野,長數百里,是謂天賜,不可失也。 會懷恩暴死于鳴沙 十餘萬於靈武臺西原(4),斬首五萬,生擒萬人,收其所掠士女四千人,獲牛羊駝馬, 吐蕃 ^薬虜 知其謀,是夜奔退。 無所統攝 ,遂許諾,乃遣首領石野那等入朝。 今能逐戎以利舉, 與我繼好而凱旋, 迴紇與元光追之,子儀大軍繼其後,大 子儀遣朔方兵 不亦善

三百里內不絕。

子儀

自涇陽入朝,加實封二百戶,還鎭河中。

関軍 孝,上獲天譴,非人患 素惡子儀,疑其使之。 献、王縉、僕射裴晃、京兆尹黎幹、內侍魚朝恩共出錢三十萬,置宴於子儀第,恩出羅錦二百 見,帝言之,子儀號泣奏曰:「臣久主兵,不能禁暴,軍士殘人之墓,固亦多矣。 匹,爲子儀纏頭之費,極歡而罷。 十月,蕃軍 部 師五 - 戎,將發,同華將吏聞軍起, 侍郎趙縱受 大曆 萬 自河中移鎮 元年十二月,華州節度使周智光殺監軍張志斌謀叛,帝以同、華路阻,召子儀 退至 靈州,邀擊敗之,斬馘二萬。 口 韶往河中,令子儀起軍討之。 奉天。 也。」朝廷乃安。 子儀心知其故,及自涇陽將入,議者慮其構變,公卿憂之。及子儀 是月, 乃斬智光父子,傳首京師。 九月, 白元光大破吐蕃於靈武。 三年三月,還河中。八月,吐蕃寇靈武。 吐蕃寇涇州,韶子儀以步騎三萬自河中移屯涇陽。 十二月,盜發子儀父墓,捕盜未獲。人以魚朝恩 縱請爲蠟書,令家僮間道賜子儀。 十月,子儀入朝, 二年二月,子儀 入朝, 還鎭河中。 九月,韶子儀 此臣不忠不 宰相 奉 女壻 詔 元

于宜祿 發涕零。 中移鎮邠州 紇 匹,有司 馬價 畤 議以 ,不利。會馬璘設伏於潘 以國計不充,請市千匹。 雖韶旨不允,內外稱之。 旣退 西 ,徙馬璘爲涇原節度使。 蕃 ,復上封論備吐蕃利害,曰: 侵寇 ,京師不安,馬璘雖在邠州,力不能拒,乃以子儀 源,與瑊合擊,大破蕃軍,俘斬數萬計。 九年,入朝,代宗召對延英。 子儀以迴紇前後立功,不宜 八年十月,吐蕃寇涇州, 直阻意, 語及西蕃充斥,苦戰不暇,言 子儀遣先鋒兵馬使渾瑊 請自納一 兼邪 迴紇赤心 寧慶節度, 年俸物, 賣馬 充迴 自河 逆戰 画萬

寧歲。 又得了 四。 充斥,勢強十倍,兼河、隴之地,雜羌、渾之衆,每歲來闚近郊。 萬,戰馬三 馬璘 臣所 外有 朔方 加十倍之騎,欲求制勝,豈易爲力!近入內地,稱四節度,每將 中年以僕固之役,又經耗散,人亡三分之二,比於天寶中有十分之一。今吐 牒, 統將士,不當賊四分之一,所有征馬,不當 吐蕃之強,中有易搖之衆,外畏內懼 一萬,纔敵一隅。 國之北門,西禦大戎,北虞險狁,五城相去三千餘里。 賊擬涉渭而 南。 自先皇帝龍飛靈武,戰士從陛下收復兩京,東西 臣若 堅壓, ,恐犯畿甸 將 何以安? [賊百分之二,誠合固守,不宜與戰。 ; 若 過 [畿內,則國人大恐,諸道易 以朔方減十倍之軍, 開元、天寶中,戰士十 盈萬,每賊兼乘數 南 北 曾 無

臣

.伏以陛下横制勝之術,力非不足,但慮簡練未精,進退未一 〔 時淹師老, 地闊勢

分。願陛下更詢讜議,愼擇名將,俾之統軍,於諸道各抽精卒,成四五萬,則制勝之道 矣,未可失時。 臣請抽赴關中,教之戰陣,則軍聲益振,攻守必全,亦長久之計也。 臣又料河南、河北、山南、江淮小鎭數千,大鎭數萬 了,空耗 月餼, 臣猥蒙任遇, 曾不習 必

垂二十年,今齒髮已衰,願避賢路,止足之誠,神明所鑒。

韶曰:「卿憂深慮遠,殊沃股心,始終倚賴,未可執辭也。」

戶,給一千五百人糧,二百匹馬草料,所領諸使副元帥並罷。諸子弟女壻拜官者十餘人。建中 不能興,以手叩頭謝恩而已。六月十四日薨,時年八十五,德宗聞之震悼,廢朝五日,詔曰: 二年夏,子儀病甚,德宗令舒王誼傳詔省問。及門,郭氏子弟迎拜於外,王不答拜,子儀臥 倚父比 呂望之名,爲師增 周公之位,盛業可久,歿而彌光。 羯胡作禍,咸秦失險,河洛爲戎。 公能扶翼肅宗,載造區夏。 國公、汾陽郡王、尙父子儀,天降人傑,生知王佐,訓師如子,料敵若神。 昔天寶多難, 德宗卽位,詔還朝,攝冢宰,充山陵使,賜號「尙父」,進位太尉、中書令,增實封通計二千 五岳。允釐庶績,鎭撫四夷,體元和之氣,根貞一之德,功至大而不伐,身處高而更安。 天地以四時成物,元首以股肱作輔,公合之任,鼎足相承,上以調三光,下以蒙 ,藉其驅 安社稷必在於解侯、弘、定羌戎無踰於茂國。 於國有患,勞其戡定;於 故太尉、兼中書令、上柱 絳臺綏四散之衆,涇

列

傳

陽降十萬之虜。勳高今古,名響夷狄,而勞乎征鎮,二紀于茲。

臣。聖祖園陵,所宜陪葬,式墓表文終之德,象山追去病之勳。千載如存,九原可作, 册命之禮,有司備焉。可贈太師,陪葬建陵。仍令所司備禮册命,賻絹三千匹、布三千 藥石靡攻,人之云亡,梁木斯壞。 雖賻禮加等,輟朝增日,悼之流涕,曷可弭忘。 更議 追崇,名位斯極,而尊爲尙父,官協太師,雖爵秩則同,而體望尤重。 斂以衮冕,旌我元 懸於日月,寵遇冠於人臣,尊其元老,加以崇號,期壽考之永,養勳賢之德。 膏肓生疾, 頃以春秋旣高,疆埸多事,罷彼旌鉞,寵在台衡。以公柱石四朝,藩翰萬里,忠貞

舊令一品墳高丈八,而韶特加十尺。 羣臣以次赴宅弔哭。凶喪所須,丼令官給。 端、米麥三千石。

及葬,上御

安福門臨哭送之,百僚陪位隕泣,賜諡曰忠武,配饗代宗廟庭。

安,不盡辨,領之而已。參佐官吏六十餘人,後位至將相,升朝秩貴位,勒其姓名於石,今在 子曜、旰、晞、昢、晤、瞹、曙、映等八人,壻七人,皆朝廷重官。諸孫數十人,每羣孫問

河中府。人士榮之。

史臣裴垍(10)日:汾陽事上誠蓋,臨下寬厚,每降城下邑,所至之處,必得上心。 前後遭

罹 與李光弼齊名,雖威略不逮,而寬厚得人過之。 歲入官俸二十四萬貫, 老將若李懷光輩數十人,皆王侯重貴,子儀頤指進退,如僕隸焉。幕府之盛,近代無比。 私財賦一皆遏絕,獨子儀封幣經其境,莫敢留之,必持兵衞送。其爲豺虎所服 中張譚杖殺之,物議爲薄 不之罪。富貴壽考,繁衍安泰,哀榮終始,人道之盛,此無缺焉。 名園甲館,聲色珍玩,堆積羨溢,不可勝紀。代宗不名,呼爲大臣。天下以其身爲安危者殆 承嗣西望拜之,指其膝謂使者曰:「茲膝不屈於人若干歲矣,今爲公拜。」 國,未嘗以危亡易慮,亦遇天幸,竟免患難。 讒謗不能行。代宗幸陝時,令以數十騎覘賊,及在涇陽,又陷於胡虜重圍之中,皆以身許 在親仁里,居其里四分之一,中通永巷,家人三千,相出入者不知其居。 :倖臣程元振、魚朝恩譖毀百端,時方握強兵,或方臨戎敵,詔命徵之,未嘗不卽日應召,故 校中書令考二十有四。權傾天下而朝不忌,功蓋一代而主不疑,侈窮人欲而 田承嗣方跋扈魏州,傲狠無禮,子儀嘗遣使至, 唯以讒怒誣奏判官戶部郞 私利不在焉。 李靈曜據汴州,公 前後賜良田美器, 如此。 麾下

飾池館,盛其 ,子儀長子。 (車服, 曜以儉朴自處。 性孝友廉謹。 子儀出征於外,留曜治家,少長千人,皆得其所。 累遷至太子賓客。 建中初,子儀罷兵柄,乃遍加諸子 諸弟爭

列

傳

闋寢疾,或勸其茹葱薤,曜竟不屬口。 建中四年三月卒,贈太子太傅。 乃散諸昆弟。子儀薨後,楊炎、盧杞相次秉政,姦諂用事,尤忌勳族。子儀之壻太僕卿趙 官,以曜爲太子少保。子儀薨,曜遵遺命,四朝所賜名馬珍玩,悉皆上獻,德宗復賜之,曜 子儀身歿,或被誣構,欲論奪之,有司無得爲理。」詔下方已。曜居喪得禮,若儒家子,服未 大勳力,保乂皇家,嘗誓以山河,琢之金石,十世之宥,其可忘也!其家前時與人爲市,以 力爲庇護。姦人幸其危懼,多論奪田宅奴婢,曜不敢訴。德宗微知之,詔曰:「尙父子儀,有

常持弓警夜,不寐者凡七十日,叛將竟不敢發,以功拜殿中監。廣德二年,僕固懷恩誘吐蕃 帥,子儀至絳,誅其元惡,其黨頗不自安,欲謀翻變。晞知其謀,選親兵四千,伏甲以防之, 節度使李國貞、荔非元禮於絳,韶以子儀爲河東關內副元帥,鎭絳州。時四方擾叛,多逐戎 京,晞力戰於香積寺、陝西,皆出奇兵克捷,以功加銀青光祿大夫、鴻臚卿。後河中軍亂,殺 再寇邠州,陣于涇北,子儀令晞率步卒五千、騎軍五百,出西南掩擊之。 晞以兵寡不敵,持 迴紇入寇,加晞御史中丞,領朔方軍以援邠州,與馬璘合勢,大破蕃軍。 **晞**,子儀第三子。少善騎射,常從父征伐。初以戰功授左贊善大夫,從廣平王收復兩 其年多,懷恩誘虜

母憂;服除,加檢校工部尙書,判祕書省事。建中二年,丁父喪,持服京城。朱泚構逆,遣 失,子儀固讓不受。永泰二年,檢校左散騎常侍。|大曆七年,加開府儀同三司。十二年,丁 人就第問訊,欲令掌兵,晞佯瘖噤口不言,泚以兵脅之,晞終不語,賊知其不可用,乃止。 而不戰,及至晡晚,乘其半濟而擊之,大破獯虜,斬首五千級。是時連戰皆捷,韶加御史大

\<u>公、食實封二百五十戶</u>曙,太子左諭德映等,並休有令名,保其先業,宜允推恩之典,以明延 男前左散騎常侍、駙馬都尉、食實封五百戶;曖,夙稟義方,居忠履孝,儷崇銀牓,攄美金章, 曖、映、曙四人所襲實封,各減五十戶,以賜郭曜男鉾、郭晤男鐇,各襲一百戶。 嗣之誠。其實封二千戶,宜準式減半,餘可分襲。曖可襲代國公,仍通前襲三百戶,晞可 繼撫先封,允宜聽復。曖兄檢校工部尚書、守太子賓客、趙國公晞,并弟右金吾將軍、祁國 格上玄,道光下土,積其善慶,垂裕無窮。雖嫡長云殂,支宗斯盛,汾陽舊邑,盍有丕承。其 二百五十戶; 曙可五十戶,通前三百七十戶; 映可二百三十五戶。」 尋又韶尙父子儀男睎 潛奔奉天,僅而獲免。 初,晞兄曜襲父代國公,實封二千戶,及曜卒,詔曰:「故尙父、太尉、中書令、汾陽王,功

使杜希全賓佐,希全以鋼攝豐州刺史。晞以鋼幼弱,恐不任邊職,貞元七年,晞上章請罷鋼 |晞至行在,復檢校工部尙書、太子詹事,從駕還京,改太子賓客。|晞子||鍋爲朔方節度

客。 官。 上,流入黄河令歸,杜希全得之,送赴京師, 貞元十年卒,贈兵部尙書。 德宗遣中使召之,鋼疑以他事見攝,乃單騎走入<u>吐蕃</u>。 晞次子鈞。 鈞子承嘏別有傳。 賜鋼自盡 ,晞亦坐子冤官。 蕃將見鋼獨叛,不納,置之筏 明年,復授太子賓

漑田。 思寵 曙及昇平公主皆奔奉天,德宗喜,並釋前咎,待之如初,復銀靑光祿大夫、檢校左散騎常侍。 旣而朱泚之亂,不知車駕幸奉天,爲賊所逼,欲授僞官,曖辭以居喪被疾。 從駕至 八十餘所,皆毀之。曖檢校左散騎常侍。 日:「吾行此詔,蓋爲蒼生,爾豈不識我意耶? 可爲衆率先。」公主卽日命毀。 冠於戚里,歲時錫賚珍玩,不可勝紀。大曆十三年,有韶毀除白渠水支流碾磑 曖,子儀第六子。年十餘歲,尚代宗第四女昇平公主,時昇平年亦與**曖相類**。 山南 昇平有脂粉磴兩輪,郭子儀私磑兩輪,所司未敢毀徹。公主見代宗訴之,帝謂 ,改太常卿同正 員。 建中末,公主坐事,留之禁中,曖亦不令出入口。 既而與兄晞、弟 由是勢門碾磑 大曆中, ,以妨民 公主

公主,元和 貞元中,帝爲皇孫廣陵郡王納曖女爲妃。曖,貞元十六年七月卒,贈尙書左僕射。昇平 元和十五年,穆宗即位,尊郭妃爲皇太后,詔曰:「追遠飾終,先王令典。 况積仁累義 五年十月薨,贈虢國大長公主,諡曰懿。 廣陵王卽位,爲憲宗皇帝,妃生穆宗皇

沁水之祥,德厚流光,乃啓塗山之祚。肆予小子,獲纘大業,未展定申之命,敢緣褒紀之恩 仕 三朝。 太后父贈尙書左僕射曖,克荷崇構,有勞王家,孝友本於生知,英華發於事任,實修一德,歷 事已顯於身前;觧會慶傳,福遂流於天下。式光盛德,爰舉徽章,尊尊親親,於是乎在。 俾繼維師,用光縟禮。可贈太傅。」|曖子|劉、蹤、銛。 建中末年,屬有大難,畢力扈駕,忘驅卽戎,忠貞之節,國史明備。 才高望洽,是膺

檢校左庶子,爲元帥府都押牙。京城亂,從幸山南,轉太府卿。隨駕還京,拜左金吾衞大 **將軍。貞元末卒。** 曙,代宗朝累歷司農卿,居父憂。 建中三年多,舒王誼爲淮西、山南諸道大元帥,以曙

職等,起家爲太常寺奉禮郎。

德宗朝,累官至太子右庶子。

元和初,爲左金吾衞大將軍,充 侈之失,士君子重之。 爲司農卿。 左街使。九年十一月,檢校工部尙書,象別州刺史,充別寧節度使。數歲,檢校戶部尙書,入 **剑,偉麥儀,身長七尺,方口豐下,沉默寡言。母昇平長公主。代宗朝,剑爲外孫,恩寵) 剑,大勳之後,烟聯戚里,而謙和接物,恭愼自持,居家臨民,無驕怠之色,無奢** 十五年正月,憲宗寢疾彌旬,諸中貴人秉權者欲議廢立,紛紛未定。

在 東 宮 心 甚 憂之, 遺人問計於國, **釗曰:「殿下** ·身爲· 皇太子,但旦 夕視膳 ,謹守以俟,又

何慮 平 迄 一今稱 釗 得元舅之體。

除帥 年入 好而退。 於蠻首領箋巔 用,不獨憑椒房之勢,所莅簡約不撓,其俗自理。 兵部尙書, 三城懷 乃以 為太常卿、 大和三年多,南蠻陷巂州 穆宗 節 度使。 即位 朝廷嘉之,授成都尹 釗 兼檢校尙書左僕射。 兼 ,責以侵寇之意 ,册皇太后 檢校司徒。 領 歲中,換河中尹、河中晉絳慈隰節度使。 西川節度。 南內,推崇外氏,以釗兼 十二月,在道 ノ、劍南 **蠻軍已寇梓州,諸道援軍未至** ,遂寇西川,杜元穎失於控禦,蠻軍陷成都府 明年, 西川 出爲梓州 卒, 節度使。 韶贈 敬宗即 司農卿 刺 與南韶 司 史、 徒。 劍南 位, · (III) 子仲文、仲辭 釗 立約 , 川 歷踐藩鎮 東川 **尊郭太后爲太皇太后,** 未幾,檢校戶部尚書,充河陽 吾圉,以 軍寡弱,不 疆 節度使。 陲 不 ,以汾陽 擾。 是修報 外城。 可 文宗 一令戦 以 冑胤 也。」 疾求代。 即位 朝 興釗 徴 廷 材 釗 未 釗 致 加 能 眼 選 四 書

爲漢陽 鏦 與 鏦 公主 主年未及冠 ,母昇平長公主,大曆、 那 主尤爲德宗 貞元 之所 之間,日 鍾 恩禮 愛、故縱 冠 諸 之貴 主。 穆宗即位 寵 順宗在東 焜 燿 宮,以 、縱爲叔舅,改右 時。 順宗 女德陽 即位 郡主 改封德 金吾衞 尙鏦 陽 時

省,接之以禮,由是中外稱之。 長慶二年十月卒,贈尙書左僕射,仍以其弟 話代 縱爲太子詹 將軍、兼御史大夫,充左街使。城南有汾陽王別墅,林泉之致,莫之與比,穆宗常遊幸之,置 年,而椒房之寵,國舅之恩,近代已來,無有其比。 而縱恭遜虔恪,不以富貴驕人,士無賢不 事,充閑廐宮苑使。 酒極歡而罷,賜蹤甚厚。 俄加檢校工部尙書,兼太子詹事,充閑廐宮苑使。從容貴位三十餘 爲銀青光祿大夫、檢校殿中少監、駙馬都尉,襲封太原郡公,尚饒陽公主。又仲辭兄詹事府 **姻嫡庶,朝野具知,奪宗之配,實玷風教。且仲文、仲辭旣非同出,襲封尙主,不可並行。 伏** 仲辭不合配尙貴主。伏以郭仲文,尙父子儀之孫,太皇太后之姪,戚里勳門,無與儔比,婚 外孫,有男仲辭,已選尙主。 仲文不合假冒,自稱嫡子。 準制書,贈司徒郭釗嫡男仲文襲封太原郡公者,臣近訪知郭釗妻沈氏,公主之女,代宗皇帝 請付臺勘當。」詔曰:「以萬年縣尉仲辭襲封。」仲文落下,以太皇太后姪,不之罪。 尋以仲辭 丞仲恭,爲銀青光祿大夫,尙金堂公主。 仲文,大和末爲殿中少監。 開成初,韶仲文襲父太原郡公,制下,給事中封敕奏曰:「伏 若仲文承嫡,即沈氏須黜居別室,

幼明 ,尙父子儀之母弟也。 性蓮 愿無過,不工武藝,喜賓客飮讌, 居家御衆,皆得其歡

Ę, 以子儀勳業,累歷大卿監。 大曆 八年卒,贈太子太傅。

將 西 東西阻絕,忠義之徒,泣血相守,愼固封略, 元禮皆遙領之。 北庭節度使李元忠,可北庭大都護; 吏已下敍官,可超七**資**。」 韶曰:「四鎭、二庭,統任西夏五十七蕃十姓部落,國朝以來,相次率職。 子町,肅宗末爲四鎭留後。 <u></u>
町阻隔十五年,建中二年,與伊西北庭節度使李元忠俱遣使于朝, 自關 、隴陷蕃,爲虜所隔,其四鎭、北庭使額, 四鎭節度留後郭昕,可安西大都護、四鎭節度使。其 奉尊朝法,皆侯伯守將交修共理之所致也。 自關、隴失守, 李嗣業、荔非 德宗嘉 伊

子, 庭者 自焚而死。 為伊州 李元忠,本姓曹,名令忠,以功賜姓名。 刺 史,隴右諸郡皆陷,光庭堅守伊州,吐蕃攻之累年,兵盡食竭,光庭先刃其妻 因昕使知之,贈工部尙書。 時町使自迴紇歷諸蕃部,方達於朝。 又有袁光

師 ,關西殄寇,身扞豺虎,手披荆榛。 史臣曰:天寶之季,盜起幽陵,萬乘播 七八年間,其勤至矣,再造王室,勳高 遷,兩都覆沒。 天祚土德,實生汾陽。 及國威復 河朔 班

振,羣小肆讒,位重懇辭,失寵無怨。不幸危而邀君父,不挾憾以報仇讎,晏然効忠,有死無 二,誠大雅君子,社稷純臣。自秦、漢已還,勳力之盛,無與倫比。而晞、曖於穣粗之中,拔

身虎口,赴難奉天,可謂忠孝之門有嗣矣。

敢告忠良。 贊曰:猗敷汾陽,功扶昊蒼。 秉仁蹈義,鐵心石腸。四朝靜亂,五福其昌。爲臣之節,

校勘記

(11)河南 「河」字各本原無,據獅覽卷一九八補。

(三)季廣琛 「季」字各本原作「李」,據本書卷一〇蕭宗紀、通鑑卷二二〇改。

肅宗 二十二史箚記卷一八據子儀表文有「陛下貽臣詔書一千餘篇」「賜手詔敕書凡二十卷」云

云,謂「肅」是「代」之誤。

(1) 邠王守禮子 「子」字各本原作「孫」,據本書卷八六章懷太子賢傳改。

Œ 諫官屢論之 宗立爲皇太子在廣德二年,故「東幸」時不得有「東宮」之稱,今據冊府改。 「諫官」,各本原作「東宮」,冊府卷六七〇作「諫官」,按代宗「東幸」在廣德元年,德

《K)難逃天子之貴 册府卷四〇九「天子」作「天下」。

- なり生産武臺 本書卷一九六上吐蕃傳、冊府卷三六六作「鹽臺」。
- (水) 上柱國 「上」字各本原無,據廣大韶令集卷六三補。
- [A] 必在於絳侯 「在」字各本原作「有」,據冊府卷三一九、唐大韶令集卷六三改。
- (10) 裴垍 各本原作「裴洎」,據本書卷一四八裴垍傳改。
- (III) 以倒棄司農卿 冊府卷三○一「乗」上有「爲刑部尚書」五字•

舊唐書卷一百二十

列傳第七十一

僕固懷恩 梁崇義 李懷光

山、趙郡、沙河、嘉山,皆大破之,懷恩功居多。 下,抗賊七千騎,生擒忠義男,襲下馬邑郡。 有統禦材,委之心腹。及安祿山反,從郭子儀討高秀巖于雲中,破之,又敗薛忠義于背度山 天寶中,加左領軍大將軍同正員、特進。歷事節度王忠嗣、安思順,皆以善格鬭,達諸蕃情, 授歌濫拔延爲右武衞大將軍、金微都督。拔延生乙李啜拔,乙李啜拔生懷恩,世襲都督。 大首領率其部落來降,分置瀚海、燕然、金微、幽陵等九都督府於夏州,別爲蕃州以禦邊, 僕固 懷恩,鐵勒部落僕骨歌濫拔延之曾孫口,語訛謂之僕固。貞觀二十年,鐵勒九姓 十五載,進軍與李光弼合勢,及史思明戰于常

肅宗卽位於靈武,懷恩從郭子儀赴行在所。 列 傳 第 七 十 一 固 篾 恩 時同羅部落自西京叛賊,北寇朔方,子儀 三四七七

與懷恩擊之。懷恩子玢領徒擊賊,兵敗而降,尋又自拔而歸,懷恩叱而斬之。 形勢,乃遣懷恩與燉煌王承寀使于迴紇,請兵結好。迴紇可汗遂以女妻承寀,兼請公主,遣 不一當百,遂破同羅千餘騎於河上,盡收其器械、駝馬。 肅宗雖仗朔方之衆,將假蕃兵以張 將士懾駭,無

首領隨懷恩入朝。

急,使懷恩及王昇、陳週光、渾釋之、李國貞等五將伏兵於白渠留運橋以待之,賊至伏發,歸 疲矣,且休息,迨明而後圖之。」懷恩曰:「歸仁、守忠,天下聽賊也,驟勝而敗,此 水(三)。 賊伏兵於營東,懷恩引迴紇馳殺之,匹馬不歸,賊乃大潰。 日暮,懷恩謂王曰:「賊 仁大敗而走。又從子儀戰于淸渠,不利,歸于鳳翔。及迴紇使葉護帝得數千騎來赴國難 歸子儀於河東,整其餘衆。四月,子儀赴鳳翔,李歸仁以勁卒五千邀之於三原北。 仁自京率衆來援,苦戰二日,官軍敗績。懷恩退至渭水,無舟楫,抱馬以渡,存者僅半,乃奔 奈何縱之不取?若使得衆,復爲我患,雖悔無及。夫戰尙速,何明日 必棄城走矣,請以二百騎馬追之,縛取李歸仁、田乾眞、安守忠、張通儒。」王曰:「將軍戰亦 南蠻、大食之卒相繼而至。肅宗乃遣廣平王爲元帥,以子儀爲副,而懷恩領迴紇兵從之灃 懷恩又固請,往而復反,一夕四五起。 二年正月,又從子儀下馮翊、河東二郡,走僞將崔乾祐,又襲破潼關。賊將安守忠、李歸 遲明諜至, 守忠等果逃。 又從王大破賊於陝西 爲?」王固 止之,令還 天與我也, 子儀窘

之新店 ,收兩京,皆立殊功。 以前後功加開府儀同三司、鴻臚 卿同正員、 同節度副使。

月,封豐國公,食實封二百戶。

男瑒 節度。 兵馬使。 二州 又以開府儀同三司從將兵於其軍,每深入虜陣,以勇敢聞,軍中號爲「鬭 乾元元年九月,遣九節度擊安慶緒於相州。 圍相州 又從李光弼守河陽,破周乂,擒徐璜玉、安太淸,拔懷州 及李光弼代子儀,懷恩 戰 思崗。凡經五月,常爲先鋒,堅敵 又副之。 乾元二年,進封大寧郡王,遷御史大夫、朔方 從郭子儀領朔方行營,破安太清,下懷、 大陣, 必經其戰, ,皆推 鋒陷敵, 勇冠三軍。 將 功冠 諸將。 尋充都 其 知 衞

儀每事 部尙書,敕李輔國 元二年,從李光弼 懐恩 郭子儀爲帥,以寬厚容衆,素重 ,優容之,行師用兵,倚以輯事。 爲 人雄毅寡言,應對舒緩,而剛決犯上,始居偏裨之中,意有不合, 與史思明戰于邙山,不利。 及常參官送上,太官造食以寵之。 懷恩,其麾下皆朔方蕃漢勁卒,恃功怙將,多爲不法, 而 光弼持法嚴肅,法不貸下,懷恩心憚而頗不叶。 肅宗以懷恩功高,恩顧特異諸將,至多, 雖主將必詬怒 加

子昂 請兵於迴紇 馳於塞 代宗卽位 登 E 一勞之,遇於忻州。 里 「,拜隴右節度,未行,改朔方行營節度,以副郭子儀。 可汗 登里已爲史朝義誘之傾國入塞 先是, 肅宗以寧國公主下嫁於毘伽 ,衆號十萬,關中騷擾, 其秋, 闕 可汗, 上使中官劉清 毘 上使殿 伽 闕 中 可开 監 文

以 兩牌,突入萬衆之中,左右披靡,大軍乘之而入,朝義大敗,斬首一萬六千級,生擒四千六百 發,多中賊而死,陣亦如初。 鎭西節度使馬璘曰:「事急矣!」 遂援旗而進,單騎奔擊,奪賊 戰,短兵旣接,相殺甚衆。官軍驟擊之,賊陣而不動。 魚朝恩令射生五百人下馬,弓弩亂 內應,表裏擊之,一鼓而拔,賊死者數萬。朝義領鐵騎十萬來救,陣於昭覺寺,賊皆殊死決 栅自固。懷恩陣于西原上,廣張旗幟以當之,命驍騎及迴紇之衆傍南山出於東北,兩軍舉旗 陳鄭節度李抱玉自河陽入;河南副元帥、雍王留陝州〔三〕。懷恩等師至黃水,賊徒數萬,堅 副,加同中書門下平章事,領河東、朔方節度行營及鎭西、迴紇兵馬赴陝州,并令諸道節度 兵,歷太原、汾、晉,營于陝州以俟期。十月,詔天下兵馬元帥雍王爲中軍先鋒,以懷恩爲 以遣之,卽令其母便發。懷恩與迴紇可汗相見於太原,可汗大悅,遂許助討嘲義,於是進 騎而走。 人,降者三萬二千人。轉戰於石榴園、老君廟,賊黨又敗,人馬蹂賤,填於尚書谷,朝義輕 爲可敦。 時齊進。懷恩與迴紇左殺爲先鋒,觀軍容使魚朝恩、陝州節度郭英乂爲後殿,自澠池入, 少子請婚 至是,可汗請與懷恩及懷恩之母相見,詔從之。懷恩嫌疑不敢,上因賜鐵券,手詔 懷恩乃進收東京及河陽城,封其府庫,僞中書令許叔冀、王伷等,承制釋之,悉皆 ,肅宗以懷恩女妻之。 **毘伽可汗死,少子代立,卽登里可汗。登里立,以懷恩女**

衆 乘勝 恩留迴紇 逐北。 懷恩常壓賊而行 可汗營於河陽,乃使其子右廂兵馬使陽、北庭朔方兵馬使高輔成以步軍 至于鄭州 再戰皆捷; 進至汴州 偽節度張獻誠 開門出 萬

崩之, 之。 諸將同爲攻守,凡月餘日。 陣殺其僞尙書敬榮。 義至貝州,又與僞大將薛忠義兩節度合。陽至臨淸縣 抱玉 降 餘 義 玉、兗鄆節度使辛雲京會師於下博,進軍莫州城下。 馬來戰,又敗走,達盧來降,賊徒震駭。於是相州僞節度薛嵩以相、衞州、洺、邢、趙降于李 與朝義合,據河來拒。 三萬丼攻具來攻,場合高彥崇、渾日進、李光逸等設三伏以待之,賊半渡, 平州石 其時迴紇又至,官軍益振,陽卷甲馳之,大戰于下博縣東南。賊背水而 、高輔成、尙文悊;僞恆陽節度李寶臣以深、恆、定、易四州降于河東節度辛雲京。 又拔 賊 潰 積屍擁流而下。 滑州 城縣温 屬 幽州 追破朝義于衞州。 泉棚 節度使李懷仙送降款,瑒頓兵於其境, 朝義懼,自分萬餘衆投歸義縣,留承嗣守城 |陽連盤濟師,登岸薄之,賊黨悉奔,長驅至昌樂縣東。 朝義又走莫州。 `窮蹙,走入長林自縊,懷仙使妻弟徐有濟傳其首以獻。 **瑒與高彥崇、侯希逸、薛兼訓等以衆三萬追及朝義於歸義縣,交** 偽睢陽 于是河南副元帥都知兵馬使薛 節度田承嗣、李進超、李達盧等兵馬四萬餘衆,又 朝義與田 懼賊氣盛 遣懷仙分兵追 承嗣頻出挑戰,大敗而 駐軍以俟變。 於是淄青節度侯希逸 兼訓、 蹄。 大發, 陣 朝義率魏州 二年三月, 大軍 兵馬使郝 合擊而 又降田承 朝義領衆 衝撃 臨 兵 狂 嘲

嗣之軍,河北悉平,懷恩乃與諸將班師。

戶,仍與一子五品官。高彦崇太子賓客,依舊朔方右廂兵馬使,實封二百戶,莊宅各賜一所, 與一子五品官。 仍與一子五品官。 兼中書令、靈州大都督府長史、單于鎭北大都護、朔方節度使,仍加實封四百戶,通前一 春,又加太子少師,充朔方都知兵馬使、同節度副大使,食實封五百戶,莊宅各一所, 去多郭子儀以懷恩有平定河朔之功,讓位於懷恩,遂授河北副元帥、尚書左僕 高輔成太子少傅、兼御史中丞,充河北副元帥都知兵馬使, 加實封三百

酒酣, 爲功無以讓。 如之。 令節。」<u>奉先固辭,懷恩苦邀之,命藏其馬。中夕謂其從者曰:「向者責吾,又收吾馬,是將害</u> 至太原,辛雲京以可汗是其子壻,疑其召戎,閉關不報,且懼可汗相襲,不敢犒軍; 曰:「爾等與我兒約爲兄弟,今又親雲京,何兩面乎?雖然,前事勿論,自今母子兄弟如初。」 京,雲京言懷恩與可汗爲約,逆狀已露,乃與奉先厚結歡。 迻 懷恩起舞,奉先贈纏頭綵。懷恩將酬其貺,奉先遽告發,懷恩曰:「明日端午,請宿爲 懷恩父子宣力王室,攻城野戰,無役不從,一舉滅史朝義,復燕、趙、韓、魏之地,自以 韶懷恩統可汗還蕃,遂自相州西郭口趣潞州,與迴紇可汗會,出太原之北。 至是,又爲雲京所拒,懷恩怒,上表列其狀,頓軍汾州。 奉先迴至懷恩所,其母數讓奉先 會中官駱奉先使于雲 及還,亦 懐思初

保, 雲京 我 也。 仍與一子三品、一子四品官幷階, 奉先 」奉先懼,遂踰垣 ,上以雲京 有功, 而走。懷恩驚,遽令追還其馬。 手詔 和 解之, 仍 加實封 懷恩遂有 五 百戶。 旗 於我。 奉先使迴,奏其反狀。 僕固 至七 瑒 万_, 一 子 改元 五 品官 廣德 懷恩累奏請 加 實 册 封 勳 拜 太 誅 百

犪 恩以 寇 難已來, 門之內死王 事者四 十六人,女嫁絕域,再收 兩 京, 皆 導引 迴紇

仍賜鐵券,以名藏

太廟

,畫像於凌煙閣。

尋以陽爲御史大夫、朔方行營節

度。

滅強 敵 Mi 爲 人媒孽 ,、蕃性獷戾,怏怏不已。乃上書自敍 功伐

策,出 思明 累任 使、 皇帝陛下。 前 讎 以 九族之親, 河 陛 繼 偏 廣 北 入死 匡 下 德 逆 裨, 時 副 悉 元年八 生,竭 難 叉據 決 元 臣 臣家 死 帥、上柱國、大寧郡王臣 愚 十不 闔門 東周、宸極 **靖難,上以安社稷,下以拯生靈,仗皇天之威神,滅狂** 誠。 (月二十三日, 万 本蕃夷, 存 疆 忠烈 大行皇帝未捐宫館之時, 場, 一,縱有在者 叨承先帝報 代居邊塞, 爰自祖父, 成願殺身,野戰攻城 不安 開 ,海內騰沸。 府儀同三司、 清痍 犪 功,時年已授特進。 恩
, 徧 身。 刺 臣謬承大行皇帝委任, 肝瀝 尙 () 皆先士卒。兄弟死於陣敵 臣頻立微效, 況 早沐國恩。 書左僕射、 陛 血 下潛龍之時,親統 謹 **消**乎祿山 一頓首! 累霑官賞,遂被輔國 臣 兼中書令、 [頓首上 年未弱 作亂, 授以兵權, 胡之醜 書寶應 冠 師旅、臣 朔方節度 大振王 子 即蒙 類 姪沒 聖文神 誓 上 師 無 於軍 皇 副 事 雪 臣 何, 麾 國 驅 缸 大

列

傳

第

肉 開 葉,至將歸骨泉壤,永謝明時。 ,使臣得竭駑蹇之力,劾錐刀之功,上答陛下再造之恩,下展徼臣犬馬之志。 **、獨見之明,杜絕衆多之口,特拔臣於汧、隴,再任臣於朔方。 誠謂遊魂返骸,枯骨再** 幾至破家,便奪兵權,逾年宿衞。臣雖內省無疚,終懼讒佞傾危,以日繼時,命懸秋 幸遇陛下龍躍天衢,繼續鴻業,知臣負謗,祭臣丹心,遂

於迴紇 迎, 京曾無禮數,閉關不出相看。臣遂過汾州,休息士馬,凡經數日,不遣一介知聞。 讎 被 平賊卻迴,天恩又令餞送,臣遂罄竭家產,爲國周旋,發遣外蕃,貴圖上道。 行至山北, 神策兵馬,頓軍獨住陳留。可汗時在洛陽,即被朝恩猜阻,要爲流議,已失蕃情。 結託之私,貴在厚誣,務相傾奪。陛下不垂明察,採聽流言,欲令忠直之臣,枉陷讒邪 公行事乖: 一、臣遂 府過日,見抱玉祗迎迴紇,庶事用心,懇稱家資罄於公用,又與臣馬兼銀器四事, 奉先、雲京共生異見,妄作加諸,閉城不出祗迎,仍令潛行竊盜。蕃夷怨怒,早欲相 一切事宜,許臣逐便處置。遂與可汗計議,分道用兵,克復洛陽,平蕩幽、薊,惟有 去年秋末, 迴紇仗義而來, 士庶不知, 悉皆驚駭。 陛下以臣與其姻婭, 令至太原祗 處得絹,便與抱玉二千匹以充答贈。今被抱玉共相組織,將此往來之貺,便爲 爾縫,方得出界。及其祖餞事了,迴至太原,臣忝跡鼎司,又承重寄,奉先、雲 疏,恐臣先有論奏,遂乃構其謗黷,妄起異端, 扇動軍城,以爲設備。 又臣從 臣自 臣

臣實不欺天地,不負神明,夙夜三思,臣罪有六:

往年同羅背叛,河曲騒然,經略數軍,兵圍不解。臣不顧老母,走投靈州, 先帝嘉

臣忠誠,遂遣徵兵討叛,使得河曲淸泰,賊徒奔亡。是臣不忠於國,其罪一也。

臣男母嘗被同羅虜將,蓋亦制不由己,旋卽棄逆歸順,卻來投臣,

臣斬之以令士

衆。 且臣不愛骨肉之重,而徇忠義之誠,是臣不忠於國,其罪二也。

臣有二女,俱聘遠蕃,爲國和親,合從討難,致使賊徒殄滅,寰宇淸平。是臣不忠於

國,其罪三也。

臣及男陽,不顧危亡,身先行陣,父子効命,志寧邦家。是臣不忠於國,其罪四也。

陛下委臣副元帥之權,令臣指麾河北。其新附節度使,皆握強兵,臣之撫綏,悉安

反側? 州縣旣定,賦稅以時。是臣不忠於國,其罪五 也。

臣叶和迴紇,戡定兇徒,天下削平,蕃夷歸國,使其永爲鄰好。 義著急難, 萬姓安

寧,干戈止息,二聖山陵事畢,陛下忠孝兩全。是臣不忠於國,其罪六也。 臣旣負六罪,誠合萬誅,延頸轅門,以待斧鑕。 過此以往,更無他違。 陛下若以此

誅臣,何異伍子胥存吳,卒浮屍於江上,大夫種霸越,終賜劍於曆山。 唯當吞恨九泉,

衛冤千古,復何訴 哉!復何訴哉

列 傳 第 七 + -僕 固 馊 恩

疑。況 諸道節度使皆懼,非臣獨致如此。 而使梯航納費?天下至大,豈可暫輕。 庭,均、房羣盜縱橫,廊、坊稽胡草擾。 社 處置,寵用 損傷,豈唯是臣不忠,只爲回邪在側。 離 魏闕 稷,若無極諫, 且 來瑱 誠恐以忠獲罪,龜鏡不遙。 爾深。皆由同類相從,致蒙蔽聖聰,人皆懼死,誰復敢言!臣義切君臣,志憂 功業素高,人多所忌,不審聖衷獨斷,復爲姦臣弄權?臣欲入朝,恐罹斯禍 一份解 仰陽,犬馬猶能戀主,臣忝恩至重,委任非輕,夙夜思奉天顏,豈暫心 有負聖朝,敢肆愚忠,以干鼎鑊。 近聞追詔數人,並皆不至,實畏中官讒 頃者來瑱受誅,朝廷不示其罪,天下忠義 陛下不思外禦,而乃內忌忠良,何以混一車書, 且臣前後所奏駱奉先詞情,非不摭實,陛下竟無 況今西有犬戎背亂,東有吳、越不 口,又懼陛下 ,從此生

留數月 何殊指鹿爲馬?陛下倘斥逐邪佞,親附忠良,蠲削狐疑,敷陳政化,使君臣無二,天下 備 是陛下蒙塵故吏,曾不別加優獎,卻信嫉妬謗詞,子儀先已被猜,臣今又遭毀黷。 鳥盡,冤死犬烹,臣昔謂非, ,分兵數郡,貴免般糧,勸課農桑,務安黎庶,有何狀跡,而涉異端。 伏 .承四方敷奏之人,引對之時,陛下皆云與驃騎商量,曾不委宰臣可否。 ,不放歸還,遠近之心,轉加疑阻。 今方知實。 且臣息軍汾上,關鍵大開,收馬放羊, 且臣朔方將士,功効最高,爲先帝中興主人, 陛下必信矯詞, 或有稽 曾無守 弓藏

愚懇 歸心 則窺邊之戎,不足爲患,梗命之寇,將復何憂,偃武修文,其則不遠。 且貴因循, 臣實不敢保家, 陛下豈能安國! 忠言利行, 良藥愈病, 陛下若不納 伏惟陛下圖

優厚 門侍 使還,懷恩與可汗往來,恐洩其事,乃止之。 途令子·陽率衆攻雲京,雲京出戰,陽大敗而旋, 成,奈何入不測之朝。公不見來瑱、李光弼之事乎!功成而不見容,二臣以走、誅。」懷恩然 重 「楡女,朝廷患之。 明日,又以 九月,上以迴紇近塞,懷恩又與辛雲京有隙,上欲其悔過,推心以待之。恐其不信,詔黃 臣、臣即 議近臣, 公然進發,盧恐將士留連。臣今便託巡晉、絳等州,於彼遷延且住,謹遣押衙開府儀同 三司、試太常卿張休臧先進書兼口奏事。伏惟陛下覽臣此書,知臣誠懇,特垂聖斷, 諷 令入朝,懷恩許諾。 臣今戎事已安,糧儲且繼,深願一至闕下,披露心肝,再覩聖顔,萬死無恨。 便與同行,冀獲蹈舞軒陛。鄙臣愚盧,不顧死亡,輕觸天威,戰汗無地。 待臣 如初,浮謗不入,臣當死節王命,誓酬國恩。仍請遣一介專使至絳州問 先是,尚書右丞顏眞卿請奉詔召懷恩,上因以眞卿爲刑部尙書、兼御 副將范志誠說之日:「公以讒言交構,有功高不賞之懼,嫌隙已 臣欲 勿

進

朝恩四 並停。 臣, 惟岳等四人斬其首獻於闕 儀代之,喻以逆順 恩進不勤王 子儀到,束甲來奔,歸者數萬 不恭問官守。當是時也,懷恩來朝,以助討賊,則其辭順。今陛下攘去犬戎,卽宮京邑,懷 「懷恩阻兵,是其反 厚撫其家, 夫往宣 人耳,自外朝臣,咸言其枉。 ,退不釋衆,其辭曲,必不來矣。 一慰之。 懷恩終不從。 禍 **、側明矣。頃陛下避狄于陝** 眞卿日:「臣往請行 福,必相率而 下。 其母月餘日竟以壽終。又遙授太師、 懷恩至靈武,嘯聚亡命, 懷恩聞之,率麾下數百騎,棄其母, 歸耳。」上從之。 然懷恩將士,皆子儀部曲, 者, 時也; 且明懷恩反者,獨辛雲京、李抱玉、駱奉先、魚 郊,臣方責以春秋之義,云寡君豪塵於郊, 今方受命, 子儀至河中, 其衆復振。 事 恩信結其心, 無 僕固瑒已爲朔方 益 渡河北走靈武。 兼中書令、 上念其勳舊,不欲罪功 矣。」上問 陛下 大寧王, 其故 兵馬使張 何不以子 餘衆聞 對 敢 餘

京師 進屯雲陽,馬璘、郝廷玉屯中渭橋,董秦屯東渭橋,駱奉先、李日越屯盩厔,李抱玉屯 刺之衆自西道寇盩厔、 郭子儀拒之而退。 :遺吐蕃之衆自北道先寇醴泉、奉天,任敷、鄭庭、郝德自東道寇奉先、同州 是秋爲鄉導, 誘吐蕃 永泰元年,上徵天下兵以防之。 鳳翔。 ·十萬入寇徑、/邠州,祭來與之墓,自序云「俱遭放逐」。寇奉天、醴 朝廷大駭,詔遣郭子儀 屯涇陽, 懷恩又糾合諸蕃,衆號二 渾日進、白元光屯奉天, 十萬 **羌、渾、奴** 一,南犯

周智光、杜冕屯同州。 上親率六軍,令魚朝恩屯苑中,下詔親征

莫敢先 請擊 迴紇 法 焚 吐 進 而葬之。 懐 蕃 寇涇陽,諸軍 恩領 進 以自劾。 ,遂大掠居人,焚燒舍宇, 迴紇及朔方之衆繼進, 張韶代領其衆,爲徐璜玉所殺; 子儀分兵隨之, 堅壁不戰。 吐蕃相持二十餘日,又聞懷恩死, 行至鳴沙縣,遇疾舁歸。九月九日, 驅 大破吐蕃於涇州界。 男女數萬而去, 璜玉領其衆,又爲范志誠所殺 所 過踐禾穀殆盡。 任敷又敗走, 與迴紇爭長, 死於靈 羌、 迴紇乃詣子儀 志誠 **渾又多降於李** 武, 自 部曲以鄉 相 領 其衆。 疑貳, 降,

右所誤。」其寬仁如此。 爲之隱 懐 惡,前後下制,未嘗言其反。 恩逆命三年,再犯順,連諸蕃之衆,爲國大患,士不解甲,糧盡餽軍,適幸天亡, 閏十月,懷恩姪名臣領千餘騎來降。 及懷恩死,羣臣以聞, 上爲之憫默日:「懷恩不反,爲左 而上

皆潰歸。 沉默寡言, 梁崇義,長安人。以升斗給役於市,有膂力,能卷金舒鉤。 崇義時在南陽,統歸師徑入襄州,與同列李昭、薛南陽相讓爲長,不決。諸將請曰: 衆悅之,累遷爲偏裨。 瑱 朝京師,分使諸將戍福昌、南陽。 後爲羽林射生,從來頭於襄 來瑱 被誅,戍者

列

授其 逡巡 承嗣、 洽,故其 觀,然於羣兇,地最褊, 非 一稽召 節 李正 梁卿主之不可。」遂推崇義爲帥。 度 人知 ,及代宗嗣位,不俟駕行,旋見誅族。 己、辞嵩、 化。 以襄州 所親嘗勸其來朝 薦履 李寶臣爲輔車之勢,奄有襄、漢七州之地,帶甲二萬,連結 兵最 兵 禍 少,法令最理,禮 屈法含容,姑務息人也。 ,崇義曰:「吾本帥來公有大勳庸,當上元中以閹豎讒讟, 寶應二年三月,崇義殺昭與南陽,以脅衆心,朝 貌最恭。 今吾釁盈而 其地跨東南之衝, 歷御史中丞、大夫、尚書。 事人,若之何見上? 數有王命之所宣 根固 遂 未嘗朝 與田 廷因

舟復 告其爲 將,是以 難 **州**曹入 或 建中 如 有 荆 變,崇義 · 元年 忠言沮 襄,崇義慮 恶。 其城說利害,文喜拘之,會帳下殺文喜而降。 及舟 准 聞之,請罪昔 勸,多遭 西節度使李希烈數請興師討崇義,崇義懼,軍旅之事加嚴焉。 至,又勸其入覲,言頗切直,崇義益不悅。 「有變,拒境不納,上言「軍中疑懼,請換他使」。由是益不安,兇謀日深, 傷 害 ,坐決杖配流,命金部員外郎李舟諭旨以安之。 四方反側者聞之、謂舟必能覆軍殺 二年春,發五使宜諭諸道,而 杒, 流人郭昔 劉文喜作

悉 加 封賞 時 使持滿而受命。 羣 兇方 且賜鐵券暫之, 自 疑阻 ,朝廷將仗大信,欲來而安之,以示天下。 乃加崇義同平章事,其妻子 蘭杲奉韶書,又不敢發,馳詣崇義請命,崇義益疑懼,對著號哭,不受 兼授其裨將藺杲爲鄧州刺史, 遺御史張著齎手韶徵之。 益

屯襄、 之,使統本兵 義使將翟暉、 年八月 由是)鄧 崇義 微四方兵,使希烈統擊之。 希烈先發千餘 杜少誠 與其妻投井而死, 入襄陽號令,以安百姓。 迎戰於蠻水, 人守臨漢 傳首闕下。 希烈大破之; 復合於凍口 ,崇義屠之,無遺噍。 崇義乃發兵攻江陵,以 崇義領親兵老小閉壁,將守者斬關爭出 其親戚希烈皆戮之,選其嘗從臨漢之役者三千 旣而 通 ,又破之。 希烈統· 黔、嶺、及 大軍緣漢而 二將求降, 四望,大敗 一,不可 上 而 (国), 希烈 止 受 崇 其

人,悉斬之。

雖親 二年,以日 太僕、太常卿,主右 氏, 更名嘉慶。 戚犯法,皆不撓避。 大曆六年,兼御史中丞 李懷光,渤海靺鞨 ·母憂 韶 職 懐光少從軍 衙兵將,積功勞至開府儀同 明年 人也(至)。 ,起復本官,仍無別、 子儀性寬厚,不親軍 一, 間 ,以武藝壯 一年, 本姓苗,其先徙于幽州,父常爲朔方列將 兼御史大夫, 勇稱,朔方 寧、慶三州 事 三司,爲朔方軍 紀 節 加爲軍 綱任 度使郭子儀 都將 懐光 都虞候。 軍 都 禮之益 ·虞侯。 中尤畏之,亦稱爲理。 性清勤嚴猛 厚。 永泰初, (云)、以戰 上元中,累遷 ,而敢誅殺, 實封三百 功賜 試 姓

徳 宗 即 位 , 罷子儀 節 度副元帥,以其所部分隸諸將, 遂以 懷光起復檢校刑部尚書,兼河

列

傳

七

+

中 落六城水 涇州 中 師城 年 一威畏之。 初 尹 遷檢校 严原 長 刺 武 史、 州 運 以 涇原 四鎮 左僕射,兼 刺 處軍 使,實封 劉文喜因衆不 史、 四鎮 節度使段秀實爲宰相 上 邠 一,城據 寧慶晉絳慈隰節 北庭 四 靈州 一百戶。 原首 節度使。 欲, 大都督、單于鎭 別 寧 ,臨涇水 遂以城叛 節度 時懷 度支度營田 楊炎所惡 ,俯瞰 ⟩等使. 光 北 挾私怨, 韶 通道 大 如 朱泚 都 故 觀察押諸蕃部落等使。 徵 護、朔方節度支度營田觀察鹽池押諸蕃部 與懷光將兵討平之, 吐蕃 新誅 爲 司 農 自 殺朔方舊將温 1是不 卿。 敢 上 將 南 侵, 復城原州, 儒雅 加檢校太子少師。二 爲西邊 先 等數人, 乃以 要防 懐光 涇州 懐光 頻歲 軍 建 兼

朔方 騎 號 知 益 懐光軍 兵 實 Ш 造遺 朔 封二 兵 於 時 中 爲滔等所 方軍 、醴泉 (步騎 馬燧 使 至 百戶 馳 使也 ,令張韶號令於城上,人心乃安。 直 告河 李抱眞 萬 赴 敗。 自 、」乃以 五 奉天。 北 復爲悅 是 千 諸軍 諸 與陷 ·同計 帥 繩引 前數日 同 等相持 決水 懐光 田 討 悦。 上城 魏城 率軍 以 (灌之, 先 而 不 懷 未 光勇 入,比 遣 奔命 戰。 拔, 神將張 諸 0 明 而 朱滔、王武俊皆反, 登堞, 年 軍 時 無謀,至魏城之日,營壘未設, 不利, ·十月, 韶 屬 懷光又敗泚兵於魯店,泚乃解兵還走入城。 持表 身中 泥淖,懷光奮厲軍士, 因 數 封 涇原之卒叛, 與燧等退軍于魏縣。 7 蠟丸隨賊攻城,乘間 矢。 連兵救悅。 時上在重圍中,守拒益急,旣 上居奉天。 道自蒲津渡河 三年,詔遣懷光統 因與滔等大戰于 逾 尋加同平章事 塹,呼城上人 朱泚既) 僭大 敗 泚

見上,當請誅之。」杞等微知之,懼甚,因說上令懷光乘勝逐泚,收復京師,不可許至奉天,德 懷光性粗厲疏愎,綠道數言盧杞、趙贊、白志貞等姦佞,且曰:「天下之亂,皆此輩也,吾

宗從之。 又疏中使翟文秀,上之信任也,又殺之。懷光旣不敢進軍,遷延自疑,因謀爲亂。 崔漢衡使於吐蕃,出兵佐收京城,蕃相尙結贊曰:「蕃法,進軍以統兵大臣爲信。 今奉制書 懷光屯軍咸陽,數上表暴揚杞等罪惡,上不得已爲貶杞、趙贊、白志貞以慰安之。 初,韶遺

無懷光名署,故不敢前。」上聞之,遺翰林學士陸贄詣懷光議用蕃軍,懷光堅執言不可者三,

使鄧鳴鶴齌券喻旨。 懷光怒甚,投券於地曰:「凡人臣反,則賜鐵券,今授懷光,是使反也。」 不肯署制,詞慢,且謂贊曰:「爾何所能?」興元元年二月,詔加太尉,兼賜鐵券,遣李昇及中

詞氣益悖,衆爲之懼。

元等軍 段威勇自三原擁兵三千餘人奔歸李晟, 泚連和,車駕當須引避。」 由是上遽幸梁州。 時李晟已移軍東渭橋, 懷光復劫李建徽、楊惠 疑懼不自安,居二旬,乃驅兵分爲部隊,掠涇陽、三原、富平,自同州往河中。 神策將孟涉、 又使趣之,遊壞復奏聞。數日,懷光又使趣遊壞,爲門者所捕。 時懷光部將韓遊褒掌兵在奉天,懷光乃與遊壞書,約令爲變,遊壞密奏之。 ·,移於好時,其下頗多攜貳。 先是朱泚甚畏之,至是因欲臣之。 懷光虜劫無所得,**益** 懷光不能遏。 韓遊壞殺懷光留後張昕, 懷光且宣言曰:「吾今與朱 翌日,懷光

列

使。 順。 乃除懷 戴 休顔 光 自 奉天 太子 令於軍曰:「懷光已反。」乃令城守馳表以聞。 太保、罷其餘官, ,其所管委本軍擇一人功高望崇者統之,皆不 上於是授遊瓌、 奉詔。 休顔節度 四

月,懷光至河中,遂偷有同、絳等州,按兵觀望。

節度使 是繕兵 名俊斬懷光首以降燧,其子輝刃其弟數人,乃自殺。 既還,與瑊先自河東而降其驍將尉珪、徐庭光,統諸軍以圍河中。 屯軍 度唐朝臣 宣言於衆:「太尉軍 賜莊宅各一所,仍還懷光屍首,任其收葬,妻子並徙澧州。 不 李晟既收復京 進 馬燧威名素著,乃加燧副元帥,與瑊及鎭國軍節度駱元光、邠寧節度韓遊瓌、鄜坊節 益修守拒。 會兵 ,數爲懷光所敗。 同討懷光。 上還京 師 中誰可領軍 , 上遣給事中孔巢父、中使啖守盈持詔徵之,懷光素服受命。 巢父乃 燧率軍拔絳州,至寶鼎,盧懷光西走,唐突京邑,乃捨軍朝京師。 師, 時仍歲旱蝗,京師初復,經費不給,言事者多請赦懷光。 以侍中渾瑊爲河中節度副元帥,將兵討懷光。 事者? 」懷光左右皆胡虜,因發怒,亂持兵殺巢父及守盈, 懷光死時年五十七。 五年,又詔曰: 貞元元年秋,朔方部將牛 尋詔 城復 以男 破同州 時河 東 自

之道 ,洎乎烈祖之訓, 干紀 懹 舊 一念功, 漢后 爵其拏以弓高。 仁之大也; 興滅繼 皆以刑佐德,俾人嚮方,則斧鉞之誅,甲兵之伐,蓋不得已而用 侯君集之不率景化,我太宗存其胤以主祀。 絕 ,義之弘也。 昔蔡叔圮族,周公封其子於東土; 詳考先王

素誠所志。爾其保姓受氏,宜力承家,勉紹乃考之建國庸,無若爾父之違王命。 姓李氏,名承緒,授左衞率府胄曹參軍,承懷光之後。仍賜錢一千貫,任於懷光墓側置 是用悽軫。予欲布陳大惠,冀以化成,保合太和,期於刑措。宜以懷光外孫燕八八賜 立莊園,侍養懷光妻王氏,幷備四時享奠之禮。嗚呼!殷實不德,臨於兆人,泣辜宥罪 雖自貽伊戚,與衆棄之,而言念爾勞,何嗟及矣!以其前効猶在,孤魂無歸,懷之怳然, 至此,在法必誅,猶示綏懷,庶其牽復。而梟音益厲,狶突莫遷,大戮所加,曾無噍類。 逐虎狼之衆。議功方始,守節靡終,潛構禍胎,拒違朝命,棄同卽異,捨順効逆。爲臣 **徵師未達于諸侯,衞士且疲于七萃。而李懷光三軍夙駕,千里勤王,上假雷霆之威,下** 囊歲盜臣竊發,國步多虞, 股狩于近郊, 指期薄伐, 將振昆陽之旅, 以興涿鹿之功,

初,懷光授首,其子难、暖等皆死,唯妻王氏在,故上特捨其死。及是又思懷光舊勳,哀

其絕後,乃命承緒繼之。

辛雲京、駱奉先、盧杞、白志貞輩,致彼二逆、貽憂時君,亦可謂國之讒賊矣。 史臣曰:僕固懷恩、李懷光,咸以勇力,有勞王家,爲臣不終,遂行反噬,其罪大矣。 列 傳 第七 + 李 濅 光 校 勘 62 梁崇義旣無令

始,又無善終,與妻投泉,何塞其咎。

贊曰:臣之事君,有死無二。懷恩、懷光,凶終一致。 崇義多姦,國家所棄。

自速其斃。

校勘記

(二) 僕骨歌濫拔延之曾孫 按下文云,「拔延生乙李啜拔,乙李啜拔生懷恩」,則懷恩是拔延之孫,此

句「曾」字疑衍。

3 澧水 各本原作「汝水」,按西京一帶無汝水,今據本書卷一九五迴紇傳改。 據通鑑卷二二二,當作「河南等道副元帥李光弼自陳留入,雍王留陝

(三) 河南副元帥雍王留陝州

州」。本卷上文即云雅王爲天下兵馬元帥,此處「河南副元帥」,當是李光弼,史文誤脫

(1) 緣漢而上 「上」字各本原無,據新書卷二二四上梁崇義傳、通鑑卷二二七補

(E) 靺鞨 各本原作「靺鞨」,據本書卷一九九下靺鞨傳、新書卷二二四上李懷光傳改。

(*) 父常爲朔方列將 「父」字各本原無,據新書卷二二四上李懷光傳補。

舊唐書卷一百二十二

列傳第七十二

張獻誠 楊朝晟 弟獻恭 樊澤 獻甫 李叔明 獻恭子煦 装胄 路嗣恭 子恕 曲環 崔漢衡

豫山 賜甚厚。三遷檢校工部尙書,兼梁州刺史,充山南 帥高玉以獻。永泰二年正月,獻名馬二、絲絹雜貨共十萬匹。 歸汴州, 祭使,封鄧國公。 年四月,獻誠以疾上表乞歸私第,仍薦堂弟試太常卿兼右羽林將軍獻恭以自代。詔許之, ,受偽官;連陷史思明,爲思明守汴州,統逆兵數萬。 張獻誠,陝州平陸人,幽州節度使、幽州大都督府長史守珪之子也。 獻誠不納,舉州及所統兵歸國,詔拜汴州刺史,充汴州節度使。 西川崔旰殺郭英乂,獻誠率衆戰於梓州,爲旰所敗,獻誠 西道觀察使。 寶應 是月, 元年冬, 廣德二年十月,擒南山賊 兼充劍南東川 東都平, 踰年來朝, 天寶末,陷逆賊安 僅以 身免。 史朝義逃 代宗寵 節度觀

以獻誠檢校戶部尚書,知省事。 八月,獻誠以疾抗疏辭官,無幾,卒於私第。

御史中丞,充山南西道節度觀察使。大曆十二年七月,獻恭破吐蕃萬餘衆於 興元元年六月,轉檢校吏部尙書,仍與一子正員官。 四年七月,與渾瑊、盧杞、司農卿段秀實與吐蕃尙結贊築壇於京城之西會盟,如淸水之儀。 年正月,加檢校兵部尙書,爲東都留守。三年正月,爲太府卿、容州刺史、本管經略招討使。 獻恭,守珪之弟守瑜子。累以軍功官至試太常卿,兼右羽林將軍,代獻誠爲梁州 岷州。 刺史、兼 建中二

何! 謂宰臣李勉等曰:「殷欲授杞一 煩聖聽,不敢縷陳其事。」德宗不悟,獻恭復奏曰:「袁高是陛下一良臣,望特優異。」德宗顧 」獻恭守正不撓也如此。 盧杞移饒州刺史,給事中袁高論其不可。獻恭因入對紫宸殿,上言:「高所奏至當,臣恐 小州刺史可乎?」 對曰:「陛下授大州亦可, 其奈士庶失望

初,從節度使買耽征梁崇義於襄、漢,以功加太子詹事。 功累授試光祿卿、殿中監、河中節度副元帥都知兵馬使,檢校兵部尚書、兼御史大夫。 獻甫 ,守珪弟左武衞將軍、贈戶部尚書守琦之子。 獻甫少隨諸兄從軍,初爲偏裨 及幸奉天、興元、獻甫首至,從渾瑊 建中

衆禦之,斬首百餘級,吐蕃遁邊城。貞元十二年,加檢校左僕射。 各置兵防以備蕃寇,朝廷從之。貞元四年九月,吐蕃將尚志董星、論莽羅等寇寧州,獻甫率 於彭原置義倉,方渠、馬嶺等縣選險要之地以爲烽堡。又上疏請復鹽州及洪門、洛原等鎮, 陽,凡累年,軍民悅之。貞元四年,遷檢校刑部尚書,兼邠州刺史、邠寧慶節度觀察使。乃 征討有功,及復京邑,入爲金吾將軍。 時李懷光未平,吐蕃侵擾西邊,獻甫領禁軍出鎭咸 五月丙申卒, 年六十一,

廢朝三日,贈司空,賻物有差。

试,誅作亂蘇國珍等二百五十三人乃定。 是歲十二月卒,贈太子太保。 節度使李進賢而屠其家,殺判官嚴澈。憲宗怒,遺煦以夏州兵二千人赴振武,仍許以便宜擊 九年正月,賜絹三萬匹以助軍資。 獻恭子煦,嘗隨獻甫征討,積戰功累遷至夏州節度使。 河東節度使王鍔遣兵五千會煦於善羊棚,韶煦入振 元和八年十二月,振武軍逐出

最,以其能, 賜名嗣恭。 路嗣恭,京兆三原人。 歷工部尙書、兼御史大夫、靈州大都督府長史,充關內副元帥郭子 始名劍客,歷仕郡縣,有能名,累至神烏令,考績上上,爲天下

列傳第

兵,倔強不受制,嗣恭稱疾召至,因殺之,威信大行。 永泰三年(1),檢校刑部尚書,知省事 儀 劉希暹,魚朝恩誅,希暹從坐,明觀積惡犯衆怒。時宰相元載受賂,遣江南効力,魏少遊承 大曆六年七月,爲江南西道都團練觀察使,在官恭恪,善理財賦。 副 使,知朔方節度營田押諸蕃部落等使,嗣恭披荆棘以守之。大將御史中丞孫守亮握重 賈明觀者,事北軍都虞侯

人口,以撓其心腹。二人皆有全策詭計,出其不意,遂斬晃及誅其同惡萬餘人,築爲京觀, 嗣 俚洞之宿惡者皆族誅之,五嶺削平。拜檢校兵部尚書,知省事 恭擢流人孟瑶、敬冕,使分其務:瑤主大軍,當其衝;冕自間道輕入,招集義勇,得八千 大曆八年,嶺南將哥舒晃殺節度使呂崇賁反,五嶺騷擾,詔加嗣恭兼嶺南節度觀察使。

載意荷容之。及嗣恭代少遊,即日杖殺,識者稱之。

都留守。 面功,止轉檢校兵部尙書,無所酬勞。及德宗卽位,楊炎受其貨,始敍前功,除兵部 嗣恭前後沒其家財寶數百萬貫,盡入私室,不以貢獻。 嗣恭起於郡縣吏,以至大官,皆以恭恪爲理著稱。及平廣州,商舶之徒, 尋加懷鄭汝陝四州、河陽三城節度及東都畿觀察使。 代宗心甚銜之,故嗣恭雖有平方 徵至京師卒, 時年七十一, 多因晃事誅 尚書、東

廢朝一日,贈左僕射。

都督。 遊,高歌縱酒,不屑外慮,未嘗問家事,人亦以和易稱之。 前便 察使、太子詹事。坐事貶吉州刺史,遷太子賓客。以右散騎常侍致仕卒,年七十三, 懐州 刺史。 宜從事。 子恕,字體仁。初,嶺南衙將哥舒晃反,韶嗣恭自江西致討,授檢校工部員外 恕私第有佳林園,自貞元初李紓、包佶輩迄于元和末,僅四十年, 久之,轉京兆少尹、監門衞大將軍、兼御史中丞、教練招討等使。 俄而降者繼路,於是擢降將伊愼,推心用之。 賊平,恕功居多,年纔三十, 朝之名卿, 其後爲鄜坊 鄓 贈洪州 **咸從之** 得以軍 爲 觀

道率。 別將。 部兵合諸軍同討史朝義,平河北,累轉金吾大將軍,並同正員,隨李抱玉移軍京西。大曆中, 兵書,尤以勇敢騎射聞。天寶中,從哥舒翰攻拔石堡城,收黃河九曲、 領兵隴州 曲環,陝州安邑人也。父彬、爲南使正監,因家於隴右 安祿山反,從襄陽節度魯炅守鄧州,拒賊將武令珣,戰數 又從李抱玉守河陽南城,尋將兵守澤州,破賊驍將安曉, ,頻破吐蕃,加特進、太常卿。 ,以環故累贈兵部尙書。 一合, 敕特拜羽林將軍 環功居 洪濟等城 多 累授果毅 超授左清 環少讀 又將別

上初嗣位,吐蕃大寇劍南,詔環以邠、隴兵五千馳往, 列 僔 第七 + = 曲 鈕 崔 漢 衡 大破戎虜, 收七盤城、威武軍及 三五〇一

侍,充邠、隴行營節度使。 唐,平之,加開府儀同三司、兼御史中丞,充)邠、隴 維、茂二州,西戎奔遁。 令環與劉玄佐同救援,累破李納叛黨,環以功最,加御史大夫。 環大振功名而還,加太子賓客,賜以名馬。 兩軍都知兵馬使。 建中三年十月,加檢校左常 與諸將討涇州 時李納擁兵侵逼徐州 **扳將劉文**

訓農理戎,兵食皆豐羨。 甚,人多逃竄他邑以避禍。 帛米粟有差。 加環兼許州刺史、陳許等州節度觀察,加實封三百戶。陳、蔡二州以希烈擾亂, 人,擒其驍將翟暉以獻,希烈因遁歸蔡州。 李希烈侵陷汴州,環與諸軍守固寧陵、陳州,大破希烈軍於陳州城下,殺逆黨三萬五千 十二年,加檢校左僕射。 環勤身恭儉,賦稅均平,政令寬簡,不三二歲,襁負而 環以功加檢校工部尚書,兼陳州 卒時年七十四, 廢朝一日 刺史。 贈司空,賻布 歸者相屬 遭剽劫頗 希烈平,

中,改萬年令。 奏署掌記,累遷殿中侍御 **崔漢衡**,博陵 建中三年,爲殿中少監、兼御史大夫,充和蕃使,與吐蕃使區頗贊至自蕃中。 人也。 性沉厚寬博,善與 史。 大曆六年,拜檢校禮部員外 人交。 釋褐,授沂州費令。 鄓 ,爲和吐蕃 副使; 滑州節度使令狐彰 還,遷右司郎

略,因言於贊普,請定界明約以息邊人,贊普然之,竟以結贊代結息爲大相,約和好,期以十 時吐蕃大相尙結息忍而好殺,以常覆敗於劍南,思刷其恥,不肯約和。其次相尙結贊有材 **倘書、晉慈隰觀察使,尋加都防禦使。 十一年四月卒。** 結贊素信重,與孟日華、中官劉延邕俱至石門,而遣五騎送至境上。四年七月,加檢校吏部 使,所至皆稱職。貞元三年,副侍中渾瑊與吐蕃會盟於平凉,吐蕃背約,瑊僅免,時無備預 監、西京留守。無幾,眞拜兵部尙書,爲東都、淄青、魏博賑給宜慰使。 月十五日會盟於境上。戊申,以漢衡爲鴻臚卿。四年,吐蕃朝貢,加檢校工部尙書,復使吐 在會免者什無一二,士卒死者以千數。漢衡與同陷者並至河州,結贊令召之,以頻使於蕃, 興元初,上居奉天,吐蕃遺帥佐渾瑊敗朱泚兵於武功,以功轉檢校兵部尚書、兼祕書 明年,爲幽州宣慰

初,從李懷光討劉文喜于涇州,斬獲生擒居多,授驃騎大將軍,稍爲右先鋒兵馬使。 楊朝晟字叔明,夏州朔方人也。 ,從唐朝臣征討,嘗冠軍鋒,以功授開府儀同三司、檢校太子賓客。 初在朔方爲步軍先鋒,嘗有功,授甘泉府果毅。 後李納 建中

|在奉天,李懷光自山東赴難,以朝晟爲左廂兵馬使,將千餘人下||咸陽以挫朱泚,加御

列

都虞候。時父子同軍,皆爲開府賓客、御史中丞,榮於軍中〔三〕。 遊壞營于長春宮,懷賓身當戰伐。及懷光平,上念其忠,俾副元帥渾瑊特原朝晟,遂爲遊壞 事,泣告懷光曰:「父立功於國,子合誅戮,不可主兵矣。」懷光遂繫之。 使懷賓奉表聞奏,上召勞問,授兼御史中丞,正除遊瓌邪寧節度使。 徵卒乘,約明潛發,歸于懷光。 史中丞,實封一百五 懷光以嘗在哪、寧,迫制如屬城,以賊黨張昕在哪州 一十月。 及懷光反於河中,朝晟被脅在軍。 朝晟父懷賓爲遊瓌將,因夜以數十騎斬昕及同謀,遊壞 總後務。 上幸梁、洋, **听懼難作**, 間諜至 及諸 軍進 河中 韓遊瓌退於邪 乃大索軍資 ,朝晟聞其 圍河中, 卽 B

闕。 衆中唱二百餘人,斬之乃定。 獲,張尙書昨日已入邠州 賀也。」 出奔將范希朝爲節度。 察使,代韓遊瓌。 其將卒素驕怠,畏張獻甫之嚴,因遊壞夜出,衙內千餘人遂叛掠,且因監軍楊明義 後詔徵遊壞宿衞,以左金吾將軍張獻甫爲檢校刑部尙書、兼御史大夫、邠寧慶節度 由是稍安。 初,遊壞以吐蕃犯塞,自將兵戍寧州,及受代,以是月壬子夜輕騎 朝晟及諸將謀誅首惡者,乙卯, 朝晟時爲都虞候,初逃於郊,翌日乃來,紿其衆曰:「所請甚愜,我來 ,汝等皆當死,吾不能盡殺 上擢希朝爲寧州刺史, ,各言戎首以歸罪焉, 朝晟率諸將經數日以告曰:「前請者不 以副獻甫。 獻甫入奏朝晟功, 餘無所問。」 潛 加 於是 邀 遁 觀 歸

大夫。

傳第七十二 樊 澤 李 叔 眀

丞,充通和蕃使,蕃中用事宰相尙結贊深禮之。尋從鳳翔節度張鎰與吐蕃會盟於淸水,遷 河朔,相衞節度薛嵩奏爲磁州司倉、堯山縣令。建中元年,舉賢良對策,禮部侍郎于邵厚遇 金部郎中、御史中丞、山南節度行軍司馬。時李希烈背叛,詔以普王爲行軍元帥,徵澤爲諫 與楊炎善,薦爲補闕,歷都官員外郎。澤好讀兵書,朝廷以其有將帥材,尋兼御史中 樊澤字安時,河中人也。 父詠,開元中舉草澤,授試大理評事,累贈兵部尚書。 澤長於 下,視其跡,水隨而流。朝晟令築防環之,遂爲停泉,軍人仰飮以足,圖其事上聞,詔置祠焉。

十五年二月,免喪,加檢校工部尙書。是夏,以防秋移軍寧州,遘疾,來年正月卒。

未三旬而功畢。」蕃人始乘障,數日而退。初,軍次方渠,無水,師徒囂然,遽有青蛇乘高而

今臣境迫虜,若大興兵,即蕃戎來寇,寇則戰,戰則無暇城矣。今請密發軍士,不十日至塞下,

助。」復問:「前樂鹽州,凡興師七萬,今何其易也?」朝晟曰:「鹽州之役,諸軍藩戎盡知之。

皆賊路也,請城其地以備之。」詔問:「所須幾何?」 | 朝晟奏曰:「臣部下兵自可集事,不煩外

母憂,起復左金吾大將軍同正、邠州刺史,大夫如故。十年春,朝晟奏:「方渠、合道、木波,

,城<u>鹽州,徵兵以護外境,</u>朝晟分統士馬鎭木波。<u>獻甫卒,韶以朝晟代之。其年,</u>

九年

議大夫、元帥行軍右司馬。屬駕幸奉天,普王不行,澤改右庶子、兼中丞,復爲山南東道行 軍司馬。尋代賈耽爲襄州刺史、兼御史大夫、山南東道節度觀察等使。

襄、漢,復代曹王阜爲襄州刺史、山南東道節度使。十二年,加檢校右僕射。 司空,賻布帛米栗有差。其日將宴百官,廢朝改取他日。 大夫。三歲,加檢校禮部尚書,會襄州節度曹王阜卒於鎮,軍中剽劫擾亂,以澤威惠素著於 憂,起復右衞大將軍同正,餘如故。三年,代張伯儀爲荆南節度觀察等使、江陵尹、兼御史 後擒降其驍將張嘉瑜、杜文朝、梁俊之、李克誠、薛翼等,收唐、隨二州。 澤有武藝,每與諸將射獵,常出其右,人心服之,賊衆畏焉。頻與李希烈兇黨接戰, 希烈旣平,澤丁母 卒年五十,贈

尹,無幾,以疾辭,除右庶子,出爲邛州刺史。尋拜東川節度、遂州刺史,後移鎭梓州,檢校 唐子壻,豈可恃微功而傲乎 郎,副漢中王|瑀使|迴紇,迴紇接禮稍倨,|叔明離位責之曰:「大國通好,賢王奉使,可汗於|大 節度使。兄弟並涉學,輕財好施。 李叔明字晉卿,閬州新政人。 ,!唐法不然。」可汗改容加敬。 本姓鮮于氏,代爲豪族。兄仲通,天寶末爲京兆尹、劍南 叔明,初爲劍南節度使楊國忠判官。乾元後爲司勳員外 復命,遷司門郞中。 後爲京兆少

戶部尙書。時東川兵荒之後,凋殘頗甚,叔明理之近二十年,招撫甿庶,夷落獲安。

訓,果著勳効,識者嘉之。 叔明旣朝京師,以本官兼右僕射,乞骸骨,改太子太傅致仕,卒, 焉。 氏子於法。及駕幸奉天,其子昇翊從。叔明每私疏誡勵,見危臨難,當誓以死。昇奉父嚴 叔明初不知其從外氏姓,意醜其事,遂抗表乞賜宗姓。 大曆末,有閬州嚴氏子上疏稱「叔明少孤,養子於外族(11),遂冒姓焉,請復之」, 叔明總戎年深,積聚財貨,子孫驕淫,歿纔數年,遺業蕩盡。 、代宗以戎鎭寄重,許之,仍置嚴 韶從

息。 得意,歸免。陳少遊爲宣歙觀察,復辟在幕府,抱玉怒,奏貶桐廬尉。 | 青明經及第,解褐補太僕寺主簿。屬二京陷覆,淪避他州。 賊平,授祕書省正字,累轉祕書 陳少遊陳鄭節度留後,奏胄試大理司直。少遊罷,隴右節度李抱玉奏授監察御史,不 裴胄字胤叔,其先河東聞喜人,今代葬河南。伯父寬,戶部尚書,有名於開元、天寶間

使。 常異席,事多咨之;崔造輩皆所薦引,一見胄,深重之,薦於栖筠,奏授大理評事、觀察支度 代宗以元載隳紊朝綱,徵栖筠入朝,內制授御史大夫,方將大用,蔵怙權,栖筠居顧問 浙西觀察使李栖筠有重望,虛心下士,幕府盛選才彥。觀察判官許鴻謙有學識, 栖筠

列

刺 南節度陳少遊奏檢校主客員外、兼侍御史、觀察判官。尋爲行軍司馬,遷宜州 與不平。 及栖筠卒,胄護栖筠喪歸洛陽,衆論危之,胄坦然行心, 刺 無所顧望。

者,炎命酷吏員寓 **其資糧,分爲月進,胄至,奏其本末,罷之。** 國子司業。遷湖南觀察都團練使,移江南 上首命胄代澤,仍兼御史大夫。 楊炎初作相, 深按其事,貶汀州司馬。 銳意爲元載報讎, 凡其枝黨無漏。 西道。 **尋徵爲少府少監,除京兆少尹** 會荆南節度獎澤移鎭襄陽至,宰相方議其人, 前江西觀察使李兼罷省南昌軍千餘 適會胄部人積胄官時服雜俸錢爲 ′,以父名不 拜, 換

以禮,物議薄之。」貞元十九年十月卒,時年七十五,贈右僕射,諡曰成。 時武臣多廝養畜賓介,微失則奏流死,胄以 竭公藏以買其歡。 ·儉恆一,時諸道節度觀察使競剝下厚斂,製奇錦異綾,以進奉爲名。 **胄待之有節,皆不盈數金,常賦之外無橫斂,宴勞禮止三爵,未嘗酣樂。**)書生始,奏貶書記梁易從,君子薄其進退賓客不 又貴人宣命,必

政。 漢衡誠慇奉職。 史臣曰:三獻軍謀臣節,克紹家 朝晟忠孝權謀。 風 澤威惠荆、襄。 路嗣恭從微至著,執法簡廉。 叔明見危誓死,立政惠民。 環 理 兵勸 農、獨 || 抱義危 彰善

行、守政奉公。 皆賢帥矣。 然嗣恭聚財,爲功名之瑕玷;叔明聚財,致子孫之驕淫。 財之

汚人,誠可誠也。

贊曰:張、路、曲、崖、樊、楊、李、裴,守忠臣之道,皆賢帥之才。

校勘記

(1) 永泰三年 新書卷一三八路嗣恭傳同,而永泰無三年,合鈔卷一七三路嗣恭傳作「大曆三年」。

(三) 得八千人 「千」字各本原作「十」,據冊府卷四二二、新書卷一三八路嗣恭傳改。

) 榮於軍· $\dot{\mathbf{H}}$ 「榮」字各本原作「營」,據本書卷一四四楊朝晟傳改。

養子於外族 新書卷一四七李叔明傳作「養外家」, 校勘記卷四四謂「子」字係衍文。

(H) 荆南節度 「荆」字各本原作「京」,據本書同卷獎澤傳改。

舊唐書卷 一百二十三

列傳第七十三

劉晏 第五琦 班宏 王紹 李巽

子賓客。 論號爲稱職。無何,爲酷吏敬羽所構,貶通州刺史。復入爲京兆尹、戶部侍郎,判度支。 殿中侍御史,遷度支郎中、杭隴華三州刺史,尋遷河南尹。時史朝義盜據東都,寄理長水。 部尙書、平章事,領度支鹽鐵轉運租庸使。 顏眞卿以文學正直出爲利州刺史,晏舉眞卿自代爲戶部,乃加國子祭酒。 入爲京兆尹,頃之,加戶部侍郎、兼御史中丞,判度支,委府事於司錄張羣、杜亞,綜大體,議 劉晏字士安,曹州南華人。年七歲,舉神童,授秘書省正字。 尋授御史大夫,領東都、河南、江淮、山南等道轉運租庸鹽鐵使如故。 坐與中官程元振交通,元振得罪,晏罷相,爲太 累授夏縣令,有能名。 寶應二年,遷吏 時 歷

時新承兵戈之後,中外艱食,京師米價斗至一千,官廚無兼時之積,禁軍乏食,畿縣百 列 傳 第 七 + Ξ 劉 晏 三五二

姓 [乃挼穗以供之。|晏受命後,以轉運爲己任,凡所經歷,必究利病之由。 至江淮,以書遺元

献日

緣兵糧。漕引瀟、湘、洞庭,萬里幾日,淪波掛席,西指長安。三秦之人,待此而飽;六 |滎郊、|凌澤,遙瞻||准甸,步步探討,知昔人用心,則潭、|衡、||桂陽必多積穀,關輔汲汲,只 宇文愷置梁公堰,分黃河水入通濟渠;大夫李傑新堤故事,飾像河廟,凛然如生。 弘羊重興功利,敢不悉力以答所知。 驅馬陝郊,見三門渠津遺迹。 到河陰、鞏、洛,見 安社稷之奇策也。晏賓于東朝,猶有官謗,相公終始故舊,不信流言,賈誼復召宣室 率醫愚懦,當憑經義,請護河隄,冥勤在官□,不辭水死。 流離者於茲請命。相公匡戴明主,爲富人侯,此今之切務,不可失也。 軍之衆,待此而強。天子無側席之憂,都人見泛舟之役;四方旅拒者可以破膽,三河 浮于准、泗,達于汴,入于河,西循底柱、硖石、少華,楚帆越客,直抵建章、長樂,此 使僕湔洗瑕穢

毀,百無一存。 稅畝傷多,若使江、湖米來每年三二十萬,卽頓減徭賦, 之倉以食躍、洛,是計之得者,其利二也。 然運之利病,各有四五焉。 若米運流通,則飢人皆附,村落邑廛,從此滋多。 受命之日 [三] 晏自尹京入爲計相, 共五年矣。 諸將有在邊者,諸戎有侵敗王略者,或聞曰 歌舞皇澤,其利一也。 京師三輔百姓,唯苦 引海陵 東都殘

也。自古帝王之盛,皆云書同文,車同軌,日月所照,莫不率俾。今舟車旣通,商賈往 江、五湖,貢輸紅粒,雲帆桂楫,輸納帝鄉,軍志曰:「先聲後實,可以豐耀夷夏。」其利三 來,百貨雜集,航海梯山,聖神輝光,漸近貞觀、永徽之盛,其利四也。

半菽,又云無挾纊,輓漕所至,船到便留,卽非單車使折簡書所能制矣,其病四也。 毀澱,故每年正月發近縣丁男,塞長茭,決沮淤,清明桃花已後,遠水自然安流,陽侯、 縣更空拳。奪攘姦宄,窟穴囊橐。夾河爲藪,豺狼狺狺,舟行所經,寇亦能往,其病三也。 | 这妃,不復太息。 頃因寇難,總不掏拓,澤滅水,岸石崩,役夫需於沙,津吏旋於濘,千 亦不易求。今於無人之境,興此勞人之運,固難就矣,其病一也。河、汴有初,不修則 餘而已。居無尺椽,人無烟爨,蕭條悽慘,獸遊鬼哭。牛必羸角,興必說輹,棧車輓漕, 小子畢其慮奔走之,惟中書群其利病裁成之。 東自准陰,西臨滯坂,亙三千里,屯戍相望。中軍皆鼎司元侯,賤卒儀同靑紫,每云食 <u>里</u>洄上,罔水舟行,其病二也。 <u>康垣、底柱,澠池、二陵,北河運處五六百里,戍卒久絕,</u> 所可疑者,函、陝凋殘,東周尤甚。過宜陽、熊耳,至武牢、成阜,五百里中,編戶千

獨百身。 見一水不通,頗荷鍾而先往; 見一粒不運, 願負米而先趨。 焦心苦形, 期報 晏累年已來,事缺名毀,聖慈含育,特賜生全。 月餘家居,遽即臨遺,恩榮感切,思

七十

劉

明主、丹誠未克、漕引多虞、屏管中流、掩泣獻狀

自此每歲運米數十萬石以濟關中。

曹視事 遺利。 千二百萬貫, 又至德初,爲國用不足,令第五琦於諸道権鹽以助軍用,及晏代其任,法益精密, 初,歲入錢六十萬貫,季年所入逾十倍,而人無厭苦。 敕尙食增置儲供, 而鹽利且過半。 許內侍魚朝恩及宰臣已下常朝官咸詣省送上。八年, 累遷吏部尙書。大曆四年六月,與右僕射裴遵慶同 大曆末,通計 一歲征 一賦所 知三銓 赴本 官無 入總

等覆奏,代宗乃減縉罪從輕。縉之生,晏平反之力也。 國之常典,況誅大臣,得不覆奏?又法有首從,二人同刑,亦宜重取進止。」涵等從命。 官共事。敕御史大夫李涵、右散騎常侍蕭昕、兵部侍郎袁傪、禮部侍郎常衮、諫議大夫杜亞 同推,載皆款伏。初,晏承旨,門下侍郎、同平章事王縉亦處極法,晏謂涵等曰:「重刑再覆, 十二年三月,誅宰臣元載,晏奉韶訊鞫。 晏以載居任樹黨,布于天下,不敢專斷, 及晏 請他

內實去其權。 蓄,職舉功深,慮公望日崇,上心有屬,竊忌之,乃奏晏朝廷舊德,宜爲百吏師長,外示崇重, 十三年十二月,爲尙書左僕射。 及奏上,以晏使務方理,代其任者難其人,使務、知三銓並如故。 時宰臣常衮專政,以晏久掌銓衡,時議平允,兼 李靈曜之亂 司儲

不四 知 故吏。 或以 凡 仍 之官,或封 也 所 舊 事 河 任 親 議 五 必一時之選,故晏沒後二十餘年, 南 有 使 其部吏居數千里之外, 戚 H 미 節 者 多收 爲託,晏亦應之,俸給之多少,命官之遲速, 知 賀者,必先上章奏。 稱 帥所據,多不奉法令,征賦亦隨之;州縣雖益減,晏以羨餘相補,人不加 山 故 斷道 其 後 食貨 能 進 ,禁前發者,晏厚以財力致之,常先 有 自 之重輕,盡權在掌握 幹能 諸道巡院 者。 奉教令如 江淮茶、橘, 其所) 距京 總領 師 在目 ,重價募疾足,置 韓洄、元秀、裴腆、包佶、 ,務乎急促, 朝廷獲美利 晏與本道觀察使各歲貢之, 前, 雖寢興宴語, 他 必如 趨 M 司, 利 遞相望, 天下無 其志 由 者化之, 遂以 而 是甚不爲藩鎮 無欺給 盧徵、李衡繼掌 甚貴甚賤之憂, 然未 四方物價之上 嘗得親職 皆欲其先至。 匹 成 方 風。 所 動 便。 事。 下, 靜 財 當 得 賦 其 時權勢, 賦,所入 莫不 雖 其所領 術矣。 皆晏 極遠 有

未嘗檢 然多任 任 晏 事 理 一家以 + 數,挾權貴,固恩澤,有口者必利啗之。 餘 儉 年 ·,權勢之重 約稱,而 重 一,鄰於宰相 交敦舊, 頗以 ,要官重職 財貨遺天下名士 頻 當大曆時,事 出其門。 故 人多稱之。 旣 貴 有材 因 循,軍國之用, 力,視 善訓 事 敏速 諸子 7,威有7 乘 皆仰於 欆 無

不 相 得。 德宗 嗣位 炎 坐 一言事 元載貶, 者稱轉運可罷多矣。 晏快之,昌言於朝。及炎入相,追怒前事 初,楊炎爲 吏部侍郎,晏爲尙書,各恃權 ,且以 晏與元 載隙憾 使氣, 兩

列

僔

劉晏 與站 朱泚 罪當 州 以忠州謀 忠州 載之得罪 年,上悟,方錄|晏子|執經,授太常博士;少子|案經,祕書郎。 啓請立 刺史。 書祈救 萬死。」崔祐 刺 甫 黎幹之輩 獨孤爲 史。 救解之,寧言頗切,炎大怒,故斥寧令出鎭鄜坊以摧挫之。 叛 ,晏有力焉。 解, 炎欲誣構其罪, ,下詔暴言其罪,時年大十六,天下冤之。 皇后。 ,搖動社稷,凶謀果矣。今幹以伏罪,晏猶領權,臣爲宰相,不能正持此 言多怨望,炎又證成其事 甫 奏言:「此事曖昧,陛下以廓然大赦,不當究尋虛語。」朱泚、崔寧又從傍 炎因 炎將為載復讎,又時人風言代宗龍獨孤妃而又愛其子韓王迥, 對數流涕奏言:「賴祖宗福 知庾準與晏素有隙,舉爲 ,上以爲然。 站 家屬徙嶺麦,連累者數十人。貞元 荆南節度,以伺晏動靜。 是月 ,先皇與陛下不爲賊臣所間。 庚午,晏已受誅,使迴奏報,誣晏 執經上請削官贈父, 特追贈鄭 **遂罷晏轉運等使,尋貶爲** 準乃奏晏與 不然, 晏密

海郡太守,奏琦爲錄事參軍。 天寶 初 第 事章堅 五 琦,京兆長安人。少孤,專兄華,敬順過人。及長,有吏才,以富國強兵之術自任。 一、堅敗貶官。 累至須江丞,時太守賀蘭進明甚重之。 祿山巳陷河間、信都等五郡,進明未有戰功,玄宗大怒,遣中 會安祿山反,進明遷北

玄宗 之強 其 促辨 敢 士 封刀促之,曰:「收地不得,即斬進明之首。」進明惶懼,莫知所出,琦乃勸令厚以財帛募勇 大喜 弱 百姓 頟 應卒,事無違闕。 出奇力戰 官置吏出糶。其舊業戶丼浮人願爲業者〔三〕,免其雜徭, 在 河 除 南等道支度都勾當轉運租庸鹽鐵鑄錢、司農太府出納、山南東西江西淮南館驛等 即即 賦 ,, 賦之所出,, 工准居多。 若假臣職任,使濟軍須,臣能使賞給之資,不勞聖盧。 **」** 租庸外,無得橫賦,人不益稅而上用以饒。 日拜監察御史,勾當江淮租庸使。 了。 、 途收所陷之郡。 遷司金郎中、兼御史中丞,使如故。於是創立鹽法,就山海井竈收榷 令琦奏事,至蜀中,琦得謁見,奏言:「方今之急在兵,兵 **專拜殿中侍御史。尋加山南等五道度支使,** 遷戶部侍郎、兼御史中丞,專判度 隸鹽鐵使, 盜煑私 市罪有

日聞。 並行。 以爲此是琦伏罪也,遽奏之,請除名,配流夷州,馳驛發遣,仍差綱領送至彼。 琦對曰:「二百兩金十三斤重、忝爲宰相、不可自持。 乾元二年,以本官加同中書門下平章事。初,琦以國用未足,幣重貨輕,乃請鑄乾元重 ,以一當十行用之。及作相,又請更鑄重輪乾元錢,一當五十,與乾元錢及開元通 乾元二年十月,貶忠州長史,既在道,有告琦受人黃金二百兩者,遣御史劉期光追按 旣而穀價騰貴,餓殣死亡,枕藉道路,又盜鑄爭起,中外皆以琦變法之弊, 若其付受有憑,卽請準法科罪。」 封奏 寶錢

使(日)。

度支。 專判度支,兼諸道鑄錢鹽鐵轉運常平等使。累封扶風郡公。又加京兆尹,改戶 太子賓客、東都留司。 副 元帥郭子儀請琦爲糧料使、兼御史大夫,充關內元帥副使。 寶應初, 前後領財賦十餘年。 起爲朗州刺史,甚有能政,入遷太子賓客。 上以其材,將復任用,召還京師,信宿而卒,年七十,贈太子少保。 魚朝恩伏誅,琦坐與款狎,出爲處州 屬吐蕃寇陷京師,代宗幸陝, 未幾,改京兆 刺史、歷饒、湖二州。 尹。 部侍郎,判 車駕克復、 入爲

子》, 學婦鄭氏女, 皆以孝著, 旌表其門。

山有妖賊張安居以左道惑衆,事覺,多誣引大將, 曹,後爲薛景先鳳翔掌書記,又爲高適劍南觀察判 班宏,衞州汲人也。 祖思簡,春官員外郎。父景倩,秘書監。宏少舉進士,授右司禦胄 冀以緩死,宏驗理而速殺之,人心乃安。 官,累拜大理司直,攝監察御史。 時青城

旣而 郭英乂代適,以厭人望,奏署秘書與,兼維令,以疾免。

使。 求位,上遣宏使成德問疾,且喩之。 時右僕射崔寧考兵部侍郎劉迺上下,宏駁曰:「夷荒靖難,專在節制,尺籍伍符,不校省 大曆三年,遷起居舍人,尋兼理 惟岳 匭使,四遷至 厚路宏,皆不受,還報合旨,遷刑部侍郎,兼京官考 給事中。 時李寶臣卒於其位,子惟岳匿

司。 迺 雖不敏,敢掠 夫上行宣美之名,則下開趨競之路;上行阿容,下必朋黨。」因削去之。 迺知而謝曰: 一美以徼二罪乎?」尋除 吏部侍郎,爲吐蕃會盟使李揆之副。

來,一 剛愎 且日: 聞 旣 每 事 奉韶營建,宏必極壯麗,親程課役,又厚結權倖以傾參。 不理,且以賄聞,含欲代之,宏執不可。 參初爲大理司直,宏已爲刑部侍郎,及參爲相,領度支,上以宏久司國計,因令副之。 貞元初,仍歲旱蝗,上以賦調爲急,改戶部侍郎,爲度支使韓滉之副。 ,爲人間之,且怒食言,公事多異。 朝居尚書之上,甚不自安,一年之後,當歸此使。」宏心喜。歲餘,緣絕不復言。宏性 輒 「殷藉多宰相以臨遠,衆務悉委於卿,勿以辭也。」多以宏先貴,常私解悅之曰:「參後 留中。 無何,參以使勞加吏部尙書,而宏進封蕭國公,怨參以虛號寵之,間惡愈甚。 揚子院,鹽鐵轉運委藏也,宏以御史中丞徐粲主之, 參又選諸院吏,未嘗訪宏,乃疏**參**所用者過惡以 遷尙書,復副竇

使 准 分 慮 鹽 兩 以 ,遂以宏專判,而參不欲使務悉歸於宏,問計京兆尹薛珏,珏曰:「二子交惡,而牓剛決,若 法細 · 稅,悉宏主之,置巡院,然令宏、跨共擇其官。 鐵 張滂先善於宏,宏薦爲司農少卿,及參欲以滂分掌江淮鹽鐵,詢之於宏,宏以滂嫉惡, 轉運於滂,必能制宏。」一參乃薦一滂爲戶部侍郎、鹽鐵使、判轉運,尚隸於宏以悅之。江 徐粲,因曰:「滂強戾難制,不可用。」滂知之。八年三月,慘遂爲上所疏,乃讓度支 膀請鹽鐵舊簿書於宏, 宏不與之。 每署

如劉 陸贊曰:「宏職轉運,年運江淮米五十萬斛,前年增七十萬斛,以實太倉,幸無過。 今職移於 家大計,職不修,無所逃罪。 今宏若此,何以輯事。」遂令分掌之。 無幾,宏言於宰相趙憬、 院官,宏、傍更相是非,莫有用者。傍乃奏曰:「班宏與臣相戾,巡院多闕官。臣掌財賦,國 有力焉。 何以致是?道路喧喧,無不知之,聖上故令濟分掌。公向所言,無乃歸怨於上乎?」宏默然 公錢、縱姦吏故也。 年七十三,廢朝,加贈,諡曰樹。 人,不知何謂?」)牓時在側,忿然曰:「尙書失言甚矣!若運務畢舉,朝廷固不奪之,蓋由喪 晏、韓滉所分。 是目,宏稱疾於第,跨往問之,宏不見,憬、實乃以宏、跨之言上聞。由是遵大曆故事, 勤恪官署,侵入夕歸,下吏勞而未嘗厭苦,清白勤幹,稱之於時。 貞元八年七月卒, 且凡爲度支胥吏,不一歲,資累鉅萬,僮馬第宅,僭於王公,非盜官財, **跨至揚州按徐粲,逮僕妾子姪,得贓鉅萬,乃徙嶺表。故參得罪,宏頗**

之,因紹舊名,字之日德素,奏授武康 亦以紹爲判官。時李希烈阻兵,江淮租輸,所在艱阻,特移運路自願入汴。 王紹,本家于太原,今爲京兆萬年人。舊名與憲宗同,永貞年改焉。少時,顏眞卿器重 尉。 蕭復爲常州刺史,辟爲從事,包佶領租庸鹽鐵, 紹奉佶表詣闕,

屬德宗西幸,紹乃督緣路輕貨,趣金、商路,倍程出洋州以赴行在。 「六軍未有春服, 我猶衣裘。」紹俯伏流涕,奏曰:「包佶令臣間道進奉數約五十萬。」上曰: 德宗親勞之, 謂紹曰:

「道路回遠,經費懸急,卿之所奏,豈可望耶?」後五日而所督繼至,上深賴焉。

嘗洩漏,亦不矜衒。 部侍郎,尋判度支。 之後,兵驕難治,紹修輯軍政,人甚安之。六年,徵拜兵部尚書,兼判戶部事。 後,宰臣 十二,贈左僕射,諡曰敬。 以爲水旱之備。 元和初, 貞元中,爲倉部員外郞。 I備位 而已。 遷檢校尙書右僕射、徐州刺史、武寧軍節度,復以濠、泗二州隸焉。 後二年,遷戶部尙書。 紹自拜倉部,便準韶主判,及遷戶部、兵部郞中,皆獨司其務。 順宗即位,王叔文始奪其權,拜兵部尚書,尋除檢校吏部尚書、東都留 |徳宗以||紹謹密,恩遇特異,凡主重務八年,政之大小,多所訪決。 時屬兵革旱蝗之後,令戶部收闕官俸, 德宗臨馭歲久, 機務不由台司, **兼稅茶及諸色無名之** 自竇參、陸贊已 九年卒,年七 時承張愔 擢 紹未 拜戶

臺省,由左司郞中出爲常州刺史。 李巽字令叔,趙郡人。少苦心爲學,以明經調補華州參軍,拔萃登科,授鄂縣尉。 踰年,召爲給事中,出爲湖南觀察使, 銳於爲理。 五年, 周歷

列

傳第

改 江 西 觀 祭使 加 檢 校 散 騎 常侍、 兼 御史大夫。 異持下以法、吏不 敢欺 而 動 必祭之。

羡。 運江 重 異掌使 淮米 順 巽 宗 遂專領度支鹽 五 卽 位 十萬斛抵河陰,久不盈其數,唯異三年登焉。 年,征 ,入爲兵部 課 所入,類晏之多歲,明年 鐵 侍 使。 郞 権筦之法 司徒杜佑 號爲 判度 過之, 文鹽 難 重 鐵 又 唯大曆 轉 二年 運使 遷兵部尙書,明 加一 中僕射劉晏 以異 百八 幹治 十萬 雅 年 奏爲 得其 貫。 改 (吏部尙書,使 副使。 舊制 術 賦 佑 每 入 歲 豐 辭

任

如

故

無所貸 忌刻 異康察江西 嘗以 也。 州 疾,鄓官相率 刺 憲宗 絹 頗 史, 巽 宣 甚 精於吏職 武 雖 數 不 仍促 千 軍 違其請。 在 乘德宗之怒,謀殺竇參,物論 節 匹 省問 千里外,其恐慄如 以其行。 徇喜怒之情, 胳 度使 参 ,蓋性使然也。 ,巽初不言其病,與之考校程 劉士 不數月,參貶 异勾檢簿籍,又精於異,故課 異在 一寧以 湖 而無罪被戮者多矣。 南 擅襲父任 具奏其 在 雖在 異前。 郴州 私家,亦置案牘簿書,勾檢如公署焉。 事 冤 司 物議 初,程异附王 之。 言參 馬。 不可, 久之, 課 奥藩鎭 初,參爲宰相 最 ,商略功 元和四年四月卒,時年七十一,贈尙書左 加 朝 |巽自 交通 衍, 叔 廷不得已而授之。 公文貶竄 利 給 亦异之助焉。 不悅 德宗怒, 至 事 中爲 其 巽 於異,自左司 夕 湖 知 而 途賜<u></u>參死,議者冤之。 其吏 南 卒。 異為吏部尚書, 觀察使, 及參之貶, 才明辨 然性強很狡惡 人更有 郎中出爲常 郴 過,絲 奏而用 刨 屬 寧 臥 郡

利國者,農商之外,不可爲也。宏、滂爭權樹黨,皆非令人。 第五琦促辦應本,民不加賦,而國豐饒,亦庶幾矣。然鑄錢變法,物貴身危,其何陋哉!凡 者以利啖之,苟不塞讒口,何以持重權?卽無以展其才,濟其國矣。是其術也,又何譏焉。 人。嗚呼!木秀於林,風必摧之,常衮見忌於前,楊炎致冤於後,可爲長歎息矣!時譏有口 貴甚賤之物,泛言治國者,其可及乎!舉眞卿才,忠也,減王縉罪,正也,忠正之道,復出於 年繼掌財賦,不其是哉!史記貨殖云:「平糶齊物,關市不乏,治國之道也。」晏治天下,無甚 忍、不敢也。 晏之吏,遠近自不欺者何也?答曰:蓋任其才而得其人也。 不能欺,宓子賤吏不忍欺,西門豹吏不敢欺。三子者,古之賢人也,吏皆懷其欺而不能、不 有之矣。如劉晏通擁滯,任才能,富其國而不勞於民,儉於家而利於衆。 史臣曰:歷代操利柄爲國計者,莫不損下益上,危人自安,變法以弄權,斂怨以構禍,皆 紹之謹密幹事,異之皦祭精辨, 晏歿,故吏二十餘 或問曰:鄭子產吏

列傳第七十三 李巽 校勘記 賀日:豐財忠良,晏道爲長。琦、宏、滂、巽,咸以利彰。 亦足可稱。

校勘記

(1) 冥動在官 「冥」字各本原作「宜」,據禮記祭法、唐會要卷八七改。

(11) 受命之日 「受」字各本原無,據唐會要卷八七補。

(11) 浮人 各本原作「浮入」,據唐會要卷八七、冊府卷四九三改。

(E) 江西 「西」字各本原無,據新書卷一四九第五琦傳、合鈔卷一七四第五琦傳補。

舊唐書卷一百二十四

列傳第七十四

薛嵩 弟粤 嵩子平 嵩族子雄 令狐彰 子建 運通 田神功

侯希逸 李正己 子納 納子師古 師道 宗人洧附

事之後,姑欲安人,遂以重寄委嵩。嵩感恩奉職,數年間,管內粗理,累遷檢校右僕射。 篇、洺、邢等州節度觀察使, 平河朔旋,乃奏嵩及田承嗣、張忠志(1)、李懷仙分理河北道;詔遂以嵩爲相州刺史,充相、 朝義兵潰,王師至,嵩惶惑迎拜于懷恩馬前,懷恩釋之,令守舊職, 時懷恩二心已萌。 廣德元年,東都平,時皇太子爲天下兵馬元帥,遺僕固懷恩東收河朔。當爲賊守相州 少以門蔭,落拓不事家產,有膂力,善騎射,不知書。自天下兵起,東身戎伍,委質逆徒。 辞嵩 ,絳州萬泉人。祖仁貴,高宗朝名將,封平陽郡公。父楚玉,爲范陽、平盧節度使。 承嗣鎮魏州,忠志鎭恆州,懷仙鎭幽州,各據數州之地。 聞賊

三五二五

列

儜

第七

十四

薛

淸 曆 盗 八 年正 所 將 兵逐導 月 卒。 韶 , 舉衆歸 遣 弟 萼 田 知 承 留 嗣 後, 以 累加 叛。 粤太子少師。 粤奔于洺州 大曆十年正月丁酉, 上表乞入朝,許之。 昭義軍 至京,素服 兵馬使裴 於銀 志

待罪,

韶釋之。

及 河 得 滑 爲 於 觀 以 古河道 平李 汝州 察等使 州 叔 父粤 分 刺 嵩 史、鄭滑 水 師 刺 子 勢,滑 了,仍押 平,年十 道 接接 史、 夕以 兼 朝 衞 御史 廷以 節 新 州 人 黎陽縣)喪歸。 遂 羅 度 二,爲磁州 中丞 、渤海 東平 無水 觀 察等使, 十二 患。 界。 ,理有能名。元和 及免喪, 兩 刺史。 蕃使 州 平率 居鎭 累有 析 累授右 六二年 爲 魏 嵩卒、軍 博節度 戦 道 功。 ,入爲左金吾大將軍。 衛將軍 七年,淮西 ,以淄、青、齊、登、萊五州 使 滑州 吏欲用河北故事 田田 , 城西 弘 在 IE 用兵,自左龍武 南衙凡三十年。 . 距黄 同 上聞, 河二里 ,齊平知留後務,平僞許之, 未幾,復爲鄭滑 開古河南北 ,每歲常爲水患。 爲平盧軍 。宰相 大將 杜黄裳 軍 長十四 授 以以 節 兼 度 御 平爲節度、 深器之,薦 里, 觀 史大夫、 平 察使。 決 詢 舊 訪 讓

所窘 稍 薄 · 兵 ,朝廷乃委 長慶 士怨怒,叔佐不能戢, 元年 咝, 平以 鎭 偏 级, 師援棣 杜 叔 良統橫海 州 育潰而 平 卽 歸。 遣 全 將 軍 175 一討伐 李叔 推突將馬狼兒爲帥 不勝, 佐以兵五 王庭 百救之。 湊 圍牛元翼於深州。 ,行及青城鎮 居數月, 刺 劫鎭 史王 棣州 將 稷 爲賊 李自 餽 給

與其同惡十數輩脫身竄匿,餘黨降,稍後者斬於鞠場。 府庫井家財募二千精卒,遊擊之,仍先以騎兵掩其家屬輜重,賊衆惶惑反顧,因大敗。 勸 , 并其衆; 次至博昌鎮, 復劫其鎭兵, 共得七千餘人, 徑逼青州城。 明日,狼兒亦就擒戮,脅從者放 城中兵士不敵, 平悉 公歸田 狼兒

里。

韶加右僕射,進封魏國公,由是遠近畏伏平之威略。

徒。 近日節制,罕有其比。寶曆元年,歸朝,進加檢校左僕射、兼戶部尙書。 雄 兼 不從,承嗣遣刺客盜殺之。 河中絳隰節度觀察等使。大和二年,復以晉州、慈州隸河中,益兵三千人,加平檢校司 嵩族子雄,初爲嵩屬吏,知衞州事,嵩歿,特韶授衞州刺史。 在河中凡六年,召拜太子太保。明年,上疏乞老,以司徒致仕,居一年卒,册贈太傅。 在鎮六周歲,兵甲完利,井賦均一。至是入覲,百姓遮道乞留,數日乃得出。 魏博節度田承嗣誘爲亂, 踰月,復檢校司空, 時人以爲

于母氏,彰遂少長范陽。 軍,以淸白聞,本道採訪使宋鼎引爲判官。 令狐彰,京兆富平人也。遠祖自燉煌徙家焉,代有冠冕。父濞,天寶中任鄧州錄事參 倜儻有膽氣,涉獵書傳,粗知文義,善弓矢,乃策名從軍,事安祿 初任范陽縣尉,通幽州人女,生彰,及秩滿,留彰

傳第七十

山。天寶中,以軍功累遷至左衞員外郎將。

青光祿大夫,鎭滑州,委平殘寇。 遣所親薛岌統精卒圍杏園攻之。彰乃明示三軍,曉以逆順,衆心感附,咸悉力爲用。 未幾,檢校右僕射,餘並如故。 戰,大破之,潰圍而出,遂以麾下將士數百人隨萬定入朝。 者,未有舉州向化,肅宗得澎表,大悅,賜書慰勞。時影移鎭杏園渡,遂爲思明所疑 |彰感激忠義,思立名節,乃潛謀歸順。 會中官|楊萬定監滑州軍,|彰遂募勇士善於水者,俾乘 隨通儒等遁走河朔,又陷逆賊史思明,爲署爲博州刺史及滑州刺史,令統數千兵戍滑臺。 夜涉河,達表奏于萬定,請以所管賊一將兵馬及州縣歸順,萬定以聞。 一區、名馬數匹,幷帷帳什器頗盛,拜御史中丞,兼滑州刺史、滑亳魏博等六州節度,仍加銀 安祿山叛逆,以本官隨賊黨張通儒赴京師,通儒僞署爲城內左街使。 及史朝義滅,遷御史大夫,封霍國公,尋加檢校工部尚書。 肅宗深獎之,禮甚優厚, 自祿山構逆,爲賊守 王師收復二京, 人思明 。與賊兵 賜甲第 乃

黎庶 時犬戎犯邊,徵兵防秋(三)。 (,率自齎糧,所過州縣,路次供擬,皆讓而不受,經閭里不犯秋毫,識者稱之。 , 法令嚴酷, 人不敢犯。 彰在職,風化大行。 滑州瘡痍未復,城邑爲墟,彰以身勵下,一 數年間,田疇大闢,庫藏充積,歲奉王稅及修貢獻 |彰遣屬吏部統營伍,自滑至京之西郊, 向二千餘里 志農戰,內檢軍戎,外牧 未嘗暫闕。 然性識猜 甲士三千

阻,人有忤意,不加省察,輒至斃踣,此其短也。 臨終,手疏辭表,誠子以忠孝守節,又舉能

自代。表日:

疾益 展,臣之大罪,下慚先代,仰媿聖朝。 敢入朝,專聽天誅,即欲奔謁。 第,使他年爲臣報國,下慰幽魂。 官吏等,各恭舊職,祗待聖恩。臣伏見吏部尙書劉晏及工部尙書李勉,知識忠貞,堪委 不遂行,言發自痛。 人,拜舞不能 大事,伏願陛 [頓首。 重,瘡腫又生,氣息奄奄,遂期殞歿。不遂一朝天闕,一拜龍顏,臣禮不終,忠誠莫 臣自 臣受性剛拙,亦能包含。 事陛下,得備藩守,受恩則重,効節未終,長辭聖朝,痛入心骨,臣誠哀懇,頓 下速令檢校,上副聖心。臣男建等,性不爲非,行亦近道,今勒歸東都私 ,數月有闕。欲請替辭退,卽日望稍瘳,冀得康強,榮歸朝覲。 當使倉糧錢絹羊馬牛畜一切已上,並先有部署;三軍兵士,州縣 及魚朝恩死,即臣屬疾苦,又遭家艱,力微眼暗,行動須 臨歿昏亂,伏表哀咽。 頃因魚朝恩將掠亳州,遂與臣結怨,當其縱暴,臣不 臣竭誠事上,誓立大節,天地神明,實知臣心。 自多末舊

上覽表,嗟悼久之。特下詔褒美曰:

賢,有匡時戡難,迫於大化,不忘時君,未嘗不嘉尙而流歎也。 中衞社稷,外修疆事,合於一體,以靖庶邦,其在有終,謂之不朽。 今有忠烈之臣彰,剛直 觀前代文武通

列傳第七十四 令狐彰

以 遂。 不戀 隱,見之於詞。 形 鄰 付 外,純 史館 報國 喟然 闕 想其風彩,久軫顧懷,遽見淪沒,用深追悼。 一、式昭 ,以茲曠 感傷 約禮以居喪。 和 積中,本於孝敬,輔以才略,統制藩闧,服勞王家。 名臣。 「、鑒寐增慟。 年。 復節守常,條上軍簿,請擇良帥,命于中朝。乃令遺胤,爰歸東洛,敎忠 及苴麻 古人所謂生不交利,死不屬其子,夫豈遠哉!節概誠亮,高絕無 有以見東州士大夫勤王尊主之志,用嘉其休,可以垂範 在艱,優踰權奪,踴絕傷足,淚盡 · 嗟乎! 方疾之時,以情自疏,無所 往以 喪明,入覲之期,良願莫 母老,躬於就養, 宣宣

子建、運、通。

射於軍 建召士倫榜殺之,因逐其妻。 使、左神武 廂兵馬使、右羽 建守死不 建 中 ,大曆四年十二月,彰遣入朝,特加兼御史中丞,歸滑州。及彰卒,滑三軍逼奪情禮 - , 遂以 從,舉家 大將軍 。林大將軍、兼御史大夫。 興元元年六月,加檢校左散騎常侍、行在都知兵馬 四百 歸京師。 人隨駕爲後殿。至奉天,以建爲行在中軍鼓角使。幸梁州,轉行在右 建妻李氏, 恆帥實臣女也, 建惡, 服闋,累轉至右龍虎軍使。德宗以涇原兵亂,出幸奉天,建方教 士倫母聞,不勝其痛,卒。 將棄之,乃誣與傭敎生邢士倫姦通。 李氏奏請按劾,韶令三司詰之。李

徳宗 念 舊 勳 念 氏 在予之責 及奴 委京兆 姆款證 用 尹 軫 大將軍。 厚 特容貸之; 被 加 于 一誣頗 存恤。」貞元 懷。 (明白,建方自首伏。 十年,贈揚州 宜 輟常膳五 復陳 四年 訴 百千文,充 詞 七月,以前官爲右領 甚 虚罔, 建會赦 葬 遂 上倫 貶 **免坐。** 施州 母 子。 軍 別 大將I 德宗 駕 其父既 同正 詔 軍 曰:「子育黎元、未能禁暴, 卒於貶所。 五 衰耄,至無 年 三月,以專殺不辜 所 貞元六年九 歸 ,良深矜

月

贈右領

軍

大都督。

杜亞 不聽 威 自 司直 **令判官穆員** 娅 盧 與留臺 運爲 ,竟無臟狀。 而怒斥逐員等,令親事 人通款 土膽 東都留守將,逐賊 及 同劾之,皆首伏。 三司覆按運獄 ,配流建州 從事 亞具以聞 張 弘靖 ,既竟,明運 同 後歲餘, 「請流 出郊,其日 將武 輷 然終不原運,運 其事 金 運於嶺表。 齊抗 輷 1有劫 之。 迹非行 員 捕 與弘靖皆以運 得劫 金答箋 ·轉運絹於道者,杜亞以運豪家子, 盜 死於歸州 德宗令侍御史李元素、刑部員外崔從質、大 轉運絹賊郭鵠、 以 運從 曾捕掠 者 職 衆冤之。 十餘人,一人笞死,九人不勝考掠 在牙門,必 人於家,配流 朱瞿 曇等七人及贓絹 不爲盜 歸州 ,抗請不 意 **武金** 其爲之, 按。 虐 詔 作 理

通 元和 中, 宰相 李吉甫 奏曰:「臣伏見代宗朝滑州節度使令狐 彰 臨終上表 悉以土

列

傳

第

七

+

79

令

M

爲 出。 衡笑 壽州 錄。」憲宗念彰之忠,即授通贊善大夫,出爲宿州刺 |州 忘 今有 兵甲 宜 家, 右 喩門下 欲使忠義之人,何所激勸?今通幸存, 憲宗 次 團 籍 衞 而 遣子入朝,以土 不奏; 將 練使、檢校御史中丞。 子 E 遣 朝 通 軍 言通 李文通往 在 廷 制 如有 父有 下 遣 臣每感彰同時 , 諸 給事 敗 功於國,不 子 . 宣慰,度其將至,遂令代通 」 即,即不 一地歸於先帝。 中崔植 隨 表 歸 每與賊戰, 敢 闕。 封還制 河朔 宜逐棄其子 上聞。 代宗以彰遺表宣示百僚, 潜鎮 貞元 書, 後爲賊所攻, 必 中, 言通前刺 付子傳孫 得遇明聖,伏乞陛下召之與語, 制制 虚張 長子建 命 《虜獲》 ,貶爲昭州 方行 史。 壽州 坐事 無不 境 上 ,得賊數人,即爲露 時討准、蔡, 歳餘 失 燻灼 死於施州 一城栅 律,不宜 司戶 當時在 ,出爲淄州 數代; , 並 移 陷 遽加獎任。 用爲泗州刺 撫州 一位者聞之, 幼子運亦 唯彰忠義 通 刺 走 布上之,宰相 司 如 史。 馬。 固 州 堪 無罪流 憲宗令宰相 史。 用 感激, 長慶 城, + DU 歲中 閉 望 初 年 感歎。 武元 屋不 於歸 垂 獎 改

為平盧節 田 神 功 冀州 度都知兵馬使、兼鴻臚卿、於鄭州破賊四千餘衆,生擒逆賊大將四人,牛馬器械 人也。 家本微賤。 天寶 (末,爲縣里胥,會 河朔兵 興, 從事幽、 薊。 元

爲

左

衞

大將軍,卒。

逸時爲平盧裨將,率兵與安東都護王玄志襲殺歸道,使以聞,詔以玄志爲平盧節度使。 以追 州 朝三日;贈司徒,賻絹一千匹、布五百端;特許百官弔喪,賜屛風茵褥於靈座,并賜千僧齋 時郭子儀入朝,請宴宰臣等於私第,神功効其請,亦以許之。 尋加檢校右僕射,赴尙書省視 事 大夫、汴宋等八州節度使。 大曆三年三月,朝京師,獻馬十匹、金銀器五十件、繒綵一萬匹。 殺者數千人。二年二月,生擒逆賊劉展,送于闕下。以擒展功,累遷檢校工部尙書、 不可勝數。 一年卒,韶滑州李勉代之。 ,特韶宰臣已下百官送上,仍加知省事以寵之。 刺史,知汴州節度觀察留後事幷河陽、澤潞等兵馬,直據淇門,會李承昭討魏博田承嗣。 [福,至德已來,將帥不兼三事者,哀榮無比。 侯希逸,平盧人也。少習武藝。 弟神玉,自曹州刺史權汴州留後。大曆十年正月,加檢校兵部郎中、兼御史中丞,爲汴 神功忠朴幹勇,當時所稱。八年冬,復覲闕廷,遘疾,信宿而終。上悼惜,爲之徹樂,廢 **蕁爲鄧景山所引,至揚州,大掠百姓商人資產,郡內比屋發掘略徧,商胡波斯被** 天寶末,安祿山反,署其腹心徐歸道爲平盧 節度。 兼御史

列

傳第七十四

侯希逸

李正

己

三五三三

率勵將: 元元 希逸爲平盧、淄青節度使。自是迄今,淄青節度皆帶平盧之名也。 二萬餘人,且行且戰,遂達于靑州。 年多,玄志病卒,軍人共推立希逸爲平盧軍使,朝廷因授節度使。 士,累破賊徒向潤客、李懷仙等。旣淹歲月,且無救援,又爲溪虜所侵,希逸拔其軍 會田神功、能元皓於兗州,靑州遂陷於希逸〔三〕,詔就加 既數爲賊所迫,希逸

書右僕射、上柱國,封准陽郡王(四)。後漸縱恣,政事怠惰,尤崇奉釋教, 平之,加檢校工部尚書,賜實封,圖形凌煙閣。以私艱去職。大曆十一年九月,起復檢校尚 校右僕射,久之,加知省事,遷司空。詔出而卒,廢朝三日,贈太保。 寺宇,軍州苦之。 希逸初領淄青,甚著聲稱,理兵務農,遠近美之。寶應元年,與諸節度同討襲史朝 永泰元年,因與巫者夜宿於城外,軍士乃閉之不納。 希逸奔歸朝廷,拜檢 且好败遊, 興 功創

能方強暴恣横,諸節度皆下之, 正己時爲軍候,獨欲以氣吞之。因與其角逐,衆軍聚觀, 來存問,懷玉恐玄志子爲節度,遂殺之,與軍人共推立候希逸爲軍帥。 後與希逸同至靑州,累至折衝將軍,聽健有勇力。寶應中,衆軍討史朝義,至鄭州。 李正己,高麗人也。本名懷玉,生於平盧。乾元元年,平盧節度使王玄志卒,會有敕遣 希逸母卽懷玉姑 迴

曰:「後者批之。」旣逐而先,正己擒其領而批其背,迴紇尿液俱下,衆軍呼笑,虜慚,繇是不

敢爲暴。

御史大夫,加平章事、太子太保、司徒。 歲不絕。法令齊一,賦稅均輕,最稱強大。嘗攻田承嗣,威震鄰敵。 籍,從之。爲政嚴酷,所在不敢偶語。初有淄、青、齊、海、登、萊、沂、密、德、棣等州之地,與 書右僕射,封饒陽郡王。大曆十一年十月,檢校司空、同中書門下平章事。十三年,請入屬 使、海運押新羅渤海兩蕃使、檢校工部尙書、兼御史大夫、青州刺史,賜今名。 攻其地,得者爲己邑,正己復得曹、濮、徐、兗、鄆,共十有五州,內視同列,貨市渤海名馬,歲 田承嗣、令狐彰、薛嵩、李寶臣、梁崇義更相影響。大曆中,薛嵩死,及李靈曜之亂,諸道共 言其非罪,不當廢。會軍人逐希逸,希逸奔走,遂立正己爲帥,朝廷因授平盧淄青節度觀察 節度使侯希逸卽其外兄也,用爲兵馬使。 正己沉毅得衆心, 希逸因事解其職, 歷檢校司空、左僕射、兼 尋加檢校尙 軍中皆

政,秘之數月,乃發喪。 將築汴州,乃移兵屯濟陰,晝夜教習爲備。河南騒然,天下爲憂,羽檄馳走,徵兵以益備。 又於徐州增兵,以扼江淮,於是運輸爲之改道。未幾,發疽卒,時年四十九。子納擅總兵 後自青州徙居鄲州,使子納及腹心之將分理其地。 納阻兵,興元元年四月,歸順,方贈正己太尉。 建中後,畏懼朝廷,多不自安。

袋。 尋遷 青州刺史,又奏署行軍司馬,兼曹州刺史、曹濮徐兗沂海留後,又加御史大夫。 歷檢校倉部郎中,兼總父兵,奏署淄州刺史。 納 少時,正己遣將兵備秋,代宗召見嘉之,自奉禮郎超拜殿中丞、 正己將兵擊田承嗣,奏署節度觀察留後。 兼侍御史, 賜紫金魚

冷從順。 。 誅之,納從叔父洧以徐州,李士眞以德州,及棣州李長卿,皆以州歸順。 陽,治攻破其城外。納自城上見洽,涕泣悔罪,遣判官房說以其弟經、男成務朝京師 怒洧背宗,乃悉兵圍之。詔宣武軍節度劉治與諸軍救之,大敗納兵於城下。 比會悅於濮陽,遣大將衞俊將兵一千救悅,爲河東節度使馬燧敗於洹水,殺傷殆盡。詔諸軍 右僕射、同中書門下平章事。 司空,封五百戶。」貞元初,升鄆州爲大都督府,改授長史。年三十四,薨於位,廢朝三日,贈 元之降罪己詔,納乃効順,詔加檢校工部尚書、平盧軍節度、淄**青等州觀察使**。 納遂歸鄆州 建中初,正己、田悅、梁崇義、張惟岳皆反。二年,正己卒,納祕喪,統父衆,仍復爲亂。 會中使宋鳳朝見之,謂納計蹙,欲誅破之以爲己功,奏請無捨,上乃械說等繫禁 復與李希烈、朱滔、王武俊、田悅合謀皆反,僞稱齊王,建置百官。 時希烈圍陳州,納遣兵與諸軍奮擊,大破之,因 納以彭城險阨,又 [解] 後將兵於濮 無幾, 加 檢校 及興 檢校 請因

賻有差。

列傳第七十四 李正己

侵軼 未進。 成德 以其年弱初立,舊將多死,心頗易之,乃率衆兵以取蛤檗、三汊爲名,其實欲窺納之境。 以守之,謂之三汊,交田緒以通魏博路,而侵掠德州,爲武俊惠。及納卒,師古繼之。武俊 十萬 皆留其妻子,或謀歸款於朝,事洩,族其家,衆畏死而不敢異圖。 古令棣州降將趙鎬拒之。武俊令其子士淸將兵先濟於滴河,會士淸營中火起,軍鶩,惡之, 鹽 利 起復右 (之謀,招集亡命,必厚養之,其得罪於朝而逃詣師古者,因卽用之。其有任使于外者, 斛 子師 軍 其後武俊以敗朱滔功,以德、棣二州隸之,蛤椝猶爲納戍。納初於德州南跨河而城 節度王武俊率師次于德、棣二州,將取蛤躱及三汊城。 棣州之鹽池與蛤躱歲出鹽數 德宗遣使諭旨,武俊卽罷還。 棣州之隸淄青也,其刺史李長卿以城入朱滔,而蛤蚣爲納所據,因城而戍之,以專 古, 金吾大將軍同正、平盧及靑淄齊節度營田觀察、海運陸運押新羅渤海兩蕃使。 累奏至青州刺史。貞元八年,納死,軍中以師古代其位而上請,朝廷因而授 師古毀三汊口城,從詔旨。師古雖外奉朝命,而嘗畜

六年六月,與淮南節度使杜佑同制加中書門下平章事。及德宗遺詔下,告哀使未至,義成 丁母憂, 貞元十年五月,師古服闋,加檢校禮部尚書。十二年正月,檢校尚書右僕射。十一月, 起復左金吾上將軍同正。十五年正月,師古、杜佑、李欒妾媵並爲國夫人。十

軍節 日:「師古近得 ,位兼將相, 俄聞 度 使 順宗即位,師古乃罷兵。 李元 邸吏狀,具承聖躬萬 素以與師古鄰 見賊 不可以不討。」 道,錄遺 遂杖元素 後累官至檢校司徒、兼侍中。 福 韶報 李元素豈欲反,乃忽僞錄遺詔以寄。 師古,以示無外。 《使者,遽出兵以討元素爲名,冀因國 師古遂集將士, 卒,贈太傅。 引元素 師古三 喪以 代 使者謂 受國 |侵州

未定 懼衆 請進 無 祭處置、陸運 節度 師 道 少長皆殺之。 尚書, 了, 授 也 於 兩 師 以以 密 道, 稅,守鹽法,申官員,遣判官崔承寵、 附己,皆用嚴法制之。 師道 而奉之。 計分削之,憲宗以蜀川方擾 兼 師古異母弟。 鄆州 海 檢校左散騎常侍、兼御 運 以故能 押新羅渤海 大都督府長 朝命久未至 ,師道使賊燒河陰倉,斷建陵橋。 劫其衆,父子兄弟相 其母張忠志女。 大將持兵鎭于外者,皆質其妻子;或謀 史,充平盧 兩蕃等使。 ,師道謀於將吏,或欲加兵於四境, 史大夫,權 ,不能加兵於師道。 軍及淄青節度副大使,知節度事、管內支度營田觀 自正己至師道, 師道時知密州事,師古死, 孔目官林英相 傳焉。 知鄭州 五年七月,檢校尙書右僕射 事, 初, 竊有 充淄 繼奏事。 元和元年七月,遂命建王宏遙 師道置留邸於河南府,兵諜雜 **)鄭、曹等十二州,六十年矣。** 青節度留後。 其判官高沐固止之。 時杜黃裳 歸款於朝,事洩,其家 其奴不發喪,潛使 十月,加檢 作相,欲乘其 領 乃 校 迎

年,王師討蔡州

|驛卒三人,皆潛受其職署,而爲之耳目,自始謀及將敗,無知者。 窮理得其魁首,乃中岳寺僧圓靜,年八十餘,嘗爲史思明將,偉悍過人。初執之,使巨力者 之。數月,有山棚鬻鹿於市,賊遇而奪之,山棚走而徵其黨,或引官軍共圍之谷中,盡獲之。 其墉而入者。賊衆突出殺人,圍兵奔駭,賊得結伍中衢,內其妻子於囊橐中,以甲胄殿而 以往來,更不敢辨。 刑,乃曰:「誤我事,不得使洛城流血。」死者凡數十人。 留守禦將二人、都亭驛卒五人、甘水 奮鎚,不能折脛。圓靜駡曰:「鼠子,折人脚猶不能,敢稱健兒乎!」乃自置其足敎折之。臨 行,防禦兵不敢追。賊出長夏門,轉掠郊墅,東濟伊水,入嵩山。元膺誠境上兵重購以捕 呂元膺告變,元膺追伊闕兵圍之,半日不敢進攻。防禦判官王茂元殺一人而後進,或有毀 人內其即,謀焚宮闕而肆殺掠。旣烹牛饗衆矣,明日將出,會有小將楊進、李再興者詣留守 因吳元濟北犯汝、鄭,郊畿多警,防禦兵盡戍伊闕,師道潛以兵數十百

集二縣山棚人作亂。及窮按之,嘉珍、門察,乃賊武元衡者,元膺具狀以聞。及誅吳元濟, 師道恐懼,上表乞聽朝旨,請割三州丼遣長子入侍宿衞,詔許之。 者,潛部分之,以屬圓靜,以師道錢千萬僞理嵩山之佛光寺,期以嘉珍竊發時舉火於山中, 初,師道多買田於伊闕、陸渾之間,凡十所處,欲以舍山棚而衣食之。 有訾嘉珍、門察

師道識暗,政事皆決於羣婢。 婢有號蒲大姊、袁七娘者,爲謀主,乃言曰:「自先司徒以

第七十

李正

之。 博節度使田弘正率本軍自陽劉渡河,距鄲州九十里下營,再接戰,破賊三萬餘衆,生擒三千 縣,斬首五百餘級。十月,徐州節度使李愬、兵馬使李祐於兗州魚臺縣破賊三千餘人。 千,遂至平陰。十一年十一月,加師道司空,仍遣給事中柳公綽往宜慰,且觀所爲,欲寬容 十年十二月,武寧軍節度使李愿遣將王智興擊破師道之衆九千,斬首二千餘級,獲牛馬四 加,可以力戰,戰不勝,乃議割地,未晚也。」師道從之而止, 於故東阿縣界破賊五萬。 人,收器械不可勝紀。 師道荷以遜順爲辭,長惡不悛。十三年七月, 有此十二州,奈何一日無苦而割之耶!今境內兵士數十萬人,不獻三州,不過發兵相 陳許節度使李光顏於濮陽縣界破賊,收斗門城、杜莊栅。 諸軍四合,累下城栅。 滄州節度使鄭權破淄青賊於齊州 表言軍情不叶, 乃詔諸軍討伐。 田弘正

牒,乃得入。兵士繼進,至毬場,因圍其內城,以火攻之,擒師道 貴。」衆皆曰:「善。」乃迎其使而斬之,遂齎師道追牒,以兵趣鄆州。 乃稱 十四年二月也。 病不出,召將更謀曰:「魏博兵強,乘勝出戰,必敗吾師,不出則死。今天子所誅, 師道使劉悟將兵當魏博軍,旣敗,數令促戰。師未進,乃使奴召悟計事。悟知其來殺己, 悟與公等皆被驅逐就死地,何如轉禍爲福,殺其來使,以兵趣即州,立大功以求富 是月,弘正獻於京師,天子命左右軍如受馘儀,先獻于太廟郊社 而斬其首,送于魏博軍 及夜,至門,示以師道 憲宗御興 司空一 ·, 元 追

相全貨,何所疑留。」及燈等至行營,賊覘知傳告,叛徒皆感朝恩,由是劉悟得行其謀焉。 各委節度收管驅使。 炭,是用活其性命,誠爲屈法, **劾款之由,情似可矜,股不忍殺。 況三軍百姓,孰非吾人,詔令頒行,罪止師道。方欲拯於塗** 有常刑,悉合誅戮。 初 ,東軍諸道 行營節度擒逆賊將夏侯澄等共四十七人,詔曰:「附麗兇黨,拒抗王師,國 股以久居污俗,皆被脅從,況討伐已來,時日未幾,縱懷轉禍之計,未有 如父母血屬猶在賊中,或羸老疾病情切歸還者,仍量事優當放去,發 庶使知恩。 並宜特從釋放,仍令却遞送至魏博及義成行營,

兩河復爲王 優容,每聞擅襲,因而授之,以故六十餘年,兩河號爲反側之俗。 子立,則以三軍之請聞,亦有爲大將所殺而自立者。自安、史以後,迄至于貞元,朝廷多務 地 分領州郡 安祿山首 一州爲三節度, 師道妻魏氏及小男並配掖庭。 而 遞 亂兩河,至寶應元年王師平史朝義,其將薛嵩、李懷仙、田承嗣、李寶臣等受偽命]相廖固,聯結姻好,職貢不入,法令不加,率以爲常。 仍皆署其子爲副大使,父死 ,朝廷厭兵,因僕固懷恩請,就加官爵。及侯希逸爲軍人逐出,正己又據齊、魯之 土焉。 俾馬總、薛平、王遂分鎮焉。 師道 妻魏氏, 元和十五年出家爲尼。 堂弟師賢、師智配流春州,姪弘巽配流雷州。 仍命宰臣崔羣撰碑以紀其績。 憲宗知人善任,削平亂迹, 國家自天寶末 韶分其十

列

傳

第七

洧驚 始加洧徐、海、沂都團練觀察使,尋加密州。時海、密州皆爲賊所據,不受洧命。 消所請不行, 尼妨公害私, 皆此類也。及 李納遣兵攻徐州, 劉治與諸將擊退之, 賊勢未衰, 亦並爲賊納所據,非國家州縣。其刺史王涉、馬萬通等,洧並素與之約,若有詔命,冀必成 白宰相:「徐州恐不能獨當賊,若得徐、海、沂三州節度都團練使,即必立功。 況海、沂兩州, 戶部尙書。 功。」程乍自外到闕,以爲宰相一也,乃先以其言白張鎰,鎰言於盧杞。 大夫,封潮陽郡王,食實封二百戶,充招諭使。 , 疽潰於背而卒, 贈左僕射。 洧,正己從父兄也。 未幾,疽發背,稍平,乃大具糜餅,飯僧於市,消乘平肩輿自臨其場,市人歡呼, 正己用爲徐州刺史。 初, 正己死,子納犯宋州,洧以其州歸順,加御史 洧遣攝巡官崔程奉表至京師, 令口奏丼 **把怒程不先自己,故** 旋加消檢校

禮,有士子之風;馭衆權謀,著將軍之業。中外善政,終始令名,成功不居,告老致仕,方之者 身濡足賊廷,旣沐國恩,尙存家法,守土奉職,終身一心,果有令人,克全餘慶。 曰:自安、史亂離,河朔割據,雖外尊朝旨,而內蓄姦謀。 薛嵩祖父,國之名將,及 彰居喪循

臣道合,中外情通;師道外任諸奴,內聽羣婢,軍民攜貳,家族滅亡,不亦宜乎!假息數年, 朝廷任盧杷,以私妨公,致懷光變忠爲逆,李納父子,宜其苟延。 洎憲宗當朝,裴度爲相,君 前,三帥而不滅;師道繼立,數年而亡者,何哉?答曰:納與師古,自運姦謀,躬臨戎事; 兄,盜據靑、鄆,得計則潛圖兇逆,失勢則僞奉朝旨,向背任情,數十年矣。或問曰:師古之 全令名,不能終保功業,惜哉!神功忠勇,竟著勳名; 背逆歸國,治兵牧民,上表推誠,舉賢代己,時稱能善始善終者也。 希逸荒狂, 自失茅土。 建志稟遺訓 師道祖父弟

猶爲多矣,何所疑焉? 贊曰:田神功勇能立勳,令狐彰死不失節。 薛平振家世以顯揚,師道任臧獲而亡滅。

校勘記

張忠志 各本作「張志忠」。 據本書同卷李正己傳及卷一 四二李寶臣傳、卷一四三李懷仙傳、通

鑑卷二二二改。

(=) 3 徴兵防秋 「秋」字各本原作「狄」,據新書卷一四八令狐彰傳、合鈔卷一七五令狐彰傳改。

節度 青州遂陷於希逸 仍 帶 平盧名,所以寵異之也,謂之陷可乎?」按冊府卷四五〇此處作「平盧始陷於賊」。 此句文字有訛 誤。 唐書合鈔補正卷五云:「朝廷以希逸攻守之功,詔爲青州

第七十四 校勘記

列

三五四三

(1) 以私戴去職 …… 封淮陽郡王 以上二十九字合鈔卷一七五侯希逸傳移在「拜檢 校 右 僕 射」

ፑ

舊唐書卷一百二十五

列傳第七十五

張鎰 馮河清附 劉從一 蕭復 柳渾

公服白其母曰:「上疏理樅,樅必兔死,鎰必坐貶。 若以私則鎰負於當官,貶則以太夫人爲 帥 憂,敢問所安?」母曰:「爾無累於道,吾所安也。」遂執奏正罪, 樅獲配流, 鎰貶撫州司戶。 呵責邑人內侍齊令詵,令詵銜之,構誣。外發鎰按驗,樅當降官,及下有司,樅當杖死。 量移晉陵令,未之官,洪吉觀祭張鎬辟爲判官,奏授殿中侍御史。遷屯田員外郎,轉祠部、 ,以嘗伏事齊丘,辟鎰爲判官。授大理評事,遷殿中侍御史。乾元初,華原令盧樅以公事 司二員外。 張鎰,蘇州人,朔方節度使齊丘之子也。以門蔭授左衞兵曹參軍。 大曆五年,除濠州刺史,爲政淸淨,州事大理。乃招經術之士,講訓生徒,比去郡,升明 母憂居喪有聞,免喪,除司勳員外。交遊不雜,與楊綰、崔祐甫相善。 郭子儀爲關內副元 盤具

列傳第七十五 張鎰

經者 練鄉 位,除江南西道都團練觀察使、洪州刺史、兼御史中丞,徵拜吏部侍郎,尋除河中晉絳都防 禦觀察使。 入,養疾私第。 兵,嚴守禦之備,詔書褒異,加侍御史、沿淮鎭守使。 尋遷壽州刺史,使如故。 德宗即 四十餘人。 到官數日,改汴滑節度觀察使、汴州刺史、兼御史大夫,以疾辭,逗留於中路,徵 未幾,拜中書侍郎、平章事、集賢殿學士,修國史。 撰三禮圖九卷、五經微旨十四卷、孟子音義三卷。李靈曜反于汴州,

建中三年正月,太僕卿趙縱爲奴當千發其陰事,縱下御史臺,貶循州司馬,留當千於內

侍省。 鎰上疏論之曰:

奴在禁中,縱獨下獄,考之於法,或恐未正。 將帥之功,莫大於子儀;人臣之位,莫大 上者,同自首法,並準律處分。」自此奴婢復順,獄訴稍息。今趙縱非叛逆,奴實姦兇, 溢 令李濟得罪因奴,萬年令霍晏得罪因婢,愚賤之輩,悖慢成風,主反畏之,動遭誣告,充 化之本旣正,悖亂之漸不生。爲國之經,百代難改,欲全其事體,實在防微。頃者長安 其奴告也。自今已後,奴告主者皆不受,盡令斬決。」由是賤不得干貴,下不得陵上,敎 奴 府縣,莫能斷決。 建中元年五月二十八日,詔曰:「準鬭競律,諸奴婢告主,非謀叛已 '告其主謀逆,此極弊法,特須禁斷。 假令有謀反者,必不獨成,自有他人論之,豈藉 伏見趙縱爲奴所告下獄,人皆震懼,未測聖情。貞觀二年,太宗謂侍臣曰:「比有

朝偕違,不與衆守,於教化恐失,於刑法恐煩,所盆悉無,所傷 **賊**,大用武臣,雖見寵於當時,恐息望於他日。 奴,纔經數月,連罪三壻。錄勳念舊,循或可容,況在章程,本宜宥免〔〕。 於尙父。 歿身未幾,墳土僅乾,兩壻先已當辜,趙縱今又下獄。 太宗之令典尚在,陛下之明韶始行 至廣。 設合縱實抵法 臣非私趙縱 陛下方誅 ,所告非 非惡 鋫

此奴,叨居股肱,職在匡弼,斯是大體,敢不極言。 。伏乞聖慈,納臣愚懇。

諾。 書侍 |熱(三)、論利陁、斯官者、論力徐等亦七人,俱升壇爲盟。初,約漢以牛, |蕃以馬爲牲, 之盟,將殺其禮,乃請結贊曰:「漢非牛不田,蕃非馬不行,今請以羊豕 及盟官崔漢衡、 千人赴壇所,執兵者半之,列於壇外二百步,散從者半之,分立壇下。 上深納之,縱於是左貶而已,當千杖殺之。 郎爲 時塞外無豕,結贊請以羝羊, 盧
杞忌
鎰名
重道
直,無以陷之,以方用兵西邊,
杞乃僞請行, 鳳翔隴右節度使代朱泚,與吐蕃相尚結贊等盟於淸水。 樊澤、 常魯、于頔等七人, **鎰出犬、白羊,乃坎於壇北刑之,雜血一** 鎰乃令召子儀家僮數百人,以死奴示之。 皆朝服; 結贊與其本國 上固以不可,因薦鎰 將盟,鎰與結贊約各以二 犬三物代之。」結贊許 將相論悉頰藏、 鎰與賓佐齊映、齊抗 器而献 鎰 論臧 恥 以

唐 有 天下,恢奄 禹跡,舟車所至,莫不率俾。 以累聖重光, 卜年惟永, 恢王者之丕

列

儜

業,被 蕃落。 縣三, 其間 至成州 漢 以兩國之要,求之永久,古有結盟,今請用之。 堅 人 廟 相 公有兵馬 受辭而 大磧 彼此 盟從約。 副在有司,二國之誠,其永保之。 `或因小忿,棄惠爲讎,封疆騒然,靡有寧歲。 四 **暨劍南** 二國 一海以聲教。與吐蕃贊普,代爲婚姻,因結鄰好,安危同體,甥舅之國,將二百年。 南至賀蘭山駱駝嶺爲界,中間悉爲閒田。 兩邊見屬漢諸蠻,以今所分見住處依前爲定。其黃河以北,從故新泉軍直北 抵劍南西界磨些諸蠻至、大渡水 會, 處漢守, [展禮,同茲協和,行人往復,累布成命,是必詐謀不起,兵革不用矣。 今國家所守界: 齋戒將事, 西山、大渡河東,爲漢界。 不得侵越。其先未有兵馬處, 告天地山川之神,惟神照臨(云),無得愆墜。 涇州西至彈箏峽西口,隴州西至淸水縣, 蕃國 西南,爲蕃界。其兵馬鎭守之處州縣見有居 [守鎭在蘭、渭、原、會,西至臨洮(日),又東 國家務息邊人,外其故地,棄利蹈義, 皇帝踐阼,愍茲黎元,乃釋俘囚,悉歸 不得雜置幷築城堡耕種。今二國將 盟文所有不載者,蕃有兵馬處蕃守, 其盟文藏於郊 鳳州西至同谷 彼猶

結贊 誓畢,復 亦出盟文,不加於坎,但埋牲而已。盟畢,結贊請鎰就壇之西南隅佛幄中焚香爲耆(も), 升壇飲酒。 獻酬之禮,各用其物,以將厚意而歸

<u>德宗將幸奉天,鎰竊知之,將迎鑾駕,具財貨服用獻行在。</u> 李楚琳者,當事朱泚, 得其

傭保 是夜 不時發。 Ļ 負 軍司馬齊映等密謀曰:「楚琳不去,必爲亂。」乃遣楚琳屯於隴州。 ,楚琳遂與其黨王汾、李卓、牛僧伽等作亂。 荷而 逃,皆獲免。鎰出鳳翔三十里,及二子皆爲侯騎所得,楚琳俱殺之; 判官汪沼、 鎰夜縋而走,判官齊映自水寶出,齊抗爲 楚琳知其謀,乃託故

張元度、柳遇、李漵被殺。

尋贈太子太傅,葬事官給。

使。 原節度使、兼御史大夫;姚況兼御史中丞、行軍司馬。 吏、誓敦誠節、衆頗義之。 知州 隸涇原節度馬璘, 奪贈 令言累遣間諜招誘,河淸輒拘而戮焉。 雖集,蒼黃之際,都無戎器,及涇州甲仗至,軍士大振。 事。 尚書左僕射,葬事官給。 建中四年,節度使姚令言奉詔率兵赴關東,以河淸知兵馬留後,判官、殿中侍御史姚況 馮河淸者,京兆人也。初以武藝從軍,隸朔方節度郭子儀,以戰功授左衞大將軍同正 及令言至京師,所統兵叛,上幸奉天,河淸與況聞之,乃集三軍大哭,因共激勵將 頻以 《偏師禦吐蕃,甚有殺獲之功。歷試太子詹事、兼御史中丞,充兵馬 卽時發甲仗、器械、車百餘輛,連夜送行在所。 興元元年,贈太子少傅。 及駕幸梁州,其將田希鑒潛通泚,使結兇黨害河淸。 俄加河清檢校工部尙書。 特詔褒其誠効,拜四鎭北庭行軍涇 時駕初遷幸,六軍 賊泚及姚

肅後

道,麟德初爲右相,祥道卽從一會伯祖也。今植從父兄齊賢,弘道初爲侍中。 位,章疏六上,乃許,除戶部尙書。尋卒,年四十四,輟朝三日,贈太子太傅。 天,拜刑部侍郎、平章事,從幸梁州。 明年六月,改中書侍郎、平章事。 歲中,加集賢殿大學 部員外郎。 舉進士,大曆中宏詞,授祕書省校書郎,以調中第,補渭南尉,雅爲常衮所推重。及衮爲相, 一,劉氏凡三相。 士、修史。 上遇之甚厚,以容身遠罪而已,不能有所匡輔。 無幾,以疾請告,至是,病甚辭 遷監察御史。居無何,丁母憂。服除,宰相盧朼薦之,超遷侍御史。居數月,以親避除刑 劉從一,中書侍郎林甫之玄孫也。祖令植,禮部侍郎。父孺之,京兆府少尹。從一少 建中末,普王之爲元帥也,遷吏部郎中、兼御史中丞,爲元帥判官。德宗居奉 初,林甫生祥 自祥道至從

其羣從兄弟,競飾興馬,以侈靡相尙, 復衣澣濯之衣,獨居一室,習學不倦, 非詞人儒士不 蕭復字履初,太子太師嵩之孫,新昌公主之子。父衡,太僕卿、駙馬都尉。 少秉淸操,

伯華每歎異之。以主蔭,初爲宮門郎,累至太子

州刺史、湖南觀察使。及爲同州刺史,州人阻饑,有京畿觀察使儲廩在境內,復輒以賑貸 憾之,乃罷復官。 沉廢數年,復處之自若。後累至尙書郎。 大曆十四年,自常州刺史爲潭 爲有司所劾削階。朋友唁之,復怡然曰:「苟利於人,敢憚薄罰。」尋爲兵部侍郎。 之,乃使弟|紘誘焉,曰:「足下之才,固宜居右職,如以別業奉家兄,當以要地處矣。」復對曰: ·僕以家貧而鬻舊業,將以拯濟孀幼耳,倘以易美職於身,令門內凍餒,非鄙夫之心也。 I 縉 廣德中,連歲不稔,穀價翔貴,家貧,將醫昭應別業。時宰相王縉聞其林泉之美,心欲

當此任。 詞不正。」<u>德宗愕然,退謂左右曰:「蕭復頗輕</u>朕。」遂令往<u>江南宣撫</u> 德光被,自用楊炎、盧杞秉政,惛瀆皇猷,以致今日。 今雖危急,伏願陛下深革睿思,微臣敢 此輩只合委宮掖之寄,不可參兵機政事之權。」上不悅,又請別對,奏云:「陛下臨御之初,聖 扈駕奉天,拜吏部尙書、平章事。 復嘗奏日:「宦者自艱難已來,初爲監軍,自爾恩倖過重 建中末,普王爲襄漢元帥,以復爲戶部尚書、統軍長史,以復父名衡,特詔避之, 若令臣依阿偷冤,臣不敢曠職。」盧杞奏對於上前,阿諛順旨,復正色曰:「盧杞之 未行。

官章鼻先知隴州 先時,淮南節度陳少遊首稱臣於李希烈,鳳翔將李楚琳殺節度使張鎰以應朱泚, 留後,首殺豳叛卒數百人,不應楚琳。復江南使迴,與宰相同對訖,復獨留,

臣節; 從一詣復曰:「適飲緒宣旨,令與公商量朝來所奏便進,勿令李勉、盧翰知。」復曰:「適來奏 出,宰相李勉、盧翰、劉從一方同歸中書,中使馬欽緒至,揖從一,附耳語而退,諸相各歸閣。 奏曰:「陛下自返宮闕,勳臣已蒙官爵,唯旌善懲惡,未有區分。 陳少遊將相之寄最崇,首敗 之,上寖不悅。 復累表辭疾,請罷知政事,從之,守太子左庶子。 三年,坐問國公主親累,檢 獨避此之一節?且與公行之無爽,但恐寖以成俗,此政之大弊也。」竟不言於從一。從一奏 論,朝廷有事,尙合與公卿同議。今勉、翰不可在相位,卽去之;旣在相位,合同商量,何故 對,亦聞斯旨,然未論聖心,已面陳述,上意尙爾,復未敢言其事。」復又曰:「唐、虞有僉曰之 校左庶子,於饒州安置。四年,終于饒州,時年五十七。 章鼻名宦最卑,特建忠義。 請令章鼻代少遊,則天下明然知逆順之理。」上許之。復

居位不久。性孝友,居家甚睦,爲族子所累,晏然屛退,口未嘗言。 1復門望高華,志礪名節,與流俗不甚通狎。 及登台輔,臨事不茍,頗爲同列所嫉,以故

幽主於 駕蕭鼎、商州豐陽令韋恪、前彭州司馬李萬、太子詹事李昇等出入主第,穢聲流聞。德宗怒, 爲禱文,位弟佩、儒、偲及異父兄駙馬都尉裴液,並長流端州。公主女爲皇太子妃,卽順宗 部 別第,李萬決殺,昇貶嶺南,蕭鼎、韋恪決四十,長流嶺表。又言公主行厭禱,其子位 國公主者,肅宗之女也,出降駙馬蕭升,升於復爲從兄弟,升早卒。貞元中,蜀州別

也。 降蕭升公。 太子懼 小亦請 與妃離婚。 六年, 郜國薨, 位兄弟及液韶還京師。 液父徽,初尚節國

黴

庸 局 衢 海 院 念 州 丞 事 |柳渾字||夷曠,襄州人,其先自 司 其 而志學棲貧。 馬。 疏 縱。 未至,召拜監察御史。 渾不樂,乞外任,執政惜其才 天寶 初,舉 進 河東徙焉。 士,補單父 臺中執法之地 尉。 ,奏爲左補闕。 六代祖惔,梁僕射。 動限 至德中, 儀矩, 渾性放 爲江西採訪使 明年 , 渾少孤, 除殿中侍御 曠, 皇甫侁 不甚檢束,僚 父慶休, 史, 判 知江 官 累除 至 西 長 拘 租

祐甫 聞。 而 延 及路 火,歸罪 遽入白 大曆初,魏少遊鎭 嗣 恭領鎮 ,少遊驚 於守門瘖 了,復以 問 江西, ,醉僧 ·奴,軍 為都 首伏。 侯 奏署判官, 團 亦 練 ?受財, 副使。 旣 而 累授檢校司封郎中。 同上其狀, 謝日:「微 十二年,拜袁州 二君子,幾成老夫暗劣矣。」自此以公正 少遊信焉。 刺 史。 州理有開元寺僧與徒夜飲 人知奴冤,莫肯言。 渾 興崔

徴服 徒行,遁 年 ', 崔 終 南 站 甫 Щ 谷 入 相, 踰 旬方達 薦爲 諫 行 議 在。 大夫、浙江 扈從 至梁州 東西黜陟 改左散騎常侍。 使, 累遷尙書左丞。及駕在奉天, 初, 渾之歸行在,

列傳第七十五 柳渾

泚籍其名甚,願以致之,猶疑匿在閭里,乃加宰相。及克復,渾尙名載,乃上言:「頃爲狂賊

點穢,臣實恥稱舊名,矧字或帶戈,時當偃武,請改名渾。..

門,虧損風敎,望少責罰,亦可懲勸。」上可其奏。 臣。其祖、父皆以孝行旌表門閭,京城隋朝舊第,季羔一家而已。今被堂姪伯強進狀,請貨 宅召市人馬,以討吐蕃。一開此門,恐滋不逞。討賊自有國計,豈資僥倖之徒? 且毁棄義 **謏傷乘輿器服,杖六十,餘工釋放,詔從之。 復奏:「故尙書左丞田季羔,公忠正直,先朝名** 至中書,渾執日:「陛下若便殺則已,若下有司,卽須議識。且方春行刑,容臣條奏定罪。」以 工爲帶,墜壞一跨,乃私市以補;及獻,上指曰:「此何不相類?」 工人伏罪,上命決死。 貞元二年,拜兵部侍郎,封宜城縣伯。三年正月,加同平章事,仍判門下省。時上命玉

渾以疾稱告,卽日詔下。 疾間,因乞骸骨,優詔不許。 其判門下,主吏白當過官,渾愀然曰: 焉。及白志貞除浙西觀察使,渾奏曰:「志貞一末吏憸人,縱稱廉謹,不當頓居重職。」適遇 且非刑人之地,奈何蹈前非而又甚焉?專立威福,豈尊主卑臣之禮!」滉感悟愧悔,爲霽威 引,心惡其專政,正色讓之曰:「先相公以狷察爲相,不滿歲而罷; 今相公搒吏於省中至死, 丼,上悉仗焉。每奏事,或日旰,他相充位而已,公卿救過不能暇,無敢枝梧者。 先時,韓滉自浙西入覲,朝廷委政待之,至於調兵食,籠鹽鐵,勾官吏贓罰,鋤豪強兼 **渾雖滉所**

列官分職 ,復更撓之,非禮法 也。 千 里辭家,以干微祿, 邑主辭辦,豈慮無能, 矧旌善進賢[,]

事不在此。」故其年注擬,無退量者。

會不 果亦 生長 歡。 俾其所厚謂渾曰:「相公舊德,但節 明之代 可斷 士,而萬 成 有 邊 馬燧前賀日:「今之一盟,百年 ,而舌不可禁也。」自是爲其所擠,尋除常侍,罷知政事。 及 渾 城, ,將校覆沒,兵臨近鎮,上驚**歎**, 斯言乎!」皆頓首俯伏,遽令歸中書。 ,豈又行於夷狄! 有文集十卷。 里知軍戎之情。」自此 瑊 知蕃戎心,今日之事 與 八吐蕃 會盟之日 ·人面獸心,難以信結〔tū,今日盟約, Ŀ 驟 ,誠如渾言。」上變色日:「柳渾 加 御便殿謂宰相曰:「和戎息師,國之大計, 禮異。 內更無蕃寇。」渾曰:「五帝無誥暫之盟,皆在 言於廟堂 即遞其表以示渾。 時張延賞與渾同列,延賞怙權矜己,而 其夜三更,邠寧節度韓遊瓌 則重位可久。」 詰旦, 輝日:「爲吾謝張 貞元五年二月,以疾終,年七 書生,未達 臣竊憂之。」 臨軒慰勉渾日:「卿文儒之 飛驛叩 邊 今日將士與卿 李晟繼言曰:「臣 事 相公, ; 季 嫉渾守正, 苑門,奏盟 大臣智略 末。 柳 渾頭 同

及。 端,往往詣極 渾 警辩 渾母兄 識 ()好諧! ,當時作者,威伏其簡拔,而 ,篤意文章,有重名於開元、天寶間,與蕭穎士、元德秀、劉迅 謔放 達,與人交, 豁然無隱。 趣尚 辨博。 性節儉,不治產業,官至丞 渾亦善爲文,然趨 時 向 相,假宅而居。 和亞。 功,非沉 其練 理創 靇

相數日, ·吾輩方柳宜城,悉爲拘俗之人也。」 則命親族尋勝,讌醉方歸,陶陶然忘其黜免。 時李勉、盧翰皆退罷居第,相謂曰:

循默。 前, 泚、懷光之亂,是失其人也,豈尤其時哉!河淸歿於王事,乃顯忠貞;從一舉自姦人,固宜 延賞排之於後,管仲有言:「任君子,使小人間之,害霸也。」德宗黜賢相,位姦臣,致朱 史臣曰:張鎰、蕭復、柳渾,節行才能,訏謨亮直,皆足相明主,平泰階,而盧祀忌之於

贊曰:得人則興,失人則亡。鎰、復、渾去、宗社其殃。

校勘記

- 本宜宥免 「宥」字各本原作「看」,據唐會要卷五一、冊府卷三二八改。
- 論臧熱 「臧」字各本原無,據本書卷一九六下、吐蕃傳、殘宋本冊府卷九八一補。
- 同谷縣 「谷」字各本原作「父」,據本書卷一九六下吐蕃傳、冊府卷九八一改。
- (国) 西至臨洮 「至」字各本原作「使」,據本書卷一九六下、吐蕃傳、冊府卷九八一改。

金

- (会) 惟神照 臨 「惟神」二字各本原無,據本書卷一九六下、吐蕃傳、冊府卷九八一補。
- (字) 就壇之西南隅 「壇」字各本原作「疆」,據本書卷一九六下、吐蕃傳、冊府卷九八一改。
- 2 降蕭升 「降」字各本原作「尙」,據合鈔卷一七六纛復傳改。
- (元) 五帝無誥誓之盟……難以信結 無誓誥,三王無詛盟,詛盟之興,皆在季末。 此處疑有脫誤。 今盛明之代, 豈可以季末之事, 行於夷狄! 唐書合鈔補正卷五引影宋本舊唐書作:「五帝 夫夷狄

人面獸心,難於結信。」

舊唐書卷一百二十六

列傳第七十六

李揆 李涵 陳少遊 盧慧 裴

知制誥。扈從劍南,拜中書舍人。 中書試文章,擢拜右拾遺。改右補闕、起居郞,知宗子表疏。遷司勳員外郞、考功郞中,並 監、贈吏部尙書成裕之子。少聰敏好學,善屬文。開元末,舉進士,補陳留尉,獻書闕下,詔 李揆字端卿,隴西成紀人,而家于鄭州,代爲冠族。秦府學士、給事中玄道玄孫,祕書

間,美聲上聞,未及畢事,遷中書侍郎、平章事、集賢殿崇文館大學士、修國史。 及切韻本於床,而引貢士謂之曰:「大國選士,但務得才,經籍在此,請恣尋檢。」由是數月之 不至者,文史之囿亦不能摛詞,深昧求賢之意也。其試進士文章,請於庭中設五經、諸史 乾元初,兼禮部侍郎。揆嘗以主司取士,多不考實,徒峻其隄防,索其書策,殊未知藝

傳第七十六 李揆

列

聖,今若加皇后之號,與韋氏同。陛下明聖,動瓊典禮,豈可蹤景龍故事哉!」肅宗鶩曰: 章,皆當代所推。」故時人稱爲三絕。 其爲舍人也,宗室請加張皇后「翊聖」之號,肅宗召揆 社稷之福,天下幸甚,臣不勝大慶。」肅宗喜曰:「殷計決矣。」自此頗承恩遇,遂蒙大用 問之,對曰:「臣觀往古后妃,終則有諡。生加尊號,未之前聞。」景龍失政,韋氏專恣,加號翊 因對見,肅宗從容曰:「成王嫡長有功,今當命嗣,卿意何如?」揆拜賀曰:「陛下言及於此, 「凡才幾誤我家事。」遂止。時代宗自廣平王改封成王,張皇后有子數歲,陰有奪宗之議。揆 接美風儀,善奏對,每有敷陳,皆符獻替。 肅宗賞歎之,嘗謂揆曰:「卿門地、人物、文

衙,文武區分,以相伺祭。 今以羽林代金吾警夜,忽有非常之變,將何以制之?」 遂制罷羽 揆上疏曰:「昔西漢以南北軍相統攝,故周勃因南軍入北軍,遂安劉氏。 時京師多盜賊,有通衢殺人置溝中者,李輔國方恣橫,上請選羽林騎士五百人以備巡 皇朝置: 南北

員,其制旨曰:「扇湖南之八州,沮江陵之節制。」揆旣黜官,數日,其兄皆改授爲司門員外 滯於冗官,竟不引進。 |揆在相位,決事獻替,雖甚博辨,性銳於名利,深爲物議所非。 又其兄皆自有時名(1), 懼其重入,遂密令直省至諲管內構求諲過失。 同列呂諲,地望雖懸,政事在揆之右,罷相,自賓客爲用南節度,聲問

郎。後累年,揆量移歙州刺史。

謂晉 州,凡十五六年,其牧守稍薄,則又移居,故其遷徙者,蓋十餘州焉。 元載以罪誅,除揆睦州 當徙職 行至鳳州 刺 史, 卿 初 入拜國子祭酒、禮部尚書,爲盧杷所惡。 ,遂奏爲試祕書監,江淮養疾。 曰:「龍章鳳麥之士不見用,鏖頭鼠目之子乃求官。」藏銜恨頗深。 揆秉政,侍中苗晉卿累薦元載爲重官。揆自恃門望,以載地寒,意甚輕易,不納,而 以疾卒,興元元年四月也,年七十四。 既無祿俸,家復貧乏,孀孤百口,丐食取給。 德宗在山南, 令充入蕃會盟使, 加左僕射。 贈司空,喪事官給。 及載登相位,因揆 萍寄諸

留後杜鴻漸,草牋具朔方兵馬招集之勢,軍資倉儲庫物之數,咸推涵宗枝之英,純厚忠信 乃令涵奉牋至平涼謁見。 夫、兼侍御史。 李涵 ,高平王道立曾孫云。父少康,宋州刺史。 朔方節度郭子儀奏爲關內鹽池判官。 涵敷奏明辯,動合事機,肅宗大悅,除右司員外郎,累至司封郎 肅宗北幸平凉,未有所適。 涵簡素恭愼, 有名宗室, 累授贊善大 **涵與朔方**

寶應元年,初平河朔, 列 傳 第 七 + 六 李 涵 代宗以涵忠謹洽聞,遷左庶子、兼御史中丞、河北宣慰使。會丁 陳 少 遊

中、宗正少卿。

官終喪制,代宗以其毀瘠,許之。服闋,除給事中,遷尙書左丞。 母憂,起復本官而行,每州縣郵驛,公事之外,未嘗啓口,疏飯飲水, 大曆六年正月,爲蘇州刺史、兼御史大夫,充浙江西道都團練觀察等使。 以幽州之亂, 席地而息。 充河朔宣慰 使還, 十一年,來 請罷

朝,拜御史大夫。京畿觀察使李栖筠歿,代之。 月卒,追贈太子太保。 昔是今非,罔我何甚!豈得謬當朝典,更廁周行,宜佐遐藩,用誠薄俗。 可 獻州司馬同正。 」 諱,歎其忠於所事,亦謂確以上聞。乃加殊恩,俾膺厚賞。 近聞所陳『少』字,往歳已任少卿, 由是改涵爲檢校工部尙書、兼光祿卿,仍充山陵副使。 妄有奏議。」詔曰:「呂渭僭陳章奏,爲其本使薄訴官名。 殷以宋有司城之嫌,晉有詞曹之 如此,實太平之道。」除渭司門員外郎。 尋有人言:「涵昔爲宗正少卿,此時無言,今爲少傅, 言:「涵父名少康,今官名犯諱,恐乖禮典。」宰相崔祐甫奏曰:「若朝廷事有乖舛, 德宗卽位,以涵和易,無剸割之才,除太子少傅,充山陵副使。涵判官殿中侍御史呂渭上 無幾,以右僕射致仕。 興元元年九 羣臣悉能

陳少遊,博州人也。 祖嚴,安西副都護。 父慶,右武衞兵曹參軍,以少遊累贈工部尚

升 書。 坐 日 少 遊 相 問 幼聰辯,初習莊、列、老子 難。 及會,少遊攝 齊升坐,音韻 ,,爲崇玄館學生,衆推 流清辯 觀 者 屬 目。 引講經。 所 引文句,悉兼 時同列有私習經義者,期 他義 諸 生不能

對

了,甚爲

大學士陳希烈所歎賞,又以同宗,遇之甚

厚

兵 爲 直、 改 長 於於 部 檢 副 監察殿中 使、御 郞 校 權 旣 中、兼 職方員外郎。 變 擢第 時推 史中丞、陳鄭二州留 補渝州 侍御史。 侍御史、節度 幹濟,然厚斂財貨 南平令、 **充使檢校郎官**, 遷晉州 到官。 刺史,改同州 理甚有聲。 後。 寶 ,交結權倖, 應元 自少遊始也。 年, 至德中, 刺 入爲 史,未 以是頻獲遷擢。 金部員 河東節度王思禮奏爲參謀, 視事 明年 外郎。 又歷晉、鄭二州刺 僕固 無 懐 尋授侍御史、 恩奏爲 澤潞節度使李抱玉 河北 史。 迴紇 副 累授大理司 少遊爲理, 元 糧 帥 料使, 判官、

常 以 職 一,候其下 須 家果 桂管觀 《數求 身獨 永泰二年, 甚 供 外人,方可 重 直 祭使。 + ,又屬時物騰貴,一月過千餘貫。 ,際晚謁之,從容曰:「七郎 郎之費, 抱玉又奏爲隴右行 少遊以強徼)取濟。 每歲 倘 請 獻錢 有 退遠 輸 五 誠 , ?軍司馬,拜檢校左庶子,依前兼中丞。 欲規求 萬貫。 供 億者 家中人數 近 今見有大半,請卽受納, ,但留心庇覆之,固易爲 。」少遊日:「據此 郡。 **殺**傾? 時中 每月所 官董秀掌樞密用事 之費, 費復幾何? 俸錢不足支數日, 力耳。 餘到 少遊 官續送。 其年, 少遊 秀日:「久忝 雖 除桂州 乃宿 **免貴人** 其餘 於其 近 請 刺

列

僔

觀察使 深愴 勞慮 分。」時少遊 違 亦 可 但 又已納賄於元載子仲武矣。 乎? 恐不 生還再觀顏色矣。」秀遽 秀既 踰 於始望,欣愜頗甚,因與之厚相結。 秀、載內外引薦,數日,拜宣州刺 日:「中丞美才,不 當遠官, 少遊言 訖 請從容旬 史、宣欽池 泣曰:「南 日 方炎瘴 ,冀竭蹇 都 團練

約 虚 鹽 節 在 小 相位 每 惠 度 日 而 萬 斂積 , 胥 觀察使,仍 大 一斗更加一 陰使 年 曆 .貫,又多納賂於用事 吏得職 深 五. 財寶 人何其過 年, 以 加銀青 ,人亦獲安。 過 改越州 百文。 累巨億萬,多賂遺權貴,視文雅淸流之士,蔑如也。 犯 失,密以 漸 光祿 見疑忌, 刺史、兼御史大夫、浙東觀察使。 少遊十餘年間、三總大藩、 中官駱 大夫,封 上聞。 及朝 少遊亦稍疏之。 延多事 奉先、 潁 代宗以爲忠 Щ 劉淸潭、吳承倩等, ,奏請本道兩稅錢千增二百。 縣開國子。 ,待之益 無 皆天下殷厚處也。 何 所在悉心綏輯、 載子伯和貶官揚州, 厚。 八年,遷揚州大都督府長史、淮南 ,由是美聲達於中禁。後 而 初結元載,每年饋金帛 以故徵求貿易, 多以任 因 詔 諸 少遊外與之交 道 數爲政,好行 悉 如 見元載 淮 且無

退軍盱眙 盧杷早年與之同在僕固懷恩使府,故驟加其官秩。 上 卽 位 ,累加檢 又 加加 檢 校禮部、兵部 校左僕射,賜實封 尚書。 建中三年,李納 三百 戶。 其年, 反 就加同平章事。 叛,少遊以師收除、海等州 關播嘗爲少遊賓

承敕 爲吳仲孺所困,崔衆供軍吝財,爲光弼所殺,故頬言及之。 入京師者,悉爲少遊奪之。信自謁,少遊止焉,長揖而遣,旣懼禍,奔往白沙。 |判官崔顩就||告強索其納給文曆,丼請供二百萬貫錢物以助軍費,||恰答曰:「所用財帛,須 時 命。」未與之。 所總賦稅錢帛約八百萬貫在焉,少遊意以爲賊據京師,未卽收復,遂脅取其財物。先 四 年十月,駕幸奉天,度支汴東兩稅使包佶在揚州,尙未知也。恰判官崔沅遽報少遊, **顧勃然曰:「中丞若得,爲劉長卿;不爾,爲崔衆矣。」長卿嘗任租 佶大懼,不敢固護,** 財帛將轉輸 少遊又遣判 「庸使,

他盜,供費軍旅,收亦何傷。」時方隅阻絕,國命未振,遠近聞之大驚,咸以聖情達於變通, 但領胥吏往江、鄂等州。恰於彈丸中置表,以少遊脅取財帛事。 「少遊取包信財帛,有之乎?」對曰:「臣發揚州後,非所知也。」上曰:「少遊國之守臣,或防 會少遊使繼 至, , 上問日: 明

信先有兵三千,守禦財貨,令高越、元甫將焉,少遊盡奪之。 隨信渡江者,又爲韓滉所留,信

官房孺復召之,信愈懼,託以巡檢,因急棹過江,妻子伏案牘中。至上元,復爲韓滉所拘留。

壽、舒、廬,尋令罷壘,韜戈卷甲,佇候指揮。」少遊又遭巡官趙詵於鄆州結李納。 僭號,遣其將楊豐齎僞赦書赴揚州,至壽州,爲刺史張建封侯騎所得,建封對中使二人及少 及李希烈陷汴州,聲言欲襲江淮。少遊懼, 乃使參謀温述 由壽州送款於希烈日:「濠、 其年,希烈

見萬里。少遊後聞之,乃安。

列傳第

七十

大

陳少

盧燕

烈僞起居注「某月日陳少遊上表歸順」。少遊聞之,慚惶發疾,數日而卒,年六十一,贈太尉, 府殘破,無以上塡,乃與腹心孔目官等設法重稅管內百姓以供之。 遊 奪財賦事狀,少遊大懼,乃上表,以所取包佶財貨,皆是供軍急用, 先平壽州 判官許子瑞廷責豐而斬之。希烈聞之大怒,即署其大將杜少誠爲僞僕射、淮南 ,後取廣陵。 建封於霍丘堅栅,嚴加守禁,少誠竟不能 進。 今請據數卻納。 無何, 後包佶入朝,具奏少遊 劉洽收汴州,得希 節 旣而州 度,

賻布帛,葬祭如常儀。

秘書少監。 觀察使。 爲政苛躁。 金州刺史。 盧 甚, 貞元二年七月,以疾終。 幽州范陽人也,貞觀中工部侍郎義恭玄孫也。父子騫,潁王 宰相楊炎遇之頗厚,召入左司郎中、京兆 盧杞甚惡之,諷有司彈奏,坐貶撫州司馬同正,改饒州刺史, 累授閬州錄事參軍、監察殿中御 少尹,遷大尹。 基無 府諮議參軍 遷福州 術學, 史、侍御史、 刺史、 善事 ,以基贈 權要, 福建

河 南 府參軍 裴諝字士明 ,通達簡率,不好苛細。 河南洛陽 人。 父寬 積官至京兆倉曹 ,禮部尙書,有重名於開元、天寶間。 了,丁父喪,居東都。 , 是時, 諝 少舉明經, 安 禄 Ш 盗 補 陷

宗室 捕騎 復爲史思明所陷,諝藏匿山谷。 一京,東都收復,遷太子司議郞。 數 爾陰緩之,全活者數百人。 十跡逐得諝。 思明見之,甚喜,呼爲郎君,不名,僞授御史中丞,主擊斷。時思明殘殺 思明嘗爲醑父將校,懷舊恩,又素慕醑名,欲必得之,因令 又嘗疏賊短長以聞,事泄,思明大怒詬駡,僅而 無幾, 號王巨奏署侍御史、襄鄧營田判官, Ţ ·母憂。 **死**死。 東 賊 都

(糖、<u>庫</u> 問人之疾苦,而乃責臣以利。 以 前坐曰:「微公言,吾不聞此。」 拜左 平,除太子中允,遷考功郎中,數召見言事 「何思?」對曰:「臣自河東來,其間所歷三百里,見農人愁歎,穀菽未種。 爲御史中丞,爲元載 問辭:「権酤之利,一歲出 |代宗居陝,醑步懷考功及南曹二印赴行在,上見而謂之曰:「疾風知勁草,果信矣。」 將 亳 三州刺 史。 入爲右金吾將軍 所排,爲河東道 入幾何?」

諝久之不對。上復問之,對曰:「臣有所思。」上曰: 孟子曰:理 一司郎 租 中。 國者,仁義而已,何以利爲?由是未敢即對也。」上 庸鹽鐵等使。 上時訪以 事,執政者忌之,出爲虔州刺史,歷 時關輔大旱, 諝 入計, 誠謂陛下軫念,先 代宗召見便

建中初, 列 傳 第 上以 七 + 刑名理天下,百吏震悚。 六 翇 箭 時十月禁屠殺,以甫近山陵,禁益嚴。尚父、汾陽 三五六七

右庶子,改千牛上將軍。會吐蕃入寇,尋拜吏部侍郎、兼御史大夫,爲吐蕃使,不行。無幾, 轉太子賓客、兵部侍郎、河南尹、東都副留守。 言。今輕猾之人,援桴鳴鼓,始動天聽,竟因纖微。若然者,安用吏理乎!」上然之,悉歸有 別置三司以決庶獄,辯爭者輒擊登聞鼓,諝上疏曰:「夫諫鼓謗木之設,所以達幽枉,延直 衆。今發其細過,以明不弄權耳。吾上以盡事君之道,下以安大臣,不亦可乎?」時於朝堂 |公有社稷功,豈不爲蓋之?」|醑笑曰:「非爾所解。且|郭公| 威權太盛,上新卽位,必謂黨附者 王郭子儀隸人殺羊以入,門者覺之,謂列奏狀,上以爲不畏強禦,累遣宜諭。或謂謂曰:「郭 司。醑以法吏舞文,多挾宿怨,因獻獄官箴以諷。無何,坐所善僧抵法,貶閬州司馬。徵爲

九年十一月,以疾終,年七十五,贈禮部尚書。 辭自河南凡五代爲官,入視事,未嘗當正處,不鞫人於贓罪,以寬厚和易爲理。

要巧宦,祭言觀行,皆無可稱。一涵節行著聞,諝和易爲理,庶幾近仁也。 史臣曰:李揆發言沃心,幸遇明主;蔽賢固位,終非令人。少遊逐勢利隨時,盧惎事權

贊日字、陳、盧甚,言行非眞。涵、醑和易,庶乎近仁。

E

(三) 道立 各本原作「道之」,據冊府卷
(三) 道 新書卷一五○李揆傳作「楷」。

各本原作「道之」,據冊府卷八九九、新書卷七八永安王孝基傳改。

三五六九

舊唐書卷一百二十七

列傳第七十七

姚令言 張光晟 源休 喬琳 張涉 蔣鎭 洪經綸

彭偃

節度使、涇州 進 正,爲衙前兵 身,不樂軍旅,頻表薦令言謹 姚令言, 刺 馬使,改試太常卿、兼御史中丞。 河中 史、兼御史大夫。 人也。 少應募,起於卒伍, 肅 ,堪任將帥。 隸涇原節度馬璘。以戰功累授金吾大將軍同 **嗥尋歸朝廷,遂拜令言爲四鎭北庭行營涇原** 建中元年, 孟暤爲涇原節度留後, 自以文吏

賞,及師上路, 勢甚危急。 建中四年,李希烈叛,寇陷汝州, 十月,詔令言率本鎭兵五萬赴援。 無所賜。 時詔京兆尹王翃犒軍士,唯糲食菜啖而已,軍士覆而不顧,皆憤 韶哥舒曜率師攻之,營于襄城。 涇師離鎮, 多攜子弟而 來,望至京師以獲厚 希烈兵數萬圍襄城,

列

傳第

七

+

七

姚

令

言

約東都有厚賞,兒郎勿草草,此非求活之良圖也。」衆不聽,以戈環令言請退,令言急奏之。 怒,揚言曰:「吾輩棄父母妻子,將死於難,而食不得飽,安能以草命捍白刃耶! 國家瓊林、 于丹鳳樓下。是日,德宗倉卒出幸,賊縱入府庫輦運,極力而止。 上恐,令內庫出繒綵二十車馳賜之,軍聲浩浩,令言不能戢。街市居人狼狽走竄,亂兵呼 大盈,實貨堆積,不取此以自活,何往耶?」行次滻水,乃返戈,大呼鼓譟而還。 日:「勿走,不稅汝間架矣!」 德宗令普王與學士姜公輔往撫勞之,纔出內門,賊已斬關, 。 令言曰:「比 陣

言爲侍中,與源休同知賊政事。 矣。」泚嘗節制涇州,衆知其失權,廢居快快,又幸泚寬和,乃請令言率騎迎泚於晉昌里。 泚 初遲疑,以食飼之,徐觀衆意,旣而諸校齊至,乃自第張炬火入居含元殿。 時太尉朱泚罷鎮居晉昌里第,是夜,叛卒謀曰:「朱太尉久囚於宅,若迎爲主,大事濟 既僭號,乃以冷

讓,子當曹參可矣。」時朝士在賊廷者,聞之皆笑,謂源休爲火迫酇侯。朱泚敗,令言與 與源休論功,令言自比蕭何,源休曰:「帷幄之謀,成溱之業,無出予之右者。吾比蕭何無 張廷芝尙有衆萬人,從泚將入吐蕃。至涇州,欲投田希鑒,希鑒僞致禮誘之,與泚俱斬首來 既以身先逆亂,頗盡心於賊,害宗室,圍奉天,皆令言爲首帥也。 羣兇宴樂,既醉,令言

常使 怒焉。 光晟遂陳潼關之事,思禮大喜,因執其手感泣曰:「吾有今日,子之力也。 求子頗久,竟此相 卽令之太原。 言者,恥以舊恩受賞。今使君憂迫,光晟請奉命一見司空,則使君之難可解。」雲京然其計, 而斃,光晟時在騎卒之中,因下,以馬授思禮。 人密求之。無何,思禮爲河東節度使,其偏將辛雲京爲代州刺史,屢爲將校譖毀,思禮 張光晟,京兆盩厔人,起於行間。 雲京惶懼,不知所出。 乃謁思禮,未及言舊,思禮識之,遽曰:「爾豈非吾故人乎?何相見之晚也! 光晟時隸雲京麾下,因間進曰:「光晟素有德於王司空,比不 天寶末,哥舒翰兵敗潼關,大將王思禮所乘馬中流矢 思禮問其姓名,不告而退,思禮陰記其形貌,

少卿 遇,何慰如之?」命同榻而坐,結爲兄弟。 光晟遂述雲京之屈,思禮曰:「雲京比涉謗言,過 亦不細,今爲故人,特捨之矣。」即日擢光晟爲兵馬使,賚田宅、綠帛甚厚,累奏特進,試太常 ,委以心腹。 及雲京爲河東節度使,又奏光晟爲代州刺史。

禦之計。」光晟旣受命,至鎮,威令甚行。建中元年, 還國,興載金帛,相屬於道。 大曆末,遷單于都護、兼御史中丞、振武軍使。代宗密謂之曰:「北蕃縱橫日久,當思所 光晟訝其裝橐頗多,潛令驛吏以長錐刺之,則皆輦歸所誘致京 迴紇突董梅錄領衆丼雜種胡等自京師

列傳

÷

十

-1:

張光晟

源休

阻蕃 胡歸 師 婦 情 人 國 也。 復 命 徵 拜右金吾將軍。 遂紿突董及所領徒悉令赴宴,酒酣,光晟伏甲盡拘而殺之,死者千餘人,唯留二 遂部其婦 人, 給糧還京,收其金帛,賞賚軍士。 迴紇猶怨懟不已, 又降爲睦王傅, 後週紇遣使來訴,上不欲甚 尋改太僕卿, 負才怏怏不

得志、

拂衣 晟以 表請 東渭 、還營。 特減 數千人送泚出城,因率衆迴降於晟。 橋 賊 泚 凡十餘里。 其罪。 僭逆,署光晟僞節度使兼宰相。 展不得已,拘之私第,後有詔言其狀跡不可原,乃斬之。 每大宴會,皆令就坐,華州節度使駱元光詬之曰:「吾不能與反虜同席 光晟潛使於李晟,有歸順之意。 及泚衆頻敗,遂擇精兵五千配光晟,營於九曲,去 晟以其誠款,又愛其材,欲奏用之,俾令歸私第, 晟進兵入苑, 光晟勸賊泚宜速西奔,光

卽 使 支部 判 源休, 官 侍 遷 郞 | 虞部| 相州 王 翊 臨潭人,京兆尹光輿之子也。 員 女也。 外郎。出 因 小忿而離,妻族上訴,下御史臺驗理, 潭州 刺史,入爲主客郎中,遷給事中、御史中丞、左庶子。 **休遲留不答款狀,除名,配** 其妻,

流藻州

久之,移岳州

離 絕之時 建 中 ', 炎 初 楊 風 開休、野 炎執政,以京兆尹嚴郢威名稍著,心欲傾之。 有隙 休自 流 人為京兆 少尹 俾令伺郢 野,即王翊甥婿也。 過失。 休旣 職 休與王 || 理 氏

休來 宰相 今以 等 薄 危 之 而 四 親 也? 屍。 善 死 mi 居常怨望。 我 朝 水 ,非天子命也(ii)。」又問:「使者背唐國 頡 還 初欲遂絕其使,令休還,待命于太原。 炎怒之, 突董者 洗 國 于思迦坐大帳 休 凡將殺者數矣,言頗悖慢, 宰相 Ų 人皆欲殺 竟不得見其 ,不亦善乎 盧杷 , 奏令以本官兼御 即武義可汗之叔父也二。 汝,唯我不然。 又恐復命之日以 ,立体等於帳外雪中, 可 汗。 所 欠吾馬 尋遺赤心等歸,與之帛十萬疋、金銀 史中 汝國 直 乃引去, 口 絹 逑, 辯結恩, 一百 .已殺突董等,吾又殺汝,猶以血洗血,汙益 奉使迴紇。 ,供餼甚薄,留之五十餘日, 久之方遣,仍令休歸其突董 詰殺突董等故。 屍旣至, 八十萬疋,當速歸之。」遣散支將軍 負罪當死 將 至太原, 可汗令宰臣已下具綵 休至 不 振武 能自戮耶?不然, 休日:「突董等自 遽奏爲光祿卿。 軍 十萬兩,償其 使張光晟已殺 乃得還。 一、翳 服車 密施 何假 1與張 休以 (馬直。 可汗 康 大 馬 其 赤心 光是 手於 迴紇 甚 來 小 遠使賞 使 梅 迎 爾 突董 休履 等隨 我殺 謂 忿 錄 其 吾 休 鬭

退。 及休至 會 涇 原兵扳, 一,遂屛 人移 立 朱 時 泚 爲主。 言 1多悖逆,盛陳成敗,稱述符命,勸令僭號。 初 但稱 太尉, 朝官謁泚者,悉勸奉迎 之變駕, 泚悅其言,以休爲宰 既不 合泚 意 而

列

傳

第

泚 焉。 |休之逆,甚於|朱泚。」朝 相 敗 判 走 又勸泚鋤翦宗室 度 休隨 支。 休 至寧州。 迻 爲謀 一,以絕人望,命萬年縣賊曹尉楊偡專其斷決, 泚死,休走鳳翔,爲其部曲所殺 主 廷大臣之奔竄不獲者,多爲休所 ,至於兵食軍資,遷除補擬, 內外容謀, 傳首來獻。 誘 致 以 至 一稟休 工戮辱, 休三子並斬于東市,籍沒 諸王子 畫。 職休 孫 5遇害不 故時人云:「源 而爲,蓋 可勝數。 非

南郭令、 方 懷州 院 識 論 度 御 節 材 史 刺 度郭子儀辟爲掌書記,尋 改檢校駕 奏不合時。 ~畢耀 略 琳 史。 ,改殿中侍御 ,太原人。少孤貧志學,以文詞稱。 堪備 初與琳 琳 素與張 部 大 鄓 用 倖居相位,凡八十餘日 中日、果綿遂三州刺 嘲誚往復,因成 大 因 史, 涉 友善,上在春宮,涉嘗爲侍讀。及嗣位,多以政事 拜 充 御 山 史大夫、平章事。琳本粗 南 拜監察御史。 節度張獻誠 | 釁隙,遂以公事 , 史、兼御 除工 行 琳 天寶初、舉進士,補成武尉,累授興平尉。 軍 一部尙書,罷知政事,尋加迎皇太后副使。 倜儻 司 史中丞。入爲大理 馬。 耳 疏 相 ,材,又年高有耳疾,上每顧 誕,好談 使罷, 告訴, 爲劍南東川節度鮮于叔明 坐貶巴州員外司戶。遂起 a 諸,侮謔僚列, 少卿、國子祭酒 詢訪於涉,盛稱 頗 無 問 禮 ,對答失 檢。 出 爲 剉 同

施。|琳掌賊中吏部,選人前請曰:「所注某官不穩便。」|琳謂之曰:「足下謂此選竟穩便乎?」 之,遂令數十騎追至京城,俾爲僞吏部尙書。令源休被公服,饋肉食,琳雖辭讓,而僧言求 上悵然,賜之所執策曰:「勉爲良圖,與卿決矣。」後數日,乃削髮爲僧,止仙遊寺。 賊泚聞 虧臣節,自受逆命,頗聞譏諧悖慢之言,背義負恩,固不可捨,命斬之。 臨刑數曰:「喬琳以 及官軍收京師、當處極刑、時琳已七十餘、李晟憫其衰老、表請減死。 遲留,上以琳舊老,心敬重之,慰諭頗至,以御馬一匹給焉。又懇辭以老疾不堪山阻登頓, 七月七日生,亦以此日死,豈非命歟!」 朱泚之亂,扈從至奉天,轉吏部尙書,遷太子少師。再幸梁、洋,琳從至盩厔,託以馬乏 上以其累經重任,頓

唯賢是擇,故求人於不次之地。 小之事皆咨之。翌日,詔居翰林,恩禮甚厚,親重莫比,自博士遷散騎常侍。上方屬意宰輔 司日試萬言,時呼張萬言。德宗在春宮,受經于涉。及卽位之夕,召涉入宮,訪以庶政,大 數月,琳以不稱職罷,上由是疏涉。 張涉者,蒲州人,家世儒者。涉依國學爲諸生講說,稍遷國子博士,亦能爲文,嘗請有 涉舉懷州刺史喬琳爲相,上授之不疑,天下聞之者皆愕然。 俄受前湖南都團練使辛京杲贓事發,詔曰:「尊師之道,

三五七七

第七十

張沙

蔣

鉞

田

禮 有所加 ; 議故之法 恩有所掩。 張涉賄賂交通,頗駭時聽,常所親重 良深歎惜。 宜放 飆

之上瑞。」上以秋霖稍多,水潦爲患,不宜 給事中、工部侍郎,以簡儉稱於時。 水所入,其味多苦。 請宣付史館,丼請置神祠,錫其嘉號寶應 拾遺、司封 常州 員外 義 郎,轉諫議大夫。 興 韓滉慮鹽戶減稅,詐奏雨不壞池,池生瑞鹽,鎭庇之飾詐,識者醜之。轉 人, 尚書左丞冽之子也。 時戶部侍郎、判度支韓滉上言:「河中鹽池生瑞鹽,實土德 生瑞, 靈 慶 池。 與兄鍊並以文學進。 命鎭馳驛檢行之。鎭奏與滉同, 時霖潦彌月,壞居人廬舍非 天寶末舉賢良, ,鹽池爲潦 仍上表賀, 累授左

復謀竄 躓 擁 在 鎭 鄠。 墮 潘澗 而 其妹壻源溥 匿,竟以性懦畏怯,計終不果。然源休與泚頻議,欲逼脅潛藏衣冠,大加殺戮 至 鍊與源休聞之大喜,遂言於賊泚。 中,傷足不能進。 ,署爲僞宰相。 ,即休之弟也,以姻媾之故,與休交好。 旣知不免,每憂沮, 時兄鍊已與源休相率受賊僞官。 泚素慕鎭清名, 常懷 刃將 自裁, 涇師之叛, 鎭潛竄 即令騎 鎮僕 多爲兄鍊所救 二百求之鄂縣 人有逃歸投鍊 ,夜至鄂縣西,馬 而 罷。 ,云鎭病足 | 鎭輒力 數 明日 日 後

爭救,獲全者甚衆。 至是,與兄鍊等並授僞職,斬於東市西北街。

弟亦以敎義禮法爲己任,而貪祿愛死,節隳身戮,爲天下笑。 初 ,鎭父洌,叔渙,當禄山、思明之亂,並授僞職,然以家風修整,爲士大夫所稱。

> |鎭 兄

以符停其兵四萬人,令歸農畝。 服厚給之,各令還其部伍,自此人堅叛心,由是罷職。及朱泚反,僞授太常少卿。 爾等在軍旅,各有父母妻子,旣爲黜陟使所罷,如何得衣食?」遂大哭。悅乃盡出家財衣 洪經綸,建中初爲黜陟使。 至東都,訪聞魏州田悅食糧兵凡七萬人,經綸素昧時機,先 田悅僞順命,即依符罷之;而大集所罷兵士,激怒之曰:

蘭若、道場無名者皆廢」。德宗曰:「叔明此奏,可爲天下通制,不唯劍南一道。」下尙書集議。 等:上寺留僧二十一人(10);上觀留道士十四人,降殺以七,皆精選有道行者,餘悉令返初。 南東川觀察使李叔明上言,以「佛、道二教,無益于時,請粗加澄汰。其東川寺觀,請定爲二 彭偃,少負俊才,銳於進取,爲當塗者所抑,形於言色。大曆末,爲都官員外郎。 時|劍

三五七九

列傳第七十七

洪經綸

彭偃

偃獻議曰:

明, 不能行非常之事。今陛下以惟新之政,爲萬代法,若不革舊風,令歸正道者,非 王者之政,變人心爲上,因人心次之,不變不因,循常守固者爲下。 故非有獨見之

欺,而去者未必非,留者不必是,無益於國,不能息姦。 矣,況是苟避征徭,於殺盜淫穢,無所不犯者乎!今叔明之心甚善,然臣恐其姦吏詆 亦已甚矣。且佛之立教,清淨無爲,若以色見,卽是邪法,開示悟入,唯有一門,所以三 滅,其亦數乎!或至坑殺,殆無遺餘。前代帝王,豈惡僧道之善如此之深耶?蓋其亂人 被于中國,去聖日遠,空門不行五濁,比丘但行粗法。 也。 力持,難致遠耳。 乘之人,比之外道。況今出家者皆是無識下劣之流,縱其戒行高潔,在于王者,已無用 當今道士,有名無實,時俗鮮重,亂政猶輕。唯有僧尼,頗爲穢雜。 既不變人心,亦不因人心,強制 爰自後漢,至于陳、隋,僧之廢 自西方之教,

衣食,歲計約三萬有餘,五丁所出,不能致此。舉一僧以計天下,其費可知。 征,此古之常道也。今天下僧道,不耕而食,不織而衣,廣作危言險語,以惑愚者。一僧 臣聞天生烝人,必將有職,遊行浮食,王制所禁。 故有才者受爵祿,不肖者出租 陛下日旰

命。」列子曰:「不班白,不知道。」人年五十,嗜慾已衰,縱不出家,心已近道,況戒律檢 其情性哉!臣以爲此令旣行,僧道規避還俗者固已太半。其年老精修者,必盡爲人師, 則陛下之國富矣,蒼生之害除矣。其年過五十者,請皆免之。夫子曰: 「五十而知天 爲平人者聽。但令就役輸課,爲僧何傷。臣竊料其所出,不下今之租賦三分之一,然 女道士未滿五十者,每年輸絹二疋;其雜色役與百姓同。有才智者令入仕,請還俗 憂勤,將去人害,此而不救,奚其爲政?臣伏請僧道未滿五十者,每年輸絹四疋;尼及

則道、釋二教益重明矣。

丞崔宣、賊將杜如江、吳希光等十三人,李晟收之,俱斬於安國寺前。 家,爲賊所得。 朱泚素知之,得偃甚喜,僞署中書舍人,僭號辭令,皆偃爲之。 賊敗,與僞中 議者是之,上頗善其言。大臣以二敎行之已久,列聖奉之,不宜頓擾,宜去其太甚,其議 偃以才地當掌文誥,以躁求爲時論所抑,鬱鬱不得志。涇師之亂,從駕不及,匿於田

史臣曰:肇分陰陽,爰有生死,修短二事,賢愚一途。 故君子遇夷險之機, 不易其節;

委任,危輸款誠;源休雖日士流,甚於元惡;喬琳巧辭眞主,俯就僞官;蔣鎭貪祿隳節,皆 小人昧逆順之道,而陷於刑。鴻毛泰山,斯爲至論。令言遠總師徒,首爲叛逆;光晟初當

贊曰:時爭逆順,命繫死生。 君子守節,小人正刑。

日小人。經綸之徒,不足言爾。

校勘記

[1] 武義可汗 「武」字各本原無,據冊府卷六六三補。

(11) 非天子命也 「命」字各本原無,據冊府卷六六三補。

(三) 改檢校駕部郎中 「改」字各本原作「故」,據漢校本、合鈔卷一七八喬琳傳改。

(图) 上寺 各本原作「上等」,據冷鈔卷一七八彭偃傳改。

舊唐書卷一百二十八

列傳第七十八

段秀實 子伯倫 顏真卿 子類 碩 會孫弘式

段秀實字成公,隴州汧陽人也。 祖達,左衞中郎。父行梁,洮州司馬,以秀實贈揚州大

都督。 于仙芝,以秀實爲判官,授斥候府果毅。十二載,封常清代仙芝,討大勃律,師次賀薩勞城 責之曰:「軍敗而求免,非丈夫也。」嗣業甚慚,遂與秀實收合散卒,復得成軍。 靈祭,舉兵圍怛邏斯,黑衣救至,仙芝大衂(こ)軍士相失。 天寶四載,安西節度馬靈祭署爲別將,從討護蜜有功,授安西府別將。七載,高仙芝代 秀實性至孝,六歲,母疾,水漿不入口七日,疾有間,然後飮食。及長,沉厚有斷。 夜中聞都將李嗣業之聲,因大呼 師還,嗣業請

府折衝。

戰而勝。

常清逐之,秀實進曰:「賊兵羸,餌我也,請備左右,搜其山林。」遂殲其伏,改綏德

列傳第七十八 段秀實

急 千,令嗣業統赴朔方,以秀實爲援,累有戰功。 臣下晏然,信浮妄之說,豈明公之意耶?」 肅宗 即位 於 靈 武 徵安西兵節度使梁宰, 而秀實父歿,哀毀過禮。 嗣業遂 字潛懷異圖 (見)字, 請發兵, 秀實謂嗣 從之。乃出 業 嗣業旣授節制, 日:「豈有天子告 步騎 五

傾私 秀實聞嗣業之喪, 節度留後。 秀實如失左右手,表請起復,爲義王友,充節度判官。 財以奉葬事。 安慶緒奔鄴 諸軍進戰于愁思岡,嗣業爲流矢所中,卒于軍,衆推安西兵馬使荔非元禮代之。 嗣業與諸軍圍之,安西輜重委於河內。乃奏秀實爲懷州長史,知軍州,加 乃遺先鋒將白孝德書, 元禮多其義,奏試光祿少卿,依前節度判官。 令發卒護嗣業喪送河內。 秀實率將吏哭待于境,

亦竭 營田 爲節 還于邪寧,復爲都 馬言之,遂以秀實爲都 二副使。 度使,人心稍定。又遷試光祿卿,爲孝德判官。 ,縣更憂恐多逃匿,羣行剽盜,孝德不能禁。 邙山之敗,軍徙翼城,元禮爲麾下所殺,將佐亦多遇害,而秀實獨以智全。衆推白孝德 大軍西遷,所過掠奪。 虞候,尋拜涇州 虞候,權知 刺 奉天行營事 史。 又以邠寧之食,難於饋運,乃請軍於奉天。是時 ,號令嚴一,軍府安泰,代宗聞而嗟賞久之。兵 秀實 孝德改鎭邠寧,奏秀實試太常卿、支度 《私曰:「使我爲軍候,當不如此。」軍

大曆元年,馬璘奏加開府儀同三司。 軍中有能引二十四弓而犯盜者,璘欲免之,

鄭、潁 曰「牧 後 告者復 曰:「每更籌盡,必來報。」每白之,輒延數刻,四更畢而曙。 動搖,導以爲亂。 不合理者,必固爭之,得購引過乃已。 韶徙鎮 一、將 徙者族(三)! 二州 涇州 ·日:「今夜將焚草場,期救火者同作亂。 火者斬。」童之居外營,請入救火,不許。 有私愛,則法令不一,雖韓、白復生,亦不能爲理。」」隣善其議, 以瞻涇原軍,俾秀實爲留後,二州甚理。」璘思其績用,又奏行軍司馬,兼都知兵 ,其士衆嘗自四鎮、北庭赴難中原,僑 」於是遷 或告其事,且曰:「侯嚴,警鼓爲約矣。」秀實乃召鼓人,陽怒失節, 涇州。 既至其理所,人烟夐絕,兵無廩食。 璘城 涇州 。」秀實使嚴加警備。 明日斬之,捕殺其黨凡十餘人以徇,日:「敢 秀實掌留後, 居驟移,頗積勞怨。 既差互, 童之亂不能作。 歸還, 夜半火發,乃使令於軍中 朝廷憂之,遂韶璘遙管 加御 竟使殺之。 刀斧將王童之因人心 史中丞。 璘決 璘 且戒之 明日 既奉 入事有

忘其死 統 時都 八年, 十一年,磷疾甚, 東依古原,列奇兵示賊將戰,且以收合敗亡。 而 欲 將焦令諶與諸將四五輩狼狽 吐蕃來寇,戰于鹽倉,我軍不利。 安其家耶 不能 」令諶等恐懼,下拜數十。 視 事,請 秀實攝節度副使兼左廂兵馬使。 () 而至, 秀實召讓之曰:「兵法:失將,麾下當斬。公等 璘爲寇戎所隔, 秀實乃悉驅城中士卒未出戰者,使驍將 蕃衆望之,不敢逼。及夜,璘方獲歸。 逮暮未還,敗將潰兵爭道而 秀實乃以十將張羽飛

馬使。

列

送廷 尙 親 爲 不 四 書 聴樂飲 鎭 矛 招 一、張 幹 北 得 召 於 將 庭 居 掖 酒 ,分兵 京 行 喪 郡 軍 師 側 王 私室 *, 徙珍 涇原鄭潁 按 族談 甲 無妓媵, 及景華 離 以 節度使。 備 立 者捕而 非 外鎭 無贏 常。 財, 囚 \equiv 軍 四 之。 中遂定, 退公之後,端居靜慮而 年間, 都虞侯 軍中行哭 赴喪事於內, 吐蕃不 不戮一人。 史廷幹、 敢犯 塞 尋拜 裨將 一,清約 Ę 秀實 催 率易, 珍張景華謀 德宗 李漢 涇州 嗣位 惠 遠 刺 接賓客於外, 近 史、 稱之。 作亂 就 兼御 加 檢校 非公會, 史大夫, 秀實乃 禮 非其 部

之狀 光 建 中 兼 秀實 元 涇 原 以爲方春 年,宰相楊炎欲行元載 節度使 **示**可 以以 事 興 西 土 拓。 功 請 舊志,築原州 無 俟 何 農
隙
。 劉文喜叛 炎以 一城,開陵陽渠, 韶中使上聞, 仍問秀實 一,亦不果 其沮 己之謀 城。 , 遂除 司農卿, 以 邪 寧節 可否 度

驛得符 社 岳 且. 趨 奉天。 之 同 久,必肯同 謀 四 殺泚 年 軍 期 - , 朱泚 時蒼 於 人 頃 以 惡 亦莫辯其印文,惶遽而 黄之中,未 兵 刻 盜據宮闕 乃召 迎 ,乃使人 乘 與謀 奥。 有 走 源休教 議。 寅 三人者 渝 備 靈丘 秀實 1 此偽迎 ,皆秀實 泚 竊 迴。 初詐從之, 以 秀實嘗爲涇原節度,頗得 令言印。 秀實謂海賓等日〔三〕「長之來,吾黨無遺類 鐢 | 夙所獎遇,遂皆許諾。 駕 , 陰說 陰 不遂,乃倒用司 濟 5逆志。 大將劉 海賓、 泚 乃遣其將韓旻領馬步三千 農印印符以 士心,後罷兵權,以爲蓄 及韓旻追駕,秀實以 何明禮、姚令言判官 追 兵。 旻至 岐 憤 疾 靈

當直搏殺泚,不得則死,終不能向此賊稱臣。」乃與海賓約,事急爲繼,而令明禮應於外。 實等不至,秀實乃曰:「我不同汝反,何不殺我! 逐汝反耶! 秀實勃然而 日 泚 召秀實議 德宗在奉天聞其事,惜其委用不至,垂涕久之。 」遂擊之。 起,執体腕奪其象笏,奮躍而前,唾泚 事 ,源休、姚令言、李忠臣、李子平皆在坐。 |泚舉臂自捍,纔中其顙,流 面大駡曰:「狂賊,吾恨不斬汝萬段, 血匍匐而 走。 秀實戎服 兇徒愕然,初不敢動;而 ",與泚 海賓、明禮、靈岳相 並 膝,語至僭位, 我豈 海

次

、被殺。

爲 亂 虜 日 5,內有 爪牙也。 百 乘 初 神策六軍 此蓋 梗 秀實見禁兵寡少,不足以備非常,乃上疏曰:「臣聞天子曰萬乘,諸侯曰千乘, 命之臣,竊觀禁兵不精,其數全少,卒有患難,將何待之!且猛虎所以百獸畏者, 若去其爪牙, 則 以大制小,以十制一也。 逐 無一人至者。 犬彘馬牛悉能爲敵。 秀實守節不二,竟歿於賊,其明略義烈如此。 尊君卑臣,強幹弱枝之義,在於此矣。 今外有不庭之 **伏願少留聖慮,冀裨萬一。」** 及涇原兵作 大大夫

惟 依,逼畏所 予式嘉乃勳 興元元年二月,詔曰:「見危致命之謂忠,臨義有勇之謂烈。惟爾克勵臣節,不憚殺身; 操行岳 加 立,忠厚精至,義形於色,勇必有仁。頃者嘗鎭涇原,克著威惠, 叛卒知訓 淄 ,懋昭大典。 澠共混。 故開府儀同三司、檢校禮部尚書、兼司農卿、上柱國、張掖郡王 日台不德,罔克若天,遘茲殷憂, 變起都邑。 惟爾卿士,嗷然靡 段

列

傳

爾以 밆 令 **翠** 盗。 死義之臣 臨危致命,歿而 兇渠之首,以敵君父之讎,視死 並 足以激勵 子人,臨馭 委所 樹 IE 誠 員官,諸子並與五品正員官。 此風聲。 昔王蠋守死以全節,周顗正色而抗詞,惟我信臣,無愧前哲。 司 .,傳于不朽。」 訪其事蹟,續具條 人倫,光昭史册。不有殊等之賞,孰表非常之功。 賊 .億兆,一夫不獲,時予之辜。 泚 藏姦 逾彰; 可贈太尉,諡曰忠烈, ,欺爾 有因事成功,權以合道。 以詐。 奏,當加褒異,錫其井賦。圖形雲閣, 如歸,履虎致咥。 守人臣之大節,見元惡之深情,端委國門,挺 仍廢朝三日,收京城之後,以禮葬祭,旌表門閭。 宣付史官,仍賜實封五百戶、莊宅各一區。 況誠信不達,屢致寇戎,使抱義之臣,陷于凶逆。 **苟利社稷,存亡一致,酬報之典,豈限常倫。** 噫,天未悔禍 **爱議疇庸,特超檢限,著之甲** 事 書功鼎彝,以彰我有服節 乖 垂 聲震寰宇, 成, 雄風 身白刃。 (壯圖) 義冠 長子與三 股承天 古今, 誓碎 振駭 有

難,詭收寇兵,撓其兇謀 書節文褒獎忠烈 并旌 德宗還京,又詔曰:「贈太尉秀實,授乎貞烈,激其頹風,蒼黃之中,密蘊雄斷。 表門閭, 、必以 **綠葬所須,一** ,果集吾事 切官給。 挺身徑進,奮擊渠魁,英名凛然,振邁千古。 仍於墓所官爲立碑,以揚徽烈。」自貞元後累朝凡赦 宜差官致 將紓國

其子伯倫,累官至太子詹事。 大和二年正月奏:「亡父贈太尉秀實,準前後制敕令所司

秀實爲首

所激 并給鹵簿人夫,棄太常博士一人檢校。」 尋加伯倫檢校左散騎常侍,兼殿中監。 大和四年十 置廟立碑,今營造已畢,取今月二十五日行升祔禮。」詔曰:「秀實忠衞宗社,功配廟食,義風 秀實之賢。」文宗憫然曰:「伯倫宜加賻贈。」仍輟朝一日,以禮忠臣之嗣。 練觀察使,入爲太僕卿,卒。 宰臣李石奏曰:「伯倫,秀實之子。 自古歿身以衞社稷者,無如 月,遷右金吾衞大將軍、兼御史大夫,充街使。八年七月,檢校工部尚書,充福建等州都 ,千載凛然。 間代勳力,須異等夷, 宜賜綾絹五百疋, 以度支物充。 仍令所司供少牢, 團

又充河東朔方試覆屯交兵使。 交兵使。 三十年不齒,天下聳動。 額眞卿字清臣,琅邪臨沂人也。 開元· 五原有冤獄,久不決,眞卿至,立辯之。天方旱,獄決乃雨,郡人呼之爲「御史雨」。 中,舉進士,登甲科。 遷殿中侍御史、東都畿採訪判官,轉侍御史、武部員外郎。楊國忠 有鄭延祚者,母卒二十九年,殯僧舍垣地,眞卿劾奏之,兄弟 事親以孝聞。四命爲監察御史,充河西隴右軍試覆屯 五代祖之推,北齊黃門侍郎。眞卿少勤學業,有詞藻,

安祿山逆節頗著,眞卿以霖雨爲託,修城浚池,陰料丁壯,儲廩實,乃陽會文士,泛舟 列 儜 第 七 + 八 顏 風 卿 三五八九

怒其不附己,出爲平原太守。

祿山 等爲將。 外池,飲酒賦詩。或讒於祿山,祿山亦密偵之,以爲書生不足虞也。無幾,祿山果反,河朔 四郡,豈無一忠臣乎!」得平來,大喜,顧左右曰:「殷不識顏眞卿形狀何如,所爲得如此!」 募勇士,旬日得萬人,遣錄事參軍李擇交統之簡閱,以刁萬歲、和琳、徐浩、馬相如、高抗朗 盡陷;獨平原城守具備,乃使司兵參軍李平馳奏之。玄宗初聞祿山之變,數曰:「河北二十 初尙移牒眞卿,令以平原、博平軍屯七千人防河津,以博平太守張獻直爲副。眞卿乃

原太守。 卿恐搖人心,乃詐謂諸將曰:「我識此三人,首皆非也。」遂腰斬子光,密藏三首。 異日,乃取 守土門。 十七郡同日歸順,共推眞卿爲帥,得兵二十餘萬,橫絕瀌、趙。 三首冠飾,草續支體,棺斂祭殯,爲位慟哭,人心益附。。祿山遣其將李欽湊、高邈、何千年等 祿山旣陷洛陽,殺留守李憕、御史中丞盧奕、判官蔣清,以三首遣段子光來徇河北。 眞卿從父兄常山太守杲卿與長史袁履謙謀殺湊、邈,擒千年送京師。 韶加眞卿戶部侍郎,依前平 土門旣開,

以三平原之富,士卒可以二平原之強。公因而撫之,腹心輔車之郡,其他小城,運之如臂使 公爲長城。今淸河,實公之西鄰也,僕幸寓家,得其虛實,知可爲長者用。今計其蓄積,足 清河客李尊,年二十餘,與郡人來乞師,謂眞卿曰:「聞公義烈,首唱大順,河朔諸郡恃

思明、 將平 若先 我? 指 敗 陵 師 無 與 屯於 ,斬首萬 耳。 (挑戰 伐魏 平原 原縣令范東馥、 粤 尹子奇急攻 博平 唯公所意 曰:「今聞 清河 那 ,不數十日 除級。 一,去堂 ,斬袁 合同志十萬之衆徇洛陽 ,誰敢不從。」眞卿借兵千人。 河北 肅宗幸 邑縣 知 朝廷使程千里統衆十萬 裨將和琳、徐浩等進兵,與淸河四千人合勢, 泰 ,賊必潰而 西南 諸 ,太守司馬垂使爲 那 靈武 十里。 饒 ,授工部尙書、兼御史大夫、河北採訪招討使。 相圖矣。」眞卿然之, 陽、 袁知泰遣其將白嗣深、乙舒蒙等以二萬人來拒戰, 河間、景城、樂安相次陷沒, 西南主; 自太行 分兵而制其衝。 粤將去, ,分兵開 東下 乃移牒淸河等郡, .,將出 眞卿謂之曰:「兵出也,吾子何以教 | 鄭口之路,出千里之兵使討鄴、 計王師亦不下十萬, 啷 口 爲 獨平原、博平、淸河三郡城 而博平以千人來,三郡之 賊所扼,兵 遣其大將李擇交、 禄山 不得前。 公當堅壁, 乘虚 賊 遣 史 副

守, 爲 都 致 大 右 夫。 虞 謁 候 庶子 於 至 中 德 朝 先王 堂。 書舍人兼 元 何忌 年 上 $\dot{+}$ 百 西平 馬 僚 月,棄郡渡河, 真 拜,答拜, 吏部侍郎崔 郡 卿 司馬。 進狀 。元帥 彈之。 辭 漪 歷江淮、荆襄。 亦 帶酒 廣平王 如之。 肅宗日: 容入朝 領朔方蕃漢兵號二十萬來收長安,出辭之日,百 王當闕 「肸兒子每出, ,諫議大夫李何忌在班不肅,眞卿劾之; 二年四月,朝於鳳翔 不乘馬, 步出木馬門而後 諄諄教誠之,故不敢失禮。 ,授憲部尚書,尋加御史 乘。 管崇嗣 貶 爲王 僚 漪

然人心危盪

,不可復振

列

興將 嗣老將,有足疾,姑欲優容之,卿勿復言。」乃以奏狀還眞卿。 刺 東向 賊所 儀 使 輔 史。 催器 `哭`然後遣使。」竟不能從。 復宮闕, 毁,眞卿奏曰:「春秋時,新宮災,魯成公三日哭。 今太廟旣爲盜毀,請築壇於野, 國 爲御 矯 詔 日:「上皇 遷玄宗居西宮,眞卿乃首率百僚上表請問起居,輔國惡之,奏貶蓬州長 史唐旻所構, 遣 左司郎中李巽先行,陳告宗廟之禮,有司署祝文,稱「嗣皇帝」。 在蜀 ,可乎?」器遽奏改之。中旨宣勞,以爲名儒深達禮體。 貶饒州刺史。旋拜昇州刺史、浙江西道節度使, 軍國之事,知無不言。爲宰相所忌,出爲同州刺史,轉滿州 雖天子蒙塵,典法不廢。 ,徵爲刑部尙書。 眞卿 時太廟爲 史。 洎鐢 皇帝 謂禮

耶 陜 不合事宜何? (料還) 代宗嗣位 載深銜之。 眞卿請皇帝先謁五陵、 」眞卿怒,前曰:「用捨在相公耳, ,拜利州刺史,遷戶部侍郎,除荆南節度使,未行而罷,除尚書左丞。 旋改檢校刑部尚書知省事,累進封魯郡公。 九廟而後還宮。 言者何罪? 然朝廷之事, 豈堪相公再破除 宰相元載謂眞卿曰:「公所見雖美, 車駕自 其 如

時元 載 引用 私 黨, 懼朝臣論奏其短,乃請:百官凡欲論事,皆先白長官,長官白宰相,然

後上聞。 眞卿上疏曰:

多挾讒毀;自今論事者,諸司官皆須先白長官,長官白宰相,宰相定可否,然後奏聞 御 史中丞李進等傳宰相語,稱奉進止:「緣諸司官奏事頗多,殷不憚省覽,但所奏

述焉。 也。 令訪察,迴日 達於天子也。 者。」臣自聞此語已來,朝野囂然,人心亦多衰退。 此不爲, 聽祭,其言虛誣者,則讒人也,因誅殛之;其言不虛者,則正人也,因獎勵之。 之無極、漢之江充,皆讒 詩人深惡之,故曰:「取彼讒人,投畀豺虎。豺虎不食,投畀有北。」 詩云:「營營青蠅,止于棘。 使衆人皆謂陛下不能明察,倦於聽覽,以此爲辭,拒其諫諍, 奏聞,所以明四目、達四聰也。 郎官、御史者,陛下腹心耳目之臣也。 人也,孰不惡之?陛下惡之,深得君人之體矣。 讒言罔極,交亂四國。」以其能 今陛下欲自屛耳目, 何則?諸司 故其出使天下,事無巨細得失,皆 `長官皆達官也,言皆專 變白 使不聰明, [為黑, 則夏之伯明、楚 陛下何不深 臣竊爲陛下痛 變黑爲白 則天下何 陛下捨 迴

平治 必 以 門 告 他 林 與仗 故 天下 不 臣 聞 Ė 甫 中 ·, 正 家引 達,所以 傷,猶不敢明約 太宗勤於聽覽,庶政以理,故著司門式云:「其有無門籍人,有急奏者,皆令監 先意 用此道也。 奏,不許關礙。」所以防壅蔽也。 奏請 漸致潼關之禍,皆權臣誤主,不遵太宗之法故也。 玄宗驚喜若神。 天寶 百司,令先白宰相。 已後,李林甫威權日盛,羣臣不先諮宰相輒 以此權柄 又閹官袁思藝日宣 并置立仗馬二匹, 須有乘騎便往, 所以 恩寵日甚,道路以目。上意 一韶至中書,玄宗 陵夷至于今日,天 .奏事者,仍託 不下宣, 動靜

惜之。

列

心骨。 危懼,扇動却反。又今相州敗散,東都陷沒,先帝由此憂勤,至於損壽,臣每思之,痛切 司,不安反側,逆賊散落,將士北走党項,合集土賊,至今爲患。僞將更相驚恐,因思明 凋獘,太平之理,立可便致。 屬李輔國用權,宰相專政,遞相姑息,莫肯直言。 大開三 下之蔽,盡萃于聖躬,豈陛下招致之乎?蓋其所從來者漸矣。 自艱難之初,百姓尚未

漸 也。 以爲太宗之理,可翹足而待也。臣又聞君子難進易退,由此言之,朝廷開不諱之路,猶 則陛下聞見,只在三數人耳。天下之士,方鉗口結舌,陛下後見無人奏事,必謂朝廷無 恐不言,况懷厭怠,令宰相宜進止,使御史臺作條目,不令直進。從此人人不敢奏事, 乎 事可論,豈知懼不敢進,即林甫、國忠復起矣。凡百臣庶,以爲危殆之期,又翹足而至 ,!臣竊聞陛下在陝州時,奏事者不限貴賤,務廣聞見,乃澆、舜之事也。 凡百臣庶 成孤立,後縱悔之無及矣!臣實知忤大臣者,罪在不測,不忍孤負陛下,無任懇迫 如今日之事,曠古未有, 今天下兵戈未戢,瘡痏未平,陛下豈得不日聞讜言以廣視聽,而欲頓隔忠讜之路 雖李林甫、楊國忠猶不敢公然如此。今陛下不早覺悟,

其激切如此。於是中人爭寫內本布於外。

誅 袁 修以 後攝祭太廟, 刑部尙書。 諂 言排之, 代宗崩,爲禮儀使。 **遂罷**。 以祭器不修言於朝,載坐以誹謗,貶俠州 楊炎爲相, 惡之,改太子少傅, 又以 高 旭 已下 七 聖諡 禮儀使如舊, 號繁多 別駕、 撫州 ,乃上議請 湖州 外示崇寵, 刺 取初 史。 諡 元載伏 實去其 爲定。

權

也。

李勉 會 首 旭 李希 至 於 平原 中 聞之,以爲失一元老,貽朝廷羞,乃密表 盧 書 杷 烈陷汝州 面 日「眞卿以褊性爲 專權、忌之、改太子太師、罷禮儀使、諭於眞卿曰:「方面之任,何處爲便?」 上血 ,
起乃奏曰:「顏眞卿四方所信,使 眞卿 不敢衣拭,以舌舐之, 小人 、所憎 頷 逐 人請留。 非 相公忍不相容乎? • 「諭之,可不勞師旅。」上從之, 今已羸老,幸相公庇之。 又遣逆於路,不及。 杞矍然下 拜, 相 公先 而 朝廷失色。 含怒心。 眞卿 中丞傳 候

使 公,人臣也,奈何使此曹如是乎? 嚴 令雪己, 願 刃 在坐,目眞 以 奉家廟, 擬之,眞卿 初 見 一希烈, 龍 恤 諸 兵 卿謂希烈曰:「聞太師名德久矣,相公欲建大號,而太師至,非天命正位。欲求 欲宣 不動。 馬。 孤 而已。 一韶旨 累遣真卿兄子峴與從吏凡數輩繼來 希 烈遽以 希烈 ,希烈養子千餘 大宴遊 」拂衣 身蔽之,而麾其衆, 黨,召眞 而 人露刃爭前迫 起, 希烈慚 卿 坐,使觀 衆退, 亦 眞卿,將食其肉。 京 मम 倡 此 師。 乃揖眞 優斥黷朝政 時朱滔、王武俊、田悦、李納 上皆 卿 就 不報。 館舍。 爲戲,眞卿怒曰:「相 諸將叢 每於諸子書,令 因逼 **遷慢** 罵 爲章表,

列

豈受汝輩誘脅耶!」諸賊不敢復出 反,首舉 ,孰先太師乎? 義兵,及被害,詬駡不絕於口。吾今年向八十,官至太師,守吾兄之節,死而後已, .」眞卿正色叱之曰:「是何宰相耶!君等聞顏杲卿無?是吾兄也。 口。

於眞卿,眞卿曰:「老夫耄矣,曾掌國禮,所記者諸侯朝覲禮耳。」 遺 **績於安州,希烈令齎伯儀旌節首級誇示眞卿,眞卿慟哭投地。後其大將周曾等謀襲汝州** 因迴兵殺希烈,奉眞卿爲節度。事洩,希烈殺曾等,遂送眞卿於龍興寺。 表 ,自爲墓誌、祭文,常指寢室西壁下云:「吾殯所也。」希烈旣陷汴州,僭僞號,使人問儀 希烈乃拘眞卿,令甲士十人守,掘方丈坎於庭,曰「坑顏」,眞卿怡然不介意。後張伯儀敗 眞卿度必死,乃作

宗復宮闕,希烈弟希倩在朱泚黨中,例伏誅。希烈聞之怒,興元元年八月三日,乃使閹奴與 知使人何日從長安來?」奴曰:「從大梁來。」眞卿駡曰:「乃逆賊耳,何敕耶!」遂縊殺之,年 景臻等殺眞卿。先曰:「有敕。」眞卿拜,奴曰:「宜賜卿死。」眞卿曰:「老臣無狀,罪當死,然不 之以油,且傳逆詞曰:「不能屈節,當自燒。」」眞卿乃投身赴火,景臻等遽止之,復告希烈。 興元元年,王師復振,逆賊慮變起察州,乃遣其將主景臻、安華至眞卿所,積柴庭中,沃

及淮、泗平,貞元元年,陳仙奇使護送眞卿喪歸京師。 德宗痛悼異常, 廢朝五日, 諡日 十七。

卿、眞卿之孫至。永惟九原,旣不可作,旌其嗣續,諒協典彝。考績已深於宦途者,命列於中 宗詔曰(四):「朕每覽國史,見忠烈之臣,未嘗不嗟歎久之,思有以報。 朝,堅貞一志。屬賊臣擾亂,委以存諭,拘脅累歲,死而不撓,稽其盛節,實謂猶生。 於寤寐。故光祿大夫、守太子太師、上柱國、魯郡公顏眞卿,器質天資,公忠傑出, 臺;官次未齒於搢紳者,俾佐於左輔。庶使天下再新義風。」以眞卿曾孫弘式爲同州參軍。 斯禍,慚悼靡及,式崇嘉命,兼延爾嗣。 可贈司徒,仍賜布帛五百端。 男顋、碩等喪制終,所 文忠。復下詔曰:「君臣之義,生錄其功,歿厚其禮,況才優匡國,忠至滅身。 朕自興歎,勞 司奏超授官秩。」貞元六年十一月南郊,赦書節文授眞卿一子五品正員官,故題得錄用。文 如聞從覽、弘式,實杲 **股致** 胎 出入四

焉!夫國得賢則安,失賢則危。德宗內信姦邪,外斥良善,幾致危亡,宜哉。噫,「仁以爲己 學,守其正,全其節,是文之傑也;苟無盧杞惡直,若任之爲相,遂行其道,豈有浠烈之叛 任,不亦重乎;死而後已,不亦遠乎!」二君守道歿身,爲時垂訓,希代之士也,光文武之 國,是武之英也;苟無楊炎弄權,若任之爲將,遂展其才,豈有朱泚之禍焉!如淸臣富於 史臣曰:每思先軫免胄,子路結纓,雖云其忠,未聞於道。如成公孝於家,能於軍,忠於

傳第七十八

顏

眞卿

校勘

記

道焉。

贊曰:自古皆死,得正爲順。 二公云亡,萬代垂訓。

校勘記

(二) 仙芝大衂 「仙芝」,各本原作「靈察」,據新書卷一五三段秀實傳改。

(三) 敢後徙者族 各本原作「敢後者徙族」,據冊府卷三六七、新書卷一五三段秀寶傳、合鈔卷一七

九段秀實傳改。

秀實謂海賓等日 「謂」字各本原無,據葉校本、新唐書卷一五三段秀實傳補。

(18) 文宗詔日 此句上疑有脫文。據冊府卷一四〇,文宗下詔事在開成元年二月,新書卷一五三顏

眞卿傳作「開成初」。

如聞從覽弘式實杲卿真卿之孫 爲杲卿曾孫,弘式爲眞卿曾孫,據補。 「杲卿」,各本原無,册府卷一四〇「眞卿」上有「杲卿」。 按從覽

舊唐書卷一百二十九

列傳第七十九

韓滉 子阜 弟洄 **張延賞** 子弘靖 弘靖子文規

次宗

山南。 主簿。 美,璵頗銜之。 祠部、考功、吏部三員外郎。 賓佐,未行,除殿中侍御史,追赴京師。 韓滉字太沖,太子少師休之子也。少貞介好學,以蔭解褐左威衞 至德初,青齊節度鄧景山辟爲判官,授監察御史、兼北海郡 採訪使李承昭奏充判官,授通州長史、彭王府諮議參軍。 及其秉政,諸使奏滉兄弟者,必以冗官授之。 先是,滉兄法知制誥(1),)興 発相, 鄧景山 司馬,以道路 草王璵拜官之詞, **羣議稱其**屈, 騎曹參軍 移鎮 淮南 祖絕, 出爲 累遷至 不 叉 因 表爲 加 同官 避 虚 地

事中。 **滉公潔強直,明於吏道,判南曹凡五年,詳究簿書,無遺纖隱。** 時盜殺 富平令韋當,縣吏捕獲賊黨,而名隸北軍 ٠, 監軍魚朝恩以有武材, 大曆中,改吏部郎中、給 請詔原其

列傳第七十九 韓滉

容姦妄 |滉能 罪 自至德、乾元已後,所在軍興,賦稅無度,帑藏給納,多務因循。 ,滉密疏駁奏,賊遂伏辜。 儲 積穀帛,帑藏稍實。然苛剋頗甚,覆治案牘,勾剝深文,人多咨怨。 ,下吏及四方行綱過犯者,必痛繩之。又屬大曆五年已後,蕃戎罕侵,連歲豐稔,故 遷尙書右丞。五年,知兵部選。 六年, **滉旣掌司計** 改戶部侍郎、 ", 清勤: 檢轄,不 判度支。

部(三)。 數月, 豈有恤隱之意耶! 御史朱敖再檢,渭南損田三千餘頃。 上謂|敖曰:「縣令職在字人,不損猶宜稱損 迴奏諸縣凡損三萬一千一百九十五頃。時渭南令劉藻曲附滉, 大曆 拜蘇州刺史、浙江東西都團練觀察使。尋加檢校禮部尚書、兼御史大夫、潤州刺史、 分巡御史趙計復檢行,奏與藻合。代宗覽奏,以爲水旱咸均,不宜渭南獨免,申命 十二年秋,霖雨害稼,京兆尹黎幹奏畿縣損田,滉執云幹奏不實。 卿之此行,可謂稱職。」下有司訊鞫,藻、計皆伏罪,藻貶萬州南浦員外 言所部無損, 乃命御史巡覆, ,白于府及戶 分損而 刺

鎭海軍節度使。

將李長榮、王栖曜與宣武軍節度劉玄佐掎角討襲,解寧陵之圍,復宋、汴之路,滉功居多。 幸,河、汴騷然,滉訓練士卒,鍛礪戈甲,稱爲精勁。 旣移鎮,安輯百姓,均其租稅,未及踰年,境內稱理。 李希烈既陷汴州, 及建中年多,涇師之亂 滉乃擇其銳卒, 令裨 ,德宗出

戰艦 所 修場 三十餘 然 自 壁 關 ,建業抵 中 艘 -多難 以 次,滉即 京峴, 角師 五 於所部閉關梁,築石頭 樓雉 一千人 相 、由海門揚威武, 屬, 以佛殿材於石頭城繕置館第數十。 五 至 申浦 城,自京口 而還; 至玉山 毀撤上元縣 禁馬牛出境 時滉以 佛 、寺道 國家多難 觀 ; 造 几 樓船 十餘

教習 毁廢。 師, 平,俾偏將丘涔督其役。 恐有永嘉渡江之事 千人臨 軍 長 用 兵。 明年正月,追李長榮等戍軍還〔三〕,以其所親吏盧復爲宣州 既繁, 金山 以 佛寺銅鐘 道路又阻, 與少遊相應,樓船於江中, ,以爲備預 鑄弩牙兵器。 涔酷虐士卒,日役千人,朝令夕辦, 關中饑饉, ,以迎鑾駕,亦申儆 加之以災蝗,江南、 陳少 遊時鎮 以金銀網綵互相聘賚。 自守也。 揚州,以甲士三千人臨江大閱 兩浙 城中穿深井十丈近 去城 轉輸粟帛,府無虛月, 數十里內先賢 刺 而 史、采石軍使,增營壘, 自德宗出 百 居,及 (丘墓, 所,下 滉亦 與江 以兵 鯞 朝 狂 京

運使,欲令專督 支,以關 同平 興 元 章 輔旱儉,請運 元年,就加檢校吏部尙書。 事 ,使並 運務。秀 如 故。 江 准 以滉性 租米以 二年春,特封晉 剛 愎 給京師。 ,難與集事 數月, 國公。 上以滉浙江 叉加 ,乃條奏滉督 檢校右僕射。 其年十一月,來朝京師。 東西節 運江南米至揚子,凡一 度 貞元 (E), 元年七月, 素著威名 時右丞 拜檢校左 加江 元 十八里, 秀 准轉 剣 僕 度

賴焉

列

揚子以北

,皆元秀主之。

滉深怒於秀。

秀以京師錢重貨輕,

切疾之,乃於江東監院收獲見

不危懼?假有權臣騁志,相公何不奏請三司詳斷之。去年關輔用兵,時方蝗旱,秀總國計 議者。尚書左丞董晉謂宰臣劉滋、齊映曰:「元左丞忽有貶責至,未知罪名,用刑一濫,誰 錢四十餘萬貫,令轉送入關。 夙夜憂勤,以贍給師旅,不增一賦,軍國皆濟,斯可謂之勞臣也。今見播逐,恐失人心,人心 支諸道轉運鹽鐵等使,遂逞宿怒,累誣奏勝,貶雷州司戶。其責旣重,舉朝以爲非罪,多竊 百耳,豈至萬乎?」上然之,遣中使齎手詔令運錢。滉堅執以爲不可。其年十二月,加滉度 上以問誘,誘奏曰:「一千之重,約與一斗米均。自江南水路至京,一千之所運,費三 則有聞雞起舞者矣。竊爲相公痛惜之。」滋、映但引過而已。給事凌高又抗疏申理 滉不許,乃誣奏云:「運千錢至京師,費錢至萬,於國有害。」請

之,滉誣以朋黨,寢而不行。 計其分鎭之外,戰兵在河、隴五六萬而已。 以肆其侵軼。臣聞其近歲已來,兵衆寖弱,西迫大食之強,北病迴紇之衆,東有南韶之防, 入朝也,路由汴州,厚結劉玄佐,將薦其可任邊事,玄佐納其路,因許之。及來覲,上訪問 時兩河罷兵,中土寧乂,滉上言:「吐蕃盜有河湟,爲日已久。大曆已前,中國多難,所 然後營田積粟,且耕且戰,收復河、隴二十餘州,可翹足而待也。」上甚納其言。滉之 臣請以當道所貯蓄財賦爲饋運之資,以充三年 國家第令三數良將,長驅十萬衆,於凉、鄯、洮、

二月 初頗稟命,及滉以疾歸第,玄佐意怠,遂辭邊任,盛陳大戎未衰,不可輕進。 以 疾薨 ,遂寢其事 5,年六 十五。 上震悼久之,廢朝三日,贈 太傅,賻 布 帛米粟 滉貞元三 有 差。 年

|奉、|阜。 歲至 法, 州 嘗傳之。 相, 德。」自居重位,愈凊儉嫉惡, 即命撤去之,曰:「先公容焉,吾輩奉之,常恐失墜,所有摧圮,葺之則已, 奉公,衣裘茵袵, 傍縣 凡四 頗著勤績,自幼立名貞廉,晚途政 誅 京 滉 殺残忍, 師 有 一十年, 宰 **掣**,官至考功員外郎。 i',丞郎 犯其令者, 好易象及春秋,著春秋通例及天文事序議各 相 子 相 卿佐,接之頗倨,衆不 ,幼有美名,其所結交,皆時之傷彦 繼乘馬五匹,皆及敞帷。 判 十年一易, 卽 誅及 剿數十人, 鄰伍,死者數 居處陋薄, 彌縫闕漏,知無不爲,家 且 無虚 甚苛慘, 能 十百 平。 纔蔽 尤工 日 其在浙· 人。 風 身未達則飾情以進, 雖令行禁止,而冤濫 書、 雨。 又俾推 了,非公直者不與之親密。 兼善丹青 右 弟洄常於里宅增修廊字, 人資產 也,政令明察,末年傷於嚴急 一卷。 覆官分察境內, ,以繪 一、未嘗 然以前輩 在意。 事 得其志則本質 相尋。 非急務, 早達 豈敢; 情涉疑 入仕之初 議 稍 性持節儉,志在 者 改作, 自晦其能 滉 薄後 以 似, 自 逐彰。 滉 以 巡內婺 江南至, 以傷 必 進。 統 制 置 至 卿 極 未 晚 儉

皐 字仲聞,夙負令名,而器質重厚,有大臣之度。 列 第 -6 + 九 韓 滉 由雲陽尉擢賢良科,拜右拾遺,轉左

阜號泣承命,立草數千言,德宗嘉之。及免喪,執政者擬考功郎中,御筆加知制誥。遷中書 涉虚詞,壅蔽頗深,罔惑斯甚。宜加懲誡,以勗守官。可撫州司馬,員外置同正員,馳驛發 除,自宜悉心,以副勤恤。。阜奏報失實,處理無方,致令閭井不安,囂然上訴。及令覆視,皆 **踐清貫,頗聞謹恪,委之尹正,冀効公忠。 乃者邦畿之間,栗麥不稔,朕念茲黎庶,方議蠲** 寄,實繫邦本,以分股憂,苟非其才,是紊於理。正議大夫、守京兆尹、賜紫金魚袋韓辠,比 家往來,百姓遮道投狀,內官繼以事上聞。 德宗下詔曰:「京邑爲四方之則,長吏受親人之 ¹鼻納其計,蕁奏鋒爲興平縣令。及貞元十四年,春夏大旱,栗麥枯槁,畿內百姓,累經**1**阜陳 訴,以府中倉庫虛竭,憂迫惶惑,不敢實奏。會唐安公主女出適右庶子李愬,內官中使於愬 刻剝下爲事,人皆咨怨。又勸阜搜索府中雜錢,折糴百姓栗麥等三十萬石進奉,以圖恩寵。 舍人、御史中丞、尚書右丞、兵部侍郎,皆稱職。改京兆尹,奏鄭鋒爲倉曹,專掌錢穀。 補 1。」鋒亦尋出爲汀州司馬。 | 皐無幾移杭州刺史,復拜尙書右丞。 闕,累遷起居郎、考功員外郎。 俄丁父艱, 德宗遣中人就第慰問, 仍宣令論譔滉之事業,

從弟曄,幸於叔文,以告之,因出爲鄂州刺史、岳鄂廝沔等州觀察使。入爲東都留守。 元和 八年六月,加檢校吏部尚書,兼許州刺史,充忠武軍節度等使。以陳、許二州水潦之後,賜 |阜恃前輩,頗以簡倨自處。 |順宗時,王叔文黨盛,|阜嫉之,謂人曰:「吾不能事新貴。」 |阜

省上事 儀使。 知選事: |驛暴卒,年七十九。 贈太子太保。|大和元年,諡曰貞。 卿 皐 ·綾絹 ,命中使宣賜酒饌,及宰臣百僚送上,皆如近式。 李建罰一月俸料。 布 三月,穆宗以師保之舊,加檢校右僕射。 元和十一年三月,皇太后王氏 葛十萬端疋,以助軍資宴賞。所理以簡 長慶元年正月,正拜尙書右僕射。 崩,以鼻充大明宮使。 十二月,以銓司考科目人失實 儉稱。 入爲 其年,以本官東都留守, (吏部尙書,兼太子少傅,判太常 二年四月, 轉左僕射, 十五年閏 正月, 充憲宗 八與刑 行及戲源 赴 部 Ш 尚書 侍 陵 郎

彪; 夜以 其音主商,商爲秋聲。 永嘉之亂,其應乎! 始也(云)。 司 知魏之季而晉將代也。 馬懿受魏明帝顧託後嗣,反有篡奪之心,自誅曹爽,逆節彌露。 毌丘)揚州故廣陵之地,彼四人者,皆魏室文武大臣,咸敗散於廣陵, ¹阜生知音律,嘗觀彈琴,至<u>↓</u>止息,歎曰:「妙哉! 嵇生之爲是曲也,其當膏、魏之際乎! 一儉、文欽、諸葛誕前後相繼爲揚州都督,咸有匡復魏室之謀,皆爲懿父子 止息者,晉雖暴興,終止息於此也。 叔夜撰此,將貽後代之知音者,且避晉、魏之禍,所以託之神鬼也。」 秋也者,天將搖落肅殺,其歲之晏乎!又晉乘金運,商,金聲,此所以 慢其商絃,與宮同音,是臣奪君之義也,所以 其哀憤躁蹙,憯痛迫脅之旨,盡在於是矣。 王陵都督揚州 散言魏氏散亡自廣陵 知司馬氏之將篡也。 ,謀立荆王 ·所殺。

不理。 使」。皆從之。 之利,當歸於王者,非諸侯方岳所有。今諸道節度都團練使皆占之,非宜也,請總隸鹽鐵 之費,貫計錢九百,則利浮本矣。其江淮七監,請皆罷之。」復以「天下銅鐵之冶,是曰 令天下錢穀各歸尚書省。本司廢職罷事,久無綱紀,徒收其名而莫綜其任,國用出入, 用轉送之費,每貫計錢二千,是本倍利也。今商州有紅崖冶,出銅益多,又有洛源監, 誅 所統,故轉||泗戶部侍郎、判度支。||泗上言:「||江淮七監,歲鑄錢四萬五千貫,輸于京師, ,以累貶邵州司戶同正員。建中元年二月,復諫議大夫。先以劉晏兼領度支,晏旣罷黜, 洄 請增工鑿山以取銅,興洛源故監,置十鑪鑄之。歲計出錢七萬二千貫,度工用 以蔭緒受任,劉晏判鹽鐵度支,辟爲屬吏,累官至諫議大夫、知制誥。 與元載善,載 度工 室 一 轉送 久廢

州 正月,刑 刺 史。 |泗與楊炎善,炎得罪,常不自安。無何,兄子||皐抗疏理炎罪, 德宗意洄令爲之,尋貶圖 部侍郞劉太眞黨於宰相盧杞得罪,以洄代太眞爲刑部侍郎,尋復兵部侍郎。 興元元年三月,入爲兵部侍郎。六月,爲京兆尹。七月, 加御史大夫。貞元二年

年十一月,爲國子祭酒。

以女妻焉。 世」之義 張 延賞, ()特授左司禦率府兵曹參軍。 肅宗在鳳翔,擢拜監察御史, 中書令嘉貞之子。 幼孤 ,本名寶符 博涉經史,達於政事 賜緋魚袋,轉殿中侍御 ,開元末,玄宗召見, ,侍中、韓國公苗晉卿 史。 賜名 關內節度使王思禮請 1延賞, 見而 取「賞延於 奇之,

爲從事

思禮領

河東,又爲太原少尹,兼行

軍司

馬、北都

副留守

等使。 附, 河洛 母憂 斃,適彼而 之,奏少良狂妄,下御史臺訊鞫,欲有所屬。 歸者增於其舊。 東都留守以領之,理行第一,入朝拜御史大夫。 邦畿復完,韶書褒美焉。 去職 久當兵衝, 代宗幸陝,除給事中,轉御史中丞、中書舍人。 屬歲旱歉,人有亡去他境者,吏或拘之。延賞曰:「夫食,人之所恃而 ,終制授檢校禮部尙書、江陵尹、兼御史大夫、荆南節度觀察使。 可生,得存吾人,又何限於彼也。」乃具舟楫而遣之,俾吏修其廬室,已其逋债, **閭井丘墟** 邊江之瓜洲,舟航湊會,而懸屬江南,延賞奏請以江爲界,人甚爲便。 ,延賞勤身率下,政尙簡約,疏導河渠,修築宮廟,數年間流 時罷 河南、 淮西、 延賞不承其意,尋出爲揚州 初,上封人李少良潛以元載 山南副元帥(も),以其兵鎮東都, 大曆二年,拜河南尹,充諸道營田 刺史、淮南節 生也,此居而 陰事 聞、載 延賞 度 副使。 尋以 觀 庸 黨 權 处 而 祭 知 知

年 建 中四 ,改檢校兵部尙書、成都尹、劍南 年十 月, 部將西山兵馬使張朏以兵入成都爲亂 西川 節度觀察使, 依前 延賞 兼御史大夫, 奔漢州 鹿頭 尋就 成將叱 加 吏部

列

が、故蜀 疲 等討之。 弊,屬 土 殘 車 其月 弊 駕 、蕩然 遷幸; 斬 朏 無制度。 其後 及同 郭 惡者,復歸 英乂淫崔寧之室 延賞 薄賦約事,動 成都。 先是兵革 一,途縱 遵法度, 崔 屢擾,自 寧、楊琳 僅 至庶富焉。 交亂 天寶 末楊國忠用 及崔寧得 建中 志 事 駕 南蠻 復極 在 山山

爲

根根

本。

睦於外 播寇 度使 |展朝 蕃尙 還焉 延賞 南 是以 相,晟然之,於是復 李晟 結 會浙 劍 間 拒 貞元 於京師 南 展 贊 而 貢 而 不協,晟 不許。 興 頗衡之,形於詞 元 ,李晟領 西 蓄怒于內, 奉 兵 觀察 ,奏曰:「戎狄無信,不可許。」宰相 年 晟令牙將王佖 一供 入隴州 億 以 晟謂 使 S神策軍 ,頗竭 表論 宰相 韓滉 加 今不 人日 同 抵 延 劉從一有 中 來 忠力焉 鳳翔 成之,及旋師,以成都官妓高 賞過惡,德宗 色。 選鋭 許婚 武武 書門下 朝,嘗有德於晟, 三年正月,晟入朝,韶晟 無所 兵 人性快,若 ,釁未忘 疾, 駕在 $\stackrel{ o}{=}$ 平章事。 千設伏汧陽, 虜掠 韶徵延賞爲中 梁州 重違晟意 也,得無懼焉 ,且曰:「召我來,何不持牛酒勞軍?」徐乃 釋舊惡於盃 因會讌說晟 倚劍南 及延賞當國 韓滉又扶晟議 延賞 大敗吐 ·書侍 蜀 與延賞 氏 川 酒之間, 至 使釋憾 用 一無幾, 興元, 歸。 郎、 蕃 事 同中 ,請調軍食以繼之,上意將帥生 (釋憾 結贊僅免, 延賞聞而 晟請 改授 遂 延賞 終歡 書門 同 左僕射。 果謀 可解。 德宗注意 飲極 子聘其女, 下平章事。 大怒 麗晟兵 歡 自是數遣使乞和 文士 初, 卽 且請晟表 於 使將吏令追 一難犯, 延賞 固情好焉 大曆末, 與鳳翔 引去,持 初 將 用 吐 吐

闕,卽以宰相攝之。延賞欲輕其禮,始令兵部尙書崔漢衡攝中書令讀册,時議非之。 月,吐蕃果背約以劫渾瑊。及册晟太尉,故事,臨軒册拜三公,中書令讀册,侍中奉禮 稷之功,令自舉代已者。」於是始用邢君牙焉。拜晟太尉、兼中書令,奉朝請而已。是年五 事邀功。會滉卒,延賞揣上意,遂行其志,奏令給事中鄭雲逵代之。上不許,且曰:「晟有社 听, 如

以鄰州官充。其州縣諸色部送,準舊例以當州官及本土寄客有資產幹了者差遣。」及減員 官中取考淺人清白幹舉者,留填闕官,差攝訖聞奏。但取才堪,不限資序。 減及所留官,並合釐務。其中有先考滿及充職掌,遇停減或恐公務有闕,宜委長吏於合停 兵柄,由是武臣不附。 自建議減員之後,物議不平。 延賞懼,量留其官,下詔曰:「諸州府停 亦辭不行。時抱眞判官陳曇奏事京師,延賞俾曇勸抱眞,竟拒絕之。蓋以延賞挾怨罷李晟 初稟命,及滉卒,玄佐以疾辭,上遣中官勞問,臥以受命。延賞知不可用,奏用李抱眞,抱眞 用不乏矣。」上然之。初,韓滉入朝,至汴州,厚結劉玄佐,將薦其可委邊任,玄佐亦欲自勃, 事亦理。以此言之,員可減無疑也。請減官員,收其祿俸,資幕職戰士,俾劉玄佐復河湟,軍 由。臣在荆南、劍南,所管州縣闕官員者,少不下十數年,吏部未嘗補授,但令一官假攝,公由。臣在荆南、劍南,所管州縣闕官員者,少不下十數年,吏部未嘗補授,但令一官假攝,公 、衆,道路怨歎,日聞於上。侍中馬燧奏減員太甚,恐不可行;太子少保韋倫及常參官等 延賞奏議請省官員,曰:「爲政之本,必先命官。舊制官員繁而且費,州縣殘破,職此之 如當州官少,任

傳

各抗疏以減員招怨,並請復之,浙西觀察使白志貞亦以疏論。 初爲相,採於羣情,由是官員悉復。 貞元三年七月薨,年六十一,廢朝三日,贈太保,賻禮加 時延賞疾甚,在私第; 李泌

等,諡曰成肅。

殿中侍御史、禮部員外郎;遷兵部郎中、知制誥、中書舍人、知東都選事;拜工部侍郎, 述祖考之德,德宗慰撫之,不令毀廟。 又獻賦美二京之制,德宗嘉其文,擢授監察御史。 雜治之,後果於河南界得賊。無何,德陽公主下嫁,治第將侵弘靖家廟。 職在牙門,必不爲盜,堅請不按。。亞不聽,遂以獄聞,仍斥員及弘靖出幕府,有詔令三司使 運絹於道者,亞以運豪家子,意其爲之,乃令判官穆員及弘靖同鞫其事。 爲從事,奏改監察御史裏行,轉殿中侍御史、內供奉。 留守將令狐運逐賊出郊,其日有劫轉 戶部侍郎、陝州觀察、河中節度使,拜刑部尙書、同中書門下平章事。 子弘靖,字元理,雅厚信直。少以門蔭授河南府參軍,調補藍田尉。 弘靖拜表陳情,具 員與弘靖皆以運 東都留守杜亞辟

宗邸中有鎭率張晏輩數人,行止無狀,人多意之,詔錄付御史陳中師按之,皆附致其罪,如 然後加兵、憲宗從其議。 吳少陽死,其子元濟擅主留務,憲宗怒,欲下詔誅之。弘靖請先命弔贈使, 尋加中書侍郎平章事。

盜殺宰相
武元衡,京師案賊未得。 待其不恭, 時王承

時韓弘 婦以 |靖 實 爲之止 京 下平章事,充太原節度使。 言,請 中 即間道發使懇喻承宗,承宗因亦款附。 所 爲戎事 有殺 躬討承宗。 入覲之後 然亦重 元衡者, 弘靖疑 並興、鮮有濟者、不若供攻元濟、待淮西平、 達其言。 也。 韶許出 其不 但 弘靖用政寬緩,代弘之理 · 事 直 曖昧,互有所說,卒未得其 軍 弘靖知終不聽用,遂自陳乞罷政事 ,驟於上 ,不許自往。 行未及鎭,果下詔誅 前 言之, 俄而 旋徵拜吏部尙書,遷檢校右僕射、宣武軍 憲宗不 魏博、澤潞悉爲承宗所敗,有詔賞其前言。 承宗。 俄以劉總累求歸闕, 實。 聽 弘靖以驟諫不行 然後悉 竟殺 又殺 張 張 ٥ 、晏後, 師 晏輩 俄檢校吏部尚 河朔。 憲宗欲 及田 且請弘靖代己,制加 ,宜用自劾, 憲宗業已北討, 弘 遂伐承宗。 IE 書、 入耶 同中書門 節度使, 大関 按 弘 軍 籒

学。 張蓋 以 雍 有 韋 禄 軍 Ш 安興之別。 弘靖之入幽州 中以 、張宗厚 責 思明之亂,始 吏卒,多以反虜名之, 意 氣自 數輩 弘靖 、充幽州、盧龍等軍節度使。 負 也 ,復輕肆 白幽州 薊 ,深恨之。 久富貴,又不 人無老幼男女,皆夾道 嗜 、欲於 酒 謂 劉總歸朝, ,常夜飲 知 事 軍 初 風 士 盡革 曰:「今天下無事, 土,入燕之時,肩 醉 以錢一百萬貫賜軍 其俗,乃發祿 稦 ,燭火滿街,前後 而觀焉。 興於三 山墓 河朔軍帥冒寒暑,多與士卒同 汝輩 一,毁其棺柩,人尤 土 挽得兩石 呵叱 軍之中,薊 弘靖留二十萬 ,薊人所不 力号, 人頗駭之。 不 失望。 習之事 貫充軍 如 識 弘 從 無

檢校司空平章事

列

傳

第

七

+

九

張

延

賞

雑用。 朱洄爲兵馬留後。朝廷旣除洄子克融爲幽州節度使,乃貶弘靖爲撫州刺史。 請,弘靖卒不對。軍人乃相謂曰:「相公無言,是不赦吾曹必矣,軍中豈可一日無帥!」遂取 賓客、少保、少師。 大罵軍人,亦爲亂兵所殺。明日,吏卒稍稍自悔,悉詣館,請弘靖爲帥,願改心事之。 有張徹者,自遠使迴,軍人以其無過,不欲加害,將引置館中。 徹不知其心,遂索弘靖所在, 薊人不勝其憤,遂相率以叛,囚弘靖於薊門館,執章雅、張宗厚輩數人,皆殺之。 長慶四年六月卒,年六十五。 未幾,遷太子

中行,久而不問,朱克融輩僅至假衣丐食,日詣中書求官,不勝其困。及除弘靖,命悉還本 其事局。唯瀛、莫兩州許置觀察使,其他郡縣悉命弘靖統之。 時總所薦將校俱在京師旅舍 意。及疏上,穆宗且欲速得范陽,宰臣崔植、杜元穎又不爲遠大經略,但欲重弘靖所授而省 請薛平理之。仍籍軍中宿將,盡薦於闕下,因望朝廷升獎,使幽、蒯之人,皆有希美爵祿之 其意欲以幽、涿、營州一道,請弘靖理之;瀛州爲一道,盧士玫理之;平、薊、嬀、檀爲一道, 父,願述先志,且欲盡更河朔舊風。長慶初,累表求入朝,兼請分割所理之地,然後歸朝。 之中尤爲上策,而朝廷不能行之,竟致後患,人到于今惜之。 克融輩雖得復歸,皆深懷觖望,其後因爲叛亂。 元和初,王承宗阻兵,劉總父濟備陳征討之術,請身先之。及出軍,累拔城邑。 初,總以严、膩、嬀、檀請|薛严,於分裂 總旣繼

子文規、景初、嗣慶、次宗。

|靖陷在||幽州,||文規徘徊京師,不尋赴難,不宜塵汙南宮,乃出爲|安州刺史。 累遷右散騎常 文規,歷拾遺、補闕、吏部員外郎。 開成三年十一月,右丞韋温彈劾文規:長慶中父弘

侍、兼御史中丞、桂管都防禦觀察使。

景初,歷職使府,官止殿中侍御史。

嗣慶,位終河南少尹。

群於史氏,次宗尤稱奉職。 改禮部員外郎,以兄<u>文規爲庫温不放入省出官,次宗堅辭省秩,</u> 于螭頭之下,宰相奏事,得以備錄。宰臣旣退,上召左右史更質證所奏是非,故開成政事, 改國子博士兼史館修撰。出爲舒州刺史,卒。 次宗最有文學,稽古履行。 開成中,爲起居舍人。文宗復故事,每入閣,左右史執筆立

文規子彥遠,大中初由左補闕爲尚書祠部員外郎。 延賞東都舊第在思順里,亭館之麗,甲於都城, 子孫五代,無所加工,時號「三相 景初子天保,嗣慶子彦修,次宗子

版氏」云。

列傳

是歟 軍資; 歷典名藩,皆稱善政,及登大位,乃彰飾情。 可稱。 進其才矣。 象恭僝功,皆四凶之跡也,雖以蔭繼世,以才進身,蹈非道者,實小人哉! 運之能,非貞純之士,刻下罔上,以爲己功。 史臣曰:君民足則國富,將相和則國安,反是道焉,非得人者。 洄附元載、楊炎,繼及累貶,俱非守正中立者也**。** 延賞以私害公,罷李晟兵柄,使武臣不陳其力矣;惡直醜正,擠柳渾相位,致賢者不 幸逢多事之朝,例在姑息之地,幸而獲免,餘無 **皋**迭處大僚, 書云:「世祿之家,鮮克由禮。」不其 徒稱舊德; 滉殺元秀,奏瑞鹽,逞斡 弘靖輕傲邊事 欺減

贊曰:韓滉刻下,延賞害公。 阜、洄繼世,弘靖興戎。

校勘記

- 1〕 滉兄法 「法」字新書卷一二六韓滉傳作「汝」。
- 白于府及戶部 「白于府及」四字各本原無,據冊府卷 五二補。
- (三) 戍軍還 「軍」字各本原作「鄆」,據冊府卷四四六改。
- 浙江東西節度 「西」字各本原無,據新書卷五三食貨志補。

「右丞」。

(至) 元左丞

(六) 散言魏氏散亡自廣陵 以上九字各本原無,據冊府卷八五七補。

(七) 淮西 各本原作「西山」,據冊府卷六八四改。

(以) 時總所薦將校 「薦將」二字各本原無,據本書卷一 四三劉怦傳補。

舊唐書卷一百三十

列傳第八十

王璵 道士李國旗附 李泌 子繁 顧況附 崔造 關播 李元平附

專以祀事希倖,每行祠禱,或焚紙錢,禱祈福祐,近於巫覡,由是過承恩遇。 古今祀典,請置春壇,祀青帝於國東郊,玄宗甚然之,因遷太常博士、侍御史,充祠祭使。與 王璵,少習禮學,博求祠祭儀注以干時。 開元末,玄宗方尊道術,靡神不宗。 爽抗疏引

絳等州節度使。 嘗不豫,太卜云:「崇在山川。」 璵乃遣女巫分行天下, 祈祭名山大川。 巫皆盛服乘傳而行, 上令中使監之,因緣爲姦,所至干託長吏,以邀賂遺。一巫盛年而美,以惡少年數十自隨, 不爲衆所稱,及當樞務,聲問頓減。 肅宗卽位,累遷太常卿,以祠禱每多賜賚。乾元三年七月, 中書令崔圓罷相,乃以璵爲中書侍郎、同中書門下平章事。人物時望,素 **興又奏置太一神壇於南郊之東,請上躬行祀事。 兼蒲州刺史**, 充蒲、 肅宗

傳第八十 王璵

列

故。入爲太子少保,轉少師。 節都督越州諸軍事、越州刺史,充浙江東道節度觀察處置使,本官兼御史大夫,祠祭使如 爲刑部尙書。上元二年,兼揚州長史、御史大夫,充淮南節度使。 使發遺歸京,肅宗不能詰。肅宗親謁九宮神,慇懃於祠禱,皆興所啓也。 階下斬之,所從惡少年皆斃。閱其贓賂數十萬,震籍以上聞,仍請贓錢代貧民租稅, 尤爲蠹弊,與其徒宿於黃州傳舍。刺史左震晨至,驛門扃轎,不可啓, 大曆三年六月卒。 肅宗南郊禮畢,以興使持 震破鎖而入, 曳女巫 歲餘,罷知政事 英中

故湫置龍堂,並許之。時歲饑荒,人甚不安,昭應縣令梁鎭上表曰: 術見,因奏皇室仙系,宜修崇靈跡,請於昭應縣南三十里山頂置天華上宮露臺、大地婆父、 三皇、道君、太古天皇、中古伏羲媧皇等祠堂,并置掃灑宮戶一百戶。 與以祭祀妖妄致位將相,時以左道進者,往往有之。 廣德二年八月,道士李國禎以道 又於縣之東義扶谷

得列祀典哉!且以殘弊之餘,當凶荒之歲,丁壯素出家入仕,羸老方飛獨輓粟,令但供 孽,水旱爲災,雖王畿皆遍,而臣縣最苦。 此則神之不能禦大災明矣,又何力於陛 德 以極陳理道,明著祀典,將愛其人而愼用其財力,敬其神而虔恭於祠祭。 而降之福,人受其大賚而盡其力 ⑴,然後神人以和, 臣聞國以人爲本,害其本則非國;神以人爲主,虐其主則非神。 而國家可保 也。 故昔之聖王, 所 故神享其明 一昨蟊賊作 下而

億王事,已不堪命,更奔走鬼道,何以聊生?

等以親疏,校以厚薄,陛下又何以言哉?此又不可三也。又大地婆父,祀典無文,言甚 禮 宇,豐潔薦奠,爲去龍之穴,破生人之產,人且怨矣,神何歆哉!此又不可五也。 存則龍在,水竭則龍亡,此愚智之所同知矣。今湫竭已久,龍安所存?陛下又崇飾 哉?此又不可四也。夫湫者,龍之所居也。 以遂萬物之性哉!陛下今違神亭育之心,竭人疲困之力,如是又何從而致其福哉?此 冈 君、三皇、五帝,則兩京及所都之處,皆建宮觀祠廟,時設齋醮饗祀,國有彝典,官有常 不經,義無 又不可二也。又陛下宗廟之敬極矣,尙無一月三祭之禮;今此獨爲,則宗廟之靈,將 已困矣!其不可一也。陛下不視昔者有道之君,至德之后,曷不卑宮室,惡飮食,恭己 巫之說,走南畝之客,殺東鄰之牛,而後冀非妄之福。 蓋 ,災觧禍福,必主帝王五事 臣 |無闕失,何勞神役靈?此又不可六也。 又聞天地之神,尊之極者,掃地可祭,精意可饗。 可取。若陛下特與大地建祖宗之廟,必上天貽向背之責,陛下又何以爲詞 ,不在山 |川百神。此又不可七也。 ' 龍得水則神,無水則螻蟻之匹也。 故知水 臣稽先王之典禮,觀前聖之軌躅,休咎豐 陛下雖欲爲人祈福,福未至而人 陛下亦何必廢先王之典,崇俗

冽 傳 第 臣伏察此 + 弊,頗知其由。 王 璵 李 琢 蓋以道士李國禎等動衆則得人,興工則獲利,祭祀則受

息。 胙,主執則弄權。 曾不謂神功力,空止竭人膏血,以使人神胥怨,災孽並生。 罔上害人, 左道亂政 是以鼓動禁中,熒惑天聽,踰越險阻,負荷粢盛,以日繫年,無時而

原情定罪,非殺而何 1

當縣郵館本用。 構,終恐賄及豪右,復爲姦惡。 所徵糧糗, 皇、道君、天皇、伏羲、女媧等,旣先各有宮廟,望請並於本所依禮齋祭。 其所興兩祠土木之功、丹靑之役、三六之祭、灑掃之戶,謹明宣旨,並以權宜停訖。 更百姓等,知陛下以從善爲心,嫉惡爲務,蠲除不急,剗革煩苛,皆喧呼於庭,抃躍於路, 臣昨受命之時,親承聖旨,務存安緝,許逐權宜。誠願沉鄴縣之巫,安流弊之俗, 無不樂輸。 其湫旣竭,不可更置祠堂,又不當爲大地建立祖廟,臣並請停。 臣伏以國禎等並交結中貴,狡蠹成性,臣雖忘身許國,不懼讒 其國旗等見據狀推勘, 如獲臟狀,伏望許臣徵收,便充

上從之。

吳房令承休之子。 李泌字 ,長源,其先遼東襄平人,西魏太保、八柱國司徒徒何弼之六代孫〔三〕。今居京兆, 少聰敏,博涉經史,精究易象,善屬文,尤工於詩,以王佐自負。張九齡、

宗召見,令待詔翰林,仍東宮供奉。 章虚心、張廷珪皆器重之。泌操尙不羈,恥隨常格仕進。 楊國忠忌其才辯,奏泌嘗爲感遇詩, 天寶中,自嵩山上書論當世務,玄 諷刺時政,韶於蘄

春郡安置,乃潛遁名山,以習隱自適。

王行軍,殷父子三人,資卿道義。」其見重如此。 尋爲中書令崔圓、倖臣李輔國害其能,將有 逾宰相,仍判元帥廣平王軍司馬事。 散官寵之,解褐拜銀青光祿大夫,俾掌樞務。 至彭原郡謁見,陳古今成敗之機,甚稱旨,延致臥內,動皆顧問。 不利於泌。 天寶末,祿山構難,肅宗北巡,至靈武卽位,遣使訪召。 泌懼,乞遊衡山,優詔許之,給以三品祿俸,遂隱衡岳,絕粒 肅宗每謂曰:「卿當上皇天寶中,爲股師友,下判廣平 至於四方文狀、將相遷除,皆與泌參議,權 會泌自嵩、潁間冒難奔赴行在, 泌稱山人,固辭官秩,特以 極神

謝恩,具陳戀闕,上素重之,留京數月。會澧州刺史闕,滾盛陳巡理行,以荆南 練使魏少遊奏求參佐,稱泌有才,拜檢校秘書少監,充江南西道判官,幸其出也。 校 郞 中,依前判官。元載誅,乃馳傳入謁,上見悅之。又爲宰相常衮所忌,出爲楚州刺史。及 詔曰:「荆南都會,粤在澧陽(三),俾人歸厚,惟賢是牧。以泌文可以化成風俗, 數年,代宗卽位,召爲翰林學士,頗承恩遇。及元載輔政,惡其異己,因江南道觀察都團 爰命頒條,期乎共理,無薄准陽之守,勉思渤海之功。 可檢校御史中丞,充灃朋 凋 療、途輟巡 尋改爲檢 政可以

列傳

第

ハ 十

李邲

俠團練使。」重其禮而遣之。無幾,改杭州刺史,以理稱•

州境,泌潛師險隘,左右攻擊,盡誅之。 之處,任百姓求採,不宜禁止。」就加巡檢校禮部尙書。時陳、許戍邊卒三千自京西逃歸,至 年六月,泌奏:「虢州盧氏山冶,近出瑟瑟,請充獻,禁人開採。」詔曰:「瑟瑟之寶,中土所無, 今產於近甸,實爲靈貺。 股不飾器玩,不尙珍奇,常思返朴之風,用明躬儉之節。 其出瑟瑟 興元初,徵赴行在,遷左散騎常侍。貞元元年,除陝州長史,充陝號都防禦觀察使。二

端奏說,上意方解 順宗在春宮,妃蕭氏母郜國公主交通外人,上疑其有他,連坐貶黜者數人,皇儲亦危。 泌百 防禦判官、殿中侍御史、內供奉章綬爲左補闕,監察御史梁肅右補闕。旣復置,人心忻然。 人人以爲便。而竇多旁奏,遂改易,使同品之內,月俸多少累等。 泌又奏請罷拾遺、補闕, 請復之,以從人欲,因是奏罷兼試額內占闕等官,加百官俸料,隨閑劇加置手力課,上從之, 人,故時戲云:「韓諫議雖分左右,歸拾遺莫辨存亡。」如是者三年。至貞元五年,以前東都 上雖不從,亦不授人,故諫司惟韓阜、歸登而已。巡仍命收其署湌錢,令登等寓食於中書舍 專拜中書侍郎、平章事、集賢崇文館學士、修國史。 初,張延賞大減官員,人情**咨怨,**泌

泌頗有讜直之風,而談神仙詭道,或云嘗與赤松子、王喬、安期、羨門遊處,故爲代所

直午而行。及建中末,寇戎內梗,桑道茂有城奉天之說,上稍以時日禁忌爲意,而雅聞泌長 **輩輕薄之流,動爲朝士戲侮,頗貽譏誚。年六十八薨,贈太子太傅,賻禮有加。** 於鬼道,故自外徵還,以至大用,時論不以爲愜。及在相位,隨時俯仰,無足可稱。復引顧況 之有?」卒命修之。又代宗山陵靈駕發引,上號送于承天門,見輼輬不當道,稍指午未間。 黎幹用左道位至尹京,當內集衆工,編刺珠繍爲御衣,旣成而焚之,以爲禳膾,且無虚月。 輕,雖詭道求容,不爲時君所重。 辯,好大言,自出入中禁,累爲權倖忌嫉,恆由智免;終以言論縱橫,上悟聖主, 問其故,有司對曰:「陛下本命在午,故不敢當道。」上號泣曰:「安有枉靈駕而謀身利。」卒命 修繕,而太卜云:「孟冬爲魁岡,不利穿築,請卜他月。」帝曰:「春秋之義,啓塞從時,何魁岡 徳宗在東宮,頗知其事,卽位之後,罷集僧於內道揚,除巫祝之祀。 有司言宣政內廊壞,請 說,用妖人王璵爲宰相,或命巫媪乘驛行郡縣以爲厭勝。凡有所興造功役,動牽禁忌。 有文集二十卷。 德宗初即位,尤悪巫祝怪誕之士。 初,肅宗重陰陽祠祝之 以躋相位。 泌放曠敏 而

直,既遇知己,深德之。及泌殁,戶部尙書裴延齡巧佞奉上,德宗信任,竊弄威權,舉朝側 子繁,少聰馨,有才名,無行義。 泌爲相,嘗引薦夏縣處士北平陽城爲諫議大夫。 城道

列

疏草 之,除河南府士曹掾。以其警悟異常,泌之故人爲宰相,左右援拯,後得累居郡守,而力學 門。及肅卒,繁亂其配,士君子無不歎駭,積年委棄。後起爲太常博士,太常卿權德輿奏斥 盡以城章中欲論事件,一一先自解。及城疏入,德宗以爲妄,不之省。必與右補闕、翰林學 梁肅友善,嘗命繁持所著文請潚潤色。 · , 兼請繁繕寫。 繁旣寫,悉能記之,其夕乃徑詣延齡,具述其事。 延齡聞之,卽時請對, 城中正之士,尤忿嫉之。一日盡疏其過惡,欲密論奏,以繁故人子,爲可親信,遂示其 罷隨州刺史,歸京師,久不承恩。 繁亦自有學術,肅待之甚厚,因許師事, 日聚其

辭,以爲繁濫殺無辜,狀奏,敕於京兆府賜死,時人冤之。其後元輿被禍,人以爲有報應 常 史章疏 少卿陸亘與繁等三人抗浮圖道士講論。 | 章處厚入相,厚待之。| 寶曆二年六月,敬宗降誕日,御三殿,特韶兵部侍郎丁公著、太 朝廷遣監察御史舒元輿按問。元輿素與繁有隙,復以初官,銳於生事,乃盡反其獄 繁潛設機謀,悉知賊之巢穴,出兵盡加誅斬。時議責繁以不先啓聞廉使,涉於擅興 《相繼,宰臣不得已,出爲亳州刺史。 州境嘗有羣賊,剽人廬舍, 劫取貨財, 累政擒捕 九月,除大理少卿,復加弘文館學士。 時諫官御

初,泌流放江南,與柳渾、顧況爲人外之交,吟詠自適。 而輝先達,故泌復得入官於朝。

著作郎,況心不樂,求歸於吳。 而班列羣官,咸有侮玩之目,皆惡嫉之。 及泌卒,不哭,而有 人多狎之。 調笑之言,爲憲司所劾,貶饒州司戶。有文集二十卷。其贈柳宜城辭句,率多戲劇,文體皆 顧況者,蘇州人。 柳渾輔政,以校書鄓徵。復遇李泌繼入,自謂己知秉樞要,當得達官,久之方遷 能爲歌詩,性詼諧,雖王公之貴與之交者,必戲侮之,然以嘲誚能文,

子非熊,登進士第,累佐使府,亦有詩名于時。

此

類也。

司員外郎。與劉晏善,及晏遭楊炎、庾準誣奏伏誅,造累貶信州長史。 元,好談經濟之略,嘗以王佐自許,時人號爲「四夔」。 浙西觀察使李栖筠引爲賓僚,累至左 崔造字玄宰,博陵安平人。少涉學,永泰中,與韓會、盧東美、張正則爲友,皆僑居上

德 宗 聞 而 嘉 之。 上以爲知禮,優韶 <u>朱</u>泚之逆,造爲<u>建</u>州刺史,聞難作, 及收京師,詔徵造至藍田,以舅源休明逆伏誅,上疏請罪,不敢卽赴闕。 慰勉,拜吏部郞中、給事中。貞元二年正月, 馳檄鄰州,請齊舉義兵,遂調發所部,得二千人, 與中書舍人齊映各守本

官、 同平 章 事 時京畿兵亂之後,仍歲蝗旱,府無儲積。 **德宗以造敢言,爲能立事,**

洪潭 次登用。 河陰 本司 官典 准 觀 滋 兩 郎吉中孚 任 委之。 祭 稅 判 轉 運使, 東部 判 屯 折 部送上都 里 使發遣,仍委中書門下年終類例諸道課最聞奏。 見 造 来 納 在 久從事江外,嫉錢穀諸使罔上之弊,乃奏天下兩稅錢物,委本道觀察使、本州刺史選 其尙 光及諸道先付度支、巡院般運在路錢 判度支及諸道 而韓滉方司 、禮部; ,委淮南節度使杜亞運送二十萬石至東渭橋。 米一百 滉 餘 主之; 如 .書省六職,令宰臣分判。 造所條奏。 1萬石, 諸道水陸運使及度支、巡院、江淮轉運使等並停; 其度支、鹽鐵,委尙書省 造判戶部、工部。又以歲飢 揚子已北 ?轉運、 其年秋初,江淮漕米大至京師,德宗嘉其功,以滉專領度支、諸道鹽 委兩浙節度使韓滉運送一百萬石至東渭橋; 其淮南濠壽旨米(日)、 兩稅事; 朝廷仰給其漕發。 元 秀以滉性 ,秀主之。 宰臣齊映判兵部承旨及雜事; 宰臣李勉判刑部; 乃以戶部侍郎元畴判諸道鹽鐵、權酒等事; 剛難制, 滉聞之怒, 猗摭秀鹽鐵司事論奏。 ,浙江東西道入運米每年七十五萬石,今更令 滉以司務久行,不可遽改。 【物,委度支依前勾當,其未離本道者,分付 乃復奏江淮轉運,其江南米自江至揚子凡 造 與元琇素厚,罷使之後,以鹽鐵之 諸道有鹽鐵處,依舊置巡院勾當; 德宗復以滉爲江 **德宗不獲已**,罷 辛臣劉 戸部特

勝判使, t

轉尙書右丞。

政 鐵 轉 事 ,守太子 運等使 右 造所條奏皆改。 庶 子 ,貶秀雷州 物議亦以造所奏雖舉舊典,然凶荒之歲,難爲集事 司戶。 造初奏太鋭 ,及莠改官,憂懼成疾,數月不能視 ,乃罷造知 事。 明

年九月卒,年五

+

上急, 宗,深遇之。 楊綰、常衮知政 佐 又辟爲判官,歷檢校 評 事 捌 、遷右 所在盜賊蜂起。 字務元 補闕 元載惡其交往 事 ,衞州汲人也。 ,薦播爲都官員 金部員 善言物理, |播 調閱 外, 一,出 攝滁州 爲河南府兵曹,攝職數縣 州 尤精釋氏之學。 天寶 外郎 兵,令其守備。 末,舉進士。 刺 史。 李靈 大曆中, 又爲政淸淨簡 鄧景山爲淮南節度使,辟爲從事,累授衞 曜阻兵, , 皆有 神策軍 跋扈於梁汴。 政能。 惠,旣無盜賊, 使王駕鶴 陳少遊 少遊 妻關氏以播與同 領浙東、淮 自總兵鎮淮

膃 躬 問 親 陟 政 閱 舉 理之要,播 德 宗 登 極 活 亦遺使臣黜陟 唯 得 一、湖南 奏云:「爲政之本,須求有道賢人,乃可得理。」上謂播云:「朕下韶求賢良,當 水名文詞 山 洞 「廣加搜訪聞薦,擢其能 中有王 ?之士,安有有道賢人肯隨牒舉選乎?」上悅其言,謂播曰:「卿且 國良者,聚衆爲盜,令播往宣撫之。 者用之,冀以傅理。」 臨行,召對於別殿,上 播奏日:「下韶求賢

速出 使 去 兵 迴 翦 除。」上曰:「卿言深合朕意。」使迴,改兵部員 當 興卿 論 政 (事。」播 又奏曰:「臣今奉詔招撫,國良不受命 外,遷河中少 尹 臣請便宣 恩命,語鄰境

盧杷 於義 請删去名將配享之儀及十哲之稱」。從之。 擇古今名將 胥 吏掌 以播柔緩,冀其易制 不安。 建 中 知,爲弊頗人, 初, 十人於武成王廟配享,如文宣王廟之儀。 又孔子十哲,皆是當時弟子,今所擇名將,年代不同, 張鎰爲河中少尹。 播始建議 ,驟稱薦之。 並以士人知之, 鎰尋入相,二年七月,遷播 尋遷吏部 侍郎 至今稱當。 播以「太公古稱大賢,今其下稱亞 轉刑 給事中。 部尙書、知删定。 轉刑部侍郎、奉迎皇太后 於義旣乖,於事又失。 舊例, 諸司甲庫, 奏上元中, 韶 副 臣

叛亂 知州 播累奏云元平等皆可將相 盧杞等從駕幸奉天,旣而盧杞、白志貞等並貶黜,播尙知政事, 而親信之。 士、修國史。 事 ,上以汝州要鎮, 建中三年十月, 元平 有李元平、陶公達、張愻、劉 時政 至 州 事 旬日,爲希烈所擒, 決在盧杞、播 拜銀青光祿大夫、中書侍郎、同中書門下平章事、集賢殿崇文館大學 令選擇刺史。 也,請閱試用之,上以爲然,以元平爲補闕。 但斂袵取容而已。乏於知人之鑒,好大言虛誕者,播必悅 播 薦元 汝州 承誠, 陷 平爲汝州 皆言談詭妄,誇大可立功名,亦有微材薄藝。 賊, 中外哂之。 刺 史,尋· 加檢校 由是公達等未克任用。 中外囂然,以爲不可,遂罷 文東部 會准西節度李希烈 郎中、汝州 別駕 播與

相 ,改刑部尙書。 大臣章倫等泣於朝日:「宰相不能謀餓翊贊,以至今日,而尙爲尙書,可痛

心也!」

子重之。 固辭疾,請罷官,改太子少師致仕。 持節充送咸安公主及册 貞元 貞元十三年正月卒,時年七十九,廢朝一日,贈太子太保。 四年,迴紇請和親,以咸安公主出降可汗,令播以本官加檢校右僕射、兼御史大夫, 可汗使(云),奉使往來,皆淸儉謹愼,蕃人悅之。 使迴,遷兵部尙書, 播致仕之後,減去僮僕車騎,閉關守靜,不縈外事,士君

以汝州 何得 樂,凡入數百人, 兵,天下賢士大夫無可其意者,以是人多銜怒。關播奇重之,許以將帥。時希烈反叛,朝廷 內,縛元平馳去。 檢校吏部郎 元平得用, 將元平兒來?」因嫚駡曰:「盲宰相使汝當我,何待我淺耶!」僞署爲御史中丞。 李元平者,宗室子。始爲湖南觀察使蕭復判官,試大理評事。 與賊 仍欺於人曰:「李生功業濟矣。」言必能覆稀烈而建功也。 中,兼汝州 、接壤,刺史章光裔懦弱不任職,播乃盛稱元平,特召見,超左補闕,不數日,擢爲 元平不之覺。 旣見希烈,遺下汚地。 別駕,知州事。旣至部,募工徒繕理郛郭,希烈乃使勇士應募,執役板 希烈遣僞將李克誠以數百騎突至其城,先應募執役者應於 希烈見其無鬚眇小,戲謂克誠曰:「使汝取李元平, 性疏傲,敢大言,好論 居無何, 希烈用爲宰 播聞

列

州 相, 或告其有二者, 會赦得歸剡中 ,浙東觀察使皇甫政表聞其到,以發上怒,復流賀州而死。 乃斷一指以自誓。 希烈旣死,或有人言在賊中微有謀盧, 貸死流於珍

正士抗 諒由素履。 與假於鬼神,乃至將相,旣處代天之位,爰滋亂政之源。 國顧妖人疑衆,妄恢其祀典; 狂妄浮薄之蹤。 ,國其危矣。 史臣曰:蒸嘗酌祀,前王制以奉先,怪力亂神,宣聖鄙而不語。凡云左道,固有舊章。 疏,方悟其上心。 造爲臣得禮,莅事非能;播居位取容,舉人敗事。皆非國器,咸歷台司,失人者 汪制云:「執左道以亂政,殺。」寧無畏乎! 繁之醜行,棄於當時,竟陷非辜, 泌見可進而知難退,足爲高率智辯之士;居相位而談鬼神,乃見

校勘記

贊曰:璵、泌、造、播,俱非相材。

國禎左道,梁生直哉!

(1) 受其大資 「資」字各本原作「賴」,據冊府卷五四六改。

司徒徒何弼 各本原作「司徒何弼」,據北史卷六〇李弼傳補「徒」字。

(四) 旨米 册府卷四九八作 「先支米」。

(至) 總兵鎮淮上 「淮」字各本原作「汴」,據冊府卷六九六改。

(K) 册可汗使 「使」字各本原無,據册府卷六五四補。

舊唐書卷 一百三十一

列傳第八十一

李勉 李皐子象古道古

伏之名。 尉。 榻,坐談政理,時人榮之。 |勉幼勤經史,長而沉雅淸峻, 嚴幹聞。 時昇平日久,且汴州水陸所湊,邑居庵雜,號爲難理,勉與聯尉盧成軌等,並有擒 李勉字玄卿, 在漢州, 張嘉貞爲益州 鄭王元懿曾孫也。 長史、判都督事, 父擇言,爲漢褒相岐四州刺史、 性簡貴,待管內刺 宗於虚玄,以近屬陪位,累授開封 史禮 安德郡公, 隔, 而引擇 所歷皆以 同

在朝堂背闕 遷 至德初,從至靈武,拜監察御史。 司 膳 員 而坐,言笑自若,勉劾之,拘於有司,肅宗特原之,數曰:「吾有李勉,始 外郎。 時關東獻俘百餘,韶並處斬,囚有仰天歎者,勉過問之,對曰:「某被資 屬朝廷右武,勳臣恃寵,多不知禮。 大將管崇嗣 知朝 廷尊 於行

列

傳

之,是驅天下以資兇逆也。」肅宗遽令奔騎宥釋,由是歸化日至。 制守官,非逆者。」勉乃哀之,上言曰:「元惡未殄,遭點汚者半天下,皆欲燥心歸化。

辜乎! 陳王晬無罪,政事條舉,盡力吏也。 詔 [處死,勉問其故,乃爲權倖所誣。 勉詢將吏曰:「上方藉牧宰爲人父母,豈以譖言而殺不 事、龍門令,終有能名,時稱知人。 司馬,尋遷梁州都督、山南西道觀察使。勉以故吏前密縣尉王晬勤幹,俾攝南鄭令,俄有 克復西京,累歷淸要,四遷至河南少尹。累爲河東節度王思禮、朔方河東都統李國貞行 」即停詔拘晬,飛表上聞,啐遂獲宥,而勉竟爲執政所非,追入爲大理少卿。 肅宗嘉其守正,乃除太常少卿。 王晬後以推擇拜大理 謁見,面

虢州 諸道力戰,悉攻平之。部人有父病,以蠱道爲木偶人,暑勉名位,瘞于其隴,或以告,曰:「爲 丞歸西臺,又除江西觀察使。 賊帥陳莊連陷江西州縣,偏將呂太一、武日昇相繼背叛,勉與 刺史,改京兆尹、檢校右庶子、兼御史中丞、都畿觀察使。尋兼河南尹,明年罷尹,以中 肅宗將大用勉,會李輔國寵任,意欲勉降禮於己。勉不爲之屈,竟爲所抑, 出歷

子監事,恃寵含威,天憲在舌。前尹黎幹寫心候事,動必求媚,每朝恩入監,傾府人吏具數 大曆二年,來朝,拜京兆尹、兼御史大夫,政尚簡肅。 宦官魚朝恩爲觀軍容使, 仍 知國 父禳災,亦可矜也。」捨之。

候 百 太學 人之餼以待之。 軍容宜 厚 具主 及勉 禮 莅 職旬月 勉 忝京 朝恩1 尹 ,軍容倘 入監 速顧 府吏先期有請 府廷,豈敢不具蔬饌 勉 月..[1 軍容使判 朝恩 | 國子 聞 而 監 銜之,因 事 勉

不復至太學,勉亦尋受代。

及滑亳 以爲可繼 年 前 亂 諸 ,器用車服無增飾。 後西域舶泛海至者歲纔四 前後累歲,陷沒十餘州 侯 四 [年,除] 雖 永 暴驚者,亦宗敬之。 平 前 軍 朝宋璟、盧奐、李朝隱 廣 節度令狐彰卒,遺表舉勉自代,因除之。 州 刺 史,兼嶺南節度觀察使。 及代歸,至石門停舟,悉搜家人所貯南貨犀 五 勉 至, 之徒。 勉性廉潔, 遣 將李觀與容州 人吏詣闕請立 舶來都不 番禺賊帥馮崇道、 刺 檢閱 史王翙 在鎭八年, 碑,代宗許之。 併力招 故末年至者四十餘。 桂州 象諸 以舊德清重 討 **飯將朱濟時等阻洞爲** 物,投之江 十年, 悉斬之, 拜工 不嚴而 中, 五嶺 部尙書。 在官累 理, 平。

身死 嗣 阻 位 兵 北結田 加 靈 檢校 年,汴宋留後田神玉卒, 曜 週下 北 承 吏部尚書 走 嗣 一、勉騎 ,承嗣使姪悅將銳兵戍之。 ,明年爲麾下所逐,韶 將杜如江 ,尋加平章事 擒 韶加勉汴州刺 之以獻,代宗褒賞甚厚。 建中元年 復 加 韶勉與李忠臣、馬燧等攻討, ,檢校左僕射,**充河南**汴宋滑亳 勉汴宋節度使,移 史台、汴宋 節度使。 旣 而李忠臣代鎮 未行 餘 ٠, 大破之, **汴州**將 並 汴州 河陽 如 故。 等道 悦 李 而 虁 德 僅 勉 仍 以

列

統,餘如故。 曰:「希烈兇逆殘酷,若與較力,必多殺無辜,吾不忍也。」遂潛師潰圍,南奔宋州。詔以司徒 事徵。旣至朝廷,素服請罪,優詔復其位,勉引過備位而已。 四年,李希烈反,以他盜爲名,悉衆來寇汴州。勉城守累月,救援莫至,謂其將

平章

位,遂罷知政事,加太子太保。」貞元四年卒,年七十二,上頗愍悼之,册贈太傅,賻物有差, 曰:「天下皆知其姦邪,獨陛下不知,所以爲姦邪也。」 時人多其正直,然自是見疏。 累表辭 表,遂授灃州別駕。他日,上謂勉曰:「衆人皆言盧杞姦邪,股何不知!卿知其狀乎?」對 喪葬官給。 無何,盧杞自新州員外司馬除灃州刺史,給事中袁高以梠邪佞蠹政,貶未塞責,停韶執

輔已俶擾矣,人心已動搖矣。以文吏之才,當虎狼之隊,其全師奔宋,非量力之恥也。與其 **亂,其慓悍陰禍,兇焰不可當,天方厚其毒而降之罰。況勉應變非長,援軍莫至,又其時關** 執酹,辭色悽惻,論者美之。 或曰:「勉失守梁城,亦可貶也。」 議者曰:「不然。 當賊烈之始 零,又有巧思。及在相位,向二十年,祿俸皆遺親黨,身沒而無私積。其在大官,禮賢下士, 終始盡心。以名士李巡、張參爲判官,卒於幕,三歲之內,每遇宴飲,必設虛位於筵次,陳膳 勉坦率素淡,好古尙奇,淸廉簡易,爲宗臣之表。善鼓琴,好屬詩,妙知音律,能自制

坐受喪敗,不猶愈乎!」

李阜字子蘭, 曹王明玄孫,嗣王戢之子。少補左司禦率府兵曹多軍。天寶十一載嗣

處州 法 |州 則悌,行有餘力,然後可以學文。』若二子者,豈可備於列位!」由是舉奏,並除名勿齒。改 給。」時鈞爲殿中侍御史,鍔爲京兆府法曹,俱以文藝登科,名重於時。。皐曰:「『入則孝,出 開倉盡散之。 上旨,皐曰:「夫人日不再食,當死,安暇稟命!若殺我一身,活數千人命,利莫大焉。」於是 封 竟出則素服,入則公服,言貌如平常,太妃竟不知。及爲潮州,詭詞謂遷,至是復位,方泣以 刺 媪 ,貶温州長史。無幾,攝行州事。歲儉,州有官粟數十萬斛,阜欲行賑救,掾吏叩頭乞候 ,且言非疾不敢有聞。 ,授都水使者,三遷至秘書少監,皆同正。 多智數,善因事以自便。 奉太妃鄭氏以孝聞**。** 別駕,行州事,以良政聞。徵至京,未召見,因上書言理道,拜衡州刺史。坐小法,貶潮 上元初,京師旱,米斗直數千,死者甚多。。阜度俸不足養,亟請外官,不允,乃故抵徵 史。時楊炎謫官道州,知阜事直,及爲相,復拜衡州。初,阜爲御史覆訊,懼貽太妃憂, 垂白而泣,哀而問之,對曰:「李氏之婦,有二子: 鈞、鍔, 宦遊二十年不歸, 貧無以自 以擅貸之罪,飛章自劾。天子聞而嘉之,答以優韶,就加少府監。 鼻行縣,見

列 傳 第八 李

良 何心 日, 死罪加之。 軍 ,救誤死而已。 ,乃曰:「驅疲甿,誅反側,非所以奉聖朝事。」遣使遺國良書曰:「觀將軍非敢大逆,蓋遭讒 國良 持 中 ,散倉庫,給兵士,令復農桑。有韶赦國良罪,賜名惟新 國良召使者入, 鼻遂大叫軍中曰: 「有人識曹王否? 只我是。 建 中元 動。 有變,言降是詐也。」皐曰:「非爾輩所知。」遂留麾下兵, 單騎假稱使者, 徑入國良壘 刃殺將軍耶!將軍以爲不然, 捧書,且憂且喜,遣使請降,亦未必決。。阜即日赴縣受降,中道有候騎馳告曰:「 適有 年,遷湖南觀察使。 國良危懼,因人所苦,遂散財聚衆,據縣以叛,諸道 識者走至,傳呼曰:「是。」國良匍匐叩頭請罪。 將軍遇我,何不速降?我與將軍同爲辛京杲所構,我已蒙聖朝昭雪,使我 前使辛京杲貪殘,有將王國良鎮邵州武岡縣,豪富,京杲以 我以陣術破將軍陣, 以攻法屠將軍城,非將軍所度 同計,聯歲不能下。 **阜**執手約爲兄弟,盡焚攻守 國良何不速降?」一軍愕 阜授命 國

具戰艦,將軍二萬餘。 占,皐察其 功未 騎 常侍。 建 申者, 中二年,丁母艱,奉喪至江陵。會梁崇義反,乃授起復左衞大將軍, 詞氣,驗其有功,悉補大將。 李希烈反,遷江西道節度使、洪州刺史、兼御史大夫。 別爲行;有策謀及器能堪佐軍者,別爲行。」有裨將伊愼、李伯潛、劉旻皆自 初,伊愼將江西兵從李希烈平襄州,及反,懼阜任之,乃陰遣遺之鎖 擢王鍔委之中軍,以馬彝、許孟容爲賓佐。 至州,集將吏而令曰:「嘗 復還湖南 繕甲兵, 尋加

蘄州 功,果 陣, 甲, 兵相 大破之, 中 又詐爲愼 直。去蔡山 大破 使 理 戰 因 叉 至 進拔蘄州 艦 賊,斬首數 阜 ,分兵傍南 書往復,置遺于境。 三百餘里, 乃勉令以功自贖 ,降其將李良,又取黃州,斬 百級 涯 一,與舟 , 愼方得 阜令步 (師派江 兵登 発罪。 上開, 賜之以所乘馬及器 一舟,順 丽 即遣中使斬愼, 上。 賊樹堡栅於蔡山 流 賊以 東下, 首千餘,兵益振。 老 甲 弱守栅, 不日拔蔡山。 · 介將鋒 **阜表請捨令自効。 阜度峻險** 引 而 軍 舒王為元帥 先 循江 賊還救,間 阜率 不可 隨戰艦 攻, 軍繼之,責其有 會與城 加阜前軍兵 乃聲言 一日方至, 南北 夾江 與鼻 西 取

馬使。

山 涓水 軍 封 栅 于永安戍。 齊 屠炸州 獲 五 ,從近縣 為固 百戶。 出 德宗居奉天,淮南節度陳少遊強取鹽鐵錢,其使包信以財幣泝江,次于蘄口。 戒虚 奮擊,不爲行陣 為軍 又遺廳將杜 及大將二、 攻之累日 愼列三棚, 上至梁州,進獻繼 市,商貨畢至。 不下。 裨將二 、賊亂 相去纔 少誠將步 十,斬首千餘。 希烈遣甥劉戒 少誠 加工 至。 四 里,列鼓 騎萬餘來寇廝、黃,將絕江道。 敗走、 皐以 部尙書。 上蒙塵于外,不敢居城府, 斬首萬級 角中栅。 虚將步騎八千來援。 駕還 面縛成虛等之城下,乃使人說之, 之京師, ,封尸爲京觀。 少誠至, 又遣 ,分兵圍之, 伊愼、王鍔將兵圍安州, 皐遺伊愼將七千衆禦之,遇 **阜命李伯潛分**師迎 以功加銀青光祿大夫, 乃於西塞山上游 部隊未嚴,聲鼓而三 賊曰:「得大 摩於應 大洲 州 時希 城 屯 進 烈 阳

列

將及賓佐一二人爲信,當降。」皐乃使王鍔、馬蘇繩城而入,城中大呼,乃出降。 希烈又遺兵

接隨州, 阜令伊愼擊於厲鄉, 大破之, 復平靜、白雁等關。 希烈懼, 乃戢兵。

母曹國太妃。葬畢來朝,韶還鎭,出東都以拜墓,觀者榮之。 四、縣十七,大小十餘陣,未嘗敗衂。淮西旣平,請護喪祔東都,上遣中使弔,贈父右僕射, 貞元初,拜江陵尹、荆南節度等使,江漢倚皐爲固。未幾,李思登以隨州降。 凡下州

江南廢洲爲廬舍,架江爲二橋,流人自占二千餘戶。自荆至樂鄕凡二百里,旅舍鄕聚凡十 數,大者皆數百家。一楚俗佻薄,不穿井,飮陂澤,阜始命合錢開井以便人。 先,江陵東北有廢田傍漢古隄二處,每夏則溢,阜始命塞之,廣田五千頃,畝得一鍾。規

設監司、 豪家不得擅其利。常運心巧思爲戰艦,挾二輪蹈之,翔風鼓浪〔三〕,疾若挂帆席,所造省易 割汝、隨隸焉。 而 初平希烈,吳少誠殺陳仙奇,上以襄、鄧要阨,三年,除襄州刺史、山南東道節度等使, 能參聽下戶一,持將更短長,賞罰必信。所至常平物價,貴則出賣之,給將更廩俸, 又造欹器,進入內中。每遺人物,常自秤量。署之官匹帛皆印之,絕吏之私。 練兵積糧,市迴鶻馬益騎兵,嘗大畋以教士,少誠憚之。性勤儉,知人疾苦,

之游宴,阜將買之,緣斂袵而言曰:「張漢陽有中興功,今遺業當百代保之,王縱欲之,奈何 初,扶風馬彝未知名,鼻始辟之,卒以正直稱。漢陽王張柬之有林園在州西,公府多假

知人任下爲已任,故賓從將佐多至大官。貞元八年三月,暴卒于位,年六十,廢朝三日,贈 令其子孫自鬻焉! 右僕射、賻弔有差、諡曰成。子象古、道古、復古。 ·」。鼻謝曰:「主吏失詞,爲足下羞; 微足下,安得聞此言!」 以改過遷善、

|仲武使人諭其酋豪,數月間,歸附繼至,約兵七千餘人,收其城,斬淸及其子|志貞,籍沒其 護,且招諭之,赦淸,以爲瓊州刺史。仲武至境,淸不納,復約東部署,刑戮憯虐,人無聊生。 所親杜士交潛謀迴戈,夜襲安南,數日城陷,象古故及於害。朝廷命唐州刺史桂仲武爲都 無何,邕管黃家賊叛,詔象古發兵數道共討之,象古命凊領兵三千赴焉。清與其子志烈及 代爲南方

台豪,屬象古貪縱,人心不附,又惡清之強,自臟州刺史召爲牙門將,鬱鬱不快。 志烈與士交敗,保于長州之鑿溪,尋以所部兵來降。 象古自衡州刺史爲安南都護。元和十四年,爲楊凊所殺,妻子支黨無噍類焉。楊凊者,

由黔中觀察爲鄂岳沔蘄安黃團練觀察使,時元和十一年也。 際,每僞爲不勝而厚償之,故當時有虛名,而嗜利者悉與之狎。 道古登進士第,遷司門員外郎。 便佞巧宦,早升朝籍,常以酒肴棋博游公卿門,角睹之 初,以柳公綽在鎭無功,議將 歷利、隨、唐、睦四州 刺史,

列傳

代之,裴度言:「道古嗣曹王皐之子,皐嘗以江漢兵遏希烈之亂,威惠至今在人,復用其子, 前後再攻破申州外城而不能拔。至李愬入蔡州,乃降。 軍錢,道古半以奉權倖,半以沒己,人皆怨怒,不肯力戰。 未嘗退衂。及道古至,誣奏聽,移去之,乃自帥兵出穆陵。士卒驕惰,賜給多闕,其度支供 守卒夜帥婦人登城而呼,懸門竊發,分出其衆,道古之衆驚亂,爲虜所殺。初,李聽守安州 道古至,惶駭而出,家財多爲所奪。十二年,道古攻申州,克其羅城,乃進圍逼其中城。城中 必能繼美。」憲宗然之,故有此授。及赴鎭,倍道而行,以數騎徑入安州城。 賊亦易道古,以贏兵抵之,故道古 時公綽殊未意

馬,終以服丹藥,歐血而卒。 疾,以至棄代。 轉方諛娟固寵, 道古言柳泌有道術, 鎛得而進之, 待詔翰林。 上。後又爲左金吾衞將軍。憲宗季年頗信方士,銳於服食, 元和十三年,入爲宗正卿。 道古在鄂州日,以貪暴聞,懼終得罪,乃薦山人柳泌以媚於 穆宗在東宮,扼腕於其事,及居喪,皆竄逐誅之。縛旣貶責,授道古循州司 韶天下搜訪奇士。宰相皇甫 憲宗服餌過當,暴成狂躁之

夫治軍旅,禦寇戎,謀必臧,戰必勝,則又勉不及阜遠矣。 道古便佞,姦以事君,何父子之不

相類也。

贊曰:我宗之英,日阜與勉,才雖不同,道豈相遠。

校勘記

(二) 汴州刺史 「汴」字各本原作「沛」,合鈔卷一八二李勉傳作「汴」,按字勉旣加汴宋節度使,則作

「汁」是,今據合鈔改。

(三) 能參聽下 冊府卷六九○「聽」下有「於」字。

(三) 翔風鼓浪 「浪」字各本原無,據獅覽卷三三四補。

舊唐書卷一百三十二

列傳第八十二

李抱玉 李抱眞 王虔休 盧從史 李芃 李澄 族弟元素

華,習文儒,與士人通婚者,稍染士風。抱玉少長西州,好騎射,常從軍幕,沉毅有謀,小心 李抱玉,武德功臣安興貴之裔。代居河西,善養名馬,爲時所稱。 **羣從兄弟,或徙居京**

忠謹。

日乎? 節度。 知軍 黄玉等先次南城,將陷之,抱玉乃給之曰:「吾糧盡,明日當降。」 賊衆大喜,斂軍以俟之。 事,遷鴻臚卿員外置同正員,持節鄭州諸軍事兼鄭州刺史、攝御史中丞、鄭陳潁亳四州 乾元初,太尉李光弼引爲偏裨,屢建勳績,由是知名。二年,自特進、右羽林軍大將軍、 」抱玉曰:「過期若何?」光弼曰:「過期而救不至,任棄城也。」賊帥周擊領安太淸、徐 時史思明陷洛陽,光弼守河陽,賊兵鋒方盛,光弼謂抱玉曰:「將軍能爲我守南城二

三六四五

列傳第

ハ十二

李抱玉

州、本姓 擎軍 敗之。 長安縣。」許之,因是舉宗並賜 使、潞州 玉 因 退 得 繕 固 安氏,以祿山構禍,恥 大都督府長 完設 光弼 河陽 復懷州 備 自將于中潭城 明 史、兼御史大夫, 日 皆功 堅 壁 摯捨 一請戰。 居第 國姓 與同姓,去至德二年 --, 南城攻中潭 賊怒欺紿,急攻之。 遷澤州 加領 陳 刺 鄭二 ,不勝,乃整軍 史、兼 五月,蒙恩賜姓李氏,今請割貫屬京兆府 州, 御 遷兵部尚書。 史中丞。 抱玉 將攻 一出奇 代宗 北 兵 城。 表 抱玉 卽 裏夾攻,殺傷 位 光弼以兵 上言:「臣貫 擢爲澤潞節度 出戰 甚衆 屬 凉

討之。 高 五 五谷羣盜頗害居人,朝廷遺酵景仙領兵爲 一谷平。 玉 方 廣德)與諸 抱玉 以功遷 元年多,吐蕃寇京 偷 探 會 知 司空,餘並 賊 ,遽爲銳卒數十人掩擒之,因大搜獲偷黨 前行止之處,先分屯諸 如 師 故 ,乘輿幸陝,諸軍潰卒及村閭亡命相聚爲盜,京城南 谷 五 ,乃設奇潛使 谷使招討 , 連月不 、悉斬之, 輕銳數百 捷, 乃韶 南自洋州 餘黨 抱玉 不 討 兼 自潰, 入攻之。 鳳 翔 面子午等 旬 節 賊 度 日 帥 內 使

三大 部 兼 尙 Ш 書 府 南 時 ·吐蕃, 西 ,秩處三公。 道 上嘉其謙讓,許 節 每歲犯境,上以岐陽 度使、 抱玉 河西 之。 一以任 隴右 位 抱玉 Ш 崇 南 國之西門,寄在 凡鎭鳳翔十餘年 重 西 道 抗 副 疏懇讓 元帥、 判梁州 抱玉 司 空及 雖 一、恩寵 無破虜之功,而禁暴安人,頗爲當 山 事,連統 南 無比 西道 節度、 一道節 遷同中書門下 判 制 梁州 兼領 事 鳳 平章 ,乞退授兵 翔 潞、 梁

勁,憂甚,召見抱眞問狀,因奏曰:「郭子儀領朔方之衆,人多思之。懷恩欺其衆,日『子儀爲 節度副使。居二年,轉懷州刺史,復爲懷澤潞觀察使留後,凡八年。 雖無可取,當今百姓勞逸,繫在牧守,願得一郡以自試。」上許之,改授澤州刺史,兼爲澤潞 是時,僕固懷恩反于汾州,抱虞陷焉,乃脫身歸京師。代宗以懷恩倚迴紇,所將朔方兵又 遁,多如抱眞策,因是遷殿中少監。 居頃之,爲陳鄭、澤潞節度留後,抱眞因中謝言曰:「臣 朝恩所殺』,詐而用之。今復子儀之位,可不戰而克。」其後懷恩子賜爲其下所殺,懷恩奔 李抱眞,抱玉從父弟也。抱玉爲澤潞節度使,甚器抱眞,任以軍事,累授汾州別駕。當

益實,乃繕甲兵,爲戰具,遂雄視山東。是時,天下稱昭義軍步兵冠諸軍。無幾,復代李承 之隙,則分曹角射;歲終,吾當會試。」及期,按簿而徵之,都試以示賞罰,復命之如初。比 賦重,人益困,無以養軍士。籍戶丁男,三選其一,有材力者免其租徭,給弓矢,令之曰:「農 三年,則皆善射,抱眞曰:「軍可用矣。」於是舉部內鄉兵〔〕,得成卒二萬,前旣不廩費,府庫 抱玉卒,抱眞仍領留後。抱眞密揣山東當有變,上黨且當兵衝,是時乘戰餘之地,土瘠

列

昭爲昭義軍及磁邢節度觀察留後,加散騎常侍。

校兵 宮闕,時李希烈陷 奉天 以 抱眞 中 攘傾潰之中 功 興燧敗 《部尙書。復與燧大破悅於洹水,悅以數百騎走歸魏州。 年(日), ,中使告問至,諸將皆仰天慟哭。 加檢校右僕射。 德 宗 卽 一,以山 悦兵 田悅以魏博反,乃悉兵圍邢州及臨洺益急, 位 ,拜檢校工部尙書,兼 於雙岡,斬悅將楊朝光,又擊破悅于臨洛,遂解臨洛及邢州 東三州外抗羣賊,內輯軍 大梁,李納亦反鄆州 時悅窘蹙,朱滔、王武俊皆反,聯兵救悅,抱眞 潞州長 李懷光席卷奔命,馬燧、 無何,上幸梁州 史、昭義軍節 主 ,羣賊深憚之。 韶 ,李懷光又竊據 度支度營田、 河東 復與燧圍 李芃各引 節度使馬燧及神策兵救之。 與燧等退次魏縣。 魏州, 澤潞磁邢觀察使。 河 兵 、 歸鎮 中。 之園 又敗 抱眞 悦於城下 ,以功加檢 朱泚 獨 建

抱眞 攻 亦唯子。」言訖而去。 今日 韶,悉赦羣城, 圍 此 貝州 乃以數騎徑入武俊營。 興元初,遷 舉 ,繫天下安危。 初, 抱眞 檢校左僕射、平章事。 羣賊附於希烈, 乃遣門客賈林以大義說武俊, 武俊設備甚嚴,抱眞曰:「朱泚、希烈僭竊大位 僕死 其 將 去 不還,領軍事以聽朝命 希烈 也 、僭僞, 時朱滔 ,賓客皆止之,抱眞遺軍 有臣 悉幽薊 |屬羣賊意, 羣心稍離 ,合從擊朱滔 , 亦 軍,借兵迴紇 ?唯子; ,武俊許之。 司馬盧玄卿 奮 游雅衆 勵 ,朱滔攻圍貝州 土 馬, 上 五 萬,南向 自奉天下罪己之 勒軍部分曰:「僕 時兩軍尙相 東 向雪僕之恥, 以 此輩皆 應泚

遂與結爲兄弟而別,約明日合戰,遂擊破朱滔于經城,以功加檢校司空,實封五百戶。 貞元 退臥武俊帳中,酣寢久之。武俊感其不疑,待之益恭,指心仰天曰:「此身已許公死敵矣。」 罪己之詔,可謂禹、湯之主也。」因言及播越,持武俊哭,涕泗交下,武俊亦哭,感動左右。因 欲陵駕吾屬。足下旣不能自振數賊之上,捨九葉天子而北面臣反虜乎?乃者聖上率天下

朝于京師,居頃之,還鎭

校左僕射。 久疾,好禨祥,或令厭勝,爲巫祝所惑,請降官爵以禳除之。 是年,凡七上章讓司空,復爲檢 穀漆下之,殆盡。 病少間,季長復日:「垂上僊,何自棄也!」 益服三千丸,頃之卒。 初,抱眞 道士衣以習乘之。凡服丹二萬丸,腹堅不食,將死,不知人者數日矣。道士牛洞玄以猪肪 皇、漢武皆不能得,唯我遇之,他年朝上淸,不復偶公輩矣。」復夢駕鶴沖天,寤而刻木鶴、衣 有孫季長者,爲抱眞鍊金丹,給抱眞曰:「服之當昇僊。」遂署爲賓僚。數謂參佐曰:「此丹秦 無可採者,漸退之。時天下無事,乃大起臺榭,穿池沼以自娛。晚節又好方士,以冀長生。 抱眞沉斷多智計,嘗欲招致天下賢儁,聞人之善,必令持貨幣數千里邀致之;至與語 貞元十年卒,時年六十二,廢朝三日,贈太保,賻以布帛米粟有差

抱真薨之日,其子殿中侍御史臧匿喪不發。營田副使盧會昌令抱真從甥元仲經潛典 其明日,將吏會集,仲經詐爲抱眞令曰:「吾疾甚,不能莅職,今令臧掌軍事,諸軍善佐

第八十二

李抱

王虔休

賞軍士。盧會昌仍詐爲抱眞表,請以職事付緘。翌日,又令諸將連奏請臧領軍。上已聞 之。」節度副使李說及諸將吏俛首,皆曰:「諾。」須臾,緘盛服而出,衆皆拜之,緘乃悉府藏頒 求假財帛,武俊大怒曰:「吾與汝府公善者,冀恭王命,非同惡也。今聞已亡,孰詐令其子而 之。旣歸罪仲經,盧會昌得不坐。緘初謀亂,遣裨將陳榮詐以文書告成德節度使王武俊, 不俟朝旨耶?何敢告我,況有求也!」乃囚陳榮而遣使讓緘焉〔三〕。 發喪,畢一哭。中使召延貴,以口詔令視事,趣遣緘赴東都。元仲經逃于外,延貴捕得殺 抱眞卒,乃遣中使第五守進馳傳觀變,且令以軍事屬於大將王延貴。守進至潞州,緘詐言 不許/鹹掌事,諸公意若何?」將吏莫有對者。/緘懼而退,遂以使印及管鑰歸監軍。是日, 抱真疾病,請見明日。如此者凡三日,臧乃出造中使,左右皆陳兵,甚嚴備。 朝廷已知相公薨歿,令以兵務屬延貴,侍御宜歸發喪行服也。」緘愕然,出謂諸將曰:「有詔 中使謂緘日

兵馬使押衙。 大曆中, 王虔休字君佐,汝州梁人也。本名延貴。少涉獵書籍,鄉里間以信義畏慕之,尤好武 汝州刺史李深用之爲將。久之,澤潞節度李抱眞聞名,厚以財帛招之,累授 建中初,抱真統兵馬與諸將征討河北,其雙岡、水寨營等陣,虔休攻戰居多,

異 州 休 擢 潞州 長 意 縅 爲 史、昭義軍 軍 步軍都虞候,累加兼御史中丞、大夫,賜實封百戶。 • 左司 軍 中 中服從其言,由是竟免潰亂。 擾亂,虔休正 馬、依前 節度、澤潞磁邢洛觀 兼御史大夫,掌留後 色言於衆曰:「軍州是天子軍州,將帥闕,合待朝命,何乃云云 [察使,尋加檢校工部尙書。 朝廷知 ,仍賜名虔休。 而嘉之,以邕王 **洎抱眞卒,裨將元仲經等議立** 號令安撫 爲昭義節度觀察大使 貞元十五年卒, 年六十二, 軍州 大理。 二歲, 授虔 妄 遷潞 抱眞

虔休 性 恭勤 了,儉省節用,管內州倉庾皆積糧儲,可支軍人數歲。 又嘗撰誕聖樂曲以

其表曰:

廢

朝三日,贈左僕射

,賻以布帛米栗。

歌竊 天長 繼 六 邁 氣 禹 終始周旋 (節著于甲令,每於是日海縣歡娛,稱萬壽之無疆 誕 抃 而 臣聞 一、忘寢 大樂 樂 於師,夫君子爲能知樂,是故審晉以知聲,審樂以知政,則理道備矣。 自 似與食 未宣於 周已後 ,與天地同 曲。 人矣。適遇有 大抵以 八音,無乃臣子之分,或有所闕。 ,不能議矣。 其和 宮爲調,表五音之奉君也;以土爲德,知五運之居中也。 ,與四時合其序 知音者,與臣論 臣竊以 避下降誕之辰,未有惟新之曲。雖太和已布於 ,豈止於鐘鼓管磬云乎哉! 及樂章,探微賾奧,窮理盡性,臣乃遣造 ,樂一人之有慶, 愚臣不揆頑昧, 敢思祖述, 故能追堯接舜, 臣伏見開元中 清明廣 每思 凡

冀雲門、咸池,永傳於律呂,空桑、孤竹,合薦於宮縣,不聞遊灔之聲,長作中和之樂。可 使九域之人,頓忘於肉味;四夷之俗,皆播於薰風。與唐惟休,終古盡善。 遍 法二十四氣而足成一歲也。 每遍一十六拍,象八元、八凱登庸於朝也。 臣不勝懇款 所

先時,有太常樂工劉玠流落至潞州,虔休因令造此曲以進,今中和樂起此也。

屏營之至,謹昧死陳獻以聞。其所造譜,謹同封進。

於度支,諷朝廷求宰相;且誣奏諸軍與賊通,兵不可進。上深患之。 功。 授昭義軍節度使。 **德宗中歲,每命節制,必令採訪本軍爲其所歸者。** 郎中、江汝二州刺 前年丁父憂,朝旨未議起復,屬王士眞卒,從史竊獻誅承宗計以希上意,用是起授,委其成 及韶下討賊,兵出,逗留不進,陰與承宗通謀,令軍士潛懷賊號,又高其獨粟之價,售 盧從史,其先自元魏已來,冠冕頗盛。 父虔,少孤,好學,舉進士,歷御史府三院、刑部 史、祕書監。從史少矜力、習騎射,遊澤、潞間,節度使李長榮用爲大將。 漸狂恣不道,至奪部將妻妾,而辯給矯妄,從事孔戡等以言直不從引去。 長榮卒,從史因軍情,且善迎奉中使,得

護軍中尉吐突承璀將神策兵與之對壘,從史往往過其營博戲。

從史沓貪好得,承璀出

谜何其來博,揖語,幕下伏壯士,突起,持捽出帳後縛之,內車中,馳以赴闕。 十數人,餘號令乃定,且宣諭密詔,追赴闞庭。都將烏重胤素懷忠順,乃嚴戒其軍, 寶帶、奇玩以炫燿之,時其愛悅而遺焉,從史喜甚,日益狎。 上知其事,取裴垍之謀 從者驚亂 | 因戒承 衆不敢 斬

動。 會夜,使疾驅,未明出境,道路人莫知。 元和五年四月,制曰:

校勞而 誠 逼 度,成師旣出,保敵而交通; 邪計以行,臨戎而向背。 任,命之專征。章奏所陳,事無違者,恩光是貸,予何愛焉。 虧天性。 屬常山稱亂,朝制未行,固願興師,苟求復位。 自裨將,居于大藩,不思報國之誠,每設徇身之計。 比丁家禍,曾無戚容,行棄 德,合置於嚴科;屈法申恩,尙從於寬典。前昭義軍節度副大使、知節度事盧從史, 土徵災,鍾會禍生於部下。況害深楚、閩,功匪鍾、韓,構此厲階,布於公議。]脅軍中,潛施賊號;陵汙麾下,實玷皇風。 貨以藩身,虐而用衆,士庶怨而 · 誓云獨致。 示於懷撫,推以信誠。 臣節旣喪,恩豈念於生成;台位干求,禮頓虧於忠敬。 邪以蓄衆,自致覆車;姦以事君,所宜用鉞。故楚人告變, 不圖。 稟於陶鈞,行事至此,視於天地,負我何多,且辜覆載之仁, 排衆論以釋其苴麻,決中心而授之鈇鉞 諸侯盡力而不應,遺寇遊魂而 刻期効用,請以身先; 肆其醜行, 熾以兇威, 至於 而乃冒利蓄姦, 韓信患釋於事先, 寧逭神鬼之 罔恤, 將 了, 委以 人倫,孝 際政 指日投 懷私負 蜀 敗 重

列

傳

第

諒股懷 驩州 之辭,使邪豎絕遲迴之計。 實。況頃年上請,就食山東,及遣旋師,不時恭命,致動其衆, 觀生其心,賴劉濟抗忠正 曾列方隅,嘗經任使,惜君臣之體,抑中外之情,俾投魑魅之鄉,以解人神之憤。 事至滿盈。 ,發其衆怒,叶以一心,顧大惡而不容,幸全驅而自免,宜從大戮,以正**彝章**。 司馬。 股念以始終,務於含貨,所期悔過,豈謂踰兇。 而昭義軍忠節夙彰,義聲昭 嗚呼!姦由事驗,自開棄絕之門;禍實已招,豈漏恢疏之網。凡百多士,宜 加以徧毁鄰境,密疏事情,反覆百端,高下萬變,心無恥愧, 尙以 可貶

子繼宗等四人並貶嶺外。

支使。嚴武爲

京兆尹,舉爲

長安尉。 李芃字茂初,趙郡人也。 解褐上邽主簿,三遷試大理評事,攝監察御史、山南東道觀察 李勉爲江西觀察使,署奏祕書郎、兼監察御史,爲判

日。永泰初,轉兼殿中侍御史。

守其要地,以破其謀。李勉然其計,以聞,代宗嘉之,以宣州之秋浦、靑陽、饒州之至德置池 時宣、饒二州人方淸、陳莊聚衆據山洞,西絕江路,劫商旅以爲亂。芃乃請於秋浦置州, 列傳第八十二 李芃 李澄

芃 署 郎 州 兼亳州 奏檢校工 ,賜金紫, 焉。 芃 攝 防禦使,練達 部 爲 行 州 郞 都 中、兼侍 事 萬 練 無幾, 副 軍事,兵備甚 使。 御 史,爲判官,尋攝 乃兼侍 頃之,攝江州 御史。 肅 ; 又開陳、潁運路 居無 刺 陳州 史 何, ,州人便之。 刺 魏少遊代勉爲 史。歲中, ,以通漕 丁母 即値· 輓。 使, 憂,免喪,永平軍 李靈曜反於汴州 復署奏檢校虞 節 度 部 勉署 李 員 勉 外

封 上居 明年,詔 水等五縣隸焉。 軍 士。 百戶。 奉天,斂軍還 德 宗嗣 位 間 與河東節度馬燧等諸軍破田悅於洹水 年,爲節度使路嗣恭之副,加檢校左庶子、河陽三城懷州 進圍悅於魏州,將符璘以精騎五百夜降,戊開營以納之。 ,授檢校太常少卿、兼御 時河南北連大兵,韶益以 :史中丞、河陽三城鎭遏使。撫勞備至,資廩善者,必 神策、汝、陝之師。 ,以功加檢校兵部尚書, **尤進收新鄉、共城,途** 節度觀察使,以東畿汜 明日,歸隣於招討使。 累封開郡王 圍 (国); 衞州。 實 先

莫先 吾旣 主厭 德化, 兵革 疾病 興元 ,然則天下城 初,檢校右僕射,無何,以疾固讓罷歸。 循而 豈 能 理之,斯易致耳。 言而不踐乎 | 壘堅厚矣,戈蜒銛利矣,以力勝之,則 乃手疏乞罷。 方鎭之戴翼時 貞元元年卒, 年六十四, 主, 宜先退 有得 謂所 譲 失,其可盡乎 親曰:「今年夏被蝗旱,人 貪權持 廢朝 祿 日 ! 吾所不取也。 除弊之急, 贈太子

丞,隸於永平軍節度使李勉。及勉移理汴州,乃奏澄爲滑州刺史。四年多,李希烈陷汴州, 澄以武藝爲偏將,累除試將作監,隸於江淮都統李峘。 李澄,遼東襄平人,隋蒲山公寬之後也,居京兆。 建中初,以檢校太子賓客、兼御史中 父鎬,清江太守,以澄贈工部尚書。

澄刑部尚書,兼汴州刺史、汴滑節度觀察使。澄祕而未宜,乃集州兵嚴加訓習。希烈頗疑 而爲遁,誘六百人因驚行剽而加其罪,果大俘掠,悉令斬之以告。希烈不能窮詰焉。 之,乃令養子六百人戍之,以虞其變。希烈苦攻寧陵,邀澄率其衆至石柱。 勉奔歸行在,澄遂以城降希烈,爲署尚書令,兼滑州永平軍節度使。 興元元年春,澄密令親信人盧融間道齎表達於奉天,上嘉之,乃以帛韶藏於蠟丸中,加

澄令縱火焚營

|希烈遣其將||翟暉等寇陳州, 久之未復。

軍節度使劉洽師至城東門,賊將田懷珍開關以納之。翌日,澄方自北入,洽已據子城。澄乃 澄,又聞濯暉大敗,由是奔歸蔡州。 封武威郡王,賜實封五百戶。澄乃乘勢力焚賊旌節,誓衆歸國。及十一月,希烈旣失 是歲十月,澄以汴州兵寡,度希烈不能制己,又會中官薛盈珍持節且至,加檢校兵部尙 澄遠率衆將復汴州,屯於城北門,恇怯不敢進。及宣武

先是 題怒攻液,淸以衆助之,殺登城者數十人,顯方引退,又焚陽武而歸。 澄乃出赴鄭州, 舍於浚儀縣,兩軍將士,日有忿競,不自安。 一,河陽 軍 節度使李芃遣其將雍顥攻鄭州,顥所過縱掠,液拒之尤固;及清至,遂納之。 會鄭州賊將孫液通款於澄,澄遣其子淸赴之。

特授清檢校太子賓客、兼御史中丞,更名克寧。

朝 日,贈 澄 貞元元年三月,就加澄檢校左僕射、義成軍鄭滑許等州節度使。 二年卒,年五十四,廢 實以八月癸未終,克寧祕之,以九月庚寅,欲自起視事。其行軍司馬馬鉉不許,克寧 司空,賵布帛栗有差,仍令左散騎常侍歸崇敬充弔祭使,所緣喪葬,並勒官給

麥二千石。 府 陰遣殺之, 中財貨 曲 是克 ,以夜出城,軍人從而剽奪,及明殆盡。澄柩至京師,又賜克寧莊一所、錢千貫、栗 寧不敢妄發,然道路絕商旅者凡十四五日。及賈躭代澄,克寧護喪將歸,乃悉索 乃墨絰 澄初封隴西郡公,進武威郡王,每上疏連稱二封,頗爲時人所哂。 而出, : 加卒於城門,將爲不順。 劉治出師屯於境上以制之,且使告論切

盗 · 發洛城· 寧按其事 李 元素字大朴, 蒲山公密之孫(至)。任侍御史, 時杜亞爲東都留守, 惡大將令狐運, 會 乏北 , 亞以爲不直,密表陳之,寧遂得罪。 亞將逞其宿怒, 且以得賊爲功,上表指 運適 與其部下畋于北郊,亞意其爲盜,遂執訊之,逮繫者四十餘人。 監察御

卿,孰能辨之!」後數月,竟得其眞賊,元素由是爲時器重,遷給事中。時美官缺,必指元 復奏曰:「一出不得復見陛下,乞容盡詞。」上意稍緩,元素盡言運冤狀明白,上乃寤曰::「非 誣元素。 元素驗之五 明運爲盜之狀,上信而不疑。宰臣以獄大宜蕃,奏請覆之,命元素就決,亞迎路以獄成告。 書,在鎭稱理 遷尙書右丞。數月,鄭滑節度盧羣卒,遂命元素兼御史大夫,鎭鄭滑,就加檢校工部尙 元素還奏,言未畢,上怒曰:「出俟命。」元素曰:「臣未盡詞。」上又曰:「且去。」元素 日,盡釋其囚以還。亞大驚,且怒,親追送,馬上責之,元素不答。亞遂上疏,又

代,入拜國子祭酒,尋遷太常卿,轉戶部尙書、判度支。 先 居位,一無修舉,但規求作相。久之,寖不得志,見客必曰:「無以某官散相疏也。」見屬官必 了拜,脂章在列,大失人情。

李錡爲亂江南,遂授元素浙西道節度觀察處置等使。數月受 元和初,徵拜御史大夫。自貞元中位缺,久難其人,至是元素以名望召拜,中外聳聽。及

溺情僕妾,遂薄之。且又無子,而前妻之子已長,無良,元素寢疾昏惑,聽譖遂出之,給與非 冤官。初,元素再娶妻王氏,石泉公方慶之孫,性柔弱,元素爲郎官時娶之,甚禮重,及貴, 妻族上訴,乃詔曰:「李元素病中上表,懇切披陳,云『妻王氏,禮義殊乖,願與離絕』。初 元素少孤,奉長姊友敬加於人,及其姊歿,沉悲遘疾,上疏懇辭職,從之。數月,以出妻

書, 辱,實亦朝情悉驚。如此理家、合當懲責。宜停官,仍令與王氏錢物,通所奏數滿五千貫。」 謂素有醜行,不能顯言,以其大官之家,所以令自處置。 蓋是中情不和,遂至於此。脅以王命,當日遣歸,給送之間,又至單薄。 訪聞不曾告報妻族,亦無明過可 不唯王氏受

元和五年卒,贈陝州大都督。

時,執德不回;居大夫日,其心甚短。因緣七出,益露醜聲,善少惡多,又何足算。 命,有足可嘉;盧從史動多懷姦,自貽伊戚。,芃則老也知足,澄則過而改圖。 之射,數騎入武俊之營,非有奇謀,孰能如是。惜乎服食求仙,爲藥所誤。王虔休不黨僭 贊曰:抱玉、抱眞,我朝良將。 虔休之心,亦多可尙。 史懷姦謀,芃將祿讓。 澄迷卻行, 史臣曰:李抱玉、李抱眞,以武勇之材,兼忠義之行,有唐之良將也。 且如農隙教潞人 元素爲御史

校勘記

素貪一嚮。

吾誰與欺,豈如忠諒。

列傳第八十二 校勘記(1)於是舉部內鄉兵 「兵」字各本原無,據冊府卷四一三補。

- (11) 建中二年 「二年」,各本原作「三年」,據冊府卷三五九、通鑑卷二二六改。
- (三) 乃囚陳榮 「囚」字各本原作「因」,據新書卷一三八李抱眞傳、合鈔卷一八三李抱眞傳改。
- (图) 開郡王 本書卷一二德宗紀、合鈔卷一八三季芃傳作「開陽郡王」。
- (至) 蒲山公密之孫 新書卷一四七李元素傳作「邢國公密裔孫」。按蒲山公乃李寬,密爲邢國公

舊唐書卷一百三十三

列傳第八十三

李晟子愿恕聽意 憑恕 惎 王佖附

忠嗣 謹 度使孫志直署晟總遊兵,擊破党項羌高玉等,以功授特進、武光祿卿,轉試太常卿。 蕃,有驍將乘城拒鬬,頗傷士卒,忠嗣募軍中能射者射之。 **叛**羌於高當川,又擊宕州連狂羌於罕山,皆破之,累遷左羽林大將軍同正。 一,性雄烈,有才,善騎射。 厚賞之,因撫其背曰:「此萬人敵也。」鳳翎節度使高昇雅聞其名,召補列將。 李晟字良器,隴右臨洮人。 年十八從軍,身長六尺,勇敢絕倫。 祖思恭,父欽,代居隴右爲裨將。 晟引弓一發而斃, 三軍皆大呼, 時河西節度使王忠嗣擊吐 晟生數歲而孤,事 廣德初,鳳翔節 嘗擊疊州 小母孝

大曆初,李抱玉鎭鳳翔,署晟爲右軍都將。四年,吐蕃圍靈州,抱玉遣晟將兵五千以擊 展辭曰:「以衆則不足,以謀則太多。」乃請將兵千人疾出大震關,至臨洮,

敗 吾衞 川震恐,乃韶晟將神策兵救之,授太子賓客。晟乃踰漏天,拔飛越, 焚其積聚 朝京師 ,晟率所部横擊之,拔璘出亂兵之中,以功封合川郡王。 大將軍、涇原 ,代宗留居宿衞,爲右神策都將。德宗卽位,吐蕃寇劍南, ,虜堡帥慕容谷鍾而還,吐蕃因解靈州之圍而去。拜開府儀同三司。 四鎮北庭都知兵馬使,并總遊兵。 無何,節度使馬璘與吐蕃戰於鹽倉,兵 璘忌晟威名, 又遇之不以禮, 時節度使崔寧朝京師, 廓淸肅寧三城,絕大渡 無幾 ,兼左金 令

却。 |洛南 以 度使 河, 令公逮自引去,奈王事何?」燧釋然謝晟,燧乃自造抱眞壘,與之交歡如初。 時朱滔、王武俊聯兵在深、趙,怒朝廷賞功薄,田悅知其可間,遣使求援,滔與武俊應之,遂 擊敗悅軍於洹水,遂進攻魏州,以功加檢校左散騎常侍,實封百戶。 兵 ,獲首虜千餘級,虜乃引退,因留成都數月而還。 晟引 圍 馬燧、昭義節度使李抱眞合兵救臨洺。 ,三帥齊進。李尙書以邢州與趙州接壤,分兵守之,誠未爲害,其精卒銳將皆在於此, 建中二年,魏博田悅反,將兵圍臨洺、邢州,詔以晟爲神策先鋒都知兵馬使, 晟與河東騎將李自良、李奉國擊悅於雙岡, 悅兵却, 遂斬朝光。 康日 兵渡洛水,乘冰而濟,橫擊悅軍,王師復振,擊悅,大破之。三年正月,復以諸道 知于趙州。李抱眞分兵二千人守邢州,馬燧大怒,欲班師。 尋加兼御史中丞。 河東、昭義軍攻楊朝光於臨 無幾,兼魏府左司馬。 戰於臨洺 晟謂燧日:「初奉韶 與河東節 諸軍皆 軍

俊攻趙州,晟乃獻狀請解趙州之圍,欲引兵赴定州與張孝忠合勢,欲圖范陽。 御史大夫,俾禁軍將軍莫仁擢、趙光銑、杜季泚皆隸焉。 晟自魏州引軍而

宗 批之, 軍。 擊破之,晟所乘馬連中流矢。 徑趨趙州 吏合謀,乃以馬輿還定州,賊不敢逼 苑 展內圍景濟,外與滔等拒戰,日數合,自正月至於五月。 ,決水以灌之。田悅、王武俊皆遣兵來救,戰於白樓。 加晟 武俊聞之,解圍而去。晟留趙州三日,與孝忠兵合,北略恆州, 踰月,城中益急,滔、武俊大懼,乃悉收魏博之衆而 會晟病甚,不知人者數焉 賊犯義武軍 ,稍却, 圍朱滔將鄭景 來,復圍晟 晟引 步 濟

於外,人臣當百舍一息,死而後已。張義武欲沮吾行,吾當以愛子爲質,選良馬以啗其意。」 乃留子憑以爲婚。 中由蒲津而軍渭北,壁東渭橋以逼泚。 武軍間於朱滔、王武俊,倚晟爲輕重,不欲晟去,數謀沮止晟軍。 先次渭南,與晟合軍。 韶加晟檢校工部尙書、神策行營節度使,實封二百戶。 願以爲別。」陳赴難之意,受帶者果德晟,乃諫孝忠勿止晟。 疾間,復將進師,會京城變起,德宗在奉天,韶晟赴難。 義武軍有大將爲孝忠委信者謁晟,晟乃解玉帶以遺之, 軍無統一,晟不能制,因德信入晟軍,乃數其罪斬之。 時劉德信將子弟軍救襄城 晟軍令嚴肅,所過樵採無犯。 晟承韶泣下,即日 晟得引軍踰飛狐 晟謂將吏曰:「天子播越 ,敗於扈澗 因曰:「吾欲西 晟以數騎馳 ,開難,率餘 欲赴 , 師次代 開輔。

入德信軍,撫勞其衆,無敢動者。旣倂德信軍,軍益振。

懷光軍輒虜驅牛馬,百姓苦之;晟軍無所犯。 奉嚴令,爲公前驅,雖死不悔。」懷光益拒之。 光曰:「寇賊竊據京邑,天子出居近甸,兵柄廟略,屬在明公。公宜觀兵速進,晟願以所部得 導。 展知其意,遂收軍入壘,時興元元年正月也。 展兵合,乃詔晟移軍合懷光軍。晟奉詔引軍至陳濤斜,軍壘未成,賊兵遽至,晟乃出陣, 軍士頗相畏服,故欲令其先識以奪其心耳。」懷光益不悅,陰有異志,遷延不進。晟因人說懷 懷光恐晟立功,乃曰:「吾軍適至,馬未秣,士未飯, 詎可戰耶?不如蓄銳養威,俟時而舉。」 言於懷光曰::「賊堅保宮苑,攻之未必克;今離其窟穴,敢出索戰,此殆天以賊賜明公也 懷光望見惡之,乃謂晟曰:「將帥當持重,豈宜自表飾以咯賊也!」晟曰:「晟久在涇原 時朔方節度使李懷光亦自河北赴難,軍於咸陽,不欲晟獨當一面以分已功,乃奏請與 每將合戰,必自異,衣錦裘、繡帽前行,親自指 懷光軍惡其獨善,乃分所獲與之,晟軍不敢 晟兵軍於朔方軍北, 每晟與懷光同至城下, 且

光計欲因是令晟自署侵削己軍,以撓破之。 **寇未平,軍中給賜,咸宜均一。 今神策獨厚,諸軍皆以爲言,臣無以止之,惟陛下裁處。」 懷** 久之,懷光將謀沮晟軍,計未有所出。 時神策軍以舊例給賜厚於諸軍,懷光奏曰:「賊 德宗憂之,欲以諸軍同神策,則財賦不給,無可

令,皆得專之。 晟當將一軍,唯公所指,以効死命。 奈何,乃遣翰林學士陸贄往懷光軍宣諭,仍令懷光與晟參議所宜以聞。 - `懷光言曰:「軍士稟賜不均,何以令戰?」贄 (未有言,數顧晟。 晟曰:「公爲元帥, 至於增損衣食,公當裁之。」懷光默然, 贄、晟俱會於懷 弛張號

進討。 以裨將趙光銑爲洋州刺史,唐良臣爲利州刺史,晟子壻張彧爲劍州刺史,各將兵五百以防 與懷光聯營,晟以事迫,會有中使過晟軍,晟乃宣令云:「奉韶徙屯渭橋。」乃結陣而行,至渭 橋,以分賊勢。上初未之許。晟以懷光反狀已明,緩急宜有所備,蜀、漢之路,不可壅也,請 卒疲,更請休息,以伺其便,然陰與朱泚交通, 其迹漸露。 無以難晟,又不欲侵刻神策軍發於自己,乃止。 不數日,懷光果劫建徽、惠元而倂其兵,建徽遁免,惠元爲懷光所害。 懷光屯咸陽,堅壁八十餘日,不肯出軍,德宗憂之,屢降中使,促以收復之期。懷光託以 上初納之,未果行。 懷光聞之大駭,疑上奪其軍,謀亂益急。時趣坊節度李建徽、神策將楊惠元及晟,並 。無何,吐蕃請以兵佐誅泚,上欲親總六師,移幸咸陽,以促諸軍 晟懼爲所倂, 乃密疏請移軍東渭

僕射、 是日,車駕幸梁州。時變生倉卒,百官扈從者十二三,駱谷道路險阻,儲供無素, ,上歎日:「早從李晟之言,三蜀 同中書門下平章事,以安衆心。 可坐致也。」晟大將張少弘自行在傳 展拜哭受命,且曰:「長安宗廟所在,爲天下本,若皆 口韶授晟尚書左 從官

兇渠 亂逆 乃 執 京兆 卑 羈 少 詞 靮 建不 以 取 尹 興 厚 幣, 屬 擇官 世之功 富 復 僞 貴 車 京 更以 致 駕 師 , 非 誠 西 能從 人豪 幸 於懷 賦 乃後城 渭北 我乎? 也。 關中 光 幾縣。 渭橋 外示 隍 無主。 」 三軍 ,繕兵 推崇, 横跨大川 不旬 予代受國 無不 甲 日 ·, 以 內爲之備。 泣下 ,夠糧皆足,晟乃大陳 圖 。 斷 收復。 恩,見危 ,曰:「唯 賊首尾,吾與 時芻粟古 晟以 死節,臣子之分 公所 孤 未 軍 使。 公等戮力勤 集, 獨 晟亦 三軍 當 乃令 強 歔欷 ,況當此 寇 檢校戶部 令之日:「 王 恐爲 操 流涕 時 利 二賊之所 鄓 ',不能 國家多難 而 中張彧假 進 興 誅 併 滅

鄭。 威勇 勇者 襲。 屯 向。 福 七盤, 令破賊 戴休 (以數 是時 三月 晟 內 皆稟晟 神 額 千人 無貨財 朱泚 策 懷 率 迎 光 將 鐢 奉天之衆,韓遊 歸 以 節 盜 自三原、 晟 惡 度,晟 外無 據京 懷光 掩前 乃陳 轉輸 城 富平 之不 軍 過 兵受涉等降卒, 懷光 大 懐光 以 臣 振 瓌 東 治那 抵 孤 圖 ,旣至富 奉天, 卒不 為反 懐光 軍 寧 而 以休顔 之師 抗 噬 悟 平 所至: 軍衆 劇 乃奏授 '-, 結 河朔 駱 賊 ||焚掠 陣 漸多 遊瓌 僭偽 元 而 涉 於 光 銳 檢 軍 從晟 乃自 離 以 氣 者三,李納虎 中 校 華州 散 不 \mathbb{T} 衰 馮翊 外向 糗 部 益懼 之兵守潼關 尙 糧 徒以 入據 大 書 且 呼 竭 視 忠義 晟又致書於 威 河 而 於 中。 勇 虜 去 河 感於 剽 兼 尚 南 御 懷 懐 無 可孤 希 光 光 所 史 懐光 心 大 將 得 烈 不 以 能 懼 鴟張於汴、 孟 神 故英豪歸 策 諭 爲 之旅 晟 以 所 鴯

德宗 山 南 既入駱谷,謂渾瑊 日:「潤橋 在賊 腹內,兵勢懸 隔 李晟 可辦事乎?」 瑊

猶可賦斂,儻寇賊未滅,宿兵曠時,人廢耕桑,又無儲蓄, 非防微制勝之術也。」 上納之。 主軍畫 鄭雲達自奉天至,晟以京兆少尹張彧爲副使,鄭雲達爲行軍司馬,李敬仲爲節度判官,俾同 有韶加晟京畿、渭北、鄜坊、 億兆之心,圖翦滅之勢。若規小捨大,作都岷峨,即人心失望,武士謀臣無所施矣。」四月, 畿、渭北、鄜坊丹延節度招討使。 望自間道懷詔書加晟檢校右僕射,兼河中尹、河中晉絳慈隰節度使,益實封三百戶 對曰:「李晟秉義執志,臨事不可奪,以臣計之,破賊必矣。」帝意始安。 授之,上皆從之。 又請以懷光舊將唐良臣保潼關,以河中節度授之,戴休顏守奉天,請以鄜坊節度 渭橋舊有栗十餘萬斛,度支先饋懷光軍欲盡,晟又奏曰:「近畿雖乘兵亂, 商華兵馬副元帥。 。晟承韶流涕。時帝欲移幸西川,晟上表:「請駐蹕梁漢,繋 時京兆府司錄李敬仲自京城來, 是月,渾瑊步將上官 諫議大夫 , 又兼京

奮激士 賊將姚令言及僞 曰:「爾敢與賊爲間 而敢恤家乎!」泚又使晟小吏王無忌之壻詣晟軍,且曰:「公家無恙,城中有書聞。 神策軍家族多陷於泚,晟家亦百口在賊中,左右或有言及家者,晟因泣下曰:「乘輿何 心,卒無離叛者。 中丞 !」遽命斬之。時轉輸不至,盛夏軍 崔宣咸使諜覘我軍,爲邏騎所得,拘送於晟,晟解縛,食而遣之,誠之 會將更數輩自賊中逃來,言泚衆攜離 士或 衣裘褐,晟亦同勞苦,每以大義 可滅之狀,士心 益 先是,

乃於畿甸

'率聚征賦,吏民樂囄,守禦益固,由是軍不乏食。

列

日:「爾報崔宣 ,善爲賊守,諸人勉力自固,勿不忠於賊也!

宮闕保安, 關,百姓 拔 於城下。 外城 五月三日, ,旣有市里,然後北淸宮闕。」晟曰:「若先收坊市,巷陌隘狹,間以居人,若賊設伏格 **露**潰,非計也。 且賊重兵堅甲,皆在苑中,若自苑擊其心腹,彼將圖走不暇,如此則 市不易犨, 展引軍抵通化門,耀武而還,賊不敢出。 晨集將佐,圖兵所向,諸將曰:「先 計之上也。」諸將曰:「善。」乃移書渾瑊、駱元光、倘可孤,剋期進軍

[] 兵少,賊倂力攻之,晟遣李演、孟華以精卒救之。中軍鼓譟,演力戰,大破之,乘勝入光泰 出,今冒死而來,天贊我也!」勒吳詵、康英俊、史萬頃、孟涉等縱兵擊之。 時華州營在北, 壕 栅以候賊軍。 再戰,又敗之,僵屍蔽地,餘衆走入白華,夜聞慟哭之聲。 其月二十五日夜,晟自東渭橋移軍於光泰門外米倉村,以薄京城。 俄而賊衆大至,賊驍將張庭芝、李希倩逼栅求戰,晟謂諸將曰:「吾恐賊不 晟臨高指麾, 令設

成 馬使吳詵、王佖,都虞候邢君牙、李演、史萬頃,神策將孟涉、康英俊, 其有備,豈王師之利耶! 商州將彭元俊等,號令誓師畢,陳兵於光泰門外。乃使王佖、李演率騎軍, 翌日,將復出師,諸將請待西軍至,則左右夾攻。一晟曰:「賊旣傷敗,須乘勝撲滅, 如待西軍,恐失機便。」二十八日,晟大集諸將駱元光、尙可孤 華州將郭審金、權文 史萬頃領步 若俟

公來! 本,直抵苑牆神慶村。 決勝軍使唐良臣、兵馬使趙光銑、楊萬榮、孟日華等步騎齊進,賊軍陣成而屢北。戰十餘合, 愚叱軍士曰:「安得縱賊如此,當先斬公等!」萬頃懼,先登,拔栅而入,王佖騎軍繼進 奔潰,獲賊將段誠諫,大軍分道並入,鼓譟雷動。姚令言、張庭芝、李希倩猶力捍官軍,晟令 乘勝驅蹙,至于白華。 」賊聞之驚潰,官軍追斬,不可勝計。朱泚、姚令言、張庭芝尙有衆萬人,相率遁走, 忽有賊騎千餘出於官軍之背, 晟以麾下百餘騎馳之, 左右呼曰: 「相 晟先是夜使人開苑牆二百餘步,至是賊已樹木栅之,賊倚栅拒戰。 一,賊即

局遣田子奇追之,其餘兇黨相率來降。

內不得輒通家信,違命者斬。」乃遣京兆尹李齊運、攝長安令陳元衆、攝萬年令韋上伋告喻 馬伷取賊馬二匹,晟皆立斬之,莫敢忤視。士庶無不感悅,咸歔欷流涕,遠坊居人,亦有經 上憑睿算,下賴士心,幸得殲厥兇渠,肅淸宮禁,皆三軍之力也。長安士庶,久陷賊庭,若小 宿方知者。二十九日,令孟涉屯於白華,尙可孤屯望仙門,駱元光屯章敬寺,晟自屯於安國 百姓,居人安堵,秋毫無所犯。倘可孤軍人有擅取賊馬者,晟大將高明曜虜賊女妓一人,司 有震驚,則非伐罪弔人之義也。 是日,斬賊將李希倩等八人,徇于市。 是日,晟軍入京城,勒兵屯於含元殿前,晟舍於右金吾仗,仍號令諸軍曰:「晟實不武, 晟與公等各有家室,離別數年,今已成功,相見非晚,五日

列

守臣節不屈于賊者程鎭之、劉迺、蔣沇、趙曄、薛岌等。 股也。」百官拜賀而退。是日,**晟斬僞相李忠臣、張光晟、蔣鎭、喬琳、洪經綸、崔宣等,又表** 晟虔奉聖謨,盪滌兇醜。然古之樹勳,力復都邑者,往往有之;至於不驚宗廟,不易市肆, 長安人不識旗鼓,安堵如初,自三代以來,未之有也。」上曰:「天生李晟,爲社稷萬人,不爲 六月四日,晟破賊露布至梁州,上覽之感泣,羣臣無不隕涕,因上壽稱萬歲,奏曰:「李

歲,則我軍不戰而自潰。」參佐歎服,皆曰:「非所及也。」 兵。」晟曰:「天子外次,人臣但當死節,垂象玄遠,吾安知天道耶!」 至是,謂參佐曰:「前者 士大夫勸晟出兵, 非敢拒也, 且軍可用之, 不可使知之。 嘗聞五緯盈縮無準, 晟懼復來守 展初屯渭橋時,熒惑守歲,久之方退,賓介或勸曰:「今熒惑已退,皇家之利也,可速用

蕁拜展司徒,兼中書令,實封一千戶。

肅,抃舞感涕,跪而言曰:「臣忝備爪牙之任,不能早誅妖逆,至鑾輿再遷。及師於城隅, 迎。時元從禁軍及山南、隴州、鳳翔之衆,步騎凡十餘萬,旌旗連亙數十里,傾城士庶,夾道 十三日,德宗至自興元,渾瑊、韓遊瓌、戴休顏以其兵扈從,晟與駱元光、尚可孤以其兵奉 晟綜理以備百司,令大將吳詵將兵三千至寶雞淸道,晟又請至鳳翔迎扈,不許。七月 晟以戎服謁見於三橋,上駐馬勞之。晟再拜稽首,初賀元惡殄滅,宗廟再淸,宮闈咸 累

月方殄賊寇,皆臣庸懦不任職之責,敢請死罪。」伏於路左。 吹迎導,宰臣節將送之,京師以爲榮觀。 里第及涇陽上田、延平門之林園、女樂八人。入第之日,京兆府供帳酒饌, ,令左右起晟於馬 前 是月,御殿大赦,贈晟父欽太子太保,母王氏贈代國夫人, 上思晟勳力,製紀功碑, 上爲之掩涕,命給事中齊映 俾皇太子書之, 刊石立於 賜教坊樂具, 賜永崇 鼓

東渭橋,與天地悠久,又令太子書碑詞以賜晟。

至涇州 鳳翔, 亂 逆 泉 鑒,方屬播遷,不遑討伐,以涇帥授之。 至是楚琳在朝,晟請以楚琳俱往鳳翔,將誅之,上以初復京師,方安反側,不許。 上皆從之。 西戎,易爲反覆。 庭行營兵馬副 河、隴之陷也,豈 展以涇州倚邊,屢害戎帥,數爲亂階,乃上書請理不用命者,兼備耕以積栗,攘却西蕃 理殺張鎰之罪,斬王斌等十餘人。 藪 ,希鑒迎謁,於坐執而誅之,并誅害河淸者石奇等三十餘人,具事以聞。 *,非晟; 韶以晟兼鳳翔尹、鳳翔隴右節度使,仍充隴右涇原節度,兼管內諸軍 元帥,改封西平郡王。 莫能理之。」還鎭,表右龍武將軍李觀爲涇原節度使,吐蕃深畏之。 吐蕃 希鑒兇徒,將校驕逆,若不懲革,終爲後患。」從之。 力取之,皆因將帥貪暴,種落攜貳,人不得耕稼,展轉東徙,自棄之耳。 初,帝在奉天,鳳翔軍亂,殺其帥張鎰,立小 至是,晟奏曰:「近者中原兵禍,皆起涇州,且其地逼 初,朱泚亂時,涇州亦殺其帥 晟至鳳翔,託以巡邊 馮河清,立別將田希 上曰:「涇州 將李楚琳。 及四鎮、北 八月,晟 晟常 日 至

列

傳第

八

+

Ξ

製, 展 且 士 無 奏封 絲絮 王, 人苦 每蕃使至,晟必置息爨於坐,衣以錦袍、金帶以寵異之。蕃人皆相指目 征役, 思唐之心,豈有已乎!」乃傾家財以賞降者,以懷來之。 降虜浪息 ,

息囊。

書令 卒,張 斬其 陽 以牛酒犒勞?」 以 及 前軍已過,見五方旗、武豹衣,則其中軍也,突其不意,可建奇功。」他如晟節度,果遇結贊。 元二年九月, 出 ,誠之曰:「蕃軍過城下,勿擊首尾,首尾縱敗,中軍力全,若合勢攻汝,必受其弊。 但俟其 西 必爲我憂。」乃行反間,遣使因馬燧 宰相 北 堡使 ,奉朝請而已。 奮 蕃 延賞 邊 擊,賊皆披靡,佖 相尙結贊頗多詐謀,尤惡晟,乃相與議云:「唐之名將,李晟與馬燧、渾瑊耳。 事 韓滉又扶晟議,請調軍食以給晟, 扈屈律悉蒙等,自是結贊數遣使乞和。十二月,晟朝京師,奏曰:「戎狄無信,不可 秉政,與晟有隙, ,俾立功以 吐蕃用尚結贊之計,乃大興兵入隴州,抵 徐乃引去, 其年閏五月,渾瑊與尙結贊同盟於平涼,果爲蕃兵所劫,瑊單馬僅免, 壓晟,德宗竟納延賞 軍不 持是間晟也。 屢於上前間晟,言不可久令典兵。 識結贊,故結贊僅而 心以請和 是役也, 之言, 命將擊之。上方厭兵,疑將帥生事邀功。 ,旣和,即 獲免。 罷晟兵柄。 晟先令衙將王佖選銳兵三千, 設伏於汧 、鳳翔,無所虜掠,且曰:「召我來,何不 請盟,復因盟以廣城,因以賣燧。 十月,晟出師襲吐蕃摧沙堡,拔之, 三年三月,册拜晟爲太尉、中 延賞欲用劉玄佐、李抱眞 會滉 貞

將 吏皆陷 六月 ,罷河東節度使馬燧 爲司 徒,盡中尙結贊之謀

月, 故,瓊願 韶爲晟 乃求 晟 見晟 備 罷兵 左右,狡兔三 立 五 言事,且曰:「太尉功業至大,猶罷 權 廟,以晟高 朝 謁 之外, 一穴,盍早圖之。 | 晟怒日:「爾安得不祥之言! 祖芝贈隴州 罕所過 從。 刺 史, 有 曾 通 兵 祖嵩贈澤州 王 權, 一府長 自古功高, 史丁瓊者, 刺 史,祖思恭贈幽州 無 亦爲張延賞所排, 有保 」遽執瓊以 全者。 大都 聞 國家 心懷 四 倘 年三 有 廟 變 怨

成

官給

性牢、祭器、牀帳,禮官相儀

以

耐

爲

掃隋 然, 裔 勤 則 生 成 昭文德 、太階旣 劉 和 君 季之荒 紁 五 藴 敬 臣 復宗社。 年 恢武 求 之義 其 在 等申 九月,晟與侍中 辛; 才 色, 屯 功 想 遇 厚 翼奉之勳; 體 ,威不若,康不义,用端命于上帝,付畀四方。 乃圖 訂 其時 莫重焉。 雲 之前烈, 元 (龍之叶 厥容 御 ,尊主庇 極 馬燧見於延 ,作人父母; 列于斯 在 夫豈多謝 應,感致業之艱難。 貞元己巳歳秋九月, 庸宗 人,何代 閣 ,闕而 則郭 ,懋昭績効,式表儀形, 英殿,上嘉其勳力, 則亦 不有? 子儀掃 未錄,孰謂旌賢。 有熊羆之士 在中宗 我行 覩往 殄氛 思今, 西宮,瞻宏閣崇構,見老臣遺像,願 祲 則 ,不二心之臣,左右經綸,參翊 ; 桓彥範等著其輔 韶曰:「昔我 今則李晟等保寧股躬。 取類 一以不忘于朝夕,一以永 況念功紀 宇宙旣清, 災非遠。 **列祖**, 德, 文祖 且 日月旣貞, 功 戴之績; 與時並 乘乾坤之盪滌, 所爲也,在予 咸宜力肆 在玄宗, 王業既 才爲代 垂 **平**來 然肅

列

傳

播嘉庸,式昭于下,俾後來者尙揖淸顏,知元勳之不朽。」復命皇太子書其文以賜晟,晟刻石 曷其敢怠 ! 有司宜敍年代先後,各圖其像於舊臣之次,仍令皇太子書朕是命,紀于 ·塵焉。

於門左。

雖廝養 年六十七。 賵 堂,婦當奉酒醴供饋,以待賓客。」遂不視 譚元澄爲嵐州 言匪 無隱,知無不爲者耶!是非在人主所擇耳。」|叔度慙而退。故|晟爲相,每當上所顧問, 之。」行軍司馬李叔度對曰:「此搢紳儒者之事,非勳德所宜。」 晟斂容曰:「行軍失言。 言不及公事,視王氏甥如己子。嘗正歲,崔氏女歸省,未及階,晟却之曰:「爾有家,況姑在 元澄三子,晟撫待勤至,皆爲成就宦學,人皆義之。 理家以嚴稱,諸子姪非農昏不得謁見, 『邦有道,危言危行』。今休明之期,晟幸得備位將相,心有不可〔〕,忍而不言,豈可謂 膊 加等。 躬,盡大臣之節。 初,晟在鳳翔,謂賓介曰:「魏徵能直言極諫,致太宗於堯、舜之上,眞忠臣也,僕所慕 小善,必記姓名。尤惡下爲朋黨相構,好善嫉惡,出於天性。嘗有恩者,厚報之。 上震悼出涕,廢朝五 比大斂,上手書致意,送柩前,曰: 刺史,嘗有恩於晟,後坐貶於岳州;比晟貴,上疏理之,詔贈元澄寧州 性沉默,未嘗泄於所親。 日,令百官就第臨弔, 而遣還家,其達禮敦教如此。貞元九年八月薨,時 臨下明察,每理軍,必日某有勞,某能其事, 命京兆尹李充監護喪事,官給葬具, 刺 必極 傳稱 有犯 初,

邦翰。 股必終始保持。況<u>愿等弟兄,承卿教訓,</u>股之志義,豈忘平生? 縱卿不言,股亦存信。比 用躬述數行,貴寫所懷得盡。臨紙遣使,不能飾詞,魂而有知,當體股意 者卿在之日,却未見股深心,今卿與股長乖,方冀知股誠志。 樑;巨川未濟,遂亡舟楫。君臣之義,追慟益深,循省遺章,倍增感切。 徵,奄至薨逝,喪我賢哲,虧我股肱,天不憖遺,痛惜何極!嗚呼!大廈方構,旋失棟 謨帝道,叶贊皇猷。常竭嘉言,以匡不迨,情所親重,義無間然。 邦,是生才傑,稟陰陽之粹氣,實山岳之降靈。 皇帝遣宮闈令第五守進致旨於故太尉、中書令、西平郡王、贈太師之靈 忠誠感於人神,功業施於社稷,匡時定亂,實賴元勳。 比嬰疾恙,雖歷旬時,日冀痊除,重期相見,弼予在位,終致和平。 弘濟患難,保佑王室,掃盪氛祲, 洎領上台, 克諧中外, 訏 無以爲念, 方期與國 發言涕零,是 卿 世圖 同 日.天祚 門胤嗣, 樂 廓淸 永爲 餌 無

册贈 座。 太師 又時遭中使至晟第存撫諸子,教戒備至,聞愿等有一善,上喜形於色,眷遇終始, ,諡曰忠武。晟薨後,城鹽州, 復鹽池, 上賜宰臣新鹽, **惻然思晟,乃令致** 鹽 於 無 靈

與晟比

待以親比之恩 元和 四年,韶曰:「夫能定社稷,濟生人,存不朽之名,垂可久之業者,必報以殊常之寵 興 國無窮,時惟茂典。故奉天定難功臣、太尉、兼中書令、上柱國、 西平郡王

列傳

第

崇。**永言天步之夷,**載懷邦傑之力,思加崇於往烈,爰協比於後昆,睦以宗親,將予厚意 食質封一千五百戶、贈太師李晟,間代英賢,自天忠義,邁濟時之宏算,抱經武之長材,貫以 至誠,協于一德,嘗遭屯難之際,實著戡定之功。鯨鯢旣殲,宮廟斯復,眷茲勳伐,則旣褒

官卑而卒,而愿、觀、聽最知名。 晟十五子·侗、伷、偕,無豫早世; 次愿、聰、總、愻、憑、恕、憲、愬、懿、聽、惎、慇,聰、總

其家宜令編附屬籍。晟配饗德宗廟庭。」

弟同日拜官者九人。尋轉左衞大將軍。 憂。十二年,服闋,德宗召見愿等於延英,憫然久之曰:「殷在宮中,常念卿等,追懷勳德,何 子賓客、上柱國。舊制,勳至上柱國,賜門戟,即令賜愿,乃與父並列棨戟於門。九年,丁父 日忘之。又聞卿等居喪得禮,朕甚嘉之。」各賜衣一襲、絹三千匹。愿依前授太子賓客,兄 愿,幼謙謹寡過,晟立大勳,諸子猶無官,宰相奏陳,德宗卽日召愿拜銀靑光祿大夫、太

仍置書一緘曰:「馬逸及羣,不時告,罪當死,敢以良馬一匹贖罪,丼亡馬謹納於路。」愿付客 元和元年八月,檢校禮部尚書,兼夏州刺史、夏綏銀宥等州節度使,威令簡肅,甚得綏 客有亡馬者,以狀告愿,愿以狀膀於路,懸金以購之。不三日,所亡馬繫之牓下,

列傳第八十三 李晟

奉命 亡馬 校 尙 書 討 而縱其良馬。境內嚴肅,多如此類。 左 伐 漢射, 屠城下邑,捷奏屢聞。 兼 鳳翔尹、鳳翔隴右節度使。 無何,有疾,以其弟憋代爲徐帥,入爲刑部尙書。 轉徐州刺史、武寧軍節度使。 然自是頗怠於爲理,無復素志,聲色之外, 到鎮,以靑、鄲不恭, 疾愈,檢

不

靖時,而 慈熙 勳, 速 乘之,得至鄭州。 右 日 安 夜 士心。 疾終,不爾,蒲人必有更變。 日,乃立其牙將李齐爲留後, 數 終不 節 人露髮而走,登子城北樓,懸縋而下,由 ,牙將李臣則、薛志忠、秦鄰等三人宿直,突入竇緩帳中,斬緩首以徇。 長 度使。 慶二年二月,檢校司空,兼汴州刺史、宣武軍節度使。 加罪,入爲左金吾衞大將軍。 以 及愿至,帑藏已竭,而愿恣其奢侈 威刑馭下。 河中之政,亦如岐、梁。 愿妻竇氏死於亂兵之手, 又令妻弟竇緩將親兵,緩亦驕傲黷貨,以是羣情聚怨。 寶應元年六月卒四,贈司徒。 以邀旄鉞, 長慶四年六月,復檢校司空, 加以愿結託權幸,厚行賂遺,賦入隨盡,軍府蕭然,賴),門內數百口,仰給官司,不恤 月餘,方誅之。愿坐貶隨州刺史。 子三人匿而獲冤,僕妾爲軍士所俘。 水竇而出。 比曉,行十數里,遇野人驅驢 先是, 張弘靖爲汴帥,以厚賞 新河中尹 軍政,賞賚不及弘 愿聞有變,與左 , 充河中晉絳 是歲七月四 朝廷念晟之 城中大掠 一,奪而

轉少府監、左庶子。出爲坊、晉二州刺史。以理行殊異,加金紫光祿大夫。復爲庶子,累遷至 卒,晟以本非正室,令服緦,號哭不忍,晟感之,因許服穣。 旣練,丁父憂, 愬與仲弟憲廬于 墓側,德宗不許,詔令歸第。居一宿,徒跣復往,上知不可奪,遂許終制。 | 愬以父蔭起家,授太常寺協律郎,遷衞尉少卿。 愬早喪所出,保養於晉國夫人王氏,及 服関,授右庶子,

太子詹事,宮苑閑廢使。

之。一愬又散其優樂,未嘗宴樂,士卒傷痍者,親自撫之。 賊以嘗敗高、遠二帥,又以愬名位 知其情,乃不肅軍陣,不齊部伍。或以不肅爲言,懲曰:「賊方安袁尚書之寬易,吾不欲使其 校左散騎常侍,兼鄧州刺史、御史大夫,充隨唐鄧節度使。兵士摧敗之餘,氣勢傷沮,憋揣 改備。」乃紿告三軍曰:「天子知魊柔而忍恥,故令撫養爾輩。 戰者,非吾事也。」軍衆信而樂 又命袁滋爲帥,滋亦無功。懲抗表自陳,願於軍前自効。宰相李逢吉亦以愬才可用,遂檢 愬有籌略,善騎射。 元和十一年,用兵討蔡州吳元濟。 七月,唐鄧節度使高霞萬戰敗,

入與語,辭氣不撓,愬異之,因釋其縛,置爲捉生將。」士良感之,乃曰:「賊將吳秀琳總衆數 表請濟師。 韶河中、鄜坊騎兵二千人益之,由是完緝器械,陰計戎事。 **管獲賊將丁士良,召**

非所畏憚者,不甚增其備。

將攻 歸。 吳秀琳以文成栅兵三千降。 千,不可遽破者,用陳光洽之謀也。 吳房 賊以驍騎五百追愬, 愬下馬據胡床, 令衆悉力赴戰, 射殺賊將孫忠憲, 乃退。 或勸愬遂 ,軍吏曰:「往亡日,請避之。」愬曰:「賊以往亡謂吾不來,正可擊也。」及戰,勝捷而 愬乃徑徙之新興栅, 遂以秀琳之衆攻吳房縣, 收其外城。初, 士良能擒光洽以降秀琳。」愬從之,果擒光洽。十二月,

拔吳房

,愬曰:「取之則合勢而固其穴,不如留之以分其力。」

軍, 恕 能全酤,乃械送京師,先表請釋,且言:「必殺酤,則無以成功者。」比酤至京,韶釋以還煦,乃 之,乃持,酤泣曰:「豈天意不欲平此賊,何爾一身見奪於衆口! 等如其料,果擒站 中,又使搖旆於前,示將焚麥者。 始募敢死者三千人以爲突將,愬自教習之。愬將襲元濟,會雨水,自五月至七月不止,溝 李忠義,屏人而語,或至夜分。忠義,亦降將也,本名憲,愬致之。軍中多諫愬,愬益寵祜。 曰:「若欲破賊,須得李祐,某無能爲也。」祐者,賊之騎將,有膽略,守興橋栅,常侮易官 去來不 初,吳秀琳之降,愬單騎至栅下與之語,親釋其縛,署爲衙將。 秀琳感恩,期於効報, 可備。 而還。官軍常苦脏,皆請殺之,愬不聽,解縛而客禮之。懲乘間常召酤及 愬召其將史用誠誠之曰:「今酤以衆穫麥於張柴, 祐素易我軍,必輕而來逐,爾以輕騎搏之,必獲祐。」 用誠 爾可以三百騎伏旁林

列

署爲散兵馬使,令佩刀巡警,出入帳中,略無猜閒。又改爲六院兵馬使。舊軍令,有舍賊謀 者屠其家,愬除其令,因使厚之,謀反以情告愬,愬益知賊中虛實

夷,張柴已東,師人未嘗蹈其境,皆謂投身不測。初至張柴,諸將請所止,懲曰:「入蔡州取 其月七日,使判官鄭辉告師期於裴度。十日夜,以李祐率突將三千爲先鋒,李忠義副之,懲 陰晦雨雪,大風裂旗旆,馬慄而不能躍,士卒苦寒,抱戈僵仆者道路相望。其川澤梁逕險 至賊境,曰張柴砦,盡殺其戍卒,令軍士少息,繕羈靮甲胄,發刃彀弓,復建旆而出。是日 自帥中軍三千,田進誠以後軍三千殿而行。初出文成栅,衆請所向,懲曰:「東六十里止。」 者從之,盡殺守門卒而登其門,留擊柝者。黎明,雪亦止,愬入,止元濟外宅。察吏告元濟 擊之,以雜其聲。賊恃吳房、朗山之固,晏然無一人知者。李祐、李忠義坎墉而先登,敢銳 分五百人斷朗山路。自張柴行七十里,比至懸瓠城,夜半,雪愈甚。近城有鵝鴨池,憋令驚 生還;然已從憋之令,無敢爲身計者。憋道分五百人斷洄曲路橋,其夜凍死者十二三。又 吳元濟也。」諸將失色。 監軍使哭而言曰:「果落李祐計中!」 熜不聽,促令進軍,皆謂必不 日「何常侍得至於此?」遂驅率左右乘子城拒捍。 曰:「城已陷矣。」元濟曰:「是洄曲子弟歸求寒衣耳。」俄聞憋軍號令將士云:「常侍傳語。」乃 陳許節度使李光顏勇冠諸軍,賊悉以精卒抗光顏。由是愬乘其無備,十月,將襲蔡州。 田進誠以兵環而攻之。 恕計元濟獨望

以客禮待之。田進誠焚子城南門,元濟城上請罪,進誠梯而下之,乃檻送京師。 重質來救,乃令訪重質家安卹之,使其家人持書召重質。 重質單騎而歸愬,白衣泥首,愬 其胂、光二

州及諸鎭兵尙二萬餘人,相次來降。

使、上柱國,封凉國公,食邑三千戶,食實封五百戶,一子五品正 之分久矣,請公因以示之。」度以宰相禮受懲迎謁,衆皆聳觀。明日,懲軍還於文成栅。 兵鞠場以待裴度。翌日,度至,愬具櫜鞬侯度馬首。 度將避之,愬曰:「此方不識上下等威 一月,韶以愬檢校尙書左僕射,兼襄州刺史、山南東道節度、襄鄧隨唐復郢均房等州觀察等 自元濟就擒,愬不戮一人,其爲元濟執事帳下廚廢之間者,皆復其職,使之不疑。乃屯 員

其兄愿。兄弟交換岐、徐二鎭,旬日間再踐父兄之任。 發,屬李師道再叛,詔田弘正、義成、宣武等軍討之,乃移愬爲徐州刺史、武寧軍節度使, 重質貶春州司戶,愬上表請恕重質賜之,堪於軍前驅使,卽詔徵還送武寧軍,愬乃署爲牙 愬破賊<u>金鄉,凡十一戰,擒賊將五十,俘斬萬計</u>。 憲宗有意復隴右故地,元和十三年五月,授愬鳳翔隴右節度使,仍詔路由闕下。 愬至徐方, 理兵有方略。時蔡將蘆 代

大都 督府長史、昭義節度使,仍賜興寧里第。十月,王承宗卒,魏博田弘正移任鎭州 淄青平,將有事燕、趙。元和十五年九月,以愬檢校左僕射、同中書門下平章事、潞州

列傳

第八十三

李

潞州 賻 以田布代之,除太子少保,歸東都。是年十月,卒於洛陽,時年四十九。穆宗聞之寰悼,賵 報之曰:「願以衆從,竭其死力。」方有制置,會疾作,不能治軍,人違紀律,功遂無成。朝廷 勳,吾又以此劍平蔡寇,今鎭人叛逆,公以此翦之。」元翼承命感激,乃以劍及帶令於軍中, 者,其何以報?」衆皆慟哭。又以玉帶、寶劍與牛元翼,遣使謂之曰:「吾先人常以此劍立大 田公出於魏,撫師七年,一旦鎭人不道,敢茲殘害,以魏爲無人也。若父兄子弟食田公恩 三軍日:「魏人所以富庶 加等,贈太尉。 ,四月,遷魏州大都督府長史、魏博節度使。長慶元年,幽、鎭復亂,愬聞之,素服以令 而能通知聖化者,由田公故也。天子以其仁而愛人,使理鎭冀。且

第宅相矜,唯愬六遷大鎭,所處先人舊宅一院而已。晚歲忽於取士,辟請不得其人,至使吏 符,而功業不侔於愬,近代無以比倫。加以行己有常,儉不違禮,弟兄席父勳寵,率以僕馬 緣爲奸,軍政不肅,物論稍減,惜哉 始, 晟克復京城,市不改肆;及愬平准察,復踵其美。父子仍建大勳,雖昆仲皆領兵

後隨吐突承璀討王承宗,為神策行營兵馬使。時昭義盧從史持兩端,無心討賊,承璀 聽七歲,以蔭授太常寺協律郎,常入公署,吏胥小之,不爲致敬,聽令鞭之見血,父晟奇

使。 望 鄆 用 完 風 聽 素 乞 濟 計 + 降 五 易 軍 擒 年六 淮 中 從 山 軍 動 史 東 月 靜 以 聽 平 改 獻。 潛 o 悉 靈 訓 元 轉 用 州 練 和 聽 左 大 + 出 謀 驍 都 几 其不 衞 督 軍 年 將 聲途 府 五 意 軍 長 月 史、 趨 振 兼 , 以 海 御 靈 功授檢校左 州 史 元 鹽 和 中 節 據 中 丞 度 險 要 使。 討 出 一,破 李師 散 爲 境內 沈陽 安州 騎常 道 有 , 侍、 兵,降 刺 聽 光祿 史, 爲 夏 楚 渠 胊 隨 孙 州 鄂 , 廢 Ш 刺 刺 戍, 岳 史、 塞歲 史, 觀 懐仁、 夏綏 察使 統 淮南之 銀 東 欲 柳公綽討 海 起 宥 屯 節 兩 城 田 度

行營將 野外 爲 以 聽 州 師 康 卽 代 屯 節 初 位 兼 爲王 |貝州 之始 魏 度 林 輔 頟 初 使 魏 丌 輸 將 庭 聽 人遂安。 代代 幽 志沼潛結 博 軍 聽復 湊所殺,聽遂凱 爲 路由 節 裴 、冀不廷 羽 不與股馬 度 度 開 林 魏州 使 後 將 決 滄、 、舊渠 憲 几 軍 將 ~,太原 史 年七 , 有 ,是必可 誠 兵 鎭 憲 北 欲 旋,以 名馬 漑田 誠 月 奥 擅 渡 入 覲 懼 迴 轉滑 魏 任。」長慶二年二月 千餘頃, 足文攻其: 穆宗在 鎭 聽 功 竭 人不納聽,乘 接境 封 見 其府 州 襲 凉 刺 、東甲 東宮、 方議 國 帥 至今賴之。 史、 庫 公 史 魏 憲 義 了, 令 近 郊迎 易帥 授 城 誠 成 、怨之, 拒守,乃屯兵館 軍 候 字臣 侍 子 授檢 就 節 韶 諷 東密 五 度 聽 加 聽 品官。 殺 進擬 使。 校兵 檢校 帥 獻之, 憲 白 師 誠 聽 援之, 部 • I 大 王庭 上皆 聴以 一部尙書 和 尚書、· 陶 衙 乃令兵 軍 凑 大破 不 年 職 太原 立 魏 允, 再 , 總 其 兵 其 討 土 違 親軍 尹、北 謂 大 遽 甲 朝 叛 李 字豆 將 旨 卒, 同捷 刃 不不 何進滔 秦弓 京留守 志 日:「李 詔 敢 時 從 聽 沼 休 魏 以 奔 聽 鎭 於 全 博 河 及

졔

其軍 大 敗 無 復 部 伍 畫夜 奔走,僅 |而獲免,喪師過半,輜車兵仗並皆委棄。 御 史中丞温造、

殿中侍御史崔蠡彈之日:

常清 望,按甲遷延,熒惑人心,逗撓軍政 昨 陛 朝典,未曾貸法,必震皇威。 不吝苞羞 成,固危巢於已覆。 節 者資其承藉,委以統戎,俾代憲誠 制之權 猶示含弘,不寘極法,臣等恐憲章墜地 支; 河南 臣 . 聞 失律 袁滋逗留西川、欲 賞罰不立, ,心無報効。 ,蔑棄朝章,有同兒戲。 ,斬於關門; 委具州 無以示天下;是非一貫,莫能建大中。 況陛下授以 進而兇渠尙在。 高霞寓唐鄧 而不守,燒劫無遺; 今李聽罪狀 魏州 神算,假以天威,入魏 ,付之雄鎭 遂使憲誠陷於屠戮, 之亂,職聽之由, 破傷 凤聞 ,天下寒心。 或親當矢石 ,投諸遐裔; ,中外憤惋,比之常淸等輩 望浅口 總 二萬 而 論其負 之期 虎雞之族 ,或躬歷艱 伏請付法 渾鎬 疾驅,狼 亂衆肆其奸兇, ,剋日先定。 竊見義成軍節度使李聽, 節制易定言,將 恩 ,萬死猶幸。 位 狽就道。 危 極龍 「勢屈賊鋒,竟 ,萬萬過之。 失六 築; 而 自 聽 圖 伏以 戦 郡 兼兩 擁 石 免, 於垂 而 旄 若 藩 封 申 兵 觀

上不之罪,罷兵柄,爲太子少師。

修 ,以至隳壞,廳曰:「帥臣鑿凶門而 聽 頗 賂 遺 權幸以爲援,居無 何。 出,豈有拘于巫祝而隳公署耶 復檢校司 徒,起爲邪寧節度使。 ! 邠 」遂命葺之,卒無變異。 州衙廳,相傳不 利藁

疾求代,除太子太保。是歲十月卒,時年六十一,贈司徒。 節度,未至鎭,復除太子太保分司。開成元年,出爲河中尹、河中晉慈隰節度使。 頭所殺。 大和六年,轉武寧軍節度使。時聽有蒼頭爲徐州將,不欲聽至,聽先使親吏慰勞徐人,爲蒼 聽不敢進,固以疾辭,用爲太子太保。七年,出守鳳翔,時人榮之。 九年,改陳許 四年,以

品,竟終牖下,非西平之遺德,焉能及此乎! 聽十頜節旌,所不至者三鎭。 莅官苛細,好將迎遺賂,故急於聚斂,窮極侈欲。 位至

宗正少卿,遷光祿卿。穆宗即位,以太和公主降迴鶻,命金吾大將軍胡証充送公主使,命憲 副之。使還,獻入蕃道里記,遷檢校左散騎常侍,兼太府卿。 體泉縣尉。于頔鎭襄陽,辟爲從事。時吳少誠據淮西,獨憚頔之威,當時咸以憲謀畫致之。 大和二年,轉嶺南節度使。憲雖勳伐之家,然累歷事任,皆以吏能擢用,所履官秩,政績流 元和八年,田弘正以魏博奉朝旨,辟憲爲從事,授衞州刺史,遷絳州,所至以理行稱。入爲 性本明恕,尤精律學,屢詳決冤獄,活無罪者數百人。以能入官,官無敗事,士君子多 **激**,晟第五子。 晟十子,惠、愬最仁孝。 及長,好儒術,以禮法修整,起家太原府參軍、 大和三年八月卒,時年五十六。 出爲洪州刺史、江西觀察使。

軍 ,沉湎酒色,恣爲豪侈,積債至數千萬。 |憑累歷諸衞大將軍,|恕太子洗馬,並以蔭授官,累遷至少卿監。 其子貸迴鶻錢一萬餘貫不償,爲迴鶻所訴, **基累官至右龍武** 大將

,貶甚爲定州司法參軍。

過之。 光 河壖,先貯材木,朔方節度使每遺人潛載之,委於河流,終莫能成。 蕃之寇涇原,佖伏卒擊尚結贊,幾獲, 在方鎮,他檢校工部尚書、靈州大都督府長史、朔方靈鹽節度使。 ,先厚遺之,然後倂役成橋,仍築月城圍守之。 泰門,賊鋒尙勁,佖與兵馬使李演踰苑牆血戰,敗賊前鋒,諸軍方振, 王 展既爲張延賞媒孽罷兵權,亦不用必爲將帥,入爲左衞上將軍。 一佖,晟之甥。 雄武善騎射,自晟河西、河北出師,必無役不從。 由是深爲吐蕃所畏。 自是朔方禦寇不暇,邊上至今爲恨。 晟視佖恩寵與愿、愬不殊, 先是,吐蕃欲成烏蘭 至是, 蕃人知佖 朱泚之亂,晟攻賊於 元和中,愿、愬兄弟 論功爲神策將。 貪 橋於 給與 而 無

三年四月卒。

瓊之言,誠堪太息。雖齪齪刻渭橋之石,區區賜煙閣之銘,亦何心哉!作善遺慶,諸子俱才, 爲應變乎!解帶結孝忠之心,請婚釋延賞之怨,嫉惡有楚琳之請,懲亂行希鑒之誅,可不爲 明於決斷乎!而德宗皇帝聽斷不明,無人君之量,俾功臣困讒慝之口,奸人秉衡石之權,因 忠於事君,長於應變,誠一代之賢將也。觀恆山之役,立談釋二帥之憾,涇師之亂,號哭赴 奉天之危,可不爲忠義乎!對白華之進軍,知平凉之必詐,沮星變之議,移渭橋之軍,可不 元和平賊之功,聽、惣居其半。 父子昆弟,皆以功名始終,道家所忌之談,李氏以善勝矣。 贊曰:桓桓太師,義勇天資。 運鍾禍亂,力拯顚危。 史臣曰:西平器偉材雄,人望而畏,出身事主,落落有將帥之風,見義能勇,聽受不疑, 愬事章武, 誅蔡平齊。 凌煙畫圖

校勘記

父子爲宜。

(1) 心有不可 「心」字各本原作「必」、據御覽卷二〇五、冊府卷三七四改。

(三)寶應 「寶應」爲代宗年號,李愿卒於穆宗長慶之後,當爲「寶曆」之誤。 合鈔卷一八四李愿傳作

「寶曆」。

(三) 渾鎬 各本原作「渾縞」,據本書卷一三四渾鎬傳改。

三大八七

舊唐書卷一百三十四

列傳第八十四

馬燧子暢 燧兄炫 軍城子錦織

舉明孫吳,俶儻善兵法,官至嵐州刺史、幽州經略軍使。燧少時,嘗與諸兄讀書,乃輟卷歎 尺二寸,沉勇多智略,該涉羣書,尤善兵法。 曰::「天下將有事矣,丈夫當建功於代,以濟四海,安能矻矻爲一儒哉!」 燧麥度魁異,長六 馬燧字洵美,汝州郟城人,其先自右扶風徙焉。祖珉,官至左玉鈴衞倉曹。父季龍,當

壯士以弓弦縊殺之。 公盍 可定也。」循雖善之,計不時決,事洩,豫山果遺韓朝陽來召循。朝陽至范陽,與循語,陰伏 一建不代之功,誅其逆將向潤客、牛廷玠,拔其根柢,祿山西不能入歸,則坐而受擒,天下 安祿山反,俾光祿卿賈循守范陽。燧說循曰:「祿山負恩首亂,雖陷洛城,必當夷滅。 燧脫身走西山,隱者徐遇匿之。 踰月,間行歸平原。 平原不守,復走

列傳第

八

十四四

馬

三六八九

魏和

守 抱玉 數千人以守河陽,東都 備之。」無何, 承嗣 取死 因 睢 郵 說 ,所過或虜掠廩栗,供餼小不如意,恣行殺害。 懷恩遣其子場 令燧詣 分授疆 抱 囚給 驛。 簤 玉 應 比 中 日 左右 迴紇 薛嵩 土,皆出於懷恩,其子陽佻勇不義。 懷恩果與太原都將李竭誠通謀,將取 澤潞節度使李抱玉署奏趙城尉。 **断役**,小違令, 屬者與迴紇言,燧得其情。 說 至, 率兵 之,嵩乃絕懷恩從順。 則先路其渠帥,與明要約, 所虜掠 輒殺之。 初,迴紇北歸,遣其將安恪、石常庭將兵數百及誘募附麗者復 重貨,悉積河陽。 迴紇相顧 署奏左武衞兵 今僕固懷恩恃功樹黨,李懷仙、張忠志、薛嵩、田 失色,虜涉其境,無敢暴掠。抱玉 迴紇乃授燧旗幟 是時週紇大軍還國, 以燧度之,將必窺太原西山 是時, 抱玉具供辦 太原,其帥辛雲京覺之,斬竭誠, 曹。 懷恩遣薛嵩自相、衞餽糧以絕河津。 賓介皆憚 爲識,犯令者命燧戮之。 恃復東都之功, 不 敢 「以爲亂,公宜深 行, 燧自贊請 益奇之。 倔強恣 固城自 燧 燧

敬 懷州 ,收葬暴骨,去其煩苛。 承務郎 刺 歷太子 史。 乘 遷 通 亂 奠 事舍人, 州 兵 (之後) 刺 史。 遷 其夏大旱,人失耕稼 著作郎、 至秋, 燧乃勸課農畝 界中生穭穀,人頗賴之。 營田 判官。 總其戶籍,歲 無幾, 燧乃務修教化,將吏有父母者,燧輒造之施 遷秘書少監、兼殿中侍御史,爲節度判 一稅之,州人以爲便。 大曆四年,改

設籬 連 峻 櫓 山 抱 王 山 八 一移鎭 與 日 而 吐蕃相直 鳳翔 功 畢。 ,以汧陽被邊,署奏隴州刺史、兼御史中丞。州 ,虜每 會抱玉 入寇,皆出於 入覲,與燧俱行。 此。 燧乃按 久之,代宗知其能,召見,拜商州 行 險易,立 一西有通道,廣二百餘步,上 石 種樹以塞之,下置二門, 刺史、兼御

史中丞

防禦水

、陸運使

救於燧 降, 使。 破 [梁固 還 永 耀 長孫 因會擊殺宋州 燧讓 汴、 平 兵 十一年五 曆 承嗣 軍將劉治。 全緒 燧 請爲前 宋等八州 功 艱 + 引 於 年 耀 又 等 四 上月? 忠臣。 選鋭 遣悅將兵二 千人爲奇兵擊破之,田悅 軍,乘勝去汴州一舍,方陣 鋒,擊破 河 節度 汴州 刺 陽三城兵亂, 兵 詔 史李僧惠。燧還河陽。 忠臣 燧與淮 八千, 〈留後。 大將李靈耀 田 素暴戾,燧不欲入汴城, 萬救靈耀,破永平軍將杜 悅 號爲「餓狼軍」; 西節度使李忠臣合軍討靈耀。 進逼 靈 逐鎮將常休明,以燧檢校左散騎常侍、御史大夫、河陽三城 耀 汴州。 反 不受命, 因據州 匹馬遁去。 忠臣 而 進。 燧 乃潛結魏博; 城,絕運路, 獨 行汴南,燧引軍行汴北, 引 忠 乃引軍退舍於板橋。 臣 如江 軍擊破之,進至浚儀。 靈耀知悅敗,明日以百騎夜走,汴州 會宋州、淮南、浙 ,略曹州,又敗李正己遊 以邀節制。 田承嗣 忠臣 [懼賊, 乃遣兄子悅將兵援靈耀 西兵, 代宗務姑息人, 又敗靈耀將張淸於 焚廬含西走。 忠臣入城, 是時 與戰不利 軍, 河陽兵 果專其 撃走 因授 燧勸 悉 請 劉 冠

戟於後 之數月 原 承前 大 政 曆 ,行則載兵甲,止 ,爲精騎。 鮑 十四四 防 年 百 井敗軍之後,兵甲寡弱 六 造甲者必令長短三等,稱其所衣,以便進趨。 月 檢校工 一則爲營陣,或塞險以 部尚書、太原尹、北都留守、河東節度留後, ,燧乃悉召將吏牧 遏奔衝,器械無不犀利。 馬廝役,得數千人,悉補騎卒, 又造戰車, 居一年,陳兵三萬 尋爲節度使。 蒙以狻猊象, 列

不附己 必勝之術也。」悅乃分恆州李惟岳救兵五千以助朝光,燧率軍攻朝光,田悅將萬餘人救之。 萬人,於臨洺 至 廣場以 東栅走歸悅。 軍 義 圍 人,假令燧等 軍告急 邢州 ,燧皆斬之以 出 哪口 建中二年六月,朝於京師 詐 習 次臨洺 戦 兵未 乃詔 **劾誠款,燧上疏明其** 陣 南 盡銳攻之,比數 教其 明 過險 雙岡 徇; 燧將步騎二萬與昭義節度使李抱眞、神策行營兵馬使李晟合軍救臨洺。 ,築重城,絕其內外,以拒救兵。 遺兵擊破其支軍,射殺其將成炫之。悅自攻臨洺,遣大將楊朝光將兵 進退坐作之勢。 東西列二 ,乃遣持書喩悅, 燧進軍營明山, 日 栅以禦燧。 ,加檢校兵部尙書,令還太原。 1,計不 、必反,宜先備之。 ,且示之好, 能下,殺傷 取其棄栅以置輜重。 燧乃率李抱眞、李晟進軍,營於二栅之中。 必甚。 邢州將李洪、臨洺將張伾,皆堅守不拔。 悦謂燧畏之。十一月,師次邯鄲,悅遣使 其年,悅果與淄青、恆冀通謀,自將兵三萬 吾此 必拔臨洺,賞勞軍士而與之戰, 悦謂將吏曰:「朝光堅栅不下萬 初, 田悅新代承嗣統兵, 其夜, 恐人

等擊 功加右 敗 燧乃令大將李自良、李奉國將騎兵合神策軍於雙岡禦之,令曰:「令悅得過,當斬爾!」自良 居五 ,斬首萬餘 日 却 「僕射。 晚 進 軍至臨洺 燧乃令推 級,生虜 **先**戰, 燧誓軍中, |九百人,得穀三十萬斛 火車以焚其栅,斬朝光及大將盧子昌,斬首五 田悅悉軍復戰。 戦勝請 燧自將銳兵扼其衝口,凡百餘合,士皆決死,脫兵大 以家財行賞、旣勝、 器甲稱是。 悦收敗兵夜遁, 盡出其私財以頒將士。 千餘級,生虜八百餘人。 邢州園亦解。 德 宗 嘉 以

屯於鄴 遏 橋,築月城以 之,詔度支出錢五萬貫行賞,還燧家財。 赴 合而破之。」燧乃造三橋道逾洹水, 右,兵少未可必破,悅且來救,是前後受敵也。 兵法所謂攻其必救, 善於致人,不致於人。今田悅與淄青、恆三軍爲首尾,計欲不戰,以老我師;若分軍擊其左 水 搜 ,與悅夾洹水而軍 三年正 水稍 奏請 悅收合散卒二萬餘人,壁于洹水,淄青軍其東,恆冀軍其西,首尾相應。 淺,諸軍 月,田悅求救於淄青、恆冀,李納遣大將衞俊將兵萬人救悅,李惟岳亦遣兵三千 益 爲固,軍不得渡。 河陽兵,詔河陽節度使李芃將兵會之。 華渡。 0 抱眞 是時 、與李芃問曰:「糧少而深入,何也?」燧曰:「糧少利速戰,兵法 軍糧 燧乃於下流以車數百乘,維以鐵鎖,鎖絕中流,實以土囊以 日挑戰,脫不敢出。 一少,悅深塵不戰,欲老燧軍。 尋加 魏博招討使。 恆州兵以軍少,懼爲燧所丼,引軍合 軍次于潭,悅遣將王光進以兵守長 燧令諸軍持十日糧, 彼固當戰也,燧爲諸軍 燧率諸軍進 進 次

列

之。 乃縱 爲 持 於 刀山 角 萬 悦。 火,待 滑 陣 餘 迫 兵 師 撃 餘 燧 悦 洹 人 軍 傍 之, 踰 出 謂 水 人 畢發 洹 陣 燧 橋 溺 悅 水 悅 掩 明 募 死 軍 徑 軍 其後 JŁ 日 者不 走 趨 勇力得 大 鼓 復 魏州 橋 敗。 挑 角 乘 可 匿 戦 橋已焚矣。 五 風 時 1其旁, 令 縱 千餘人, 乃伏兵萬 神策、昭義、 火, 鼓躁 聞 何悅 、悅軍 分為 賊 軍 人, 軍 殆 而 至 畢渡 亂, 河陽 盡 前 進 欲邀燧。 則 赴水,斬首 ,死者 列 止爲 軍 以以 燧 焚 小 其 乃 俟賊 相枕 陣 却 坐 橋 燧乃令諸軍半夜皆食 , 河東 至 又令百 藉三十餘 申令無 二萬餘 軍 行 軍 比 + 既勝, 騎 動, 級 悅 · 數 里 殺 吹鼓 里。 軍至,則 命 前 悦 大將孫晉卿 諸 角, 除 軍 乃率淄 火 草 皆留 ·還鬭 先 止氣 斬 棒棘 雞 於後 青、 鳴時 乏, 合擊又大破 安墨啜,生 恆州 廣百 力少衰, 仍 撃 步以 鼓 步 抱 薪

令 忠 節 時 脫 脫 遺 旣 王 度 塞 恥 使 其 符 千 武 入 悅 名 璘 俊 收 頟 在下。 斌 敗 已殺李惟岳 李瑶 長春 俊 卒千 獨 河 爲 流 將 時朱滔討李惟岳,拔深州, 餘人走魏州 嬰城自 絕 五 防禦使,又割趙、深二 城中 百 ,傳首京師 騎送淄青兵還鎮 守。 勝紀。淄青 益 恐。 數 至門. 日 悦乃遣 授武 , 李再 州將 俊 州 春以 恆翼觀 許 李長春閉 璘 爲 求隸幽州 士則 一鎭,以 路因來降燧。 博 祭都 州 侯臧徒步間行說朱滔、王 育 不 降, 不得,亦怨望。 康 防禦使; 悦兄昂以 日 納。 知 魏州 為觀 久之, 時武俊同列張孝忠已爲易定 先引 洛州降, 察使, 追兵不 由 御河 是滔、武俊同謀救悅。 甚爲怨望,且素輕孝 至,比明,乃納悅 王光進以長橋 入城南流江, 一武俊 借兵求救

悅 持燕、 趙之援, 又出兵二萬背城而陣 燧復與諸軍擊破之。 五月, 加燧同中書門下平章

未休息 年號。 滔、王武 冀王, 田 節度使李懷光將朔方軍步騎 下兵馬元帥、太尉、建興王,皆僞署官號,如國初行臺之制,而名目頗有妖僻者,然未敢僞稱 次魏縣。 六月,朱滔、王武俊聯兵五萬來救悅,至于城下。 而 ,堅請與滔等戰,王師 悦稱魏王, 王武俊稱趙王; 俊軍亦至 五盜合從圖傾社稷,兩河鼎沸,寇盜橫行; 是月,韶加燧魏州大都督府長史,兼魏博貝四州節度、觀察、招討等使。 一魏縣,與官軍隔河對壘。 不 萬 利。 五千人赴燧。 又遣使於李納,納稱齊王。 脱等決水灌燧等軍,燧兵屈糧少,七月(三)、燧與諸軍 十一月,三盜於魏縣軍中遞相推獎王號:朱滔 是月晦,懷光 燧等雖志在勤王,竟莫能驅 諸帥議退兵,燧固不可, 亦至。懷光勇而 四道共推准西李希烈爲 無謀,軍至之日 德宗遣朔方 攘 田悅、朱 患 難 稱 退

大將之子與俱來,壁於中渭橋。 攻之,時城中敗卒無三二千人,皆夷傷未起,日夕俟降; 三盜連結,至今爲梗,職燧之由。」燧至太原,遺行軍司馬王權 面 平易受敵 四年十月,涇師犯闕,帝幸奉天,燧引軍還太原。 ,時天下 騷動,北邊數有警急,乃引晉水架汾而注城之東, 及帝幸梁州,權、彙領兵還鎮 議者云:「燧若乘田悅洹水之敗 燧與抱眞 將兵 燧以晉陽 五 不 和 一千赴奉天,又遣男彙 , 瀦以爲池 遷延於擊賊, 王業所起 一,度 寇至計 介,倂力 都 乃 城 及

列

省守陴者萬人;又決汾水環城,多爲池沼,樹柳以固隄。 尋兼保寧軍節度使。

降燧 河中,燧遣使招諭之,懷光妹壻要廷珍守晉州,衙將毛朝數守隰州,鄭抗守慈州, 度丼管內諸軍行營副元帥,令與侍中渾瑊、鎭國軍節度使駱元光同討河中。 「可詔武俊與抱眞同擊朱滔,以深、趙隸武俊,請改日知爲晉慈隰節度使。」日知未至而三州 初,王武俊自魏縣還鎭,雖去僞號,而攻圍趙州不解,康日知窘蹙,欲棄趙州, ,故又加燧昏慈隰節度使。燧乃表讓三州於日知,且言因降而授之,恐後有功者睡以 興元元年正月,加檢校司徒,封北平郡王。 七月,德宗還京,加燧奉誠軍及晉絳慈隰節 上嘉而許之。 燧乃遣使迎日知,旣至,籍府庫而歸之,日知喜且過望。 李懷 皆相 燧奏日 光據 次降

脱及兵五千人。|谷秀以犯令虜士女,斬之以徇。 千人。又遣大將李自良、谷秀分兵略定聞喜、夏縣、萬泉、虞鄉、永樂、猗氏六縣, 燧以兵攻絳州,十月,拔其外城,其夜僞刺史王克同與大將達奚小進棄城走,降其衆四 九月十五日,燧帥步騎三萬次于絳,分兵收夏縣,略稷山,攻龍門,降其將馮萬興、任象 降其將字

燧以懷光逆節尤甚,河中密邇京邑,反覆不可保信,捨之無以示天下,慮上爲左右所 ,獲馬五百匹。是歲,天下蝗旱,物價騰踊,軍乏糧餉,而京師言事多請捨懷光,上意未 貞元元年,軍次寶鼎,敗賊騎兵於陶城,前鋒將李黯追擊之,射殺賊將徐伯文, 斬首萬

惑,且兵事尙密。六月,燧乃捨軍以數百騎朝于京師。 比召見,燧曰:「臣雖不武,得獨糧支

一月,足以平河中。」上許之。

燧 賊徒皆不對。 年,功伐最高,奈何棄祖父之勳力,背君上,爲族滅之計耶!從吾,非止免禍,富貴可圖也。」 六千人,斬賊將閻晏、孟寶、張淸、吳冏等七人以徇,爲懷光脅虜者皆捨之。 敵,吾不迨遠矣!」八月,燧移軍於焦籬堡。 瑊 感泣俯伏,軍士亦泣下。先一日,賊焦籬堡守將尉珪以兵二千因堡降燧;廷光東道旣絕, 廷,可西面受命。」廷光復拜。 六千守宮城,禦備甚嚴。 燧度長春不下,則懷光自固,攻之曠日持久,所傷必甚,乃挺 乃率衆 城下呼廷光。 率諸軍濟河,兵凡八萬,陣於城下。 由是服 七月、燧因朝京師,乃與渾瑊、駱元光、韓遊壞合軍,次于長春宮。 出降。 燧,私謂參佐曰:「予嘗謂馬公用兵與予不相遠,但驚怪累敗田悅; 今觀其行兵料 燧又曰:「爾以吾言不誠,今相去不遠數步,爾當射我!」乃披襟示之。 廷光 燧以數騎徑入城,處之不疑,莫不畏服,衆大呼曰:「吾輩復得爲王人矣!」渾 廷光素憚燧威名, 燧乃喩之曰:「公等皆朔方將士,祿山以來,首建大勳,四 則拜於城上。燧度廷光心已屈,乃徐謂之曰:「我來 是日,賊將牛名俊斬懷光首以城降。 其夜,賊太原堡守將吳冏棄堡而遁,其下皆降。 懷光將徐廷光以兵 其守兵猶一萬 一十餘 自朝 身至

燧自朝京 師還行營,凡二十七日而河中平。 詔書褒美,遷光祿大夫,兼侍中,仍與一子

五品正員官。 宴賜畢,還太原。是行也,德宗賜燧宸扆、台衡二銘。序曰:

惡焉。 未能迨也。 其鑒誠,或諷以詠歌,煥乎典謨,百代是式,有以見啓沃之道,理化之端,意甚慕之, 股每覽上古之書,及唐、虞之際,君臣相得,聖賢同時,日夕孜孜,講論至道,或陳 起予者商,因之有作,庶乎朝夕自儆,且俾後代知我文武殿邦之臣敷。 頃靈鹽節度使杜希全著書上獻,多所規諫,聊爲君臣箴,用答其意。 河東 而

辰 藤 藤

誠。 器,捨短從長,理無求備。 崇德,本仁率義。 必信若寒暑,無私象天地,感而遂通,百慮一致。 任人之術,各當其 要,化行如神。 萬情云云。目不備覩,耳難徧聞,覩之聞之,矧又非眞。事失其源,道遠莫親,理得其 者傾,繫以興亡,曷云其輕。承天子人,夫豈不貴,伊昔哲王,夙夜祗畏。 鑒,我鑒斯明;以天下之心爲謀,我謀則智。 求賢惟廣,辯理惟精,逆耳咈心,必嘉乃 順旨苟容,亦察其情,斥去姦諛,全度忠貞。 天生蒸人,性命元淳〔己,嗜欲交馳,利害糾紛。 無主乃亂,樹之以君,九域茫茫, 失源維何,不自正身,正身之方,先誠其意。 罔從爾欲,罔載爾僞,體道 事多總集,衆才咸遂, 先人立言,爲代作程,諤諤者昌,唯唯 知而必任,任而勿貳。以天下之目爲 取朽爲戒,納

起。 誠必著,淸己之慮,心無億詐,事必忠恕。 露臺罷構,遠奇伎淫巧,放珍禽怪獸。 敬之愼之,天命可祐。欲令必行,順人之情,欲 隍爲志,神將害盈,天匪假易。 自理。嗟予寡昧,嗣守丕圖,寇戎薦興,德化未孚。大業兢兢,其敢以渝,俯察物情,仰 毫釐或差,禍害亦隨,慢易厥初,悔其曷追。 垂旒蔽聰,黈纊塞耳,含弘光大,是亦爲美。 覆之如天,愛之如子,仁心感人,率土 四海爲家,夫豈不富,伊昔哲王,勤儉固陋。 凡將有爲,靡不三思,喜怒以節,動靜以時。 刑不可長,武不可恃,作威逞力,厲階斯 土階罔飾

合衡銘日:

稽典謨,作誠斯言,置于坐隅。

疇吝,仄陋明敭。 洎乎有虞,二八騰芳。 爰迨伊尹,相于成踼。 載生姜牙,諒彼武王。 雲,合若符契,以道匡救,盡規獻替,木必從繩,金其用礪。 股肱運身,是則同體,孰云非親。陰陽相推,四序成歲,君臣相得,萬邦作义。 道無不行,謀無不臧,君聖臣賢,運泰時康。 書昂昂。 昌,剗滅羣兇,砥平四方。 天列合星,垂象于人,聖人則天,亦建輔臣。以翼以弼,爲衡爲鈞,如耳目應心,如 偉茲衆材,爲棟爲梁,蕩蕩巍巍,邦家有光。 惟衞及英、啓闢封疆;日房與杜,振理維綱;亦有魏徵,忠 漢高旣興,蕭、曹亦彰。 是知道之廢興,繫于時主,主之 帝者之盛,時惟陶唐,乃聞 烈烈我祖,膺期而 感同風

謀 道 刑 補。 得 垂休,體於至公, 失, 猷 多 ,亦臣之恥。 日宣。 失, 惟德是倚,惟才是求,人不易知 選茲艱 ·合輔。 長城壓境,巨艦 屯,夙夜祗慄。 自昔格言,愼終如始 何鄙 經 之 以 何讎。 文,緯之以 濟 追惟 川 翊 我 同德同心,扶危持 哲主,必賴 武, 德 戴 功藏鼎 我 出爲方、 亦 實實 難 彝,道 良弼 惟 周。 勳 召员 賢,內 傅說板 ,矧予不德 冠 顚。 圖 ,入作申、甫 熙庶 史。 ·築,夷吾射鉤,任之不疑,千載 予嘉爾 績, 一,暗於 無俾伊、傅,克專厥美,作 誠 外 、理術。 總十連, 絕維 爾相予 載張 師 理 威 旅 ,惟后失 武 繁起,政 闕 (載揚) 衮斯

鑒勒銘,永世是紀。

遺其 燧至 還蕃 四 鎭之師 更六十餘員,由燧之謬謀也,坐是奪兵權。 馬 月 多死 太原 大將論 二年多,吐蕃大將倘結贊陷鹽、夏 燧與論 會於 , 是歲閨 糧餉 ,乃勒二 頰熱 河 頰熱俱入朝,燧盛言 不繼 !五月十五日,侍中渾瑊與蕃 西 厚禮卑辭 進 銘於起義堂西偏,帝爲題 討。 德宗以**燧**爲綏銀麟 燧出 申情 師 於燧請和 ,次石州。 |播情| 盯 勝招 保,請 州 燧頻 結贊聞之懼,遣使請 相尚結贊 大月,以燧守司 ,各留兵守之,結贊大軍屯於鳴沙,自冬及春,羊 額,其崇 討使, 許其 表 論 (盟于 盟 令與華帥 寵 奏,上堅不許。 如 上然之。 平凉 此 `徒,兼侍中、北平王如故,仍賜妓 為藩 駱元光、邠 和 燧旣入朝, 仍約盟會,上皆不許。 軍 三年正月 所劫,狼狽 帥韓 結贊遂自 遊壞及鳳翔諸 ,燧軍還太原。 僅免,陷將 鳴沙 又

樂,奉朝請而已。

朝四日,詔京兆尹韓阜監護喪事,嗣吳王獻爲弔祭贈賵使,册贈太尉,諡曰莊武。子彙、暢。 許。貞元十一年八月薨,時年七十。先是,司天頻奏熒惑太白犯太微上將,間一月而燧薨。廢 燧既退,足疾,仆於地,上親掖起之,送及於陛,燧頓首泣謝。累上表乞骸,陳讓侍中,優詔不 坐。時太尉晟初薨,帝謂燧曰:「常時卿與太尉晟同來,今獨見卿,不覺悲慟。」上歔欷久之。 九年七月,燧對於延英。初,上以燧足疾,不令朝謁;是日,燧以多首入朝, 五年九月,燧與太尉李晟召見于延英殿,上嘉其有大勳力,皆圖形凌煙閣,列於元臣之 敕許不拜而

等十一人,敕炫就第杖暢三十,上於是罷括率之令。燧貲貨甲天下,燧旣卒,暢承舊業,屢 商戶, 析其產,中貴又逼取,仍指使施於佛寺,暢不敢吝;晚年財產並盡, 爲豪幸邀取。 可班師還鎭。 俊、李誠信、冀信等與暢善,因飲食聚會,言時事將危;暢乃遣家人温靖與父書,具陳利害, 暢以父蔭累遷至鴻臚少卿,留京師。建中三年,燧討田悅於山東,時歲旱,京師括率 人心甚搖。 貞元末,中尉楊志廉(三)諷暢令獻田園第宅, 燧怒,執婦具奏其狀,令兄炫執暢請罪。 鳳翔留鎭幽州兵,多離散入南山爲盜。殿中丞李雲端與其黨袁封、單超 德宗以燧方討賊,不竟其事,誅雲端 順宗復賜暢。 身歿之後, 初爲彙妻所訴, **、諸子無室可**

140日

居,以至凍餒。今奉誠園亭館,即暢舊第也。 子繼祖,以祖蔭,四歲爲太子舍人,累遷至殿中少監,年三十七卒。 暢終少府監,贈工部尙書。

時年七十九。 原 遷左散騎常侍。 爲閬州刺史,入爲大理少卿。建中初,爲潤州刺史,黜陟使柳載以清白聞,徵拜太子右庶子, 部郎中。 ,辟爲掌書記、試大理評事、監察御史,歷侍御史。常參謀議,光弼甚重之,奏授比部、刑 |炫字弱翁,|燧之仲兄,少以儒學聞於時,隱居蘇門山,不應辟召。 田神功鎭汴州,奏授節度判官、檢校兵部郎中。 弟燧爲司徒,以親比拜刑部侍郎,以疾辭,改兵部尚書致仕。 轉連州刺史,徵拜吏部郞中,又出 至德中,李光弼鎭太 貞元七年卒,

| 平凉之會,大臣幾陷,關畿搖動,此謂才有餘而心不至,議者惜而恨之。 決死,未嘗折北,謀得兵勝,冠於一時。然力能擒田悅 史臣曰:燧雄勇強力,常先計後戰,又善誓師,將戰,親自號令,士無不慷慨感動,戰皆 而 不取,納蕃帥之僞款而保其必盟,

| 蘭州 太子 僕 刺 渾 瑊 同 史。 IE 皋蘭州 曾 釋之,少 旭 元 人也 慶、 有 旭 本鐵勒 大壽、 武藝,從朔方軍 父 九姓部落之渾 釋之, 皆代爲 ·, 積 戦 部 功 泉蘭 也 於邊 都 高祖 Ē, 督。 累遷 大俟利發渾阿 大壽, 至開府 開元 儀同三司 初歷 (貪支) 一左領 貞觀 試 衞 太常 中郎將、 中爲皋

寧朔郡王。廣德中,與吐蕃戰,沒於靈武,年四十九。

阳 軍 布 累授折 思 瑊 部 本名日 衝果毅。 又 I進,年 與 諸 軍 後 十餘歲 城永淸栅、天安軍 節度使安思順 卽 善騎射,隨父戰伐, 遣 瑊 ,遷中鄓將。 提偏 師深 破賀魯部, 入葛祿部 下石堡城, 經狐 媚 磧 ,略特羅 收龍: 駒島, 斯 山 勇冠 破 諸

固 瑊 鬭 擊敗 懐 踮 恩 安 陣斬 之。 凉 討 史朝 山 之, 從 構 遷右 逆, 義 郭子儀 前 院 衛 後 收 數 將軍 兩 7 光丽 京,討安 戦 出師 旣而 朝義 慶緒 河北 肅宗 平 破賊 即位 加 定諸郡邑。 開 府儀 於 於 新鄉 靈 武 同 三司、太常卿 改檢 瑊 賊將有李立 統 兵 校太僕 赴 行 節者, 卿,充 在 賜 · 至 實 武 封 天德 素稱 鋒 二百 軍 遇 : 驍勇, 使。 蕃 軍入寇 與瑊格 叉 | 從 僕

奉天。 戰死, 還 及 秋於州。 叉起 華州 懐 恩謀 復 周 本官, 智光反 亂 會吐蕃 令子 爲 朔 瑒 子 大 儀 入 方 與 寇 奉韶討之, 瑊 行營左 率 ,至奉天 軍 圍楡 厢 兵 令城領馬步萬人攻下同州 馬 瑊 次 拒戰 使。 朔方 從子 於漢谷)將殺瑒, ·儀討 一、大破 吐蕃 瑊 蕃 率所部歸郭 於那州 軍 ·, 以 智光平, 功加 以 功 子 太子賓客,復屯 加御 儀。 韶以邪、寧、慶 史中 會瑊 丞。 父釋之 於 軍

三州 隸朔方軍 子儀領之,子儀令城先率兵至邠州, 便於宜祿縣防秋。 歲餘, 加兼御史

大使知節度使事、管內支度營田等使。 加檢校工部尙書、單于副都護、振武軍使。 歸,頗爲邊患。以瑊爲石嶺關已南諸軍都知兵馬使,率兵掎角逐之,虜騎引退。 之。十二年,子儀入朝,令瑊知邠寧慶三州兵馬留後。十三年,迴紇侵太原,破鮑防軍,北 戍於長武城,臨盛秋。十一年,領邠州刺史。其年,吐蕃入寇慶州方渠、懷安等鎮, 瑊擊却 一節度,以瑊乗單于大都護,充振武軍、東受降城、鎭北大都護府、綏銀麟勝等軍州節 大曆七年,吐蕃大寇邊,瑊興涇原節度使馬璘會兵,大破蕃賊於黃菩原。 其年,復以崔寧爲朔方節度使,領子儀舊管,徵城爲 十四年,郭子儀拜太尉,號尙父,分所管內別置 自是, 其年八月, 每年常 度

乃署爲行在都虞候、檢校兵部尙書、京畿渭北節度觀察使。 **倘書、御史大夫,充中軍都虞候。** 并鞍轡、錦綵二百匹。 左金吾衞大將軍,兼左街使。 刺史論惟明統兵三千,自乾陵北過,赴醴泉以拒朱泚。 建中四年,李希烈遣間諜詐爲瑊書與希烈交通,城奏其狀,上特保證之,仍賜城馬一匹 時以普王爲荆襄等道兵馬元帥討李希烈,大開府幕,以瑊檢校戶部 會涇師亂,德宗幸奉天,後三日,瑊率家人子弟自京城至, 居數日, 會諜報述已出兵,帝遽令追遊 **孙寧節度使韓遊褒與**

慶兵,纔至奉天,賊軍果至。遊慶等戰于城東,王師不利,遂乘勝奔突,將入,官軍與賊隔門 解去,然重圍已合。 賊大修攻具,以僧法堅爲匠師,毀佛寺房宇以爲梯櫓。 相持,自卯至午,殺傷頗甚。門內有草車數乘,碱令推車塞門,焚之以外禦,乘火力戰,賊方 是月,賊自丁未

攻東北 遭人城外捃拾樵採以進御。人心危蹙,上興城對泣。賊泚北據乾陵,下瞰城內,身衣黃衣, 賊泚可以計破也。」 盧杞等曰:「陛下以順討逆,不可自驚陵寢。」 白志貞從而贊之,上從杞 等率先赴難,安危是賴,所繫非輕,制置不宜差跌。但令希全等於雞子堆下營,固守善地, 若取乾陵北過,附柏城而行,便取城東北雞子堆下營,與城中掎角相應,且分賊勢,朱泚必 寢。」 瑊曰:「今朱泚圍城,斬伐柏城,以夜繼畫,驚動已多。 今城中危急, 佇望救軍,唯希全 將至,上議其所向,宰相盧杞、白志貞以漢谷路爲便。 瑊曰:「漢谷險隘,必爲賊所邀,不 城中出兵應援,亦爲賊挫銳而退。希全等各歸還本鎭,賊攻城逾急,壕塹圜之。 不更於陵寢往來。」||杞日:「漠谷路近,若慮逆賊邀擊,即出兵應接,若取乾陵路, 十一月,靈武節度使杜希全、鹽州刺史戴休顏、夏州刺史時常春合兵六千人赴難〔《〕。 希全等進至漠谷,果爲賊軍邀擊,奪據水口,乘高以大弩、巨石左右夾擊,殺傷頗甚; 角,矢石亂入,晝夜如雨,城中死傷者甚衆。 重圍救絕,芻粟俱盡,城中伺賊 旬日,復偏 休息,輒 恐驚陵

以爲 蔽 以翟扇 破 在 漏刻之頃,時令騎將環城招公卿、士庶,責以不識天命 ,前後左右 ,皆朱紫閹官,宴賜拜舞,紛紜旁午。 城中動息, 賊俯窺之, 慢辭戲侮,

須臾, 使侯 承倩 不能 賊之鋒,雖力戰 授之,不足者,筆書其身,因命以位。仍謂瑊曰:「朕便與卿別,更不用對來,縱有急切,令馬 下者千餘軸,募諸軍突將敢死之士以當之;兼賜城御筆一管,當戰勝,量其功伐,卽署其名 暄 别 流霑沫,格鬭不已,初不言瘡痛,以激士心。 是日,上先授]城二子官, 三千餘 直指 日 仲莊 雲橋,周以重鐵,方就,而朔方節度使李懷光自魏縣行營赴難,先遣兵馬使張韶入奏。 復下 在卿處,但令附奏。」減俯伏嗚咽,上亦悲慟不自勝,撫臧背而遣之。前一日,城與防城 風 五 城東 迴 相繼 柴薪夜燒之,平明,火焰高於城壘。是時,北風正急,賊乃隨風推橋以薄城下, 揣雲橋來路,先鑿地道,下可深丈餘,上積馬糞,深五六尺。次二日,卽令爇火,次 城中恟懼,相顧失色。 日 陷 北隅,兩旁構木爲廬,冒以牛革,迴環相屬,負土運薪於其下,以塡壕塹, 財造 轉,雲橋焚爲灰燼,賊焚死者數千,城中歡譟振地。 時瑊中流矢,遽自拔之 而登。城上士卒皆久寒餒,又少甲胄,碱但感激誠厲之。以飢弱之衆, 應敵,人憂不濟,公卿已下,仰首祝天。 賊徒至地道所,橋脚偏陷,不能 雲橋成,闊數十丈,以巨輪爲脚,推之使前,施濕氈生牛革,多懸水囊以爲 上召城勉諭之,令齎空名告身自御史大夫、實封 餘授將校有差。 五百戶已 當劇 唢

韶 至 卽 奉天,與賊填塹者相雜,臨城忽大呼,謂城上曰:「我李懷光使也,懷光自河北領大軍至 繩 引 而登。 城中得懷光表 歡 擊振動,賊衆不之測,乃令昇韶巡於城上。 翌日,懷光

軍 文 、體泉 是夜,賊解圍 而 去

時懷 等州、 令侯 抗 選 破 師 上 | 勁騎三千急追泚至涇州 一、賊之日,城亦進收咸陽。 [於武功,減與吐蕃將論莽羅之衆大破賊於武亭川,斬首萬餘級。 京 臨 城 光 軒授鉞,用漢拜韓信故事。 仲莊以後軍擊敗之。三月,加檢校左僕射、同中書門下平章事,兼靈州都督、靈 興元 定 西面。 叛 遠西城天德軍節度等使,仍充朔方邠寧振武等道兼永平軍奉天行營兵馬副元帥 逆 元 【年正月,以<u>瑊</u>爲行在都知兵馬使。 二月,賜實封五百戶。 ,二賊連結,寇盜縱橫,碱分布諸軍,以爲翼衞,纔入谷口,而懷光追 五月, 李晟 自東渭橋抵京城攻賊,城亦與韓遊瓌、戴休顏 ,賊將誅泚,傳首來獻 尋聞朱泚、姚令言奔敗, 是月,碱將諸軍赴京畿,賊將韓旻、張廷芝、宋歸朝等拒我 命諸軍分道邀擊,其衆離潰,相率來降。 **瑊便赴奉天應接李晟** 是月,德宗移幸山南。 西面諸軍會合。 騎遽至,瑊 鹽豐夏 晟

戶 (充河中同陝)號節度及管內諸軍行營兵馬副元帥, 駱元光、尚可孤五 六月,加城侍中。 百戶。 論收京城之功,加實封李晟一千戶,碱八百戶,韓遊瓌、戴休顏四百 七月,德宗還宮, 以殱守本官,兼河中尹、河中絳慈隰節度使, 改封咸寧郡王。 九月, 賜瑊大寧里甲

第、女樂五人,入第之日,宰臣、節將送之,一如李晟入第之儀。 以李懷光未平,又加朔方行 **營**兵馬副元帥,與河東節度使馬燧會兵進討。 貞元元年八月,河中平,以功加檢校司空,與 一子五品正員官。是多望,皇帝親郊昊天上帝,瑊入朝陪祀畢,還鎭河中。

贙,言還我鹽、夏,則許同盟。 結**贊**謂翰曰:「淸水之會,同盟人少,是以和好輕慢不成;今 恐蕃軍隱伏不利,不如於平凉,其地坦平,且近涇州,就之爲便。」乃定盟於平涼川。 於原州土梨樹。」又請盟畢歸二州。翰歸,備奏其事,神策將馬有麟奏曰:「土梨樹地多險, 審相及元帥已下凡二十一人赴盟,靈州節度使杜希全、涇原節度使李觀皆和善守信,境外 禮告馬燧,請重立盟誓,則審軍引去,德宗不許。馬燧自入朝言之,上乃令崔翰入審報結 陷我鹽、夏二州,以兵守之。欲長驅犯京師,而畏瑊與李晟、馬燧,欲陰計圖之。 乃卑詞遜 重之,此時須請預盟。」翰約盟于淸水,且先歸我鹽、夏二州,結贊曰:「淸水非吉地,請會盟 三年,吐蕃入寇,至鳳翔,爲李晟邀擊之,又襲破其摧沙堡,吐蕃深恨之。尚結贊入寇,

部尚書崔漢衡副之,司勳郎中鄭叔矩爲判官。 瑊統兵二萬,又詔華州節度使駱元光以本鎮 出境,李觀又已改官,今遣侍中渾瑊充盟會使。」五月,瑊自咸陽入朝,韶授平凉盟會使,兵 初,結贊請字觀、杜希全預盟,欲執之,徑犯京師。 詔報之曰:「杜希全職在靈州,不可

兵從瑊。

深矣, 召陷蕃將吏讓之,因怒減日:「武功之捷,吐蕃之力,許以涇州、靈州相報,竟食其言,負我 神策將孟 衡、 追 得他馬,跨而奔馳,追騎雲合,流矢雨 宋鳳朝、 + 遭 騎爲 遊 騎方止,瑊僅得免,辛榮兵盡矢窮, 中官俱文珍劉延李淸朝、漢衡判官鄭叔矩、 軍相 閨 舉國同怨。 遊軍 月十五日,城與結贊會平凉。 崔漢衡等入幕次,坦無他慮。 日華李至言樂演明范澄馬弇等六十餘人,皆陷于賊。 覘 伺。 ,纔至壇所,爲蕃軍所執。 是時 本劫是盟,志在擒城。 ,蕃軍精騎數萬 ,力屈而降。 `列於壇西,蕃之遊軍貫穿我軍之中。 初,約以兵三千列於壇之東西,散手四百人至壇下,各 集而不傷。 結贊命伐鼓三通,其衆呼譟而至。 結體又謂瑊曰:「請侍中已下具衣冠劍珮。」城與監軍 吾已爲金枷待瑊,將獻贊普,旣已失之,虛致君 城判官路泌袁同直、 宋鳳朝、瑊判官鄭弇,爲追兵所殺; 會瑊將 辛榮以數百人據北阜,與賊血戰, 尚結贊至原州 大將軍扶餘準馬寧、 城遽出自幕後,偶 城將梁奉貞率六 列坐帳中,

顛 帥 還 等何爲? 河 絹布四 如 中。 七月,碱自奉天入朝,素服待罪,詔釋之而後見。俄而吐蕃入寇京畿,城鎭奉天。十月, 」乃放俱文珍、馬寧、馬弇歸朝 四年 千匹、米粟三千石。 十五年十二月二日 七月,加邠、寧、慶副元帥。 ,薨於鎭。廢朝五日,羣臣於延英奉慰。 及喪車將至,又爲廢朝。應緣喪事,所司準式支給,命京兆尹 十二年二月,加檢校司徒,兼中書令,諸使、副元 韶贈太師,諡曰忠武,

監護。 葬日,賜絹五百匹。

前 位 瑊 忠勤 極將 相 謹愼,功高不伐,在藩方歲時貢奉,必躬親閱視;每有頒錫,雖居遠地,如在帝 ,無忘謙抑,物論方之金日磾,故深爲德宗委信,猜間不能入, 君子多之。子

練、錦、鱥。

廷乃除 乃以 斂 使。 入定州界焚燒驅掠。 元和 衣 |鎬率全師壓賊境而軍,距賊壘三十里。| 鎬謀盧不周,但耀兵鋒,無所控制,賊乃分兵潛 再貶循州刺史。 服 鎬檢校右散 中,諸道出師討王承宗,屬義武軍節度使任迪簡病不能軍,以鎬藉父威名,足以鎭定, 協治兵練卒,頗有威望,然不能觀釁養銳,以期必勝。
鎖、定相去九十里, 元和十一年 鎬 還鎬 陳楚代之。 **瑊第二子。** 方得 騎常侍,充義武軍節度副使。 一歸朝, 楚聞亂,馳入定州。鎬爲亂兵所劫,以至裸露。 歲餘卒。 性謙謹,多與士大夫遊。 鎬怒,進攻賊壘,交鋒而敗,師徒殆喪其半,餘衆還<u>定州,</u>亂不可遏,朝 坐貶韶州刺史。 後代州刺史韓重華奏收得鎬供軍錢絹十餘萬貫 歷延、唐二州刺史,軍政吏職, 九月六日,加檢校工部尚書,代迪簡爲節度 楚既整戢,於亂兵處率 有可稱者。 及

年,入爲右金吾衞大將軍、知街事,歷諸衞大將軍,卒。 與之邑』,今我念其先人之功,與之致富可也。」宰臣曰:「鐵常歷名郡,有政能。」乃從之。三 使,坐贓貶袁州司戶,憲宗思咸寧之勳,比例從輕。五年,徵爲袁王傅,復賜金紫,遷殿中 開成初,宰相擬壽州刺史,文宗曰:「鐵,勳臣子弟,豈可委以牧民。 仲尼有言,『不如多 **| 鏇, 城第三子。 以父蔭起家爲諸衞參軍,歷諸衞將軍。** 元和初,出爲豐州刺史、天德軍

悦;平凉之會,幾陷於吐蕃,此亦術有所不至也。緬思建中之亂,四海波騰,賊泚竊發之 辰,宗祀不絕如綫,苟非忠臣致命,化危爲安,則李氏之宗社傾矣。 史臣曰:馬司徒之方略,渾咸寧之忠蓋,各奮節義,爲時名臣。 然元城之師, 失策於田

實賴將軍。 贊曰:北平之勳,排難解紛。 咸寧蹈義,感慨匡君。再隆基構,克殄昏氛。 迥天捧日,

校勘記

(二) 先引御河入城南流 傳 八 + 四 校 「城」字各本原無,據冊府卷三五九補。 勘 記

(三) 七月 各本原作「七日」,本書卷一二德宗紀作「七月」。上文已作六月晦,此處作「七月」是。

改。

(三) 性命元淳 「命」字御覽卷五九二作「本」。

(图) 出爲方召 「召」字各本原作「伯」,據全應文卷五五改。

(六) 時常春 (至) 楊志廉 「楊」字各本原作「申」,據冊府卷八一二、新書卷一五五馬燧傳、通鑑卷二三六改。

「時」字各本原無,據冊府卷四〇五、通鑑卷二二九補。

舊唐書卷 一百三十五

列傳第八十五

章執誼 盧杷 子元輔 王叔文 王伾附 白志貞 裴延齡 程异 皇甫鎛 章渠牟 弟鏞

守 事、監察御史,以病免。入補鴻臚丞,遷殿中侍御史、膳部員外郎,出爲忠州刺史。 司而遇害。杞以門蔭,解褐淸道率府兵曹。朔方節度使僕固懷恩辟爲掌書記、試大理評 盧杞字子良,故相懷愼之孫。父奕,天寶末爲東臺御史中丞;洛城爲安祿山所陷,奕 至荆南

頗有口辯。 及聞杞至, |札貌陋而色如藍,人皆鬼視之。 出為號州刺史。 子儀悉令屏去,獨隱几以待之。

杞去,家人問其故, 建中初, 徵爲御史中丞。 時尙父子儀病, 不恥惡衣糲食,人以爲能嗣懷愼之淸節,亦未識其心。 子儀曰:「紀形陋而心 百官造問,皆不屏姬

列傳第八十五 盧杷

險,左右見之必笑。若此人得權,卽吾族無類矣。」

卒。 與張鎰善,每何杞晝眠,輒詣鎰,杞知之。他日,杞假寢佯熟,何詹果來,方與鎰語,杞遽至 野,圖欲去之。宰相張鎰忠正有才,上所委信,杞頗惡之。會朱滔、朱泚弟兄不睦,有泚判 部侍郎、判度支杜佑,甚承恩顧,爲杞媒孽,貶饒州刺 陰禍賊物如此。 宜聞。」時三司使方按詹、郢、獄未具而奏殺詹,貶郢爲驩州刺史。 官蔡廷玉者離間滔,滔論奏,請殺之。廷玉旣貶,殿中侍御史鄭詹遣吏監送,廷玉投水而 竟歿於賊。初,京兆尹嚴郢與楊炎有鷺,杞乃擢郢爲御史大夫以傾炎,炎旣貶死,心又惡 惡之,潛於德宗,言寧與朱泚盟誓,故至遲迴,寧遂見殺。惡顏眞卿之直言,令奉使李希烈, 陋貌無識,同處台司,心甚不悅,爲|杞所譖,逐於|崖州。 既居相位,忌能妬賢,迎吠陰害,小不附者,必致之於死,將起勢立威,以久其權。 把因奏曰:「恐朱泚疑爲韶旨,請三司按鞠瘡,又御史所爲,稟大夫命,并令按郢。」 詹 及居糾彈顧問之地,論奏稱旨,遷御史大夫。旬日,爲門下侍郎、同中書門下平章事 李揆舊德,慮德宗復用,乃遣使西蕃,天下無不扼腕痛憤,然無敢言者。 **德宗幸奉天**,崔寧流涕論 鎰尋罷相 一出鎮 時事,杞聞 楊炎以杞 鳳翔。 人所

初,上卽位,擢崔祐甫爲相,頗用道德寬大,以弘上意,故建中初政聲藹然,海內想望貞

觀之理 萬貫 然如 給軍 渝 博士偉都賓等謀行括率,以爲泉貨所聚,在於富商,錢出萬貫者,留萬貫爲業,有餘,官借以 河南連兵不息。 准右、襄、鄧之郡 安尉薛萃荷校乘車,搜人財貨,意其不實,即行搒箠,人不勝冤痛,或有自縊而死者,京師囂 ,後無以遏,即疾驅 切借四 ,可支半歲,則用兵濟矣。 被賊盜。 ,冀得五百萬貫。 ; 及梠爲相,諷上以刑名整齊天下。 分之一,封其櫃窖,長安爲之罷市,百姓相率千萬衆邀宰相於道訴之。相初雖慰 都計富戶田宅奴婢等估,纔及八十八萬貫。又以僦櫃納質積錢貨貯粟麥等, 度支使杜佑計諸道用軍月費一百餘萬貫, 邑。 而歸。 恆州李寶臣死,其子惟岳邀節鉞,遂與田悅締結以抗王師,由是河北、 上許之,約以罷兵後以公錢還。敕旣下,京兆少尹章禛督責頗峻,長 計僦質與借商,纔二百萬貫。德宗知下民流怨,詔皆罷之,然 初,李希烈請討梁崇義,崇義誅而希烈叛,盡據 ,京師帑廩不支數月; 且得五百

錢爲率算之。 **貫文。除** 一千,下等五 明 7年六月,趙贊又請稅間架、算除陌。 凡屋兩架爲一間,分爲三等:上等每間二千, 陌法,天下公私給與貿易,率一貫舊算二十,益加算爲五十,給與物或兩換者, क्त 百。 主 人牙子各給印紙,人有買賣,隨自署記,翌日合算之。有自貿易不用市 所由 :吏秉筆執籌,入人第舍而計之。 凡沒一間,杖六十,告者賞錢五十 約

師

在野,日須供饋。

列

第八

+

囂然滿於天下。及十月,涇師犯闕,亂兵呼於市曰:「不奪汝商戶僦質矣! 不稅汝間架除 千,出於其家。 法既行,主人市牙得專其柄,率多隱盜,公家所入,百不得半,怨譫之聲 (三), 牙子者, 驗其私簿, 投狀自其有私簿投狀(二)。 其有隱錢百, 沒入, 二千杖六十, 告者賞錢十 陌矣!」是時人心愁怨,涇師乘間謀亂,奉天之奔播,職梠之由。故天下無賢不肖,視梠

宰相謀議乖方,度支賦斂煩重,京尹刻薄軍糧,乘輿播遷,三臣之罪也。今懷光勳業崇重, 播州司馬 志,德宗方悟爲梠所構。 京城,破竹之勢,不可失也。」帝然之,乃詔懷光率衆屯便橋,克期齊進。 朝覲,則必賜宴,賜宴則留連,使賊得京城,則從容完備,恐難圖之。不如使懷光乘勝進收 「懷光勳業,宗社是賴。臣聞賊徒破膽,皆無守心。若因其兵威,可以一舉破賊; 聖上必開襟布誠,詢問得失,使其言入,豈不殆哉!」 翃、贊白於祀,祀大駭懼,從容奏曰: 德宗在奉天,爲朱泚攻圍,李懷光自魏縣赴難。 或謂王翃、趙贊曰:「懷光累歎憤,以**爲** 物議喧騰,歸咎於杞,乃貶爲新州司馬,白志貞恩州 懷光 司馬, 大怒,遂謀異 今若許其 趙贊爲

中袁高宿直,當草杞制,遂執以謁宰相盧翰、劉從一曰:「杞作相三年,矯誣陰賊,排斥忠良, 遇赦,移吉州長史。 在貶所謂人曰:「吾必再入用。」是日,上果用祀爲饒州 刺史。

朋附者欬唾立至青雲,睚眦者顧盼已擠溝壑。 傲很背德,反亂天常,播越鑾輿,瘡痍天下, 肝上聞,冒死不恐,冀迴宸睠,用快羣情;至今拳拳,未奉聖旨,物議騰沸,行路驚嗟。 人之 國,職祀之由,可謂公私巨蠹,中外棄物。 自聞再加擢用,忠良痛骨,士庶寒心。 臣昨者瀝 姓之心,乞迴聖慈,遽輟新命。」疏奏不答。諫官又論曰:「盧杞蒙蔽天聽,隳紊朝典,致亂危 非宜。臣聞君之所以臨萬姓者,政也;萬姓之所以載君者,心也。倘加巨奸之寵,必失萬 人,天地神祇所知,蠻夷華夏同葉。伏惟故事,皆得上聞,自梠爲相,要官大臣,動踰月不敢 上疏曰:「伏以吉州長史盧杞,外矯儉簡,內藏奸邪,三年擅權,百揆失序,惡直醜正,亂國珍 惡。三軍將校,願食其肉,百辟卿士,嫉之若讎。」諫官趙需、裴佶、宇文炫、盧景亮、張薦等 皆杞之爲也。 曰:「殷欲授祀一小州刺史,可乎?」李勉對曰:「陛下授祀大郡亦可,其如兆庶失望何?」上 臣等忝列諫司,今陳狂瞽。」給事中袁高堅執不下,乃改授澧州別駕。 無良,一至於此。伏乞俯從衆望,永棄奸臣。幸免誅夷,足明恩貸;特加榮寵,恐造 **雅於上聞,朝野爲之側目。』由是忠良激勸,內外歡欣;今復用爲饒州刺史,衆情失望,皆謂** 奏聞,百僚惴惴,常懼顚危。及京邑傾淪,皇輿播越,陛下炳然覺悟,出棄遐荒,制曰:『忠識 事尙可救。」翰、從一不悅,遂改命舍人草制。明日詔下,袁高執奏曰:「盧杞爲政,極恣兇 幸免誅戮,唯示貶黜,尋已稍遷近地,更授大郡,恐失天下望,惟相公執奏之, 翌日延英,上謂宰臣 禍階。

邪也 也! 泌拜而言曰:「累日外人竊議, 日:「衆人論||杜奸邪,殷何不知?」||勉曰:「盧梠奸邪,天下人皆知; 唯陛下不知,此所以爲奸 」德宗默然良久。 散騎常侍李泌復對,上曰:「盧杷之事, 股已可袁高所奏, 如何?」 以陛下同漢之桓、靈;臣今親承聖旨, 乃知薨、舜之不迨

遷給 其後 鄓。 醜行爲累,人士歸美。 事中, 元輔 ,特恩拜左拾遺,再遷左司員外郞,歷杭、常、絳三州刺史。以課最高,徵爲吏部郞中, 子元輔,字子望,少以淸行聞於時。進士擢第,授崇文館校書郎。德宗思梠不已,乃求 自祖至曾,以名節著於史册。 改刑部侍郎。自兵部侍郎出爲華州刺史、潼關防禦、鎭國軍等使,復爲兵部侍 大和三年八月卒,時年五十六。 元輔簡絜貞方,綽繼門風,歷踐淸貫,人亦不以父之

餘年。 深委信之,帳中之事,與琇珪參決。 白志貞者,太原人,本名秀珪。 | 德宗嘗召見與語,引爲腹心,遂用爲神策軍使、檢校左散騎常侍、 兼御史大夫, 賜名 代宗素知之,光弼薨後,用爲司農少卿,遷太卿,在寺十 出於胥吏,事節度使李光弼,小心勤恪,動多計數,光弼

志貞。善伺候上意,言無不從。

執不許,凡旬日,方下其詔。貞元三年, 時豪家不肖子幸之,貧而有知者苦之。 自是京師人心搖震,不保家室。 及涇師犯闕,詔志貞以神策軍拒賊,無人至者,上無以禦寇,乃圖出幸。 志貞,兩軍應赴京師,殺傷殆盡,都不奏聞,皆以京師沽販之徒以塡其闕。 由是志貞請令節度、觀察、團練等使丼嘗爲是官者,令家出子弟甲馬從軍,亦與其男官。是 沮懷光入朝,衆議喧沸,言致播遷,盧杞、志貞之罪也。 四百人從駕至奉天,仍以志貞爲行在都知兵馬使。 巨萬,以國家召募有急,懼不自安,乃上表請以子弟率奴客從軍,德宗嘉之,超授五品官。 建中四年, 貞元二年,遷果州刺史,宰臣李勉及諫官表疏論列,言志貞與盧祀罪均, 李希烈陷汝州, 命志貞爲京城召募使。 遷潤州刺史、兼御史大夫、浙西觀察使。 聞李懷光至,恐暴揚其罪,乃與盧杞同 故與杞同貶,遇赦量移閬州別駕。 時尚父子儀壻端王傅吳仲孺家財 時令狐建以龍武軍 時禁軍募致,悉委 其人皆在市廛, 未宜敍用, 是年六 固

裴延齡 河東人。 父旭,和州刺史。 延齡,乾元末爲汜水縣尉, 遇東都陷賊, 因寓居鄂

月卒。

州 齡 改易度支之務,令延齡知東都度支院。 短。 入 改 集賢 調授太常博士。 多著作 綴緝 時 院視 李 泌爲相,厚於叔則 裴 郎。 級期所注 事 竇參尋作相, 宰相延賞惡其輕率,出爲 ·史記之闕: 盧杞爲相, ,用爲太府少卿,轉司 ,中丞竇參恃 遺, 擢爲膳 自號小裝。 部員 及韓滉領 思寵, 昭應令, 外郎、集賢院直學士, 後華州刺史董晉辟爲防禦判官; 農 惡巡 度支,召赴京,守本官,延齡不待 少卿。 與京兆尹鄭叔則論辨是非, 而 佑 延 齡。 叔 改 則坐貶爲永州刺 祠 部郎 中。 攻訐 黜陟使薦其 崔 詔 造 叔則之 史,延 作相 遽

耳。 色錢 庫 物。」 吏與 貞元 差舛散失, 莫可 謀 八年 上 ,以求恩顧 皆從之。 班宏卒,以延齡守本官,權 且欲多張名目以惑上聽, 知之。 ,乃奏云:「天下每年出入錢物,新陳相因,常不減六七千萬貫,唯有 請於左藏庫中分置別庫:欠、負、耗、賸等庫及季庫、月庫 領度支。 其實於錢物更無增加, 自揣 不通殖貨之務,乃多設鉤距, 唯虛費簿書、人吏 召度 納諸

,時有蘆葦生焉,亦不過數畝,延齡乃奏曰:「廏馬冬月合在槽櫪秣飼,夏中卽須牧放。 又妨奪農務。 趙憬議,以爲:「若市送百萬圍草,即一府百姓,自多歷夏,般載不了, 其年 遷戶部侍郎、判度支,奏請令京兆府以兩稅青苗錢市草百萬圍送苑中。 請令府縣量市三二萬圍,各貯側近處,他時要卽支用。」京 百役供應, 西有汙池 宰相陸 須悉停 卑濕 臣

務殷繁,官員尙或有闕;自兵興已來,戶口減耗大半,今一官可兼領數司。伏請自今已後, 錢帛以實帑藏,上曰:「若爲可得錢物?」延齡奏曰:「開元、天寶中,天下戶僅千萬,百司公 廢中無別。」上初信之,言於宰相,對曰:「恐必無此。」上乃差官閱視,事皆虛妄,延齡旣慚且 近尋訪知長安、咸陽兩縣界有陂池數百頃,請以爲內廢牧馬之地;且去京城十數里,與苑 又誣奏李充爲百姓妄請積年和市物價,特敕令折塡,謂之「底折錢」。嘗因奏對請積年

等,猶未能盡。據此而言,庖廚者之餘,其數尙多,皆陛下本分也。用修數十殿亦不合疑 宗廟,雖至敬至嚴,至豐至厚,亦不能一分財物也。只如鴻臚禮賓、諸國蕃客,至於迴紇馬 慮,何況一栿。」上曰:「經義如此,人總不會言之。」 頷之而已。 又因計料造神龍寺, 須長五 十尺松木,延齡奏曰:「臣近於同州檢得一谷木,可數千條,皆長八十尺。」上曰:「人言開元、 價,用一分錢物,尙有贏羨甚多。況陛下御膳宮廚皆極簡儉,所用外分賜百官充俸料、飧錢 賦稅當爲三分:一分充乾豆,一分充賓客,一分充君之庖廚。乾豆者,供宗廟也。今陛下奉 何也?」對曰:「此是經義證據,愚儒常材不能知,陛下正合問臣,唯臣知之。準禮經,天下 內外百司官闕,未須補置,收其闕官祿俸,以實帑藏。」 能。」對曰:「宗廟事至重,殿栿事至輕。 況陛下自有本分錢物,用之不竭。」上驚曰:「本分錢 後因對事,上謂延齡曰:「殷所居浴堂院 殿 一栿,以年多之故,似有損蠹,欲換之未

齡奏曰:「臣聞賢材、珍寶、異物,皆在處常有,但遇聖君卽出見。今此木生關輔,蓋爲聖君, 天寶中側近求覓長五六十尺木,尚未易,須於嵐、勝州採市,如今何爲近處便有此木?」延

豈開元、天寶合得有也!」

時陸贄秉政,上素所禮重,每於延英極論其誕妄,不可令掌財賦。德宗以爲排擯,待

延齡益厚。 贄上書疏其失日:

旨,不敢告闕,不敢辭難。 欺,計錢二十萬貫,請貯別庫以爲羨餘,供御所須,永無匱乏。」陛下欣然信納,因謂委 搜求市廛,豪奪入獻;追捕夫匠,迫脅就功。以敕索爲名,而不酬其直;以和雇爲稱, 任得人。 盈路,持綱者莫敢致詰,巡察者莫敢爲言。時有訐而言之,翻謂黨邪醜直。天子轂下, 囂聲沸騰 而不償其傭。 前歲秋首,班宏喪亡,特詔延齡繼司邦賦。數日之內,遽衒功能,奏稱:「勾獲隱 既賴盈餘之財,稍弘心意之欲,興作浸廣,宣索漸多。延齡務實前言,且希睿 ,四方觀瞻,何所取則。蕩心于上,斂怨于人,欺天陷君,遠近危懼,此其罪之 都城之中,列肆爲之晝閉;興役之所,百工比於幽囚。聚詛連郡,遮訴 勾獲旣是虛言,無以應命;供辦皆承嚴約,苟在及期。遂乃

大者也。 總制邦用,度支是司;出納貨財,太府攸職。凡是太府出納,皆稟度支文符,太府

特宣進 按問。 端如貫珠,財貨多少,無容隱漏。 之數,則每月計奏。皆經度支勾覆,又有御史監臨,旬旬相承,月月相繼。 依符以奉行,度支憑案以勘覆,互相關鍵,用絕姦欺。其出納之數,則每旬申聞;見在 見在數中,請令推尋,足驗奸詐」。兩司旣有論執,理須詳辨是非,陛下縱其妄欺,不加 帳脫遺,並 落 ···, 近 因檢閱使置簿書,乃於糞土之中收得十三萬兩,其匹段雜貨又百萬有餘,皆是文 以在庫之物爲收獲之功,以常賦之財爲羨餘之費〔三〕,罔上無畏,示人不慚,此 止,並依所奏施行。 同已棄之物。今所收獲,卽是羨餘,悉合移入雜庫,以供別敕支用者」。其時 太府卿韋少華抗疏上陳,殊不引伏,確稱「每月申奏,皆是 延齡務行邪諂,公肆誣欺,遂奏云「左藏庫司多有失 明若指掌,

責。 倒 暴法以刻削私財,捨此二途,其將安取?陛下方務崇信,不加檢裁,姑務保持, 則資之於國,在國爲官物,在人爲私財,何謂贏餘,須別收貯?是必巧詐以變移官物, 在 貨 別貯贏 財,移東就西,便爲課績,取此適彼,遂號羨餘,愚弄朝廷,有同兒戲。 延齡謂能蔽惑,不復懼思,奸威旣沮於四方,憸態復行於內府。 國家 餘,以奉人主私欲。曾不知王者之體,天下爲家,國不足則取之於人,人不足 府庫,出納有常,延齡險猾售奸,詭譎求媚,遂於左藏之內,分建六庫之名,意 由是蹂躪官屬,傾 ,會無詰

又罪之大者也

安而 有也。 其本 有財。」「百姓足,君孰與不足?」蓋謂此也。 有聚斂之臣,寧有盜臣。」無令侵削兆人,爲天子取怨于下也。 必傾 財貨可保,因以興邦固位者,未之有也。故曰:「財散則人聚,財聚則人散。」「與其 故曰:「不患寡而患不均,不患貧而患不安。」「有德必有人,有人必有土,有土必 理 三天下者,以義爲本,以利爲末,以人爲本,以財爲末,本盛則其末自舉,末 自古及今,德義 立而 利用不豐,人庶安而財貨不給,因以 自古及今, 德義不立 而利用克宣,人庶不 喪邦失位者,未之

尙 **蚩蚩之性**, 原叛徒,乘人怨咨,白晝犯闕,都邑甿庶,恬然不驚,反與賊衆相從,比肩而入宮殿。 如丘 且陛下初膺寶曆,志翦羣兇,師旅繁興,徵求寖廣,権算侵剝,下無聊生。 Ш 靡所不爲, 竟資兇渠, 然亦由德澤未狹,而暴令驅之, 以餌貪卒, 此則陛下躬覩之矣。是乃失人而聚貨,夫何利之 以至於是也。 于時內府之積, 是以涇 雖

遣之。 金 發 ,賣以給直。 健 車 步出 又嘗宮壼之中,服用有闕,聖旨方以戎事爲急,不忍重煩於人,乃剝親王飾帶之 駕旣幸奉天,逆泚旋肆圍逼,一壘之內,萬乘所屯,窘如涸流,庶物空匱。 覘 一
財
軍 是時行從將吏,赴難師徒,蒼黃奔馳,咸未多服,漸屬凝冱,且無薪蒸, ,其人懇以苦寒爲辭,跪奏乞一襦袴,陛下爲之求覓不致,竟閔默而 嘗欲

危而不易其守,見死而不去其君,所謂「聖人感人心而天下和平」,此其効也 衆庶同其憂患,與士伍共其有無,乃能使人捐軀命而扞寇讎,餒之不離,凍之不憾,臨 貳,卒能走強賊全危城者,陛下豈有嚴刑重賞使之然耶? 唯以不厚其身,不藏其貨 饑 「凍內攻,矢石外迫。晝則荷戈奮迅,夜則映堞呻吟,凌風飇,冒霜雪,踰四旬而衆無攜 了; 與

奈何以天子之貴,海內之富,而猥行諸侯之棄德,守農商之鄙業哉 富,人苟歸附,何患蔑資,義苟修崇,何憂不富,豈在貯之內府,方爲已有哉!故藏於天 軍。旣遷岷、梁,日不暇給,獨憑大順,遂復皇都。是知天子者,以得人爲資,以蓄義爲 怨矣。財聚人散,不其然乎!旋屬蟊賊內興,翠華南狩,奉天所積財貨,悉復殲於亂 盈之司。未賞功勞,遽私賄玩,甚沮惟新之望,頗攜死義之心,於是輿誦興譏,而軍士始 下者,天子之富也;藏於境內者,諸侯之富也;藏於囷倉篋櫝者,農夫、商賈之富也。 及乎重圍旣解,諸路稍通,賦稅漸臻,貢獻繼至,乃於行宮外廡之下,別置瓊林、大

志,有罪已悔懼之辭,罷息誅求,敦尙節儉,渙發大號,與人更新;故靈祇感陛下之誠, 則建中之亂危亦至矣!然而遽能靖滔天之禍,成中興之功者,良以陛下有側身修勵之 之積又不在矣;若謂徇欲不足傷理化,則建中之失傷已甚矣;若謂斂怨不足致危亡, 陛下若謂厚取可以恢武功,則建中之取旣無成矣;若謂多積可以爲己有,則建中

悔,其可再乎!

黎元立可久之休業,懲前事徇欲之失,復日新盛德之言; 臣庶 感陛下之意 ,釋憾迴慮,化危爲安。 陛下亦當爲宗廟社稷建不拔之永圖,爲子孫 豈宜更縱憸邪,復行剋暴,事

之名;皇甫、棸、楀之嬖行,而周厲嬰顚覆之禍。 國者乎! 譬猶操兵以刃人,天下不委罪於兵而委罪於所操之主; 畜蠱以殃物,天下不 歸咎於蠱 上,是又大謬,所宜愼思。 臣又竊慮陛下納彼盜言,墮其奸計,以爲搏噬拏攫,怨集有司,積聚豐盈,利歸君 而 歸咎於所畜之家:理有必然,不可不察。 夫人主昏明,繫於所任,咎繇、變、製之道長,而虞舜享濬哲 自古何嘗有小人柄用,而災患不及邦

誠。 衆所擠,故欲保持,用彰堅斷。 臺賤品,喧喧談議,億萬爲徒,能以上言,其人有幾?陛下誠令親信博採興詞,參較比 勿疑之道,或未盡善。 來所聞,足鑒 或恐未亮斯言,請以 臣 .伏慮陛下以延齡之進,獨出宸衷,延齡之言,多順聖旨,今若以罪置辟,則 人間情傷。 今希旨自默,浸以成風,獎之使言,猶懼不旣,若又阻抑,誰當貢 一事爲證。 若然,陛下與人終始之意則美矣,其於改過勿吝、去邪 只如延齡兇妄,流布寰區,上自公卿近臣,下迨 似為 興

臣以卑鄙,位當台衡,旣極崇高,又承渥澤。 豈不知觀時附會,足保舊恩,隨衆沉

紀于茲 浮,免貽厚責。謝病黜退,獲知幾之名;黨奸苟容,無見嫉之患。何急自苦,獨當豺狼, 上違歡情,下餌讒口。良以內顧庸眛,一無所堪;夙蒙眷知,唯以誠直。綢繆帷扆,一 沽名街直,亦不忍爲。 願迴睿聰,爲國熟慮,社稷是賴,豈唯微臣 煩 自 至今追思,猶爲心悸;所以畏覆車而駭慮,懼燬室而悲鳴,蓋情激於衷,雖欲罷而不能 1默也 ,意懇故詞切,以**微臣自固之謀則過,於陛下盧**惠之計則忠。 糜軀奉君,所不敢避, ,聖慈旣以此見容,愚臣亦以此自負。從陛下歷播遷之危,覩陛下致興復之難, 因事陳請,雖已頻煩,天聽尙高,未垂諒祭,輒申悃款,以極愚誠。憂深故語

證 延齡矯妄。 奏,德宗不悅,待延齡益厚。時鹽鐵轉運使張滂、京兆尹李充、司農卿李銛,以事相關,皆 德宗罷陸贄知政事,爲太子賓客,牓、
、施悉罷職左遷。

詞,云「前後隱沒官錢五十餘萬貫,米麥稱是,其錢物多結託權勢,沈妻常於犢車中將金寶 事遂且止。贄、充等雖已貶黜,延齡憾之未已,乃掩捕李充腹心吏張忠,捶掠楚痛,令爲之 數日,上又幸苑中,適會神策軍人訴度支欠廢馬芻草。上思延齡言,卽時迴駕,下詔斥逐 :怨望,今專大言於衆曰:『天下炎旱,人庶流亡,度支多欠闕諸軍糧草。』 以激怒羣情。」 後 十一年春暮,上數畋于苑中,時久旱,人情憂惴,延齡遽上疏曰:「陸贄、李充等失權,心

列

第

八十

網 帛遺 詔 覆,以比部郎中崔元嘗爲陸贄所黜故也。及崔元勾覆錢穀,又無交涉。 御 史臺推問, 陸贄 妻」。忠不勝楚毒,並依延齡教抑之辭,具於款占。 一宿得其實狀,事皆虛,乃釋忠。 延齡又奏京兆府妄破用錢穀,請令比部勾 忠妻、母於光順門投匭訴冤

於私 册赠太子少保。 家,亦無敢言者。 疑,亦人之所未嘗聞。 延齡恃之,謂必得宰相 延齡旣銳意以苛刻剝下附上爲功,每奏對際,皆恣騁詭怪虛妄,他人莫敢言者,延齡言 貞元十二年卒,時年六十九。 ,尤好慢駡,毁詆朝臣,班行爲之側目。及臥病,載度支官物置 **德宗頗知其誕妄,但以其敢言無隱,且欲訪聞外事,故斷意用** 延齡死,中外相賀,唯德宗悼惜不已,

史。 初爲道 **韋渠牟**, 士,後爲僧。 京兆萬年人。六代祖範,魏西陽太守,後周封郿城公。 興元中,韓滉鎭浙西,奏授試秘書郎,累轉四門博士。 渠牟少慧悟, 涉覽經

注; 各與渠牟及道 貞元 上謂其講耨有素,聽之意動。 十二年四月,德宗誕 士萬參成、沙門譚延等十二人,講論儒、道、釋三教。 日,御麟德殿,召給事中徐岱、兵部郎中趙需、禮部郎中許孟 數日,轉秘書與,奏詩七十韻;旬日,遷右補闕、內供奉, 渠牟枝詞游說,捷

語款 僚 鰊 議 列 初 狎 大 夫。 不有之。 往往 時延 外聞。 英 在延英旣對宰相,多使中貴人召渠牟於官次, 對秉政賦之臣 渠牟形神佻躁, 晝漏 無士君子器,志向不根道德,衆雅知不能以正道開悟 率下二三刻爲常, 渠牟奏事 同輩始注目矣。 , 率漏下五 一六刻, 歲終,

刓蹄 府。 自選 太子侍讀,皆渠牟延 者,門庭塡 贈刑部尙書,仍諡 延齡、 擇。 甘辭以附渠牟。 陸贄 · 免相後,上躬親庶政,不復委成宰相,廟堂備員,行文書而已。 除守宰、御史,皆帝 然居深宮, 委。 李實, 茅山 奸欺多端, 定薦之。 處士崔芊徵至闕下 日忠。 居無 所狎而 何 上旣偏有所聽,浮薄率背本衒進,不復藏器蘊德,皆奔馳請謁 取信者裴延齡、李齊運、王紹、李實、韋執誼洎渠牟, 甚傷國體; 遷太府卿, 鄭隨 紹無所發明;而渠牟名素輕,頗張恩勢以招趨 賜金紫, 自山人再至補闕,馮伉自醴泉令爲給事中、皇 又轉太常卿。 貞元十七年卒, 時年五十 皆權 傾

嚮

相

爲幕 府,累 李 齊運 轉 者,蔣王惲之孫也。 工 部郎 中 · ,爲長安縣令,職 解褐寧王府東閣祭酒、七遷至監祭御史。 事 修理。 歷京兆少尹、陝府長史。 江淮都統李峘辟

列 傳 第 八 + 李 齊 運 李 實

城而 中 力疲,休兵三日, 走,除爲京兆尹,兼御史大夫。 末 改 河中 齊運傾力犒設 尹 晉絳慈隰觀察使。 ,軍人皆悅。 時賊據京城 時李懷光自山東卷甲奔難,晝夜倍道, 懷光旣反,驅兵還保河中,齊運不能敵,棄 ,李晟軍東渭橋,齊運擾攘之中,徵募工役, 比至河

版築城壘

,飛芻輓粟以應晟。

收復之際,頗有力焉。

崎 爲 室, 對後,齊運常次進,貢其計慮 問 改檢校禮部尙書, 而 身爲禮部尙書, 避之。 浙 貞元 西觀察使,受路數十萬計。 中,蝗旱方熾,齊運無政術,乃以韓洄代之,改宗正卿,兼御史大夫、閑廏宮苑使。 齊運被疾,歲餘不能朝 兼殿中監。 冕服以行其禮,人士嗤誚。 ,以決羣議。 尋正 請 舉李詞爲湖州 拜禮部尚書,兼殿中監使如故。 朝廷除授,往往降中人就宅咨决。 齊運無學術,不知 貞元十二年卒,時年七十二,贈尙書左僕 刺史,既而邑人告其贓犯,上以齊運故,不 **《大體,但甘言取信而已。 薦** 其後十餘歲,宰臣內殿 末以妾衞氏爲正

官, 遷蘄州刺 李實 者, 史。 道王元慶玄孫。以蔭入仕,六轉至潭州司馬。 皐爲山南東道節度使,復用爲節度判官、檢校太子賓客、員外郎。 辠卒, 洪州節度使、嗣曹王阜辟爲判 射。

新帥未至,實知留後,刻薄軍士衣食,軍士怨叛,謀殺之,實夜縋城而出。 農少卿 ,加檢校工部尙書、司農卿。 歸詣京師,用爲司

優伶舊事也。設謗木,採芻薨,本欲達下情,存諷議,輔端不可加罪。」德宗亦深悔,京師無 實聞之怒,言輔端誹謗國政,德宗遽令決殺。當時言者曰:「瞽誦箴諫,取其詼諧以託諷諫, 地城池二百年,何期如此賤田園,一頃麥苗伍石米,三間堂屋二千錢。」凡如此語有數十篇。 不切齒以怒實。 人窮無告,乃徹屋瓦木,賣麥苗以供賦斂。優人成輔端因戲作語,爲秦民艱苦之狀云:「秦 訴,一不介意。 法,人皆側目。 貞元十九年,爲京兆尹,卿及兼官如故。 因入對,德宗問人疾苦,實奏曰:「今年雖旱,穀田甚好。」由是租稅皆不免, 二十年春夏旱,關中大歉,實爲政猛暴,方務聚斂進奉,以固恩顧,百姓所 **尋封嗣道王。自爲京尹,恃寵強愎,不顧文**

警然在眉睫間。故事,吏部將奏科目,奧密,朝官不通書問,而實身詣選曹追趙宗儒,且以 奏播爲三原令,謝之日,庭詬之。陵轢公卿百執事,隨其喜怒,誣奏遷逐者相繼,朝士畏而 故事,府官避臺官。實常遇侍御史王播于道,實不肯避,導從如常。 又誣奏萬年令李衆,貶虔州司馬,奏虞部員外郎房啓代衆,升黜如其意,怙勢之色, 前歲,權德興爲禮部侍郎,實託私薦士,不能如意,後遂大錄二十人迫德興日:「可 播詰其從者,實怒,

列

傳第八十

五

李

罩

依此第之; 不爾,必出外官,悔無及也。」德輿雖不從,然頗懼其誣奏。

道卒・ 出,市人皆袖瓦石投其首,實知之, 貴賤同苦其暴虐。順宗在諒闇逾月, 十萬貫,胥吏或犯者,卽按之。有乞丐絲髮固死; 二十一年,有韶鐲畿內逋租,實違韶徵之,百姓大困,官吏多遭笞罰,剝割掊斂,聚錢三 由月營門自苑西出,人人相賀。 實斃人於府者十數, 無者,且曰「死亦不屈」,亦杖殺之。京師 **逡議逐之,乃貶通州長史。** 後遇赦量移號州 制

酬之。 因是與叔文交甚密。 中,略備顧問。 召入翰林爲學士,年纔二十餘。 **韋執誼者,京兆人。 父浼,官卑。** 執誼至東宮謝太子,卒然無以藉言,太子因曰:「學士知王叔文乎?彼偉才也。」執誼 **德宗載誕日,皇太子獻佛像,德宗命執誼爲畫像贊,上令太子賜執誼縑** 俄丁母憂,服闋,起爲南宮郎。 德宗尤寵異, 相與唱和歌詩, 與裴延齡、 章渠车等出 執誼幼聰俊有才,進士擢第,應制策高等,拜右拾遺, 德宗時,召入禁中。 入禁 帛以

孺 呂洞等以嘗同官相善,以正一得召見,偕往賀之。或告執誼曰:「正一等上疏論君與王 初 ,貞元十九年,補闕張正一因上書言事得召見, 王仲舒、韋成季、劉伯芻、裴茝、常仲

叔文朋黨事。」執誼信然之,因召對,奏曰:「韋成季等朋聚覬望。」 德宗令金吾伺之,得其相

過從飲食數度,於是盡逐成季等六七人,當時莫測其由。

都尉賜緋魚袋,授尚書左丞、同平章事,仍賜金紫。叔文欲專國政,故令執誼爲宰相於外, 敢負約爲異,欲共成國家之事故也。」|叔文詬怒,遂成仇怨;|執誼旣因之得位,亦欲矛盾掩 己自專於內。執誼旣爲叔文引用,不敢負情,然迫於公議,時時立異,密令人謝叔文曰:「不 及順宗卽位,久疾不任朝政,王叔文用事,乃用執證爲宰相,乃自朝議郎、吏部郎中、騎

觀之,乃崖州圖也,以爲不祥,甚惡之,不敢出口。及坐叔文之貶,果往崖州,卒於貶所。 至嶺南州,執誼遽命去之,閉目不視。及拜相,還所坐堂,見北壁有圖,不就省,七八日,試 司戶" 及憲宗受內禪,王伾、王叔文徒黨並逐,尙以執誼是宰相杜黃裳之壻,故數月後貶崖州 初,執誼自卑官,常忌諱不欲人言嶺南州縣名。爲郞官時,嘗與同舍詣職方觀圖,每

侍讀論政道,因言宮市之弊,太子曰:「寡人見上,當極言之。」諸生稱贊其美,叔文獨無言。 王叔文者,越州山陰人也。以棋待韶,粗知書,好言理道。 德宗令直東宮。 太子嘗與

之曰:「苟無先生,安得聞此言!」由是重之,宮中之事 黨以進;藩鎭侯伯,亦有陰行賂遺請交者 温、李景儉、韓曄、韓泰、陳諫、柳宗元、劉禹錫等十數人,定爲死交;而凌準、程异,又因其 外,不合輒預 可爲相,某可爲將,幸異日用之。」密結當代知名之士而欲僥倖速進者, 馧 坐,太子 調 外事 叔文 0 日:「向論宮市 陛下在位歲 ",君獨. 久,如小人離間,謂殿下收取 無言何也?」叔文曰:「皇太子之事上也 ',倚之裁 入情, 決。 每對太子言, 則安能自 與韋執誼、陸質、呂 解? 」,視膳 則日: 太子謝 問安之 ::「某

左右 謂 與韓泰、柳宗元、 因李忠 右銀臺門,居于翰林,爲學士。 天下無人。 ,百官上議 德宗崩,已宜遺詔,時上寢疾久,不復關庶政,深居施簾帷,閹官李忠言、美人牛昭容侍 言,忠言因牛昭容,轉相結構。 ,自惟中 劉禹錫、陳諫、凌準、韓曄唱 可其奏。 叔文與 王伾常諭上屬意叔文,宮中諸黃門稍稍知之。 (吏部 事下翰林,叔文定可否,宣于中書,俾執誼 鄭中韋執誼相善,請用爲宰相。 和,日管,日萬,日伊,日周, 凡其黨僴 叔文 因王伾、伾 其 承 然自得, 日 奏於外。 **1**,召自

部侍 蘇州 郎 司 叔 文賤時 ,領使、學士如故。 功為起 居郎 (11) 每言錢穀爲國 ,俄兼充度支、鹽鐵 內官俱文珍惡其弄權,乃削去學士之職 大本,將可以 副 使,以杜佑 盈縮兵賦, 可操 頟 使, 其 實 成於 柄 市 叔文。 制出, 弌 叔文初入翰林, 數 叔文大駭 育, 轉尙書 ,謂人

爲奇才。 林 日:「叔文須時至此商量公事,若不帶此職,無由入內。」王伾爲之論請,乃許三、五日一入翰 ,竟削內職。 及司 `兩使利柄,齒于外朝,愚智同曰:「城狐山鬼,必夜號窟居以禍福人,亦神而畏 叔文始入內廷,陰搆密命,機形不見,因騰口善惡進退之。人未窺其本,信

以報聖人之重知也。 還。 **文無以對** 每念失此兩賊,令人不快。」又自陳判度支已來,興利除害,以爲己功。 光奇等。中飲,叔文白諸人曰:「叔文母疾病,比來盡心戮力爲國家事,不避好惡難易者,欲 中人始悟兵柄爲叔文所奪,中尉乃止諸鎭無以兵馬入。 諸 「羊士諤非毀叔文,欲杖殺之,而韋執誼懦而不遂。」叔文生平不識劉闢,乃以韋阜意求領三 鎭行營兵馬使,韓泰副之。初,中人尙未悟,會邊上諸將各以狀辭中尉,且言方屬希朝 闢排門相干,欲執叔文手,豈非凶人耶!叔文已令掃木場,將斬之,韋執誼苦執不可。 一旦畫出路馳,無能必矣。」 無幾,叔文母死。 叔文在省署 ,不復舉其職事,引其黨與竊語,謀奪內官兵柄,乃以故將范希朝統京西北 若一去此職,百謗斯至,誰肯助叔文一言者,望諸君開懷見祭。」又曰: 前一日, 叔文置酒饌於翰林院,宴諸學士及內官李忠言、俱文珍、劉 希朝、韓泰已至奉天,諸將不至,乃 俱文珍隨語折之,叔

叔文未欲立皇太子。 順宗旣久疾未平, 羣臣中外請立太子,旣而詔下立廣陵王爲太

列傳第八十五 王叔文

捷身先死,長使英雄淚滿襟。」因歔欷泣下,人皆竊笑之。 子,天下皆悅; 叔文獨有憂色,而不敢言其事 , 但吟杜甫題諸葛亮祠堂詩末句云:「出師 皇太子監國,貶爲渝州司戶,明年

位,遷左散騎常侍,依前翰林待韶。 王伾,杭州人。始爲翰林侍書待詔, 累遷至正議大夫、殿中丞、 皇太子侍書。 順宗即

院, 物,以藏金寶,其妻或寢臥於上。 黨之門,車馬塡湊,而伾門尤盛,珍玩路遺,歲時不絕。 劉禹錫、陳諫、韓曄、韓泰、柳宗元、房啓、麥準等謀議唱和, 氣自許,粗知書,好言事,順宗稍敬之,不得如伾出入無間。。叔文入止翰林,而伾入至柿林 見李忠言、牛昭容等。然各有所主:伍主往來傳授,王叔文主決斷,章執誼爲文誥; 與叔文同貶開州司馬。 室中爲無門大櫃,唯開一竅,足以受 採聽外事。 而伾與叔文及諸朋

歲,叔文敗方歸。 王叔文最所 重者,李景儉、 陸質爲皇太子侍讀,專卒。 呂温。 叔文用事時, 景儉居喪於東都; 呂温使吐蕃, 留半

体、 叔文旣逐,詔貶其黨韓曄饒州 司馬,韓泰虔州 司馬, 陳諫 台州 司 馬, 柳宗元永州

馬 劉禹 錫 朗 州 司 馬,凌準 連州 司 馬, 程昇郴州 핅 馬,韋執誼 崖州 司 馬。

韓韓 ,宰相滉之族子,有俊才,依附章執誼 ,累遷尙書司封郎中。 叔文敗,貶池州刺史,

尋改饒州 司馬,量移汀州 刺史,又轉永州卒。

陳諫 至叔文敗,已出爲河中少尹,自合州 司馬量移封州刺史,轉通州卒。

凌準 ,貞元二十年自浙東觀祭判官、侍御史召入, 王叔文與準有 舊 引用為翰林學士,

轉員外郎。 坐叔文貶連州。

韓泰,貞元中累遷至戶

準有史學,尚古文,撰<u>那</u>志二卷。

畫,能決陰事,深爲**伾**、叔文之所重 一,坐貶, 自虔州司馬量移潭州刺 史, 遷郴州

,部鄓中,王叔文用爲范希朝神策行營節度行軍

·司馬。

泰最有等

柳宗元、 劉禹錫自有傳。

程异,京兆 長安人。 曾侍父疾, 鄕里 以孝悌稱。 明經及第, 釋褐揚州海陵 主簿。 登開

元禮 科,授 華州 鄭縣 尉。 精於吏職 剖判 無 滯。 杜確 刺同 州 ,帥河中,皆從爲賓佐

貞元末,擢 授監察御史,遷虞部員外郎, 充鹽鐵轉運、揚子院留後。 時王叔文用事 由

第 八 + 五 程 异 皇 甫 餺

逕放 稅使。 薦异曉達錢穀,請棄瑕錄用,擢爲侍御史,復爲揚子留後, 利者皆附之,异亦被引用。叔文敗,坐貶岳州刺史,改郴州司馬。 异自悔前非,厲已竭節,江淮錢穀之弊,多所鏟革。 入爲太府少卿、太卿,轉衞尉卿, 累檢校兵部郎中、淮南等五道兩 元和初, 鹽鐵使李巽

兼御史中丞,充鹽鐵轉運副使。

性廉約,歿官第,家無餘財,人士多之。 上問誰可使者,异請自行。議未決,無疾而卒,元和十四年四月也。 |异自知叨據,以謙遜自牧,月餘日,不敢知印秉筆。 侍郎、同中書門下平章事,領使如故。 **俊**財,經費以 時淮西用兵,國用不足,异使江夷以調征賦,且諷有土者以饒羨入貢,至則不剝下,不 **《嬴,人頗便之。由是專領鹽鐵轉運使、兼御史大夫。十三年九月〔ヨ〕,轉工部** 議者以异起錢穀吏,一旦位冠百僚,人情大爲不可。 异知西北邊軍政不理, 建議置巡邊使, 贈左僕射、諡曰恭。异

郎、判南曹,凡三年,頗鈴制奸吏。改吏部郎中,三遷司農卿、兼御史中丞,賜金紫,判度支, 良文學制科 皇甫 鎛,安定朝那人。 授監察御史。丁母憂,免喪,坐居喪時薄游, 祖鄰幾,汝州刺史。父愉,常州刺史。鎛貞元初登進士第, 除詹 事府司 直。 轉吏部員外

俄拜戶部侍郎。 時方討淮西, 切於饋運,鎛勾剝嚴急,儲供辦集, 益承寵遇, 加兼御史大

聚斂媚上,刻削希恩。 物議上聞,憲宗怒而不聽。 十三年,與鹽鐵使程异同日以本官同平章事,領使如故。 韶書旣下,物情駭異,至於賈販無識, 度上疏乞罷知政事,因論之曰: 亦相嗤誚。 鎛雖有吏才,素無公望,特以 宰相崔羣、裴度以

相。 陛,陛高則堂高 議,旁求人望,致之輔弼,責之化成;而乃忽取徼人,列於重地,始則 **遂使每事皆勞聖心,所以平賊安人,費力如此,實由臣輩不稱所職。** 首,亦在股肱。 駭,次則街衢市肆,相與笑呼。 伏計遠近流聞,與京師無異。 文武,廓淸寇亂,建昇平之業,十已得八九。 如臣駑鈍,夙夜戰兢,常以爲上有聖君,下無賢臣,不能增日月之明,廣天地之德。 臣日昨於延英陳乞,伏奉聖旨,未遂愚衷。 自古至今,未有不任輔弼而能獨理 所以述曉、舜之道,則言稷、契、阜、夔,紀太宗、玄宗之德 , 陛卑則堂不得高矣, 宰臣失人, 則天子不得尊矣。 |天下者。 況今天下,異於十年已前,方驅駕 然華夏安否,繫於朝廷,朝廷輕重 竊以上古明王聖帝,致理興化,雖由元 何者? 天子 殿庭班 方期陛下博採物 如堂,宰臣如 ,則言房、杜、 列,相 ,在於宰 與

伏以陛 下叡哲文明,唯天所授,凡所閱視,洞達無遺。 所以比來選任宰相,縱道不

列

爲明。 相 進,供軍漸難,俱能前行〔4〕,必有優賞,以此約定,然後切勒供軍官,且支九月一日兩 其肉;猶賴臣等每加勸誠,或爲奏論,庶事之中,抑令通濟。 比者准西諸軍糧料 以副天下之望,則天下幸甚。伏聞李翛疾病,亦求入來,如浙西觀察使,且與亦得。 髓,陛下今日收爲股肱,列在台鼎,切恐不可,伏惟圖之。倘陛下納臣懇款,速賜移易, 劇,或亦得力,但升之相位,便在公卿之上,實亦非宜。如皇甫鎛,天下之人,怨入骨 四,天下共知,惟能上惑聖聰,足見奸邪之極。程异雖人品凡俗,然心事和平,處之煩 以罷兵之後,經費錢數一千三十萬貫,此事猶可。直以性惟狡詐,言不誠實,朝三暮 周物,才不濟時,公望所歸,皆有可取。 況皇甫鎛自掌財賦,唯事割剝,以苛爲察,以刻 成已上錢,俱容努力,方將小安,不然必有潰散。今舊兵悉向淄青討伐,忽聞此人入 ·,則必相與驚擾,以爲更有前時之事,則無告訴之憂。 雖侵刻不少,然漏落亦多,所 |成錢,其實只與一成、兩成,士卒怨怒,皆欲離叛。 臣到行營,方且慰喩,直其遷延下 自京北、京西城鎭及百司幷遠近州府,應是仰給度支之處,無不苦口切齒,願食

負恩寵;今退旣未許,言又不聽,如火燒心,若箭攢體。 臣自無足惜,惜陛下今日事 何者?准西盪定,河北咸寧,承宗斂手削地,程權束身赴闕,韓弘興疾討賊,此豈 臣知一言出口,必犯天威,但使言行,甘心獲戾。今者臣若不退,天下之人謂臣有

常人;臣事陛下之心,敢同衆士?所以昧死重封以聞,如不足觀,臣當引領受責。 破 京師氣力能制其命,祇是朝廷處置能服其心。 除 ,使億萬之衆離心,四方諸侯解體?凡百君子,皆欲慟哭。 今既開中興,再造區夏,陛下何忍却自 況陛下任臣之意,豈比

時憲宗以世道漸平,欲肆意娛樂,池臺館宇,稍增崇飾,而异、餺探知上旨,數頁羨餘,以備 下引一市肆商徒,與臣同列,在臣亦有何損,陛下實有所傷,不勝憤懣惶恐之至。

繒綵 結其歡心,故及相位 軍李道古叶爲奸謀,薦引方士柳泌、僧大通,言可致長生。 度出鎭太原。 以爲然,由是鎛益無忌憚。 其足奏曰:「此靴乃內庫出者,臣以俸錢二千買之,堅韌可以久服,所言不可用,皆詐也。」帝 書,其事方罷。時內出積年庫物付度支估價,例皆陳朽,餺盡以善價買之,以給邊軍。 「昨羣臣議上徽號,崔羣於陛下惜『孝德』兩字。」 **一構,故帝獨排物議相之;見裴度疏,以爲朋黨,竟不省覽。** ,觸風斷裂,隨手散壞,軍士怨怒,皆聚而焚之。 **鎛知公議不可,益以巧媚自固,奏减內外官俸錢以贍國用,敕下,給事中崔祐封還詔** 崔羣有公望,爲搢紳所重,屢言時政之弊,鎛惡之,因議憲宗尊號,乃奏曰: 裴度有用兵伐叛之功,鎛心嫉之,與宰相李逢吉、令狐楚合勢擠 憲宗怒, 斐度奏事,因言邊軍焚賜之意,鎛因引 點羣爲湖南觀察使。 中尉吐突承璀恩寵莫二,餺厚略 又與金吾將 羅敷

頓處死。」 精,藥術皆妄。 怒;以矯迹爲孤立,用塞人言。洎塵台司,益蠹時政,不知經國之大體,不慮安邊之遠圖 靡所顧,文無可觀,雖早踐朝倫,而素乖公望。 自掌邦計,屬當軍興,以剝下爲徇公,旣鼓衆 方士,上惑先朝,潛通奸人,罪在難捨。合加竄殛,以正刑章,俾黜遐荒,尙存寬典。」又詔曰: 「山人柳泌輒懷左道,上惑先朝,固求牧人,貴欲疑衆,自知虛誕,仍便奔逃。僧大通醫方不 三軍多凍餒之憂,百姓深凋瘵之弊。事皆罔蔽,言悉虛誣,遠近咸知,朝野同怨。而又恣求 穆宗在東宮,備聞鎛之奸邪,及居諒闍,聽政之日,詔:「皇甫鎛器本凡近,性惟險狹,行 旣延禍釁,俱是奸邪,邦國固有常刑,人神所宜共棄,宜付京兆府決重杖一

)鎛,因徵入禁中。自云能致靈藥,言:「天台山多靈草,羣仙所會,臣嘗知之,而力不能致。 焉!」由是莫敢有言者。 裴潾以極言被黜。 泌到天台,驅役吏民於山谷間,聲言採藥,鞭笞 **黎保證之,必能可致靈藥,乃待詔翰林院。** 躁急。歲餘一無所得,懼詐發獲罪,舉家入山谷。浙東觀察使追捕,送於京師,鎛與李道古 者,亦與官號,未嘗令賦政臨民。」憲宗曰:「煩一郡之力而致神仙長年,臣子於君父何愛 願爲天台長吏,因以求之。」起徒步爲台州刺史,仍賜金紫。諫官論奏曰:「列聖亦有好方士 柳泌本日楊仁力,少習醫術,言多誕妄。李道古奸回巧宦,與泌密謀求進,言之於皇甫 憲宗服泌藥,日益煩躁,喜怒不常,內官懼非罪

術,能變瓦礫爲金,白衣授號縣令。初,柳泌繁京兆府,獄吏叱之曰:「何苦作此虛矯?」泌 曰:「吾本無此心,是李道古教我,且云壽四百歲。」府吏防虞周密,恐其隱化;及解衣就誅, 見戮,遂爲弒逆。大通自云壽一百五十歲,久得藥力。又有田佐元者,鳳翔號人,自言有奇

無變異,但灸灼之瘢痕狹身而已。」鎛卒於貶所。

能文,尤工詩什,樂道自怡,不屑世務,當時名士皆與之交。有集十八卷,著性言十四篇。 外郎、河南縣令、都官郎中、河南少尹。時鎛爲宰相,領度支,恩寵殊異。 不之罪,徵爲國子祭酒,改太子賓客、秘書監。開成初,除太子少保分司,卒年四十九。熽 兄讌語,卽極言之,鎛頗不悅。乃求爲分司,除右庶子。及鎛獲罪,朝廷素知鏞有先見之明, **鎛弟鏞,端士也。** 亦進士擢第,累歷宜數、鳳翔使府從事,入爲殿中侍御史,轉比部員 鏞惡其太盛,每弟

犯難 每讀陸丞相論延齡疏,未嘗不泣下霑衿,其守正効忠,爲宗社大計,非端士益友,安能感激 如此!異哉德宗之爲人主也,忠良不用,讒慝是崇,乃至身播國屯,幾將覆滅,尙獨保 史臣曰:奸邪害正,自古有之;而矯誕無忌,妬賢傷善,未有如延齡、皇甫之甚也。臣

列傳

第八

十五

之妖惑也,夫何言哉! 賭生,逐臭市利,何狂妄之甚也! 章武雄材睿斷,翦削厲階;消逐澤、度而相异、餺,蓋季年 延齡之是,不悟盧杞之非,悲夫!執誼、叔文,乘時多僻,而欲斡運六合,斟酌萬幾; 劉 柳

贊曰:貞元之風,好佞惡忠。 齡、餺害善,爲國蠹蟲。 寒、陸獻替, 嫉惡如風。 天聽匪

校勘記

諶,吾道斯窮。

(1) 投狀自其有私簿投狀 卷一四八下盧杷傳作「其自相市爲私籍自言」。冊府卷五一〇作「投狀自道」。 此處文字疑有舛誤。 本書卷四九食貨志作「無私簿者投狀自集」。 新書

- (三) 怨讟之聲 「讟」字各本原作「黷」,據本書卷四九食貨志改。
- [三] 為羨餘之費 「費」字各本原作「廢」,據陸宣公翰苑集卷二一改。
- (图) 叔文賤時 「賤」字各本原作「賦」,據葉校本改。
- (至) 十三年 各本原作「三年」,據本卷皇甫鎮傳、新書卷一六八程异傳、通鑑卷二四〇改。
- [K] 俱能前行 全唐文卷五三七「俱」字作「但」。

舊唐書卷一百三十六

列傳第八十六

竇麥 從子申附 齊映 劉滋 從兄贊附 盧邁 崔損 齊抗

當罪。」坐貶江夏尉,人多義之。 疾,請參代之。會獄囚亡走,京兆尹按直簿,將奏,參遽請曰:「彼以不及狀謁,參實代之,宜 通政術,性矜嚴,強直而果斷。少以門蔭,累官至萬年尉。時同僚有直官曹者,將夕,聞親 寶參字時中,工部尚書誕之玄孫。父審言,聞喜尉,以參貴贈吏部尚書。 參習法令,

游驕蹇,不郊迎,令軍 父不坐也。」皆正其罪而杖殺之,一縣畏伏。轉大理司直。按獄江淮, 次揚州, 節度使陳少 死。 灣捕理芬兄弟當死,衆官皆請俟免喪,參曰:「子因父生,父由子死,若以喪延罪,是殺 累遷奉先尉。縣人曹芬,名隸北軍,芬素兇暴,因醉毆其女弟,其父救之不得,遂投井 吏傳問,參正辭讓之,少游悔懼,促詣參,參不俟濟江。還奏合旨。

三七四五

列

僔

第八

十六

嬖

容

令贓罪至千貫,爲得罪者之子因權幸誣奏彝,參竟白彝無罪。 彝實能吏,後累佐曹王阜,以 婺州刺史鄧珽坐贓八千貫,珽與執政有舊,以會赦,欲冤贓。詔百僚於尙書省雜議,多希執 政意,參獨堅執正之於法,竟徵贓。明年,除監祭御史,奉使按湖南判官馬彝獄。時蘇舉屬

正直強幹聞

欲奏,參曰:「此爲豕禍,安可上聞!」命棄之。是時,郊牛生犢有六足者,太僕卿周皓白宰 事班 相請奏,李泌亦戲答以遣之。 給俸多於本寺丞;又定百官班秩,初令太常少卿在左右庶子之上;又惡詹事李昪,遂移詹 頗忌之,多所排抑,亦無以傷參。然多率情壞法。初定百官俸料,以嘗爲司直,黨其官,故 權 貴,理獄以嚴稱。數蒙召見,論天下事,又與執政多異同,上深器之,或參決大政。時字 退居諸府尹之下,甚爲有識所嗤。尋兼戶部侍郎。時京師人家豕生兩首四足,有司 參轉殿中侍御史,改金部員外郎、刑部郎中、侍御史、知雜事。無幾,遷御史中丞,不避

爲部曲誣告潛通吐蕃:皆當死,無以自白,參悉理出之,由是人皆屬望。 軍孟華有戰功,爲大將軍所誣奏,稱華謀反;有右龍武將軍李建玉,前陷吐蕃,久之自拔, 艱危之際,君上含垢,未能發明,愚子何心,輒求傳襲。」正儀懼,不敢求封而去。 故淮南節度使陳少游子正儀請襲封,參大署尚書省門曰:「陳少游位兼將相之崇,節變 時神策將

參。

竇申又與吳通玄通犯事覺,

參任情好惡,

恃權貪利,不知紀極,終以此敗。 出,多必居後久之,以度支爲辭,實專大政。參無學術,但多引用親黨,使居要職,以爲耳 目,四方藩帥,皆畏懼之。李納旣憚參,饋遺畢至,外示敬參,實陰間之。 明年,拜中書侍郎、同平章事,領度支、鹽鐵轉運使。 每宰相間日於延英召對,諸相皆 上所親信,多非毀 貶參郴州別

駕,貞元八年四月也。

議,天下共傳。至於潛懷異圖,將起大惡,迹旣未露,人皆莫知。臣等親奉天顏,議加刑辟, 累不輕,事例未遙,所宜重愼。寶參頃司鈞軸,頗怙恩私,貪受貨財,引縱親黨,此則朝廷同 音,幸奉密旨,皆以社稷爲言,又知根尋已審,敢不上同憂憤,內絕狐疑,豈願遲迴,更貽念 奪又遣中使謂贄等曰:「卿等所奏,於大體雖好,然此人交結中外,其意難測,**朕尋情狀,其** 報怨,人之常情。然臣參宰衡,合存公體,以參罪犯,置之於死,恐用刑太過。」於是且止。 財,當時亦招怨灩,及加罪責,事不分明,叛者旣得以爲辭,衆人亦爲之懷愍。用刑曖昧,損 慮。但以參常經重任,斯謂大臣,進退之間,猶宜有禮,誅戮之際,不可無名。 事灼然。又竇參在彼,與諸戎帥交通,社稷事重,卿等速進文書處分。」贄奏曰:「臣面承德 又中使逢士寧使於路,亦奏其事。德宗大怒,欲殺參。宰相陸贄曰:「竇參與臣無分,因事 多至郴州, 汴州節度使劉士寧遺參絹五千匹。 湖南觀察使李巽與參有隙, 遂具以聞; 劉晏久掌貨

列

參時爲左右中官深怒,謗沮不已,未至驩州,賜死於邕州武經鎭,時年六十。 已明知 免險之意,尙昧結構之由。況在衆流,何由備悉,忽行峻罰,必謂冤誣,羣情震驚,事亦 。」乃再貶爲驪州司馬。男景伯,配泉州,女尼眞如,隸郴州;其財物婢妾,傳送京師。 若不付外推鞫,則恐難定罪名,乞留睿聰,更少詳度。 竇參於臣,素亦無分,陛下固 ,有何顧懷,輒欲營救,良以事關國體,義絕私嫌,所冀典刑不濫於淸時,君道免虧於

犯。」帝曰:「卿雖自保,如衆人何?」參固如前對。 申亦不悛。 所累,不如出之以掩物議。」参曰:「臣無強子姪,申雖疏屬,臣素親之,不忍遠出,請保無他 寶申者, 參之族子。 累遷至京兆少尹, 轉給事中。 參特愛之, 每議除授, 多訪於申, 申

吾大將軍、嗣號王則之與申及通微、通玄善,遂相與傾。 贄考貢舉,言贄考貢不實。 吳通玄 泉州司馬,竇申爲道州司馬。 取宗室女爲外婦,德宗知其毀贊,且令察視,具得其奸狀,乃貶則之爲昭州司馬,吳通玄爲 兵部侍郎陸贄與多有隙。吳通微弟兄與贄同在翰林,俱承德宗顧遇,亦爭寵不協。 德宗謂陸贄日:「竇申、竇榮、李則之首末同惡,無所不至,又並細微,不比竇參,便宜 不旬日,貶參郴州別駕,即日以陸贄爲宰相。 明年 ,竇參再貶

猜嫌 參罷黜,殆欲周星,應是私黨近親,當時並已連坐,人心久定,不可復搖。 臣等商量,除 以洽好生之恩。夫趨勢附權,時俗常態,苟無高節出衆,何能特立不羣。寶多久塵鈞 衡,特承寵渥,君之所任,孰敢不從。或游於門庭,或序以中表,或偏被接引,或驟與薦 矜全, 申等亦宜减降。又於黨與之內, 亦有淑慝之殊, 稍示區分, 足彰沮勸。 等,旣皆同惡,固亦難容;然以得罪相因,法有首從,首當居重,從合從輕。參旣蒙恩 與竇參陰謀邪事外,一切不問。 延,如此之徒,十常八九。若聽流議,皆謂黨私,自非甚與交親,安可悉從貶累。況竇 須差異,以表詳明。臣等商量,寶榮更貶遠官,寶申、則之並除名配流,庶允從輕之典, 雖非近屬,亦甚相親,然於款密之中,都無邪僻之事。仍聞激憤,屢有直言,因此漸構 感於庶品;仁煦之惠,不獨幸於斯人。所議貶官,謹具別狀。其竇申、竇榮、李則之 ,晚年頗見疏忌。若論今者陰事,則尙未究端由,如據比來所行,應不至兇險,恐 竇參罪犯,誠合誅夷,聖德含弘,務全事體,特寬嚴憲,俯貸餘生。 始終之恩,實足 竇榮與參

紹從之,由是申等得配流嶺南。 旣賜參死,乃杖殺申,諸竇皆貶,榮得冤死·

謀後事 河南府參軍。 齊映,瀛州高陽人。父圮,試太常少卿,兼檢校工部郎中。 ,,映說彰令上表請代,令子建歸京師,彰皆從之,因妻以女。彰卒後兵亂,映脫身歸 滑亳節度使令狐彰辟爲掌書記,累授監察御史。 映登進士第, 彰疾甚, 映草遺表, 應博學宏辭, 因與

曉兵家事,部將有李楚琳者,慓悍兇暴,軍中畏之,乘間將謀亂。 軍事 其謀,乃言於鑑,請早圖之。鑑不從映言,乃示其寬大,召楚琳語之曰:「欲令公使於外。」 東都,河陽三城使馬燧辟爲判官,奏殿中侍御史。 楚琳恐,是夜作亂,乃殺鎰以應泚;軍中多爲映指道,故得冤。 ,數以論奏合旨,尋轉行軍司馬、兼御史中丞。 建中初,盧杞爲宰相,薦之,遷刑部員外郎,會張鎰出鎭鳳翔,奏爲判官。 德宗在奉天,鳳翔逼於賊泚。 先數日, 因赴奉天行在,除御史中 映與同列齊抗覺 映口辩 鎰懦 緩不 頗更

責?」上嘉獎無已。在梁州,拜給事中。 左右,或令前馬,至城邑州鎭,俾映宣詔令,帝益親信之。其年冬,轉中書舍人。 堅執久之,乃止。帝問其故,曰:「馬奔蹶,不過傷臣; 興元初,從幸梁州,每過險,映常執轡。會御馬遽駭,奔跳頗甚,帝懼傷映, 映白皙長大,言音高期。 如捨之,或犯淸塵,雖臣萬死,何以塞 上自 山南還京,常令映侍 令捨轡, 映

映謙 謂唑 吐蕃數入寇,人情搖動,且言帝欲行幸避狄。 下 和美言悅下,無所是非,政事多決於遺。 貞元二年,以本官與左散騎常侍劉滋、 理裝具糗糧,臣聞大福不再,奈何不與臣等熟計之?」因俯伏流涕,上亦爲之感動。 給事中崔造同拜平章事。 映奏曰:「戎狄亂華,臣之罪也。 無幾,造疾病, 映當國政,乘間 滋以端默雅 亦敢 今人情恟懼, 言事。 時

時給事·

中袁高忤旨,映連請爲左丞、御史大夫。

以獻。 使。 銀瓶高 月,貶映夔州 左僕射, 映常以頃爲相輔,無大過而罷,冀其復入用,乃掊斂貢奉,及大爲金銀器以希旨。 映於東都舉進士及宏詞時,張延賞爲河南尹、東都留守,厚映。及映爲相,延賞罷相爲 者五尺餘,李兼爲江西觀察使,乃進六尺者。 貞元十一年七月卒,時年四十八,贈禮部尙書。 數畫時事令映行之,及爲所親求官,映多不應。 刺史,又轉衡州。 七年,授御史中丞、桂管觀察使,又改洪州刺史、江西觀察 至是,因帝誕日端午,映爲瓶高八尺者 延賞怒, 言映非宰相器。 三年正 。先是,

劉向 說苑撰續說苑一 劉滋字公茂,左散騎常侍子玄之孫。父貺,開元初爲左拾遺,父子仍代爲史官。 十卷以獻,玄宗嘉之。 滋少以門蔭, 調授太子正字,歷漣水令。 貺依

列

選,以便江、嶺之人,時稱舉職 郎,往洪州知選事。時京師寇盜之後,天下蝗旱,穀價翔貴,選人不能赴調,乃命滋江南典 **孜奉法。遷司勳郞中,累拜給事中。從幸奉天,轉太常少卿,掌禮儀。** 署奏功曹參軍。無幾,丁母喪,服除,遷屯田員外郎,轉司勳員外郎,判南曹, 侍郎楊綰薦滋堪為諫官,拜左補闕,改太常卿,復爲左補闕。辭官侍親還東都,河南尹李廣 興元元年,改吏部侍 勤於吏職

經學,善持論,性廉潔刻苦,嫉惡,掌選多所發擿更代,詐僞者尤畏之。 十年十月卒,時年六 相爲吏部尙書,換刑部尙書。無何,御史臺劾奏滋前在吏部選人渝濫,詔奪金紫階。滋有 而已。三年正月,守本官,罷知政事。四年,復爲吏部侍郎。六年,遷吏部尙書。 十六,贈陝州大都督。 貞元二年,遷左散騎常侍、同中書門下平章事,在相位無所啓奏,但多謙退,康謹畏愼 竇參以宰

祭判官(1)。楊炎作相,擢爲獻州刺史,以勤幹聞。有老婦人捃拾榛藂間,猛獸將噬之,幼 南還朝,途出於哪,贊儲供精辦。鴻漸判官楊炎以贊名儒之子,薦之,累授侍御史、浙江觀 女號呼搏獸而救之,母子俱免。宣歙觀察使韓滉表其異行,加金紫之服,再遷常州刺史。 滋從兄贊,大曆中左散騎常侍彙之子。少以資蔭補吏,累授鄂縣丞。宰相杜鴻漸自劍

韓滉入相,分舊所統爲三道,以贊爲宣州刺史、兼御史中丞、宣獻池都團練觀察使。 賀在宣

州十餘年。

做,便能侮易驕人,人士鄙之。 貞元十二年卒,時年七十,贈吏部尚書。 足一迹。 **贊祖子玄開元朝一代名儒,父彙博涉經史,唯贊不知書,但以強猛立威,官吏畏之,重** 宣爲天下沃饒,贊久爲廉察,厚斂殖貨,務貢奉以希恩。子弟皆虧庭訓,雖童年稚

刺史。入爲司門郎中,遷右諫議大夫,累上表言時政得失。轉給事中,屬校定考課,邁固 讓,以授官日近,未有政績,不敢當上考,時人重之。遷尙書右丞。 正字、藍田尉。以書判拔萃,授河南主簿,充集賢校理。朝臣薦其文行,遷右補闕、侍御史、 刑部吏部員外郎。邁以叔父兄弟姊妹悉在江介,屬蝗蟲歲饑,懇求江南上佐,由是授滁州 盧邁字子玄,范陽人。少以孝友謹厚稱,深爲叔舅崔祐甫所親重。兩經及第,歷太子

體,散齋有大功之喪,致齋有周親喪,齋中疾病,即還家不奉祭事,皆無忌日不受誓誠之文。 官、法官集議。邁奏狀曰:「臣按禮記,大夫士將祭於公,旣視濯而父母死,猶奉祭。又按唐 將作監元亘當攝太尉享昭德皇后廟,以私忌日不受誓誠,爲御史劾奏,韶尚書省與禮

第八十六 建邁 崔뒍

命,酌其輕重,誓誡則祀事之嚴,校其禮式,忌日乃尋常之制,詳求典據,事緣薦獻,不宜以 雖假寧令忌日給假一 日,春秋之義,不以家事辭王事。 今亘以假寧常式气, 而違攝祭新

忌日爲辭。」由是亘坐罰俸

陽,路由京師,邁奏請至城東哭於其柩,許之。近代宰臣多自以爲崇重,三服之親,或不過 中立,守文奉法而已。而友愛恭儉。 從而弔臨; 邁九年以本官同中書門下平章事;歲餘,遷中書侍郞。時大政決在陸贄、趙憬,邁謹 而邁獨振薄俗,請臨弟喪,士君子是之。 邁從父弟起,爲劍南西川判官,卒於成都,歸葬於洛 身

凡五 誠,雖爲懇至,俯從來奏,良用憮然。」乃除太子賓客。 疾疹,歲月滋久,章表屢聞,陳請再三,撝謙難奪。 傳,賻以布帛。 上表,堅乞骸骨,詔曰:「卿操履貞方,器識淹茂,自居台輔,益見忠淸。 十二年九月,邁於政事堂中風,肩輿而歸,上表請罷官,不許,韶宰臣就第問疾。 邁再娶無子,以從父弟子紀爲嗣。 且備養賢之禮,宜遂優閑之秩,告免之 貞元十四年卒, 時年六十, 贈太子太 方藉謀猷,遽嬰

崔損字至無,博陵人。 高祖行功已後,名位卑替。 損大曆末進士擢第,登博學宏詞科,

授 書裴延齡素與損善,乃薦之於德宗。 同 年 秘 日 書省校書郎,再授咸陽尉。 知 遷 政 右諫 事 ,並賜金紫。 議大 夫。 會門下侍郎平章事 初,二相有故旬日,中外願望名德,損比無聲實,及制下之日,中外 外舅王翃爲京兆尹,改大理評事, 十二年, 趙憬卒, 以本官同中書門下平 中書侍郎平章事 累遷兵部郎中。 章事 盧邁 風 , 與給事中 病請告 -趙宗: 戶部尙 貞元 儒

失望

性龌

w謹慎, 每延英論

事,未嘗有言。

宮在 間 山 議 然後授損送於陵所 禮 修置 上 意 ,元陵三十間,唯建陵仍舊,但修葺而已。 重 未 ·山上(三),置來歲久,曾經野火燒藥,摧毁略盡 + 「緣供 造 周, 四 一,命 **[年秋,轉門下侍郞平章** 宜令宰臣 水稍遠,百姓勞弊,今欲於見住行宮處修創, 損爲八陵修奉使。 百僚集議。 」議 於是獻、昭、乾、定、 事 者多云:「舊宮旣焚,宜移就山下。」上意不欲遷移, 是歲,以昭陵舊宮爲野火所焚,所司請修奉。 所緣陵寢中牀蓐帷幄一事以上,帝親自閱視, ,其宮尋移在瑤臺寺左側。 泰五陵造屋五百七十間,橋陵一百四十 冀久遠便人。 又爲移改舊制, 今屬通年,欲 「昭陵舊 只於

過爲 居 字相 恭 損 遜 以 ,接見便僻,不止於容身而已。 母 久疾 野殯, 《在家,賜絹二百匹以爲醫藥。 不言展墓 不 議 自建中以後,宰相罕有久在位者,數歲罪黜; 姊爲尼,歿於近寺,終喪不臨,士君子罪之。 南北兩省清要,損皆歷踐之,在位無稱於人者。 損用 加以

列

傳

第

入

+

六

崔

損

抗

子太傅,賻布帛五 此 中 上意,竊 大 任者 百端、米栗四百石 八年。 上亦知物議鄙其持祿取容,然憐而厚之。 貞元十九年卒,贈太

學,鎰甚重之。 少隱會稽剡中讀書,爲文長於牋奏。大曆中,壽州刺史張鎰辟爲判官,明閑 鳳翔,奏抗爲監察御史,仍爲賓佐,幕中籌畫,多出於抗。 齊抗字遐舉,天寶中平陽太守澣之孫。 建中初,鎰爲江西觀察使,抗亦隨在幕府。三年,鎰自中書侍郞平章 父翺,一命卑官卒,以抗貴,累贈國子祭酒。 吏事, 敏於文 平事出鎮

| 勝以抗 師。 復爲江淮宣慰使,以抗爲判官。 歷秘書監、太常卿,代鄭餘慶爲中書侍郎、同中書門下平章事 遷 **徳宗在奉天,鎰爲李楚琳所害。** 有才 諫議大夫。 用,奏授倉部郎中,條理江淮鹽務。 歷處州刺史,轉潭州刺史、湖南 德宗還京,大盜之後,天下旱蝗,國用盡竭。 抗奔赴行在,拜侍御史,旬日改戶部員外郎。宰相 貞元初,爲水陸運副使,督江淮漕運以 都團 練觀察使。 入爲給事中, 又爲河南 鹽鐵轉運 給京 使元

爲例。 先時每年 抗乃奏曰:「吏部尚書、侍郎,已是朝廷精選,不宜別差考官重覆。」其年他官考判訖, 吏部選人試判,別奏官考覆,第其上下;旣考,中書門下復奏擇官覆定,寖以

考功, 俾吏部侍郎自覆,一歲遂除考判官,蓋抗所論奏也。 謂之「別頭舉人」,抗亦奏罷之。 **尊奏省諸州府別駕、田曹、司田官及判司之雙曹者,** 故事,禮部侍郞掌貢舉,其親故卽試於

復省中書省驅使官及諸胥吏。

家絹二百匹。 疾,上表請罷,改太子賓客,竟不任朝謝。」貞元二十年卒,時年六十五,贈戶部尙書,又賜其 零加修國史。 抗雖讀書,無遠智大略,凡爲官,必求至精,末乃滋彰,物論薄其隘刻。遇

有長者之言。滋、邁家行修謹,臨事可稱,器雖齷齪,無廢爲君子矣。而損、抗之比,夫何足 云,遽汙合槐,蓋時主之容易耳。 史臣曰:竇參朋黨,不顧君上之誠,斯爲悖矣。 齊映曲貢希用甚謬,而愛君蒞事,往往

贊曰:物之同器,貴於弘通。 寶阿齊佞, 偏詖斯同。 滋、邁之行,可以飾躬。 康濟蒸民,

胡爲厥中。

校勘記

- (二) 浙江 新書卷一三二劉子玄傳作「浙西」。
- (11) 今亘以假寧常式 「亘」字各本原作「直」,據唐會要卷二三、冊府卷五九〇改。
- (三) 昭陵舊宮在山上 珊府卷三○「昭陵」作「八陵」,前有「三月詔曰」四字。

舊唐書卷一百三十七

列傳第八十七

徐浩 崔元翰 趙涓 子博宣 于公異 呂渭 盧南史附 子溫 劉太眞 恭 儉 讓 李紓 鄭雲逵 邵說 李益 于邵 李賀

令,以善政稱。 幕府,改監察御史。 郡防禦使,賜以金紫之服。 ,調授魯山主簿。 徐浩字季海,越州人。父嶠,官至洛州刺史。浩少舉明經,工草隸,以文學爲張說所器 拜太子司議郎,遷金部員外郎,歷憲部郎中。 丁父憂,服除,授京兆司錄,以母憂去職。數年,調授河南司錄,歷河陽 說薦爲麗正殿校理,三遷右拾遺,仍爲校理。幽州節度使張守珪奏在 安祿山反,出爲襄陽太守、本

悅 其能,加兼尚書右丞。 肅宗卽位,召拜中書舍人,時天下事殷,詔令多出於浩。 列 第 八八十 徐 玄宗傳位誥册,皆浩爲之,參兩宮文翰,寵遇罕與爲比。 浩 趙 狷 浩屬詞膽給,又工楷隸, 肅宗 三七五九 除國子祭

兼御 酒 坐事 史大 貶廬州 夫,又爲吏部 長 史。 侍郎、集賢殿學士。 代宗徵拜中書舍人、集賢殿學士,尋遷工部侍郎、嶺南節度觀察使、 坐以妾弟冒選,託侍郎薛邕注授京尉 ,爲御史大

夫李栖筠所彈,坐貶明州別駕。

授廣州 德 宗 即 位 典選部,多積貨財,又嬖其妾侯莫陳氏,頗干政事,爲時論所貶。 ,徵拜彭王 傅。 建中三年,以疾卒,年八十,贈太子少師。初,浩以文雅稱,及

河南 副元 趙涓 ,冀州人也。 | 帥王縉奏充判官(1),授檢校兵部郎中、兼侍御史,遷給事中、太常少卿,出爲衢州 幼有文學。 天寶初,舉進士,補郾城尉,累授監察御史、右司員外郎。

刺史。

事情。 觀察使韓滉 之,涓爲巡使,俾令即 曰:「然。」卽拜尙書左丞。 永泰 旣奏,代宗稱賞焉。 初, 不 涓爲監察御史。 相得,滉奏免清官,德宗見其名,謂宰臣曰:「豈非永泰初御史趙涓乎?」 訊 涓 周 歷 場 面 , 按 據 無何,知吏部選,扈從梁州。 德宗時在東宮,常感涓之究理詳細,及刺衢州,年考旣深, 時禁中失火,燒屋室數十間,火發處與東宮稍近,代宗深疑 迹狀,乃上直中官遺火所致也,推鞫明審,頗盡 興元元年卒,贈戶部尙書。 又與 懺

忽略,環不能容。朝廷方討淮、蔡,環誣奏博宜受吳少誠賂爲 子博宣 **一,登進士第,文章俊拔,性率多酒。** 陳許節度使曲環辟爲從事,賓筵之間,多所 反間,又妄說國家休咎,扇惑軍

時博宣權知舞陽縣事,詔令環決杖四十,流於康州,人皆以爲枉

後 建,量 以爲贓,又劾南史買鉛燒黃丹。德宗遣監察御史鄭楚相、刑部員外郞裴澥、大理 準天寶十三載敕,鉛、銅、錫不許私家買賣貨易,蓋防私鑄錢,本亦不言燒鉛爲丹。南史違勅 將退,裴獬獨留,奏曰:「臣按姚驥奏狀,稱南史取廳吏紙筆錢計贓六十餘貫,雖於公法有 儀充三司使,同往按鞫。 察使,有錄事參軍告齡 小事 **資鉛,不得無罪。** 使判官劉 五年,計錢一千貫。 ,令三司使往,非唯損耗 先是,侍御史盧南史坐事貶信州員外司馬,至郡,準例得廳吏一人,每月請紙筆錢, |事且非巨蠹。]上曰:「此事亦未爲甚,未知燒鉛何如?」 長 卿 粉競,仲孺奏長卿犯贓二十萬貫,時止差監察御史苗伾 伏以陛下自登寶位,及天寶、大曆以來,未曾降三司使至江南; 非法,朝廷止令大理評事往按。 南史以官開冗,放吏歸,納其紙筆錢六十餘千。 將行,並召於延英,謂之曰:「卿等必須詳審,無令漏罪銜冤。」三人 州縣,亦恐遠處聞 之,各懷憂懼。 大曆中, 鄂岳 解曰:「燒鉛爲丹,格令不禁。 臣聞開元中張九齡 就推。 觀 刺史姚驥劾奏南史, 祭使吳仲 今姚驥所奏事 爲 評 孺 今忽錄 五 事陳正 與 嶺按 轉 渾 此

狀無多,臣堪任此行,卽請獨往,恐不須三司並行爲使。」德宗忻然曰:「卿言是矣。」乃復召 楚相、正儀與獬俱坐,謂之曰:「朕懵於理道,處事未精,適見裴獬所奏,深協事宜,亦不用三 而博宣、南史坐誣枉擯逐,賴裴解悟主,南史不至深罪,後得召還。 人總去,但行首一人行可也,卿等便宜付宰臣改勅。」德宗不務大體,以察爲明, 皆此類也。

脆 隨。 節度使陳少遊掌書記,徵拜起居郞。累歷臺閣,自中書舍人轉工部、刑部二侍郞。 劉太眞,宣州人。涉學,善屬文,少師事詞人蕭穎士。 及轉禮部侍郎,掌貢舉,宰執姻族,方鎭子弟,先收擢之。又常敍少遊勳績,擬之桓、 天寶末,舉進士。 大曆中,爲淮南 性怯懦

文,大招物論。貞元五年,貶信州刺史,到州尋卒。 太眞尤長於詩句,每出一篇,人皆諷誦。 德宗文思俊拔,每有御製,即命朝臣畢和。

元四年九月,賜宴曲江亭,帝爲詩,序曰: 節,職思其憂,咸若時則,庶乎理矣。 一得同歡洽也。 股在位僅將十載,實賴忠賢左右,克致小康。是以擇三令節,錫茲宴賞,俾大夫、**卿** 夫共其 戚者同其休, 因重陽之會,聊示所懷。 有其初者貴其終, 咨爾羣僚, 頒股不暇, ,樂而 能

乾坤爽氣澄,臺殿秋光淸。 早衣對庭燎,躬化勤意誠。 朝野慶年豐,高會多歡聲。 時此萬樞暇,適與佳節丼。 永懷無荒誠,良士同 曲池絜寒流,芳菊舒金英。 斯情

書門下簡定文詞士三五十人應制,同用『淸』字,明日內於延英門進來。」宰臣李泌等雖 四人爲次等,張濛、殷亮等二十三人爲下等;而李晟、馬燧、李泌三宰相之詩,不加考第。 簡擇,難於取捨,由是百僚皆和。 因 韶 曰:「卿等重陽會宴,股想歡洽,欣慰良多,情發于中,因製詩序。 上自考其詩,以太眞及李紓等四人爲上等,鮑防、 今賜卿等一本,可中 于邵等 奉

賜 節日,宜任文武百僚擇勝地追賞。 左右神威、神策等十軍各賜五百貫,金吾、英武、威遠及諸衞將軍共賜二百貫,客省奏事共 日:「比者卿士內外,朝夕公務,今方隅無事,蒸民小康,其正月晦日、三月三日、九月九日三 百貫,委度支每節前五日支付,永爲常制。」 初,朱泚、懷光之亂,關輔薦饑,貞元三年以後,仍歲豐稔,人始復生**人**之樂。 德宗詔 每節宰相、常參官共賜錢五百貫文,翰林學士一百貫文,

部侍郎李季 李紓字仲舒,禮部侍郎希言之子。 卿 薦爲左 補闕, 累遷司封員外郎、知制誥,改中書舍人。 少有文學。 天寶末, 拜秘書省校書郞。 尋自號州 刺 大曆初, 史徵拜禮 吏

列傳

第八

部侍郎。 德宗居奉天,擇爲同州刺史,尋棄州詣梁州行在,拜兵部侍郎。 反正, **兼知選事** ,河東節度及諸軍會河中,韶往宣勞節度,使還,數奏合旨,拜禮部侍郎

侯』,其獻官請準舊式,差太常卿已下充。」詔百僚進議。 文武官上言,互有異同。 家,非其制不立,故孟軻稱『生人已來,一人而已』。由是正素王之位,加先聖之名,樂用宮 貞元八年, 贈禮部尚書。 官,餘依將所奏。」將又奉詔爲興元紀功述及郊廟樂章,諸所論著甚衆。卒於官,年六十二。 德廣運,乃武乃文,文化武功,皇王之二柄, 祀禮教敬, 國章孔明。 自今宜上將軍以下充獻 德,均其殊禮! 其祝文請不進署, 『敢昭告』請改爲 『敬祭于』, 『其昭告』請改爲 『致祭于图 感, 獻差太尉, 尊師崇道,雅合政經。且太公述作止於六韜,勳業形於一代,豈宜 板。伏以太公即周之太師,張良即漢之少傅,聖朝列於祀典,已極褒崇;今屈禮於至尊 敬於臣佐,理或過當,神何敢歆。 伏以文宣垂教,百代宗師,五常三綱,非其訓不明,有國有 至上元年,敕追贈太公爲武成王,享祭之典,一同文宣王,有司因差太尉充獻官,兼御署祝 宴,不嘗自忘。嘗議享武成王不當視文宣廟,奏云:「準開元十九年敕,置齊太公廟,以張良 配,太常卿及少卿、丞充三獻官。又按開元禮祝文云『皇帝遣某官昭告于齊太公、漢留侯』。 舒通達,善詼諧,好接後進,厚自奉養,鮮華興馬,以放達蘊藉稱。 雖爲大官,而佚遊佐 韶曰:「帝 一擬諸盛

厚顔 矣。 幹稱。 子女以爲婢僕者數十人,剽盜寶貨,不知紀極。 降於軍前,郭子儀愛其才,留於幕下。累授長安令、秘書少監,遷吏部侍郎、太子詹事,以才 (``而又遑遑求財,崇飾第宅,附託貴倖,以求大用,不知愧懼,而有得色,其能久乎!」 且說與史思明父子定君臣之分,居劇官,掌兵柄,亡驅犯順,前後百戰,於賊庭掠名家 邵 說 談者或以宰相許之,金吾將軍裴儆謂諫議大夫柳載曰:「以鄙夫所度, ,相州安陽人。舉進士,爲史思明判官,歷事思明、朝義,常掌兵事。朝義之敗,說 力屈然後降,朝廷宥以不死,獲齒班序,無 說得禍不久

建中三年,嚴郢得罪,說與郢厚善,勸朱泚抗疏申其冤,說爲草其奏,上知之,貶說歸州

刺史,竟卒于貶所。

部 科 書判 ,以當稱。 于邵 、超絕,授崇文館校書郞。 字相門,其先家于代, 無何,出爲道州 刺 史, 累歷使府,入爲起居郎,再遷比部郎中,尚二十考第於吏 今爲京兆萬年人。曾祖筠,戶部尙書。 未就道,轉巴州。 時歲儉,夷潦數千相聚山澤,圍州掠 邵天寶末進士登

列

傳

第

八十七

部飲

于

部

省元 翰

三七六五

節度使 尊 拜 衆,邵 睦。 犯 時大韶令, 在 諫 赦 八年,出爲杭州 勵 前 議 李 州 抱玉 ,奏出之,失旨,貶桂州 大夫、知制誥,再遷 兵以拒之。 皆出於邵。 以聞,超遷梓州 刺史,以 旬有二 頃之, 矢請 禮部侍郎、史館修撰,爲三司使。 、以疾 與御史中丞袁高、給事 日 ,遺使說喻,盜邀邵面降,邵儒服出城, 長史。 告, 不 坐貶衢州 至 貞元初,除原王傅,後爲太子賓客, 遷 兵 別駕 部 郎中。 7,移江 中蔣鎮雜理左丞薛邕 西川節度使崔寧請留爲支度 州別駕,卒年八十一。 以撰上尊號册、賜階三品、當 盗羅 詔 拜而 獄。 與宰相 降, 邵 陸 以 副 圍 爲邕 使。

不十 之材 人稱其當 也。」不 部 Ŧī. 性 年,當掌詔 一孝悌 十 有集四十卷。 ,內行 五. 年,澤爲節將。 令。」竟如其 修潔,老而 言。 彌 崔元翰年近五十, 篤。 獨 孤授舉博學宏詞, 杒, |樊澤常舉賢良方正,邵一見之於京師,曰:「將相 始舉進士,邵異其文,擢第甲科, 吏部考爲乙第,在中書覆升甲科, 且日:

升甲第, 之,又爲燧府掌書記。 崔 元翰者 年已五 博陵人。 一十餘。 入朝爲太常博士、禮部員外郎。 李汧 進士擢第, 公鎮滑 臺,辟爲從事 登博學宏詞制科,又應賢良方正、直言極諫科,三 後北平王馬燧在太原,聞其名, 竇參輔政,用爲知制誥,詔令温雅, 致禮命 一舉皆

合於典謨。 然性太剛褊簡傲,不能取容於時,每發言論,略無阿徇,忤執政旨,故掌誥二年

而官不遷。 竟罷知制誥,守比部與中。

其對策及奏記、碑誌,師法班固、蔡伯喈,而致思精密。 元翰苦心文章,時年七十餘,好學不倦。 旣介獨耿直,故少交遊,唯秉一操,伏膺翰墨。 爲時所擯,終于散位。

德宗覽之,泣下不自勝,左右爲之嗚咽。旣而曰:「不知誰爲之?」或對曰:「于公異之詞也。」 上稱善久之。 元年,收京城,公異爲露布上行在云:「臣已肅清宮禁,祗奉寢園,鍾簾不移,廟貌 于公異者,吳人。 登進士第,文章精拔,爲時所稱。 建中末,爲李晟招討府掌書記。 如故。」 興

安於棄斥,遊學遠方,忘其温凊之戀,竟至存亡之隔,爲人子者,忍至是乎!宜放歸田里 其引慝在躬,孝行不匱,匿名跡於畎畝,侯安否於門閭,俾其親之過不彰,庶其誠之至必感。 行,黜之。詔曰:「祠部員外郎于公異,頃以才名,升於省闔。 其少也,爲父母之所不容,宜 言之,公異少時不爲後母所容,自遊宦成名,不歸鄉里,及貞元中陸贄爲宰相,奏公異無素 公異初應進士時,與舉人陸贊不協,至是實爲翰林學士,聞上稱與,尤不悅。 時議者

親公異 位 自循省。 不 振 (譴逐 ,轗軻而 其舉公異官尙書左丞盧邁,宜奪俸兩月。」時中書舍人高郢薦監察御史元敦義,及 ,懼爲所累,乃上疏 卒,人士惜其才 ,惡贄之褊急焉。 首陳敦義虧於禮教、詔 嘉野之知過,俾敦義罷歸。 公異竟名

奏「陋 令、 渭上言:「涵父名少康, 檢校工部尙書、銀光祿 大理評 呂渭字君載,河中人。父延之,越州刺史、浙江東道節度使。 再任少卿 事。 浙 ,此時都不言; 西觀 察使李涵辟爲支使, 卿 今陋 爲少 今爲少傅,疑以散慢,乃爲不可。」由是貶渭歙州司馬,改涵 /傅, 恐乖 朝典。」由是特授渭 再遷殿中侍 御史。 司門員外郎。 陋自御 **渭舉進士,累授婺州永康** :史大夫改太子少 尋爲御史臺 グ傅, 劾

渭試進士,取瑞 練 擢 觀察使,在任三歲,政甚煩碎。貞元十六年卒,年六十六,贈陝州大都督。子温、恭、儉、讓。 之登第,爲正 禮 渭 部 累授 侍 鄓。 舒州 中書省有柳樹,建中末枯死,興元元年車駕還京後,其樹再榮,人謂之瑞柳。 柳爲賦題,上聞 人嗤鄙。 刺史、 吏部員外、駕部郎中、知制韶、中書舍人,母憂罷。 因入閣遺失請託 而嘉 之言。 文記,遂出爲潭州刺 澗 又結附裴延齡之子操,舉進士,文詞非工,渭 史、兼御史中丞、湖南 服闋,授太子右庶 都團

在蕃 於 郞 招 張薦 青 納 中 海 時之英俊以 温 爲 字化光, 悲歎 吐蕃以中 、吐蕃 久之。 自 使,行至 貞元末登進 國 輔 喪禍 元和 ,温與執誼尤爲叔文所跪 鳳翔, 留温 元年,使還,轉戶部員外郎。 士第,與翰林學士韋執誼 一經年。 轉侍御 時王叔文用事 史,賜緋袍牙笏。 起家再命拜左拾遺。 放與温 善。 時柳宗元等九人坐叔文貶逐,唯温以 明年 順宗在 同遊東宮者 德宗晏駕,順宗即 東宮,侍書王叔 二十年冬, ,皆不次任用, 位 文勸 副 一,張薦 工 一部侍 太子 温 卒

奉使免。

誇資州 問 爲 吉 羊 之,又奏劾吉甫 市 知 一諤趣 雜。 爲 温 刺 中官所 天 /才俊拔. 尚 史,温 吉甫 相 惡 狎。 以疾在第,召醫 均 ,將出鎮 ,文彩瞻逸 州 交通 **羣爲章夏卿** 刺 術士。 史。 揚州 朝 ,爲時流柳宗元、 人陳登 議以 憲宗 所薦 温欲 所責 異之,召登 乘其有間傾之。 診 自處 太輕 視 ,夜宿于安邑里第。 士不數年 季 劉禹錫所稱。 面訊 再貶黔南,温貶道州 ,其事皆虚,乃貶羣爲湖南觀察使, 至御史中丞,李吉甫尤奇待之。 温 自司 然性多險詐,好奇近利,與寶羣、 對員 温伺 外鄓 知之,詰旦 刺 轉刑部 史。 五 郎中, 一,令吏捕登 年,轉 竇羣 衡州 三年, 請 鞫

温 文體 列 僔 富 第 豔 八 + 有丘 -明、班 몸 渭 固之風,所著凌煙閣功臣銘、張始興畫贊、移博士書, 鄭 套 弦 三七六九 頗爲文士

秩

公滿歸京

~

得

意

,發疾卒。

所賞,有文集十卷。

裕黨盛, 呂氏諸子無至達官者。 恭、儉皆至侍御史,讓至太子右庶子,皆有美才。 自後吉甫再入中書,長慶以後,

棄妻子馳歸長安,帝嘉其來,留於客省,超拜諫議大夫。奉天之難,雲逵奔赴行在,李晟以 京,以事怒雲逵,奏貶莫州參軍。滔代泚後,請爲判官。滔助田悅爲逆,雲逵諭之不從,遂 爲行軍司馬,戎略多以咨之。歷秘書少監、給事中,尋拜大理卿,遷刑部、兵部二侍郎,遷御 表爲節度掌書記、檢校祠部員外郎,仍以弟滔女妻之。 泚將入覲,先令雲違入奏;及泚至 史中丞,充順宗山陵橋道置頓使。 鄭雲遠,滎陽人。大曆初,舉進士。性果誕敢言。 客遊兩河,以畫干于朱泚,泚悅,乃

親信,與庭玉常從容言於泚日:「滔非長者,不可付以兵權。」滔竊知之。後滔南討有功,雲 因深構庭玉於滔;滔爲泚留後事,有請於泚,庭玉又輒隳之。又有判官朱體微,亦蒙泚 雲違初爲朱泚判官,常忤同幕蔡庭玉;庭玉白泚, 黜爲莫州錄事參軍。 滔復奏爲判

達數激怒之,滔乃抗表論庭玉等離間骨肉,及滔叛,帝乃召泚以表示之,故歸罪於庭玉等

以悅滔,滔亦終叛。

節度及州縣乞丐,今見在武功縣南,西戎俯近,恐有異謀;若不冒死奏聞,必恐覆臣家族。 **韶令京兆府錮身遞送黔州,付李模於僻遠州驅使,勿許東西。** 殺復蘇。至於常言,皆呼臣亡父先臣名,親戚所知,無可教語。昨聞於哪、寧、慶等州干謁 兇黨,江中劫人。臣亡父先臣即杖至一百,終不能斃。張延賞任揚州日,亦曾犯延賞法,決 三年,雲邍奏:其弟前太僕丞方逵,「受性兇悖,不知君親,衆惡備身,訓敎莫及,結聚

雲達元和元年拜右金吾衞大將軍,歲中改<u>京</u>兆尹。 五年五月卒。

顯位。 爲苛酷,而有散灰扃戶之譚聞於時,故時謂妬癡爲「李益疾」;以是久之不調,而流輩皆居 |峯前沙似雪,受降城外月如霜」之句,天下以爲歌詞。 然少有癡病,而多猜忌,防閑妻妾,過 篇,爲教坊樂人以賂求取,唱爲供奉歌詞。其征人歌、早行篇,好事者畫爲屏障;「迴樂 李益,肅宗朝宰相揆之族子。登進士第,長爲歌詩。貞元末,與宗人李賀齊名。 盆不得意 ,北遊河朔,幽州劉濟辟爲從事,常與濟詩而有「不上望京樓」之句。 每作

列傳第八十

-E:

李益

李賀

三七七一

不容,諫官舉其幽州詩句,降居散秩。俄復用爲秘書監,遷太子賓客、集賢學士判院事,轉 右散騎常侍。 憲宗雅聞其名,自河北召還,用爲秘書少監、集賢殿學士。自負才地,多所凌忽,爲衆 大和初,以禮部尚書致仕,卒。

試。 十四。 無能髣髴者。 手筆敏捷,尤長於歌篇。其文思體勢,如崇巖峭壁,萬仞崛起,當時文士從而效之, 李賀字長吉,宗室鄭王之後。父名晉肅,以是不應進士,韓愈爲之作諱辨,賀竟不就 其樂府詞數十篇,至於雲韶樂工,無不諷誦。補太常寺協律郞,卒時年二

然太眞以畏懦聞,邵說以僭侈失,于公異、呂渭、李益皆有微累,故知全其德者罕矣。 贊曰:名以才顯,才兼德尊。 除、趙、劉、李,厥聲遠聞。 邵、 于、 呂、鄭,其名久存。 史臣曰:文學之士,代不乏才。永泰、貞元之間,如徐浩、趙涓諸公,可謂一時之秀也。 半乏

全德,愧于後人。

列傳第八十七 校勘記

(二)河南副元帥王縉 「王縉」,各本原作「王緒」,新書卷一六一趙涓傳作「王縉」,本書卷一一八

(三) 上聞而嘉之 汪縉傳云:「歲餘,遷河南副元帥,請減軍資四十萬貫修東都殿宇。」當以「王縉」爲是,據改。 「嘉」字御覽卷九五七作「惡」。新書卷一六〇呂潤傳此處作「帝聞不以爲善」。

